


ସହସ୍ରମିନାତି



ସର୍ବୋତ୍କୃଷ୍ଟ



ପରିବେଷକ :



ଡି.ଏମ.ଏ.ସି.ସି.ସି.
ଓଡ଼ିଶା ସରକାରୀ ଶିକ୍ଷା ବିଭାଗ - ୨

প্রথম প্রকাশ : আবেণ, ১৩৬৪

দ্বিতীয় সংস্করণ : আবেণ, ১৩৬৫

RR

৮২১.৪৪৩

স্বাধীনতা

দাম : সাড়ে তিন টাকা

STATE CENTRAL LIBRARY: WEST BENGAL
ACCESSION NO. ৫১-১২৪০১
DATE ১৩.১.০৭

২৮১৩ বোর্ড লেন হইতে গোপালদাস পারলিসার্স-এর পক্ষে
শ্রীঅশিসগোপাল মজুমদার কর্তৃক প্রকাশিত ও ৮০বি,
বিবেকানন্দ রোড, কলিকাতা-৬, বাণী-এ প্রেস হইতে
শ্রীহরময় চৌধুরী কর্তৃক মুদ্রিত

बहुत मिनति

অনাদিবাবুর এই বাড়িতে আজ সকাল হতে না হতেই যে সাড়া জেগে উঠেছে, সে সাড়া সত্যিই বড় মধুর। পাঁচ বছর আগে প্রভার বিয়ের দিন এইরকমই এক সকালে সানাই-এর সুরে বাতাস মিষ্টি হয়ে গিয়েছিল। বাড়ির সারা মনপ্রাণ ব্যস্ত করে দিয়ে একটা সাড়া জেগে উঠেছিল। কিন্তু আজ ঠিক সে-রকম ব্যস্ততা নয়। হাঁক-ডাক নয়, ছুটাছুটি নয়। সেই সকালের সানাই-এর সুরে অনেক মধুরতা থাকলেও বাড়ির বৃকের ভিতরটা যেন বেদনার ভারে করুণ হয়ে গিয়েছিল। এই বাড়িকেই ব্যাস্কের কাছে বন্ধক দিয়ে তিন হাজার টাকা যোগাড় করে প্রভার বিয়ে দিতে হয়েছিল। সেই ঋণ আজও শোধ করতে পারা যায়নি। সুদে সুদে ঋণের বোঝা আরও ভারি হয়েছে।

কিন্তু আজ মনে হয়, এতদিনে ঋণের বোঝা নামিয়ে দিয়ে এই বাড়িটা তার বৃকের ভারও নামিয়ে দেবার সুযোগ পেয়েছে। এই প্রথম সুযোগ। শেখরের একটা চাকরি হয়ে যাবে, এতদিনে সত্যিই বিশ্বাস করতে ইচ্ছে হচ্ছে। অনাদিবাবুর বড় ছেলে শেখর, তিন বছর হ'লো চাকরি খুঁজে খুঁজে যে শেখর শুধু হয়রান হয়েছে, আজ তাকে আর একটু পরেই তৈরী হতে হবে। যেতে হবে সেই মিশন রো। নানারকম যন্ত্রপাতি তৈরী করে এক কারখানা, তারই অফিস। ভারত সরকারের ফিন্যান্স কর্পোরেশনের কাছ থেকে পাঁচ লক্ষ টাকা সাহায্য পেয়ে কারখানা নিজেকে ফলাও করার জন্য ব্যস্ত হয়ে উঠেছে। তাই কিছু নতুন কর্মী চাই, এবং একজন ভাল প্রচার-অফিসার চাই। এই চাকরির জন্য দরখাস্ত করেছিল শেখর। দরখাস্তের উত্তরে একটি পত্রে জেনারেল ন্যানজার শেখরকে একটি

ইন্টারভিউ মঞ্জুর করেছেন। আজ সেই ইন্টারভিউ-এর দিন। বেলা একটার সময় অফিসে উপস্থিত হতে হবে।

গত রাতটা সারা বাড়ির প্রাণ ভাল করে ঘুমোতে পেরেছিল কিনা সন্দেহ। আশা, আশা, আশা! বড় স্নিগ্ধ ও সুন্দর আশা। অনাদিবাবু তাঁর পিঠের ব্যথা প্রায় ভুলেই গিয়েছিলেন। রাত দশটা পর্যন্ত শেখরের সঙ্গে গল্প করেছেন।

—আরন্তে মাইনেটা কত হবে শেখর ?

—তিনশো ষাট থেকে আরন্ত! বছরে দশ টাকা করে বাড়বে। দশ বছরের জন্য কনট্রাক্ট হবে। তারপর কোম্পানির মরজি। ইচ্ছে করলে আরও দশ বছর রাখতে পারে।

—প্রভিডেন্ট কণ্ড আছে তো ?

—হ্যাঁ। মাইনে থেকে টাকা প্রতি এক আনা করে কাটবে। কোম্পানি দেবে দু'আনা।

অনাদিবাবু বুকে হাত বুলিয়ে আনন্দে প্রায় ফুঁ পিয়ে ওঠেন—আহা বড় চমৎকার, বড় সুন্দর ব্যবস্থা।

মধু আর বিধু, শেখরের ছোট ছুটি ভাই, তারাও পড়ার বই রেখে দিয়ে বড়দার আশে পাশে ঘুর ঘুর করে। বড়দার মুখের দিকে তাকালে ওদের একটু আশ্চর্যও লাগে। তিনশো ষাট টাকা মাইনের চাকরি হবে বড়দার; কোন রাতে ঘুমের ঘোরেও এমন দুঃস্বপ্ন ওরা দেখেনি। বড়দাকে নতুন মানুষ বলে মনে হয়। মধু আর বিধুও অনেক রাত পর্যন্ত জেগেছে। যদি বড়দা একবার কোন কাজের জন্ত ডাকেন, কপালটা টিপে দিতে বলেন ? শেষ পর্যন্ত, এবং বড়দা না বললেও দুই ভাই-এ মিলে পাল্লা দিয়ে বড়দার কপাল টিপেছে, তারপর বড়দারই গা ঘেষে শুয়ে পড়েছে।

সকাল বেলায় সবার আগে জেগে উঠে ব্যস্ত হয়েছেন শেখরের মা বিভাময়ী। তিন দিন থেকে জ্বর চলছে। থাকুক জ্বর। সকালে উঠেই একবার কালীঘাট ঘুরে এসেছেন। মন্দিরে পূজা দিয়ে

প্রসাদের ঠোঙা আঁচলে বেঁধে বাড়ি ফিরেছেন। তার পরেই পাশের বাড়ির গয়লাকে অনুরোধ করে এক পোয়া দুধ আদায় করেছেন। মাসটা শেষ হলেই দুধের দামটা দিয়ে দেবেন। মাস শেষ হতেই বা আর কত বাকি ? আজ তেইশে। সাত দিন পরেই মাইনে পাবেন চৌরঙ্গীর সবচেয়ে বড় স্টোরের সবচেয়ে পুরনো ক্লার্ক অনাদিবাবু, মাইনে ষাঁচ পাঁচাত্তর টাকা। পিঠবাথার অনুখের জন্ম মাসের মধ্যে কম করেও পাঁচটি দিন অনুপস্থিত থাকতে হয়, এবং মাইনেও কাটা যায়। গত মাসে বেয়াল্লিশ টাকা এগার আনা মাইনে নিয়ে বাড়ি ফিরেছিলেন, আর, এক পোয়ালা চা মুখে দেবার আগেই অজ্ঞান হয়ে পড়েছিলেন।

সকাল ন'টা পার হয়েছে। অনাদিবাবু বলেন—আমার কাছে এসে একটু বস তো শেখর ! একটু গীতা পাঠ করবো।

অনেকদিন পরে বোধ হয় মনের এই নতুন আনন্দের আবেগে গীতা পাঠ করবার জন্ম অনাদিবাবুর মনটা ব্যস্ত হ'য়ে ওঠে। গীতা পড়েন। নিজেই বুঝতে পাবেন, এমন করে এত আগ্রহ নিয়ে অনেক দিন গীতা পাঠ করেননি তিনি।

বিভাময়ী রান্না ঘরের ভিতর থেকেই চুঁচিয়ে বলেন—আজ আর ঠাণ্ডা জলে স্নান করিসনি শেখর। যা শীত পড়েছে। আমি এখুনি এক হাঁড়ি জল গরম করে দিচ্ছি।

তারপরেই রান্না ঘরের ভিতর থেকে বের হয়ে আসেন বিভাময়ী। শেখরের কাছে এসে বলেন—এই দুধটুকু গরম গরম খেয়ে নে।

লজ্জা পায় শেখর। হেসে ফেলে।—তুমি আবার এসব কি কাণ্ড করছো মা ?

—কাণ্ড আবার কিসের ? এই তো সামান্য একটু....। কথাটা বলতে গিয়ে বিভাময়ীর গলা কেঁপে ওঠে। মনে পড়ে বোধ হয়, গত দশ বছরের মধ্যে কোনদিন শেখরকে এইভাবে সামান্য এক পোয়ালা দুধ খাবার জন্ম সাধবার সৌভাগ্য তাঁর হয়নি। পাঁচ বছর

বয়স থেকে শুধু ভালভাত গিলে এত বড়টি হয়েছে ঐ ছেলে। ভগবান সহায় আছেন, দুধ-ঘি ছুঁতে না পেলোও তাঁর ছেলে রুগিয়ে যায়নি। মনে পড়ে সুধাময়ীর, ছেলেবেলায় এক মাইল দৌড়ে ফাস্ট হয়ে প্রাইজ নিয়ে বাড়ি ফিরে এসে চৈচিয়ে উঠেছিল ঐ শেখর—দুধ খাইনা, তবু আমার দম দেখছো তো মা!

বিভাময়ীর চোখের কোণে জল এসে পড়ছে। কিন্তু আজকের দিনে, এত বড় একটা আশার দিনে চোখে জল আনা ভাল নয়। বিভাময়ীও হেসে ফেলেন।—কাণ্ডই করছি বটে। যাক গে, আগে এই দুধটুকু খেয়ে ফেল দেখি।

টালিগঞ্জের এক গলির ভিতরে এই ক্ষুদ্র ও জীর্ণ বাড়ি শীতের সকালে রোদের ছোঁয়া না পেয়েও যেন এক মায়ানীড়ের মত আপন বুকের উত্তাপে নিবিড় হয়ে উঠেছে। মধু আর বিধুকে নিয়ে একই থালাতে খাবার খায় শেখর। অনাদিবাবু সামনে বসে চা খান। বিভাময়ীর দুই চোখ অনেকক্ষণ ধরে দেখে দেখেও যেন তৃপ্ত হয় না। আর একবার ব্যস্তভাবে রান্নাঘরের ভিতরে যান; আরও তিনটে গরম লুচি নিয়ে এসে থালার উপর রাখেন।

টালিগঞ্জের এই ক্ষুদ্র বাড়ির সুদীর্ঘ দীনতার জীবনে এই প্রথম একটা আশার মাত্র আভাসটুকু দেখা দিয়েছে। তাইতেই এত। একটা কাণ্ডই বটে। অনাদিবাবুও হেসে ফেলেন—ব্যাপারটা কি জানিস শেখর? সারা জীবন ধরে শুধু অভাবে ভুগতে ভুগতে মনের এই অবস্থা দাঁড়িয়েছে। আশা দেখেও যেন বিশ্বাস করবার সাহস হয় না। নইলে, তোর মত কোয়ালিফাইড একটা তিনশো বাট টাকা মাইনের চাকরি পাবে, এতে আশ্চর্য হবার কি আছে?

এই সত্য শেখরও মনে মনে স্বীকার করে। এক এক সময় হতাশ মনের যন্ত্রণায়, তীব্র বিষাদের জ্বালায় শেখরের চিন্তাগুলিও যেন জ্বলে উঠেছে। ঠিকই তো, গুণ থাকাটাই যেন অগুণ। শেখরের সহপাঠী যারা ছিল, তাদের অনেকে তো তিনশো বাট টাকা

মাইনেকে দস্তুরমত ঘণাই করে। এই কলকাতা সহরেই তাঁর কেউ হাজার টাকার এবং কেউ বা আরও বেশি মাইনেতে অধুনি হয়ে অফিসারী করছে। ভবানীপুরের ইন্দুপ্রকাশ প্রায় সারাদিন বাড়িতেই থাকে আর রেডিওর গান শোনে। শুধু বিকেল হলে গাড়ি নিয়ে হাওড়ার এক জুট মিলের অফিসে দেখা দিয়ে ফিরে আসে। এই তো ইন্দুর কাজ। শেখর জানে, গাড়ির খরচ ছাড়া ইন্দু বারশো টাকা মাইনে পায়। ইন্দুর বাবা ইনকাম ট্যাক্সের একজন বড় অফিসার।

শেখর যে লেখাপড়ার ব্যাপারে এতদূর পর্যন্ত এগিয়ে যেতে পেরেছে তাই তো একটা অষ্টম আশ্চর্য। যে ছেলের ম্যাট্রিক পরীক্ষার ফী দেবার সময় বাড়ির পিছনের জমিটাকে বেচে দিতে হয়েছিল, তাকে এম-এ পাশ করিয়েছে পঁচাত্তর টাকা মাইনের কেরানি বাপ। অনাদিবাবু যেন তাঁর জীবনের এক ভয়ংকর আশার নেশায় পাগলই হয়ে গিয়েছিলেন। নইলে এমন করে নিজেকে শূন্য করে দেবেন কেন? বিভাময়ীর হাতে শাঁখা আর লোহাটি ছাড়া আর কিছু নেই। সোনা-রূপা যা ছিল, তার সবই ঐ এক আশার সাধনায় উৎসর্গ করে দিতে হয়েছে। ছেলে বিদ্বান হোক, তাহলেই সব হয়ে যাবে। সব ফিরে আসবে। এমন কি দশগুণ হয়ে ফিরে আসতেও পারে।

বিভাময়ী জানেন, এবং শেখরও আজ বুঝতে পারে, অনাদিবাবুর শরীরের এই ব্যথাকাতর অবস্থা ঘটিয়েছে কিসের আঘাত?

সময় কত হলো? ঠিক বেলা একটার সময় মিশন রো-এর সেই অফিসে উপস্থিত থাকতে হবে। শেখর জানে, এখনও অনেক সময় আছে। ঘরের ভিতর এক কোণে সেই পুরনো চেয়ারে বসে পুরনো টেবিলের উপর রাখা বই-এর স্তূপের দিকে তাকিয়ে এখন আরও অনেকক্ষণ ভাববার সময় আছে। ভাবতে থাকে শেখর। কি প্রশ্ন এবং কোন বিষয়ে প্রশ্ন করবেন জেনারেল ম্যানেজার? সায়েন্সের কোন দুর্লভ প্রশ্ন? পলিটিক্স? ইংরাজী ভাষা ও সাহিত্য সম্বন্ধে

হতে পারে। কিংবা নিউক্লিয়ার ফিজিক্স সম্বন্ধে জটিল কোন প্রশ্ন ?
মনে মনে তৈরী হয় শেখর।

অনাদিবাবু ব্যস্ত হয়ে ওঠেন। জানালা দিয়ে বাইরের দিকে
তাকালে বোঝা যায়, এইবার রোদ চনচন করে উঠেছে। বেলা
হয়েছে নিশ্চয়। ঘর থেকে বের হয়ে তারপর একেবারে গলি পার
হয়ে মল্লিকদের বাড়ির হলঘরে উঁকি দিয়ে ঘড়ি দেখে আসেন
অনাদিবাবু। বেলা দশট।।

আর দেরি করা উচিত নয়। মধু আর বিধুও ব্যস্ত হয়ে ওঠে।
সকাল হতেই শেখরের একটা পাঞ্জাবি ও ধুতি সাবানকাচা
করেছিলেন বিভাময়ী। সেগুলি এতক্ষণে শুকিয়েছে। মধু আর বিধু,
দুই ভাই সেই ধুতি আর পাঞ্জাবি তুলে নিয়ে উৎসাহের সঙ্গে
ইস্তিরি করতে থাকে।

শেখরের স্নান সারা হয়ে যায়, এবং ভাত খাওয়া সারা হতেও বেশি
দেরি হয়না। বাড়ি থেকে বের হবার জন্ত শেখর তৈরী হতেই
অনাদিবাবু আর বিভাময়ী সামনে এসে দাঁড়ান। বাপ আর মা'র
পা ছুঁয়ে মাথায় হাত ঠেকিয়ে শেখর এগিয়ে যাবার আগে কিছুক্ষণ
চুপ করে থাকে। মধু আর বিধুও হঠাৎ বুঁকে পড়ে বড়দার পা
ছুঁয়ে প্রণাম করে।

অনাদিবাবুর চোখ দুটো হঠাৎ বড় বেশি উজ্জ্বল হয়ে ওঠে। ঘরের
ভিতরেই দেয়ালের গায়ে কুলুঙ্গির ভিতরে রাখা লক্ষ্মীঘটের দিকে
তাকিয়ে উল্লাসের সঙ্গে বলে ওঠেন—শুভ লক্ষণ, খুবই শুভ লক্ষণ।
কি ? সকলেই চোখভরা বিস্ময় নিয়ে তাকিয়ে দেখতে থাকে।
লক্ষ্মী-ঘটের আমপাতার উপর সুন্দর একটা প্রজাপতি এসে
বসেছে। রওনা হয় শেখর। ঘরের দরজা পার হয়ে গলির সরু পথ
ধরে এগিয়ে যায়। অনাদিবাবু বিভাময়ী আর মধু বিধু, চারটি
মানুষের স্নিগ্ধ দৃষ্টি দরজার কাছে ভিড় করে দেখতে থাকে।

—শিব! শিব! আস্তে আস্তে হাঁপ ছেড়ে শিবরাম উচ্চারণ করেন

অনাদিবাবু। তারপর আন্তে আন্তে হেঁটে ঘরের ভিতর ঢোকেন।

মধু ও বিধু আজ আর স্কুলে যেতে চায় না। বড়দা ফিরে না আসা পর্যন্ত এই গলির ভিতর ঘুর ঘুর করতে ইচ্ছা করে। কত বড় একটা ভাগ্যের ঘটনা, বড়দা আজ সেই ঘটনার নায়ক। তিনশো ষাট টাকা মাইনের চাকরি নেবার জন্য পরীক্ষা দিতে গিয়েছে বড়দা, ওদের মনের ভিতর একটা সুস্বপ্নের নাচ শুরু হয়ে গিয়েছে।

বিভাময়ী বলেন—থাক, আজ আর নাই বা স্কুলে গেলি।

অনাদিবাবু বলেন—বিকেল চারটের আগে ফিরে আসবে না শেখর। ততক্ষণ আমিই বা কি করি বুঝতে পারছি না।

বিভাময়ী বলেন—তুমি এত অস্থির হয়ো না। খেয়ে দেয়ে ঘুমোও। ভগবান মাথার ওপরে আছেন।

দুই

নিবারণ 'সরকারের সম্পর্কে তাঁরই আত্মীয়-স্বজনদের মনে বিশেষ একটা অভিযোগ আছে। এই যে এত সাংঘাতিক একটা আর্থিক কষ্ট এই ক'বছর ধরে সহ্য করছেন নিবারণ সরকার, সেটা তাঁর নিজেরই একটা খামকা জেদের পরিণাম।' আর দুঃখের কথা, তাঁর এই জেদটাও ঠিক তাঁর নিজের জীবনের কোন জেদ নয়। আসলে এই জেদ হলো তাঁর বড় মেয়ে অবন্তীর।

কোন আত্মীয়, কোন নিকট সম্পর্কের মানুষ সামান্য কোন সাহায্যের প্রতিশ্রুতি দিলে এবং সামান্য একটু উপকারের প্রস্তাব করলেই নিবারণবাবু সেই একই কথা আজও উচ্চারণ করেন— অবন্তীকে একবার জিজ্ঞাসা করে দেখি।

অবন্তী যদি রাজি হয়, তবেই রাজি হবেন নিবারণবাবু। নইলে নয়। মেয়ের ইচ্ছা আর অনিচ্ছার শাসন মাথায় তুলে নিয়ে দিন পার করে দিচ্ছেন নিবারণবাবু। কাশীপুরের গলিতে ক্ষুদ্র একটা বাড়িতে থাকেন। এক মেয়ে আর তিনটি ছোট ছোট ছেলে নিয়ে নানা অভাবের টানে হয়রান হয়েও কারও কাছে সাহায্য চাইবার জ্ঞান ছুটে যান না। এখন তো ছুটে যাবার সামর্থ্যও নেই। রোগে অক্ষম হয়ে বিছানায় ঠাঁই নিয়েছেন। মাসের মধ্যে বড় জোর তিন চারটে দিন ভাল থাকেন। তখন লাঠি ভর দিয়ে হয় ঘরের ভিতরে, নয় গলির পথে ছুঁচার মিনিট পায়চারি করে এসে আবার বিছানার উপর বসে পড়েন।

পেনসন পান পঁয়ষট্টি টাকা। তাছাড়া অবন্তীও এই ক'বছর ধরে একটা চাকরি করে। বরানগরের এক মেয়ে স্কুলে ইতিহাস পড়ায়,

মাইনে পায় আশি টাকা। এই তো সর্বসাকুল্যে নিবারণ সরকারের সংসারের আয়। ছোট ছোট তিনটে ছেলে, ঐ চারু হারু আর নরু বড় হয়ে উঠেছে, এবং ওদের এখন স্কুলে ভর্তি না করে দিলেই নয়। কিন্তু খরচের কথাটা ভাবতে গিয়ে চোখে অন্ধকার দেখেন নিবারণবাবু, এবং অবস্থীও ভেবে ক্লান্ত পায় না, কি করে দিন চলেবে, যদি একটু ভাল মাইনের একটা চাকরি না পাওয়া যায় ?

আত্মীয়েরা জানান, এবং অবস্থীও স্কুল থেকে ফিরে এসে শুধু এক পেয়াল চা ক্লাস্ত হাতে টেনে নিয়ে ভাবতে থাকে, নিবারণবাবুর কেউনগরের সম্পত্তি বলতে যা ছিল, তার শেষটুকুও আজ আর নেই। বাড়ি বাগান আর ধানজমি, সবই অনেক আগেই গিয়েছে। বাকি ছিল জলঙ্গীর গা ঘেঁষে একটা ডুবো জমি, সেটাও বেচে দিতে হয়েছে সে বছর, যে বছরের একটি দিনে অবস্থীর মা এক যক্ষ্মা-হাসপাতালের বিছানায় চিরকালের মত চোখ বুঁজে নীরব হয়ে গেলেন।

সে-দিনের কিছুদিন পরেই কাশীপুরের গলির এই বাড়িতে এসেছিলেন ভাগলপুরের মাসিমা। খুব ভাল অবস্থার এক জমিদার পাত্রের খবর এনেছিলেন। অবস্থীর সঙ্গে অনায়াসেই সেই জমিদারের বিয়ে হতে পারে, যদি নিবারণবাবু রাজি হন, এবং অবস্থীর আপত্তি না থাকে।

তখনও অবস্থীর কলেজের পড়ার পালা শেষ হয় নি, ফোর্থ ইয়ারের সবটাই বাকি। ভাগলপুরের মাসিমা জানিয়েছিলেন, যদি অবস্থী বিয়ে করতে রাজি থাকে, তবে সেই জমিদার পাত্র আরও এক বছর বিয়ের জন্ত অপেক্ষা করতে রাজি আছে। অবস্থীর পড়ার সব খরচ দেবে সেই পাত্র। এমন কি কাশীপুরের এই অভাবগ্রস্ত সংসারের ভরণপোষণের সব দায় নিতেও সে প্রস্তুত আছে।

কিন্তু রাজি হয়নি অবস্থী। অবস্থী বলেছিল—ওভাবে বিক্রি হয়ে যেতে ইচ্ছে করে না মাসিমা।

মাসিমা রাগ করে চলে গিয়েছিলেন। মাসিমার সেই রাগ দেখে খুশি হয়েছিল অবন্তী। এবং একবেলা উপোস করেও খরচ বাঁচিয়ে আর একটা বছরের মত কলেজের পড়ার খরচ যোগাড় করবার জন্য মনে মনে প্রতিজ্ঞা করেছিল।

মিথ্যে হয়নি অবন্তীর সেই প্রতিজ্ঞা। প্রায় একবেলা উপোস করার মতই, অনেক রিক্ততা সহ্য করে, নিবারণ বাবুর সামান্য পেনসনের টাকার মধ্যেই সব খরচ কুলিয়ে পরীক্ষার ফী পর্যন্ত দিতে পেরেছিল অবন্তী।

অভাবের বিরুদ্ধে লড়াই করে জীবনের এতগুলি বছর পার হয়ে গিয়েছে যে মেয়ের, তার মনের গভীরে একটা গর্ব আছে। সেই গর্ব হলো একটা প্রতিজ্ঞা। এই অভাবের জীবন থেকে নিজের চেষ্টার জোরে মুক্তি পেতে হবে। কারও সাহায্যের দরকার নেই। কারও মুখের সহানুভূতির কথা শোনবার দরকার হয় না। আর, সহানুভূতি ও উপকারের প্রতিশ্রুতিগুলির ঐ তো ছিরি! ভাগলপুরের মাসিমার প্রস্তাবের মত। একবার উপকার করে পাঁচবার কৃতজ্ঞতা দাবি করবে। সম্মানটুকু কেড়ে নিয়ে শুধু কল্পনার পাত্র করে রাখবে। কোন দরকার নেই।

নিবারণবাবুও বলেন, তুই যদি মনে করিস অবন্তী, কারও উপকারে ও সাহায্যে কোন দরকার নেই, তবে আমিও মনে করি, কোন দরকার নেই।

জীবনের এই জেদ, এই প্রতিজ্ঞা, আর এই গর্বের আবেগটুকু বাঁচিয়ে রাখতে গিয়ে অবন্তী সরকারের মত আশি টাকা মাইনের এক মেয়ে-টিচারকে এবং পঁচিশ বছর বয়সের একটা মেয়েলী জীবনকে আরও যে একটা কঠোর পরীক্ষা সহ্য করতে হচ্ছে, তার ইতিহাস এই পৃথিবীতে এখনও অবন্তী ও নিখিল ছাড়া আর কেউ জানে না। এবং বোধ হয় কেউ কল্পনা করতেও পারবে না যে, একটা গরীবের বাড়ির মেয়ের প্রাণেও এত অহংকার থাকে!

নিখিল মজুমদার আশ্চর্য হয়ে গিয়েছে, এভাবে এতবড় জেদ নিয়ে কোন মেয়ে কি কখনও কাউকে ভালবেসেছে ?

নিখিল মজুমদার তার আশ্চর্যের কথা অবস্খীর কাছে কতবার মুখ খুলে বলেও ফেলেছে। শুনে অবস্খীর ছুচোখের দৃষ্টিতে যেন শাস্ত প্রদীপের আলোর মত একটা নিবিড় তৃপ্তির আভা ফুটে ওঠে।

নিখিল বলে—ভালবাসতে পারে তো অনেকেই, কিন্তু তোমার মত এমন করে নিজের সর্বনাশ করে কেউ ভালবাসতে পারে বলে আমার ধারণা ছিল না।

অবস্খী—বড় বেশি বাড়িয়ে প্রশংসা করছে নিখিল। তোমার দরকারের জন্য সামান্য কয়েকটা টাকা দিতে পারছি, এর মধ্যে কোন অদ্ভুত মহত্ত্ব নেই। ওসব কথা শুনলে আমি লজ্জা পাই।

সকাল বেলা শ্রামবাজারে গিয়ে ডাক্তার রায়ের মেয়ে ডলিকে এক ঘণ্টার মত অল্প শিথিয়ে আসতে হয়, ত্রিশটা টাকা পাওয়া যায়, এবং সেই টাকাটা প্রতি মাসে নিখিল মজুমদারের হাতে তুলে দেয় অবস্খী। টাকাটা পরিমাণে সামান্য হলেও নিখিলের কাছে সে টাকা একটা সৌভাগ্যেরই মত। কারণ সেই টাকাতাই নিখিলের মেসের অর্ধেক খরচ কুলিয়ে যায়।

নিখিলের জীবনও প্রতীক্ষায় আছে। একটা ভাল সার্ভিসের আশায় দিন গুনছে নিখিল। শুধু বসে বসে দিন গোনা নয়। বেচারা প্রাণপণে চেষ্টাও করছে। ট্রামের সেকেন্ড ক্লাসের ভিড়ের ভিতর ঠেলাঠেলি করে উঠে রোজই সকালে চলে যেতে হয় অনেক দূরে, পটলডাঙ্গা থেকে সেই বেহালায়। সেখানে এক পারফিউমারিতে অ্যাপ্রেন্টিস কেমিস্ট হয়ে রোজ অন্তত দশটা ঘণ্টা কাজ করতে হয়। এই কাজের মাইনে নেই, শুধু প্রসপেক্ট আছে। আর আছে সামান্য অ্যালায়েন্স, পঞ্চাশ টাকা।

অবস্খী বলে—তোমাকে আমি সামান্য একটু সাহায্য করতে পারছি, এটা যে আমারই তৃপ্তি।

ইয়া তৃপ্তি। বোধ হয় অবন্তী সরকারের জীবনের সুন্দর একটা জেদের তৃপ্তি। নিজের ভালবাসার অদৃষ্টকেও নিজের হাতে গড়ে তুলবার তৃপ্তি। গরীব বলে কি জগতের কাউকে উপকার করবারও ক্ষমতা থাকবে না, সুযোগ থাকবে না, অধিকার থাকবে না? স্বীকার করে না অবন্তী। স্বীকার করতে চায় না অবন্তীর জীবন। ডলিকে অঙ্ক শিখিয়ে যে ত্রিশটা টাকা প্রতিমাসে পাওয়া যায়, সেই টাকা চারটে মাস ধরে জমালে একটা হাতঘড়ি কিনতে পারা যায়, এবং সত্যিই একটা হাতঘড়ি অবন্তীর খুব দরকার হয়ে পড়েছে! কিন্তু দরকার নেই কিনে; তার চেয়ে বরং মনটা অনেক বেশি খুশি হয়ে যায়, যখন মনে পড়ে অবন্তীর, ঐ টাকাটা নিখিলের জীবনে সামান্য একটু উপকায়ে সার্থক হতে পারছে।

প্রাণ দিয়ে ভালবাসলে বোধহয় এইভাবে প্রাণেরই খানিকটা ভালবাসার মানুষের সুখের জগৎ ক্ষয় করে দিতে পারা যায়। অস্বীকার করে না অবন্তী, নিখিলকে এভাবে প্রাণ দিয়ে ভালবাসতে ভাল লাগে। অথচ এক বছর আগে এই নিখিলকে চিনতোও না অবন্তী, নিখিলের নাম পর্যন্ত শোনেনি।

অবন্তীরই স্কুলের বান্ধবী, যার নাম যমুনা, তারই দাদা হয় নিখিল। যমুনার আপন কাকার বড় ছেলে নিখিল।

যমুনার কোন কাকা আছে, এবং সে কাকার ছেলে নিখিল নামে এরকম সুন্দর চেহারার একটা মানুষও পৃথিবীতে আছে, এসব খবর অবন্তীরও কোনদিন জানা ছিল না। জানতে পেরেছিল প্রথম সেদিন, যেদিন হঠাৎ ট্রামের মধ্যে যমুনার সঙ্গে অবন্তীর দেখা হয়ে গেল। অনেক দিন পরে দেখা। সেই যমুনা, যার শরীরটা একেবারে হালকা লতার মত ছিপছিপে ছিল, আর স্কুলের প্রাইজের দিনে ফুলের মঞ্জরী খোঁপায় ঢুলিয়ে ফুরফুর করে নাচতো। সেই যমুনার চেহারাটা কী গম্ভীর আর কী ভারিক্কি হয়ে গিয়েছে!

কিন্তু সেইরকমই ছটফটে হাসি হেসে অবন্তীর হাত ধরেছিলো

যমুনা, এবং ট্রাম থেকে নেমে অবন্তীকে হাত ধরে সোজা নিজের বাড়িতে নিয়ে গিয়ে চা আর পঁপড় খাইয়েছিল।

যমুনার ঘরের চেহারা দেখেই বুঝে ফেলতে দেরি হয়নি অবন্তীর, যমুনার অবস্থা বোধ হয় অবন্তীর অবস্থার চেয়েও রিক্ত। একটি ছোট ঘর, এক ফালি বারান্দা। পাঁচটি ছেলেমেয়ে নিয়ে সেই ঘরে থাকে যমুনা। যমুনাই বলে—সত্তর টাকা মাইনের ভদ্র-লোকের ঘর এর চেয়ে বেশি ভাল হয় না অবন্তী।

সেই যমুনার বাড়িতে, সেই এক ফালি বারান্দার এক কোণে একটি সুন্দর চেহারার মানুষকে গম্ভীর ভাবে বসে থাকতে দেখে অবন্তীই প্রশ্ন করেছিল, কে ঐ ভদ্রলোক?

যমুনা—আমার দাদা, আমার দিনাজপুরের কাকার ছেলে।

অবন্তী আর কোন প্রশ্ন করেনি। কিন্তু অবন্তীর মনের নীরব প্রশ্নগুলির উত্তর যমুনারই একটানা যত আবোল-তাবোল আক্ষেপের ভাষাগুলির মধ্যে ধ্বনিত হয়েছিল। চুপ ক'রে, এবং খুবই গম্ভীর হ'য়ে শুনেছিল অবন্তী।

যমুনা বলে—আমার দিনাজপুরের কাকার অবস্থা প্রায় আমার এই স্বামীর বাড়ির অবস্থারই মত। আরও দুঃখের কথা কি জান? এত বিদ্বান হয়েও নিখিলদা বেচার। আজ পর্যন্ত একটা চাকরি যোগাড় করতে পারলেন না।

একটু চুপ করে থেকে যমুনা বলে—তোমার কাছে দুঃখের কথাই বলতে ভাল লাগছে, তাই বলছি। মেসে হোটেলে থাকবার মত টাকা নেই বলেই নিখিলদা আমার এখানে এসে উঠেছেন। কিন্তু এসেই তো ভগ্নীপতির অবস্থা দেখে চক্ষু চড়ক গাছ। তাই...

অবন্তী—কি?

যমুনা—তাই চলে না যেয়ে আর উপায় কি বল? আজই দিনাজপুরে চলে যাবেন নিখিলদা।

অবন্তী—চাকরির চেষ্টা করবেন না?

যমুনা—কলকাতার মত খরচে জায়গায় দুটো মাস থাকতে পারবেন, তবে তো চাকরির চেষ্টা করবেন ?

চোখে আঁচল দিয়ে ফুঁপিয়ে ওঠে যমুনা।—আমারও সাধ্য নেই ঝে, নিখিলদাকে এখানে থাকতে বলি। সন্তর টাকা মাইনের জীবন, আমি যে বাচ্চাগুলিকেও মাঝে মাঝে না খাইয়ে ঘুম পাড়িয়ে রাখি অবন্তী !

অবন্তীও রুমাল তুলে চোখ মুছেছিল, এবং অনেকক্ষণ গম্ভীর হয়ে চুপ ক'রে বসেছিল। তার পরেই, যমুনার কাছ থেকে বিদায় নেবার সময়, কে জানে কেন, অবন্তীর মুখের চেহারাটা হঠাৎ অদ্ভুত রকমের হয়ে গেল। এক ঝলক রক্তের আভা চমকে উঠেছে সারা মুখে। আর, চোখ দুটোর কালো নিবিড়তা যেন আরও নিবিড় হয়ে গিয়েছে। থমকে দাঁড়ায় অবন্তী, এবং নিজেরই মনের গভীরে একটা দুঃসাহসের নির্লজ্জতাকে সব নিঃশ্বাস দিয়ে জোর করে চেপে স্তব্ধ ক'রে দিতে চেষ্টা করে। কিন্তু পারে না বোধ হয়। তাই হঠাৎ বলে ওঠে—তোমার নিখিলদার সঙ্গে আমার একটু আলাপ করিয়ে দাও যমুনা।

অতীতের এই ইতিহাস রোজই একবার স্মরণ করা অবন্তী সরকারের প্রতিদিনের জীবনের একটা অভ্যাসে দাঁড়িয়ে গিয়েছে। স্কুলে যাবার সময় যতক্ষণ না হয়, ততক্ষণ হাতের কাছে বই টেনে নিয়ে যার কথা ভাবে অবন্তী, সে হলো নিখিল। আর, এই ভাষনারই ঘোরের মধ্যে হঠাৎ চমকে উঠে এক একদিন দেখতে পায় ; সকাল বেলার আকাশের সব উজ্জ্বলতা যেন নিজের মুখের হাসির মধ্যে ছড়িয়ে দিয়ে নিখিল এসে দাঁড়িয়েছে।

প্রায়ই আসে নিখিল, এবং আজও আসবার কথা। কারণ, অবন্তী জানে, আজকের দিনটা হলো নিখিলের ছুটির দিন।

অবন্তীরও আজ স্কুলে যাবার তাড়া নেই। আজকের মত ছুটি নিয়েছে অবন্তী, কারণ আজ অবন্তী সরকারেরও অদৃষ্টের

একটা পরীক্ষার দিন, যদিও সে পরীক্ষার কথা নিখিলও জানে না।

ভাবনার মধ্যেই হঠাৎ একবার হেসে ওঠে অবন্তীর চোখ। না, আজই নিখিলকে এই পরীক্ষার কথাটা বলে দিয়ে লাভ নেই। পরীক্ষাটা হয়ে যাক, এবং যদি সেই পরীক্ষায় সত্যিই সফল হওয়া যায়, তবেই নিখিল মজুমদারকে সবচেয়ে বেশি আশ্চর্য ক'রে দিতে পারবে অবন্তী।

সকাল দশটাও যখন বেজে গেল, তখন একটু চঞ্চল হয়ে ওঠে অবন্তী। না, আর তো নিখিলের অপেক্ষায় বসে থাকবার মত সময় নেই। এখনি যে একবার ঘরের বাইরে গিয়ে, কাশীপুরের এই গলি থেকে বেশ কিছু দূরে এক সৌভাগ্যের সম্ভাবনার কাছে গিয়ে দাঁড়াতে হবে।

দরজার কাছে পরিচিত পায়ের শব্দ শোনা যায়, এবং অবন্তীর ভাই হারু চৌঁচিয়ে জানিয়ে দেয়—নিখিলবাবু এসেছেন দিদি।

নিখিলের মুখের দিকে তাকালেই অবন্তী সরকারের ছুই চোখে যে হাসির অভ্যর্থনা জেগে ওঠে, সে হাসি আজ যেন আরও একটু বেশি উজ্জ্বল হয়ে ফুটে ওঠে। কিন্তু দেখে আশ্চর্য হয় অবন্তী; এবং ওর চোখের হাসিও মুছে যায়। অবন্তীর মুখটাও সেই মুহূর্তে গম্ভীর হয়ে ওঠে। বড় বেশি গম্ভীর ও বিষন্ন মূর্তি নিয়ে এবং যেন ব্যথিত অপরাধীর মত করুণ হয়ে অবন্তীর কাছে এসে দাঁড়িয়েছে নিখিল।

—তোমার কি কোন অসুখ করেছে? প্রশ্ন করে অবন্তী।

নিখিল বলে—না।...আমি এসেছি তোমার কাছ থেকে বিদায় নিতে।

—কি বললে? বিদায় নিতে? প্রশ্ন করতে গিয়ে অবন্তীর চোখের তারা দুটো শিউরে ওঠে।

নিখিল বলে—হ্যাঁ।

অবন্তী—কেন? আমার কি অপরাধ হলো?

নিখিল হাসে—আমি অপরাধী, তুমি কেন মিছে নিজেকে নিন্দে করছো অবন্তী ?

অবন্তী—তুমি অপরাধী কেন হবে ?

নিখিল—আমার ভাগ্যটাই অপরাধী ।

অবন্তী—তার মানে ?

নিখিল—আর কলকাতায় থাকা সম্ভব নয় ।

—কেন ?

—বেহালার পারফিউমারি জানিয়ে দিয়েছে, পঞ্চাশ টাকা অ্যালাওয়েন্স দিয়ে সখের কেমিস্ট পুষবার ওদের আর দরকার নেই ।

স্তব্ধ হয়ে শুধু গুনতে থাকে অবন্তী ! অবন্তীরই ভালবাসার জীবনকে হতাশ করে দিয়ে সুখী হবার জন্য একটা নিষ্ঠুর চক্রাস্ত যেন নিখিলের ঐ সামান্য পঞ্চাশ টাকার একটা অ্যালাওয়েন্সকেও ছিন্ন-ভিন্ন ক'রে দিয়েছে । সত্যিই তো, নিখিলের পক্ষে আর কলকাতায় থাকা সম্ভব নয় । মেসে থাকতে হলে প্রতি মাসে যে ষাট-সত্তর টাকা দরকার হয়, সে টাকা আসবে কোথা থেকে ? অবন্তী সরকারের পক্ষেও যে নিখিলের দরকারের সব টাকা যোগাড় ক'রে দেওয়া নিতান্তই অসম্ভব ? নিজে একবেলা উপোস ক'রে থাকলেও সম্ভব নয় ।

অবন্তীর চোখ দুটোও যেন স্তব্ধ হয়ে একটা দুঃসহ বেদনার জ্বালা সহ্য করতে থাকে । ছিন্নভিন্ন হয়ে যাচ্ছে অবন্তীরই সেই স্বপ্ন ; আজ না হোক কাল, না হয় আর কয়েক মাস পরে, বড় জোর আর এক বছর পরে নিখিল মজুমদারের একটা ভাল চাকরি হয়েই যাবে । তারপর, আর কি ? নিবারণ বাবুকে কিংবা বাবুবী যমুনাকে একেবারে স্পষ্ট ক'রে জানিয়ে দিতে একটুও দ্বিধা করবে না অবন্তী । অবন্তী আর নিখিলের এক বছরের ভালবাসার দাবি এক শুভ সন্ধ্যার উৎসবে এসে সবাকার চোখের সামনেই ফুলের মালা হয়ে,

হবে। কিন্তু অবস্তীর আজ মনে হয়, সে মালার ফুলগুলিকেই যেন
এটা নির্মম দুর্ভাগ্যের হাত এসে সরিয়ে দিতে চাইছে।

অবস্তী—তাহ'লে তুমি এখন কোথায় যাবে? দিনাজপুর?

নিখিল—না। আমি যাব কানপুর!

অবস্তী—কেন?

নিখিল—কানপুরের ট্যানারিতে একটা কাজ পেয়েছি। মাইনে
একশো টাকা। তার মানে শুধু বেঁচে থাকতে পারবো।

মাথা হেঁট করে অবস্তী, মাথাটা ভার ভার বোধ হয়। নিখিলের
কানপুর যাওয়া বন্ধ করতে পারে, আশি টাকা মাইনের টিচারের
জীবনে সেক্ষমতা কোথায়? ভালবাসতে পারে কিন্তু ভালবাসার
মাহুষকে ধরে রাখতে পারে না, তাকেই বোধ হয় বলে নারীর
জীবন। এই জীবনের হাসিগুলিও যে মুখচোরা কান্না, এই সত্য
হৃদয়তেও কখনও এভাবে বুঝতে পারেনি অবস্তী।

নিখিল বলে—তোমার কাছে ফিরে আসবার জগুই আজ বিদায়
ছি অবস্তী।

তার মানে? অবস্তীর মুখের প্রশ্নটা যেন অভিমানে তপ্ত হয়ে
ওঠে।

নিখিল—তোমার কাছ থেকে তো

নিখিল আশ্চর্য হয়—তুমি এসব কি বলছো অবন্তী ?

অবন্তী—বিশেষ কিছুই বলছি না। শুধু তোমাকে আর একটি দিন কলকাতায় থাকতে বলছি। তারপর এস, যদি হুঁভাগ্য হয়, তবে তোমাকে বিদায় দেব।

সকালে মাত্র এক পেয়ালা চা খাওয়া হয়েছে, এবং এখন ঘরের বাইরে যেতে হলে যে সামান্য একটু ডাল-ভাত মুখে না গুঁজে চলে যাওয়া উচিত নয়, সে কথা স্মরণ করিয়ে দেবার মত মানুষ আজ আর এই বাড়িতে নেই। এবং অবন্তীও আর এক মুহূর্ত দেরি না ক'রে, শুধু শাড়ির আঁচলটাকে সামান্য একটু গুছিয়ে কাঁধের উপর ফেলে দিয়ে তৈরী হয়।—আমাকে এখন একবার বাইরে যেতে হবে নিখিল।

নিখিল বলে—আমিও এখন তাহলে আসি।

অবন্তী বোধ হয় শুনতেই পায়নি। এবং বোধ হয় বুঝতে পারে না যে, নিখিলও অবন্তীর পাশে পাশে হেঁটে চলেছে। নিজেরই উতলা মনের আবেগে ছটফট ক'রে, এবং একটা নতুন প্রতিজ্ঞার মস্তক নিয়ে পথ চলতে থাকে অবন্তী। —দেখি ভাগ্য আমাকে ঠকা পারে, না আমিই ভাগ্যকে ঠকিয়ে।

স্টপের কাছে বাস এসে থেমেছে। চূপ করে দাঁড়িয়ে নিখিল। বাসের ভিতরে টিকিট পড়ে অবন্তী। ছুটে চলে যায়

ভিন

মিশন রো'র সাততলা বাড়ির তিনতলার বিরাট এক প্রকোষ্ঠে দি
গ্রি-মেশিনারি লিমিটেডের অফিস। কারখানাটি আসানসোলে।
অফিসের বিরাট প্রকোষ্ঠ মেহগনির পার্টিশন দিয়ে সারি সারি
কামরায় ভাগ করা। সব চেয়ে বড় কামরাটির স্প্রিং-ডোরের ওপারে
ভূীন সাতটিনের পর্দা ঝোলে। পাশেই কাঠের পার্টিশনের গায়ে
পিতলের নেমপ্লেট ঝকঝক করে—জেনারেল ম্যানেজার।

বাইরে বারান্দার উপর এক সেট সোফা। তকমা পরা চাপরাসি
ঘোরাফেরা করে। বারান্দার দেয়ালঘড়িতে তখন বারটা বাজে।
লিফটের খাঁচা থেকে বের হয়ে আস্তে আস্তে হেঁটে এগিয়ে যায়
শেখর।

নোটিস বোর্ডের দিকে তাকায়। হ্যাঁ, দেখা যায়, জেনারেল
ম্যানেজার যথারীতি নোটিস দিয়েছেন। বেলা ঠিক একটা থেকে
দেড়টা পর্যন্ত ইন্টারভিউ-এর জন্য সময় নির্দিষ্ট করে দিয়েছেন।
দেখে খুশি হয় শেখর, সাক্ষাৎপ্রার্থীর সংখ্যা বেশি নয়। মাত্র
দু'জন। এক, শেখর মিত্র। দুই, অবন্তী সরকার।

কে এই অবন্তী সরকার? কোন মহিলা বলেই মনে হয়। মিস বা
মিসেস কিছুই লেখা নেই। যাক গে, এগিয়ে এসে সোফার উপর
বসে থাকে শেখর। কিন্তু সঙ্গে সঙ্গে হঠাৎ মনটা বিমর্ষ হয়ে যায়।
অবন্তী সরকার নামে প্রার্থীটি শেখরের তুলনায় যদি বেশি শিক্ষিত
হয় আর বেশি যোগ্য হয়, তবে?

বিশ্বাস হয় না। অবন্তী সরকারের কি দু'বছর ধরে ফিজিও
রিসার্চের রেকর্ড আছে? অবন্তী সরকার কি শেখরের মত কোনদিন
গণতন্ত্রের কোন পত্রিকায় প্রবন্ধ লিখেছে আর প্রশংসা পেয়েছে?
শেখরের মত ইন্টারভিউ-এ ডিবেটে মেড্যাল পেয়েছে কি অবন্তী

সরকার? বিশ্বাস হয়না। মনের বিমর্ষতা মনের জোরেই মুছে ফেলতে চেষ্টা করে শেখর।

মনের জোর আছে শেখরের। ভাগ্যের কৃপা নামে কোন বিচিত্র বস্তুর অস্তিত্বে বিশ্বাস করে না শেখর। সংসারের কাছে সুবিচার আর ছায়া পাওয়া যায়, এটাও একটা অবাস্তব বিশ্বাস বলে মনে করে শেখর। তার ত্রিশ বছর বয়সের এই জীবন বলতে গেলে একটা মোহভঙ্গের জীবন। যোগ্য হলেই সেই যোগ্যতার মূল্য পাওয়া যাবে, এমন মোহ পোষণ করে না শেখর। দি এগ্রি-মেশিনারি লিমিটেডের প্রচার অফিসারের চাকরিটাকে পাওয়া যাবে বলে শেখরের মনের ভিতর যে আশা দেখা দিয়েছে, সে আশা হলো সংসারের খামখেয়ালের উপর একটা আশা। কে জানে, জেনারেল ম্যানেজার হয়তো মনের ভুলে, কিছু না ভেবে-চিন্তে, শুধু একটা হঠাৎ খেয়ালের বশে শেখরকেই কাজের উপযুক্ত বলে মনে করে ফেলতে পারেন। মনে পড়ে ইন্দুপ্রকাশের সেই কথাটা। ইন্দু অনেকবার হেসে হেসে বলেছে, তোর সবচেয়ে বড় ড্র-ব্যাক হলো তোর ঐ মেরিট। তুই সব দিক দিয়ে যোগ্য, তাই তুই অযোগ্য। তোর ভাল চাকরি হতে পারে না, শেখর; অসম্ভব।

ইন্দুর কথাগুলি তখন বিশ্বাস করতে পারেনি শেখর। কিন্তু গত তিন বছরের চেষ্টার ইতিহাস স্মরণ করলে ইন্দুকে বাস্তবিক ভূয়োদশী ঋষি বলে মনে হয়। কত জায়গায় কত রকমের সার্ভিসের জ্ঞান দরখাস্ত করেছে শেখর, কিন্তু দরখাস্তের একটা উত্তর পর্যন্ত আসেনি। সেদিক দিয়ে বিচার করলে দি এগ্রি-মেশিনারি লিমিটেডকে অনেক সভ্য বলে মনে হয়। সাক্ষাৎ দেখা করবার জ্ঞান একটা পত্র দিয়েছে। শেখরের জীবনে এই বোধ হয় পৃথিবীর কাছ থেকে প্রথম ভদ্র ব্যবহার লাভের সৌভাগ্য।

বার বার মনে পড়ে, ঐ অবস্খী সরকার নামটা। শেখরের সৌভাগ্যের পথে কাঁটার মত ঐ অবস্খী সরকার, যার মূর্তি এখনও দেখা দেয়নি।

এগ্রি-মেশিনারি লিমিটেডকে নয়, জেনারেল ম্যানেজারকে নয়, অবন্তী সরকারকেই শেখরের আজকের এত বড় আশার সব চেয়ে বড় শত্রু বলে মনে হয়। টালিগঞ্জের সেই ছোট বাড়ির রাতজাগা চোখের স্বপ্ন এবং সারা সকালের আশার উৎসব মিথ্যে করে দিতে পারে ঐ অবন্তী সরকার, আর কেউ নয়।

লিফট উঠছে উপরে, শব্দ শোনা যায়। শেখরের নিঃশ্বাসের ছন্দও হঠাৎ কঁপে ওঠে। অবন্তী সরকার এল নাকি ?

হ্যাঁ, এই বোধ হয় অবন্তী সরকার। ঐ যে অদ্ভুতভাবে সেজে, কিংবা না সেজেই অদ্ভুতরকমের সুন্দর হয়ে এক তরুণী লিফটের খাঁচা থেকে নেমে এই অফিস ঘরেরই দেয়ালের গায়ের নেম-প্লেটগুলি পড়তে পড়তে এদিকে আসছে। সিঁথিতে সিঁদুর নেই, মাথার উপর কাপড় টানাও নয়। নিশ্চয় উনি মিস, মিস অবন্তী সরকার।

দেখতে থাকে শেখর, আগন্তুক তরুণী হঠাৎ থমকে দাঁড়িয়েছে, আর একাগ্র দৃষ্টি তুলে নোটিস বোর্ডের সেই নোটিসটাকেই পড়ছে। আর কোন সন্দেহ নেই, উনিই হলেন শেখরের এত আশার চাকরিটার প্রার্থিনী, শেখরের একমাত্র প্রতিদ্বন্দ্বিনী। তরুণীর চোখ দুটোর চেহারা দেখলেই বোঝা যায়, চকচকে বুদ্ধির আভা খেলছে সেই দুচোখের দুই তারার আশে পাশে। ঐ দুই চোখ যদি একটু সজল হয়ে জেনারেল ম্যানেজারের মুখের দিকে তাকায়, তবে সত্য-মিথ্যার বিপ্লব ঘটে যেতে পারে। সন্দেহ করে শেখর। ঐ দুটি সুন্দর কালো চোখের জোরেই চাকরিটা পেয়ে যাবে বলে একটা দ্রুত বিশ্বাস নিয়ে স্থির হয়ে দাঁড়িয়ে আছে অবন্তী সরকার। অবন্তী সরকার এতক্ষণে মুখ ফিরিয়ে তাকায়। সোফার দিকে এগিয়ে আসতেই শেখরের চেহারটাকে দেখতে পায় ; এবং সেই দুই কালো চোখ যেন হিংসুক সাপিনীর চোখের মত তাকিয়ে থাকে। নোটিস বোর্ডের লেখা পড়েই বুঝতে পেরেছে অবন্তী সরকার, শেখর মিত্র নামে লোকটাই সোফার উপর বসে রয়েছে

সোফার দিকে আর এগিয়ে আসে না অবন্তী সরকার, যদিও ছোটো সোফা খালি পড়ে আছে! যেন শেখর মিত্রের ছায়ার কাছে আসতেও ঘৃণা বোধ করছে অবন্তী সরকার। দূরে সরে গিয়ে বারান্দার রেলিং-এর ধারে দাঁড়িয়ে পথের জনতার শ্রোতের দিকে তাকিয়ে থাকে। কি দেখছে, দেখবার কি আছে, তা সে-ই জানে। শেখর দেখতে পায়, জোরে একটা দীর্ঘশ্বাস ফেলে রুমাল দিয়ে কপাল মুছলো অবন্তী সরকার। মনে হয় শেখরের, অবন্তী সরকারের সেই কালো চোখের চকচকে বুদ্ধি হঠাৎ যেন নিষ্প্রভ হয়ে গিয়েছে। মুখ ঘুরিয়ে নিয়ে দেয়াল-ঘড়ির দিকে তাকায় শেখর। একটা বাজতে আর পনের মিনিট বাকি। জেনারেল ম্যানেজারের কামরা থেকে আহ্বান আসবার সময় নিকট হয়ে এসেছে। অফিস-ঘরের ভিতর থেকে হঠাৎ এক কেরানিবাবু এগিয়ে এসে প্রশ্ন করেন— আপনি শেখর মিত্র? ইন্টারভিউ আছে?

শেখর বলে—আজ্ঞে হ্যাঁ।

কেরানিবাবু—আর অবন্তী সরকার?

ছোটো আসে তরুণী। কেরানিবাবুর সামনে এগিয়ে এসে বলে— আমি অবন্তী সরকার।

কেরানিবাবু বলেন,—বাস, তাহ'লে আর গনের মিনিট অপেক্ষা করুন।

কেরানিবাবু চলে যেতেই অবন্তী সরকার আর কোন দিকে না তাকিয়ে একটা সোফার উপর বসে পড়ে। হাতের ছোট ব্যাগটিকে কোলের উপর রেখে আর হুহাতে জড়িয়ে চুপ করে বসে থাকে। শেখর মিত্র অতৃদিকে মুখ ঘুরিয়ে নেয়। অস্বস্তি বোধ করে শেখর। অবন্তী সরকারের এই সান্নিধ্য একটা অভিশাপের মত মনে হয়।

দেয়াল-ঘড়ির দিকে তাকিয়ে আর একবার রুমাল দিয়ে কপাল মোছে অবন্তী সরকার। তারপর আনমনা শেখর মিত্রের

ভাবনাগুলিকে একেবারে চমকে দিয়ে হঠাৎ বলে ওঠে—আপনাকে কোথায় যেন দেখেছি বলে মনে হচ্ছে।

শেখর অপ্রস্তুতভাবে বলে—তা হয় তো দেখেছেন।

বলতে গিয়ে শেখরও যেন অবস্খী সরকারের মুখের দিকে অতীতের একটা স্মৃতির আবছা চোখের দৃষ্টি দিয়ে দেখতে থাকে; তারপর বলেও ফেলে—আপনাকেও যেন কোথায় দেখেছি।

তরুণী প্রশ্ন করে—আচ্ছা, আপনি কি অনস্ময়ার বউদি প্রভার কেউ হন?

আশ্চর্য হয় শেখর—হ্যাঁ, প্রভা আমার বোন।

অবস্খী সরকার বলে—হ্যাঁ, ঠিকই অনুমান করেছি। প্রভার শ্বশুর বাড়িতে, তার মানে অনস্ম্যাদের বাড়িতে আপনাকে একবার দেখেছি। অনেকদিন আগে। বোধ হয় চার বছরেরও আগে।

শেখর—তাই বলুন। আমারও এখন মনে পড়ছে। প্রভার ননদ অনস্ময়ার বন্ধু আপনি। তাই না?

অবস্খী সরকার হাসে—হ্যাঁ। আপনার দেখছি খুব স্পষ্ট মনে আছে।

শেখর—মনে থাকবারই কথা। আপনি ভূতের গল্প বলে সন্ধ্যাবেলা প্রভাকে ভয় দেখাচ্ছিলেন, ঠিক তখনই আমি উপস্থিত হয়েছিলাম। অবস্খী সরকার এইবার স্বচ্ছন্দে হেসে ফেলে—আসল ব্যাপারটা তো জানেন না। অনস্ম্যা বলেছিল, তার বউদি প্রভা নাকি ভয়ানক সাহসী মেয়ে। তাই আমি অনস্ময়ার সঙ্গে বাজি রেখে প্রভাকে ভূতের গল্প বলে ভয় দেখিয়েছিলাম, আর বাজি জিতেছিলাম।

একটা বাজতে আর দশ মিনিট। হঠাৎ অবস্খী সরকার মুখ গম্ভীর করে। চোখ ফিরিয়ে অন্ধ দিকে তাকায়। বোধ হয়, শেখর মিত্রের উদ্দেশ্যটাকেই আবার মনে পড়ে গিয়েছে। এই লোকটাই তো অবস্খী সরকারের আশায় বাদ সাধতে এসেছে। শেখর মিত্র যে অবস্খী সরকারের ভাগ্যের শত্রু।

গম্ভীর মুখ ঘুরিয়ে, আন্তে আন্তে, ছুঁচোখের দৃষ্টির তিক্ততা যেন

কোন মতে হাসিয়ে একটু মিষ্টি করে নিয়ে অবস্তী সরকার বলে—
একটা কথা জিজ্ঞাসা করছি, কিছু মনে করবেন না।

শেখর—বলুন, মনে করবার কি আছে ?

অবস্তী—আচ্ছা, আপনি ইঠাৎ এই চাকরিটা নেবার জন্ত এত ব্যস্ত হয়ে উঠলেন কেন ?

শেখর—তার মানে ?

অবস্তী—এই তিনশো ষাট টাকা মাইনের একটা চাকরি, একটা কারখানার পাবলিসিটি অফিসারের কাজ ছাড়া অণু কত ভাল কাজ তো আছে।

শেখর হাসে—আছে তো, কিন্তু থাকলেই বা কি ?

অবস্তী—আপনি সেই সব ভাল কাজের জন্ত চেষ্টা করুন না কেন ? আপনার যা কোয়ালিফিকেশন, তাতে ইচ্ছে করলে আপনি তো অনায়াসে ইণ্ডিয়া গভর্নমেন্টের কোন বড় দপ্তরে একটা ভাল সার্ভিস পেতে পারেন।

শেখর হাসে—ইচ্ছে করলেই পেতে পারি না। যদি দেয়, তবে নিতে পারি।

অবস্তী—যাই বলুন, আপনার মত মানুষের পক্ষে এরকম একটা সাধারণ চাকরি নেওয়া সাজে না।

শেখর আশ্চর্য হয়—না জেনে আমাকে বড় বেশি প্রশংসা করছেন আপনি। আমার পক্ষে কি সাজে বা না সাজে সেটা আমি জানি।

অবস্তী—আমি আপনার বোনের ননদ অনসূয়ার কাছে সবই শুনেছি। আপনি ফিজিয়ে রিসার্চ করেছেন। আপনার ইউনিভার্সিটির রেকর্ড চমৎকার। আপনি ইংরেজী ও বাংলা কাগজে নানা বিষয়ে প্রবন্ধ লেখেন।

শেখর—কি আশ্চর্য, চার বছর আগে প্রভার ননদ আপনাকে যে সব কথা বলেছে, সে-সব আজও এত স্পষ্ট করে মনে করে রেখেছেন ?

অবস্তী—মনে থেকে গেছে। তাই বলছি...আপনি এই কাজটা নেবেন না।

চমকে ওঠে শেখর। অবস্তী সরকারের আবদার প্রলাপের মত মনে হয়। কোথা থেকে এসে অভিভাবিকার মত উপদেশ দিয়ে শেখর মিত্রের হিতাহিত বোঝাতে শুরু করে দিয়েছে। অবস্তী সরকারের বুদ্ধির হুঁসাহস তো কম নয়।

শেখর বলে—এই চাকরিটা নেওয়া বা না নেওয়া আমার ইচ্ছের ওপর নির্ভর করে না। হ্যাঁ, যদি দেয়, তবে নেবই। আপনি ওরকমের অদ্ভুত অনুরোধ করবেন না।

অবস্তী সরকারের মাথাটা যেন হঠাৎ একটা অদৃশ্য বোঝার ভারে ব্যথিত হয়ে ঝুঁকে পড়ে। অনুরোধটা অদ্ভুতই বটে। এমন অদ্ভুত অনুরোধ করবার অধিকার কোথা থেকে পেল অবস্তী সরকার? বোকা নয় শেখর মিত্র। বুঝতে তার একটুও দেরি হয়নি। অবস্তী সরকারের কালো চোখের চকচকে বুদ্ধি শেখর মিত্রকে স্ততির ছলে দুর্ভাগ্যের ধুলোয় বসিয়ে দিয়ে নিজের জগৎ এই চাকরির পথটাকে স্বচ্ছন্দ করে নিতে চায়।

একটা বাজতে আর পাঁচ মিনিট বাকি। হেঁট মাথা তুলে শেখরের দিকে তাকায় অবস্তী সরকার। এইবার বুদ্ধিমান শেখর মিত্রেরই চোখ দুটো একটু ব্যথিতভাবে চমকে ওঠে। কারণ, ছলছল করছে অবস্তী সরকারের চোখ। অবস্তীর কপালের একটা দিক ঘামে পিছল হয়ে গিয়েছে। ঠোঁট দুটো থরথর করছে।

—কি হলো আপনার? প্রশ্ন করে শেখর মিত্র।

অবস্তী সরকার বলে—আপনি আমাকে চিনতে পারলে আমার অনুরোধটাকে অদ্ভুত বলতে পারতেন না।

শেখর—আপনার কথার অর্থ বুঝলাম না।

অবস্তী—আপনি জানেন না, আমি কেন, কিসের জগৎ, কি অবস্থায় পড়ে এই চাকরিটা নেবার জগৎ তৈরী হয়েছি।

শেখর—না জানলেও বুঝতে পারছি, চাকরিটা পেলে আপনার সুবিধা হয়।

অবন্তী—সুবিধা? শুধু সুবিধা নয় শেখরবাবু। পেলে বেঁচে যাই। শুধু আমি নই, আরও অনেকে।

শেখর—আপনার বাড়িতে কে কে আছেন?

অবন্তী—বাবা আছেন। তিনটি ছোট ছোট ভাই আছে।

শেখরের বুকের ভিতর একটা যন্ত্রণাক্ত নিঃশ্বাস হাঁসফাঁস করে।—

আপনার বাবার কি কোন চাকরি নেই?

অবন্তী—না, এখন তিনি সামান্য কয়েকটা টাকা পেনসন পান। রোগে শয্যাশায়ী। মা আজ তিন বছর হলো যক্ষ্মা হাসপাতালের বিছানাতেই শেষবারের মত চোখ বুঁজে চলে গিয়েছেন। আর, বাবা তাঁর সর্বস্ব বেচে দিয়ে আমাদের এতদিন বাঁচিয়েছেন। কিন্তু আর না। আর তাঁর সম্বল নেই, শক্তিও নেই।

অবন্তী সরকারের জীবনের দুঃখের যন্ত্রণা শুনে শেখরের বুকের ভিতরে একটা করুণ বিদ্রূপ নীরবে হেসে ওঠে। এ আর কি-এমন নতুন কথা বলছে অবন্তী সরকার? ঐ-সব দুঃখ যে শেখর মিত্রের বুকের পাঁজরে পাঁজরে চেনা। শেখর মিত্রের জীবনটাকে একটুও চেনেনা, কোন খবরও রাখে না অবন্তী সরকার, তাই অনায়াসে তার নিজের জীবনের বেদনাগুলিকেই সংসারের সব চেয়ে বড় দুঃখের ইতিহাস বলে মনে করে একজন অপরিচিতের কাছে বর্ণনা করতে পারছে।

দেয়ালের ঘড়ির দিকে তাকায় শেখর। অবন্তী সরকারও তাকায়। একটা বাজতে আর এক মিনিট মাত্র। বোধ হয় কোন কথা বলবার জ্ঞান মনে মনে তৈরী হতে থাকে শেখর, কিন্তু অবন্তী সোফা থেকে উঠে এসে সোজা শেখরের একেবারে কাছে এসে আস্তে আস্তে বলে—আপনি অনুগ্রহ করুন।

অবন্তী সরকারের চোখের কোণে ছোট একটা জলের ফোঁটা

চিকচিক করছে। ঠোঁটে ঠোঁট চেপে, জোরে নিঃশ্বাস ছেড়ে শেখরের মুখের দিকে তাকিয়ে আছে। বিব্রত হয়ে, ভয় পেয়ে, আশ্চর্য হয়ে, আর সারা মুখটা বেদনার্ত করে ব্যস্তভাবে উঠে দাঁড়ায় শেখর—এ কি বলছেন আপনি ?

অবন্তী—ঠিকই বলছি। আপনার যা কোয়ালিফিকেশন, তাতে আপনি এর চেয়ে অনেক ভাল সার্ভিস পেতে পারেন। কিন্তু আমার পক্ষে এর চেয়ে ভাল সার্ভিস আশা করা হুয়াশা।

শেখর—কিন্তু, আমি কি করতে পারি ?

অবন্তী—আপনি যদি ইন্টারভিউ না দেন, এখনি চলে যান, তবে আশা আছে আমিই কাজটা পেয়ে যাব। কারণ, আর কোন ক্যানডিডেট নেই।

শেখরের মনের ভিতর যেন বিচিত্র এক বেদনার উষ্ণ বাতাস ছটফট করতে থাকে। পৃথিবীর একটি মানুষের অদৃষ্ট আজ করুণভাবে শেখরের মুখের দিকে তাকিয়ে আছে। ইচ্ছে করলেই শেখর আজ এই মুহূর্তে অবন্তী সরকারের ঐ বিষণ্ণ মুখে হাসি ফুটিয়ে তুলতে পারে। চেষ্টা করলেই শেখর আজ অবন্তী সরকার নামে এক নারীর দীনতাদীর্ণ গৃহনীড়ের সব উদ্বেগ দূর করে দিতে পারে। জীবনে এই প্রথম একটা মানুষের উপকার করবার ক্ষমতা পেয়েছে শেখর। একটা মানুষকে সুখী করবার অধিকার ; একটা মানুষের জীবনের আশার আবেদন ধন্য করে দেবার মত সৌভাগ্যের অহংকার।

অবন্তী বলে—কাজটা যদি না পাই, তবে বাড়ি ফিরে গিয়ে বাবার মুখের দিকে আমি কি করে যে তাকাবো, বুঝতে পারবেন না শেখরবাবু। বাবা যদি কেঁদে ফেলেন, কি করে সহ্যই বা করবো বলুন ?

চুপ করে দাঁড়িয়ে অবন্তী সরকারের আবেদন শুনতে থাকে শেখর। বুঝতে পারে শেখর, হ্যাঁ ঠিকই, অবন্তী সরকারের বাবার

চোখ ঠিক অনাদি মিত্র নামে আর একজন বৃদ্ধের চোখের মতই ছলছল করে উঠবে। জানে না অবন্তী সরকার, টালিগঞ্জের এক গলির ভিতরে ক্ষুদ্র একটি গৃহ যে মুহূর্তে স্তন্যপাবে যে, চাকরি না পেয়ে শূণ্য হয়ে ফিরে এসেছে শেখর, সেই মুহূর্তে সেই গৃহের চারটি মানুষের প্রাণে হতাশার পাঁজরভাঙা আঘাতের বেদনা শিউরে উঠবে। কিন্তু কি আশ্চর্য, যাই হোক না কেন, যে-ই এই কাজটা পেয়ে যাক না কেন, অবন্তী সরকার অথবা শেখর মিত্র, উভয়ের মধ্যে যারই সৌভাগ্য আজ প্রতিষ্ঠিত হোক না কেন, এই পৃথিবীর কোন না কোন ঘরের প্রাণকে কাঁদতে হবে। অবন্তী বলে—আপনি আমাকে নিশ্চয়ই খুবই স্বার্থপর আর ছোট মনের মানুষ বলে মনে করছেন শেখরবাবু। কিন্তু একটু ভেবে দেখুন। যদি আপনার বাড়ির অবস্থা আমার বাড়ির অবস্থার মত হতো, আর আমি আপনার চেয়ে বেশি যোগ্য ক্যানডিডেট হতাম, তাহলে আচ্ছ আপনি কি ...।

চৈচিয়ে ওঠে শেখর—না, কথখনো না। আমি তবুও আপনার কাছে এরকম অদ্ভুত অনুরোধ করে বসতাম না।

ইঠাৎ স্তব্ধ হয়ে, এতক্ষণের এত মুখরতার সব শক্তি হারিয়ে, দাঁড়িয়ে থাকে অবন্তী সরকার। দেয়াল-ঘড়ির দিকে তাকায় শেখর। থর থর করে কঁপে ওঠে শেখরের দৃষ্টি। ঠিক একটা বেজেছে।

আর এক মুহূর্তও বাকি নেই। এই মাত্র, হয়তো কেরানিবাবু কিংবা চাপরাসি এসে হাঁক দেবে। জেনারেল ম্যানেজারের আহ্বান এসে পড়বে। ঐ আহ্বানের পরিণামে, আর কয়েকটি মিনিটের মধ্যে এই পৃথিবীর একটি দুঃখী সংসার সুখী হয়ে যাবে, এবং আর একটি দুঃখী সংসার আরও দুঃখী হয়ে যাবে।

একটা আর্ত দীর্ঘশ্বাসের মত শব্দ টেনে লিফট উপরে উঠে এসেছে। দু'জন আগন্তুক লিফটের খাঁচা থেকে বের হয়ে হস্তদস্ত হয়ে অন্তরীক্কে চলে গেল। লিফটের ভিতরে অনেক জায়গা। এখনি

নীচে নেমে যাবে ঐ লোহার দোলনা। খাঁচা বন্ধ করবার জন্ত হাত তুলেছে লিফটম্যান।

লিফটের দিকে ছুটে চলে যায় শেখর। শেখরের চোখের দৃষ্টিটা উতলা, মুখটা করুণ, যেন নিজেরই ইচ্ছার নাগাল থেকে পালিয়ে যাওয়া একটা অসহায়ের মূর্তি। একটা লাফ দিয়ে, নিজেরই বৃকের একটা নিষ্ঠুরতাকে ভয় পেয়ে, লিফটের খাঁচার ভিতর ঢুকে পড়ে নিজেকে যেন রুদ্ধ করে শেখর।

টালিগঞ্জের গলির ভিতর সেই ক্ষুদ্র গৃহের দরজা আর জানালার কাছে এখন আশাদীপ্ত কতগুলি চক্ষুর দৃষ্টি আকুল হয়ে আছে। শেখরের পায়ের শব্দ শোনবার জন্ত বাড়িটা উৎকর্ণ হয়ে আছে। বার বার সেই একই দৃশ্য মনে পড়ে। টালিগঞ্জের গলির একটি ক্ষুদ্র বাড়ির প্রকাণ্ড লোভের আর আশার স্বপ্নটার দৃশ্য। চেষ্টা করেও আনমনা হতে পারে না শেখর।

কিন্তু এখনই সেই উজ্জল চোখগুলির সামনে ফিরে যাওয়া উচিত নয়। পথে পথে ঘুরে আর পার্কের বেঞ্চিতে বসে কয়েকটি ঘণ্টার মত সময় পার করে দিতে হবে। বিকেল হোক, সন্ধ্যা পার হয়ে যাক, রাতটাও একটু গভীর হোক, অপেক্ষায় থেকে থেকে দীপ্তিহীন হয়ে যাক টালিগঞ্জের গলির সেই ঘরের চারটি মানুষের চার জোড়া চোখ। মধু বিধু ঘুমিয়ে পড়ুক। দেরি দেখে বাবা আর মা আগেই বুঝে ফেলুক যে, তাদের গীতাপাঠ আর কালীঘাটের পূজা ব্যর্থ হয়েছে।

আবার একটা আর্ত দীর্ঘশ্বাসের মত একটানা শব্দ। নীচে নেমে গেল লিফট।

চার

—সত্যিই যে অনেক রাত হলো। শেখর এখনও ফিরছে না কেন ? অনাদিবাবুর প্রশ্নের মধ্যে শুধু সন্দেহ নয়, একেবারে স্পষ্ট হতাশার আক্ষেপও যেন হাঁপিয়ে হাঁপিয়ে আর্তনাদ করে ওঠে। পিঠের ব্যথা এইবার বেশ জোর করে উঠেছে। আর ভুলে থাকবার শক্তি পাচ্ছেন না অনাদিবাবু।

বিকেল হবার আগেই বড়দার জন্তে পাঁউরুটি কিনে এনেছিল মধু আর বিধু। তাছাড়া সুজির হালুয়া তৈরি করে রেখেছেন বিভাময়ী। বিকেল হতেই তো ফিরে আসবে শেখর। ক্লান্ত ছেলেটা যেন বাড়ি ফিরেই কিছু মুখে দিতে পারে, ব্যবস্থা করে রাখতে কোন ভুল করেন নি বিভাময়ী।

লক্ষ্মীঘটের আমপাতার উপর থেকে সেই প্রজাপতিটা কখন পালিয়ে গেল কে জানে ? বিকেল পর্যন্ত ঠিক ওখানেই বসে ছিল। বিভাময়ী বলেন, কে জানে, ছেলেটা এত রাত করছে কেন বুঝতে পারছি না।

বিছানার উপর কাঁথার আড়াল থেকে হঠাৎ জাগা-চোখ বের করে বিধু প্রশ্ন করে—বড়দা ফিরেছে মা ?

বিভাময়ী—না। তোরা ঘুমো।

বুকের বাঁ পাশে হাত বুলিয়ে অনাদিবাবু একবার দেয়ালের একটা তাকের দিকে তাকান, যেখানে নিঃশব্দে পড়ে আছে তাঁর জীবনের অনেক প্রিয় সেই বইটা, সেই শ্রীমদ্ভগবদ্গীতা। অনাদিবাবুর চোখের চাহনির ভঙ্গীটাও অদ্ভুত। যেন তাকের উপর রাখা একটা বাজে আবর্জনার দিকে তাকিয়ে আছেন।

বিভাময়ীর গায়ের জর একটুও কমেনি। বেড়েছে কিনা তাও বোধ

হয় বুঝতে পারেন না। শুধু বুঝতে পারেন, পা ছুটো বড় বেশি
ঠাণ্ডা হয়ে আসছে, কনকন করছে।

অনাদিবাবু বলেন—যা কপালে ছিল তাই হয়েছে বিভা।

বিভাময়ী—কি ?

অনাদিবাবু—শেখরের চাকরি হয়নি।

কোন উত্তর দেন না বিভাময়ী। জ্বরে শরীরটা শুধু একবার
সিরসির করে ওঠে। তার পরেই আঁচল তুলে চোখ মোছেন
বিভাময়ী।

ধড়ফড় করে বিছানার উপরেই শায়িত শরীরটাকে কাত করে দিয়ে
চৈঁচিয়ে ওঠেন অনাদিবাবু—তুমি কি সত্যিই ভগবানে বিশ্বাস
কর বিভা ?

বিভাময়ী—বিশ্বাস না করে উপায় কি ?

অনাদিবাবু—তার মানে ?

বিভাময়ী—ভগবান যদি না থাকে, তবে মানুষকে মিছিমিছি এত
ভয়ানক ছুঃখটা দেবে আর কে বল ?

অনাদিবাবু—ছিঃ, তাকে কি ভগবান বলে ?

বিভাময়ী—জানি না।

আবার চৈঁচিয়ে ওঠেন অনাদিবাবু—না জানলে চলবে কি ক’রে ?
চোখের উপরেই দেখতে পাচ্ছ তো, কত চোর-ডাকাত মহানুখে
আছে, আর নিরীহ মানুষ জলে পুড়ে মরছে। তবু ভগবানের
উপর ভরসা যদি কর, তবে কোন কালেই কিছু হবে না।

বিভাময়ী—আর কারও ওপর ভরসা করি না।

এইবার একটু শান্তভাবে হাঁসফাঁস করেন অনাদিবাবু—তাই বল।
অনেকক্ষণ চুপ করে পড়ে থাকেন অনাদিবাবু। পিঠের ব্যথাটাও
যেন ঝিমিয়ে পড়েছে। বিভাময়ী প্রশ্ন করেন—ঘুমিয়ে পড়লে
না কি ?

অনাদিবাবু—না।

বলতে বলতে উঠে বসলেন অনাদিবাবু। তারপর ঘরের চারদিকে তাকিয়ে, রুক্ষ ও শুষ্ক দৃষ্টিতে যেন জ্বালা ধরিয়ে দিয়ে আবার বিড় বিড় করতে থাকেন—ভাবছি, কী অদ্ভুত দুর্ভাগ্য! চোর-ডাকাত হবার মতও শক্তি আর নেই। বয়স হয়েছে, তার ওপর এই দুর্বল পাঁজরা।

বিভাময়ী উঠে দাঁড়ান। আস্তে আস্তে কাছে এগিয়ে যান। অনাদিবাবুর একটা হাত ধরে বলেন—আশ্চর্য, তুমি আবার এসব কি বলছো? তোমার মুখে এসব কথা সাজে না।

অনাদিবাবু—কেন সাজে না?

—না। চৈঁচিয়ে ওঠেন বিভাময়ী। বিভাময়ীর গায়ের সব জ্বরের জ্বালা যেন তাঁর চোখের উপর গিয়ে লুটিয়ে পড়ে। চোখ দুটো অদ্ভুতভাবে জ্বলে উঠেছে।

অনাদিবাবু বলেন—কি হলো? তুমি কার ওপর রাগ করছো?

বিভাময়ী—রাগ করে নয়, গর্ব করে বলছি, তোমাকে চোর ডাকাত করবার সাধ্য ভগবানেরও নেই।

গর্ব? ঠিকই তো। অনাদিবাবুর মনে হয়, সত্যি কথাই স্মরণ করিয়ে দিয়েছে বিভা। এত অভাব, এত দুঃখ, এত ক্লেশ, তবু আজও এই বাড়িটা ভণ্ড কপট চোর আর মিথ্যুক হয়ে যেতে পারেনি। দুঃখ-অভাব সহ্য করে করে শুধু নিজের প্রাণটাকেই ক্ষতাক্ত করেছে এই বাড়িটা, অশ্রু কারও সুখ লুণ্ঠ করতে চেষ্টা করেনি, পৃথিবীর কোন মানুষকে একবিন্দু দুঃখ দেয়নি। ঐ শেখর, লেখা-পড়া শিখে এত বড়টি হয়েছে যে ছেলে, তাকে কখনও একটি মিথ্যা কথা বলতে শোনেননি অনাদিবাবু। আর ঐ মধু ও বিধু, রথের মেলার দিনেও একটি পয়সা পাওয়ার জন্তু লোভী হয়ে কোন বায়না ধরে না ওরা। ছেলেমানুষ হয়েও কত শক্ত হয়ে গিয়েছে ওদের প্রাণ। এই তো ভাল, ঠিকই বলেছে বিভাময়ী। এক বেলা খেয়ে, কিংবা উপোস করে থেকেও এই গর্ব নিয়ে একদিন চোখ বন্ধ

করতে পারা যাবে যে, ভাগ্য আর ভগবান এক সঙ্গে মিলেও
পাঁচাত্তর টাকা মাইনের একটা সামান্য মানুষকে চোর করতে
পারেনি।

বাইরের দরজাটা শব্দ করে ওঠে। চমকে ওঠেন বিভাময়ী আর
অনাদিবাবু।

হ্যাঁ, শেখরই এসেছে। আস্তে আস্তে হেঁটে এসে বারান্দার উপর
উঠে জুতো খোলে শেখর। তারপর কলতলায় গিয়ে হাত-পা ও
মুখ ধুয়ে ঘরের ভিতর এসে ঢোকে।

অনাদিবাবু স্বচ্ছন্দে প্রশ্ন করেন—মিছিমিছি এত দেরি করলি
কেন রে ?

গম্ভীর অথচ শুকনো স্বরে শেখর বলে—মিছিমিছি বলেই তো এত
দেরি হলো।

বিভাময়ী—তার মানে, কাজটা হলো না ?

শেখর—না।

মধু আর বিধু একসঙ্গে গায়ের কাঁথা ফেলে দিয়ে বিছানার উপর
উঠে বসে। ছ'হাতে চোখ ঘষে, যেন ব্যর্থ স্বপ্নের মোহটাকে মুছে
দিয়ে বড়দার মুখের দিকে তাকায়।

টালিগঞ্জের ক্ষুদ্র বাড়ির সব কৌতূহলের চরম অবসান এতক্ষণে হয়ে
গেল। আর প্রশ্ন করে জানবার কিছু নেই। শেখরই বলে—
আমার নিজেরই ভুলে কাজটা হলো না।

শেখরের কথার শব্দ শুনেও ঘরের প্রাণটা অচঞ্চল হয়ে থাকে।
নীরব স্তব্ধ ও শাস্ত। অনেকক্ষণ। তার পরেই বিভাময়ী বলেন—
চল, খাবি চল।

শেখর বলে—খেতে পারবো না।

বিভাময়ী—কেন ?

শেখর—ভাল লাগছে না।

শুধু মধু আর বিধু খেয়েছিল। অনাদিবাবু আর বিভাময়ী শেখরের

অপেক্ষায় ছিলেন। তাঁদেরও যে খাওয়া হয়নি, সেটা শেখর জানে না, এবং জানলে বোধহয় অশ্রু কথা বলতো।

শেখর শুয়ে পড়তেই অনাদিবাবু আবার বিছানার উপর গড়িয়ে পড়েন এবং অসাড় শবের মত পড়ে থাকেন। বিভ্রাময়ী ঘরের দরজা বন্ধ করে মেজের উপর মাতুর পাতেন। তারপরেই বাতি নিভিয়ে দিয়ে শুয়ে পড়েন! অন্ধকার ঘরের ভিতর শুধু কয়েকটা বড় বড় দীর্ঘশ্বাসের শব্দ কিছুক্ষণ ছড়িয়ে ছড়িয়ে বাজতে থাকে। তার পরেই নিঝুম হয়ে যায় টালিগঞ্জের গলির ক্ষুদ্র বাড়ি। যেন হুঃসহ এক লজ্জার জ্বালায় মুখ লুকিয়ে আর উপোস করে নীরবে প্রায়শ্চিত্ত করছে কতগুলি অপরাধী জীবন।

পাঁচ

অবন্তী সরকারের বাবা নিবারণবাবু তাঁর পক্ষাঘাতের দুঃখ ভুলে গিয়ে এক হাতে ভর দিয়ে বিহানার উপর উঠে বসতে চেষ্টা করেন, এবং সেই সঙ্গে চেষ্টা করে ওঠেন—ভগবান আছেন, সত্যিই ভগবান আছেন অবন্তী।

অবন্তী হাসে—তোমার কি কোনদিন সন্দেহ হয়েছিল ?

নিবারণবাবু—হয়েছিল বৈকি। দুঃখ দুর্দশার জ্বালায় পড়ে খুবই সন্দেহ হয়েছিল অবন্তী। ভুল করে ভগবানের দয়াতেই অবিশ্বাস জন্মেছিল। কিন্তু ভগবানই আজ সেই ভুল ভেঙ্গে দিলেন।

এই বাড়িও একটা গলির মুখের কাছে ছোটখাট বাড়ি। কাশীপুরের গঙ্গা এই গলির কাছে দাঁড়িয়ে দেখা যায়। আজ সূর্য অস্ত যাবার আগে, গঙ্গার বৃকের জলে যখন পশ্চিমের আকাশ থেকে রঙীন আভা ঝরে পড়েছে, তখন এই বাড়ির তিনটি কিশোর মানুষের কণ্ঠে জয়ধ্বনির মত একটা আনন্দের রব বেজে উঠেছে—দিদির চাকরি হয়েছে বাবা।

অবন্তী সরকারের চাকরি হয়েছে। অবন্তী সরকারের সঙ্গে আলাপ করে জেনারেল ম্যানেজার খুশি হয়েছেন। সঙ্গে সঙ্গে অ্যাপয়েন্ট-মেন্ট-পত্রও দিয়েছেন। আগামী কাল সকাল দশটাতে অফিসে গিয়ে অবন্তী সরকার তার নতুন চাকরি-জীবনের যাত্রা শুরু করবে। মনে হয়, একটা অপার্থিব রঙীন আভা ঝরে পড়েছে কাশীপুরের গলির মুখে এই পার্থিব সংসারের এতদিনের যত দুঃখ ও দীনতার ধোঁয়া আর ধুলোর উপর। এক মুহূর্তের মধ্যে উজ্জ্বল হয়ে উঠেছে দীর্ঘদিনের দুঃসহ পীড়নে ক্লান্ত একঘর মানুষের বিষন্ন জীবন। নিবারণবাবু তাঁর জীবনের হারিয়ে যাওয়া সব চেয়ে প্রিয় বিশ্বাস

হঠাৎ আবার মনের কাছে ফিরে পেয়েছেন। জোরে চেষ্টা করে কথা বলতে ভুলে গিয়েছিল, হাসবার সাহস হারিয়ে ফেলেছিল যারা, সেই সব ছোট ছোট মানুষের চোখেও—হারু চারু আর নরুর চোখে যেন নতুন সূর্যোদয়ের আভা এসে ছাড়িয়ে পড়েছে। তাই এত কলরব।

দরজার বাইরে একটা ভিখারী এসে দাঁড়িয়ে কর্কশ স্বরে কৃষ্ণনাম গাইতে শুরু করেছে। আজ তাকে ধমক দিতে ভুলে গেলেন নিবারণবাবু। আর, চারু দৌড় দিয়ে বাইরে গিয়ে ভিখারীটার ঝুলিতে এক বাটি চাল ফেলে দিয়ে চলে আসে।

অবন্তী বলে—আর এই বাড়িতে নয় বাবা।

হ্যাঁ, এটা ভাড়া বাড়ি। মাসে ত্রিশ টাকা ভাড়া, এবং সেই ভাড়া নিয়মমত ও যথাসময়ে দিতে না পারায় বছরের পর বছর বাড়ি-ওয়ালার কথা আর আচরণে যে অপমান সহিতে হয়েছে, সেই অপমানের জ্বালাকেই অপমান করবার জন্ত অবন্তী সরকারের চোখ দুটো জ্বলজ্বল করে।

অবন্তী বলে—পার্ক সার্কাসে একটা নতুন বাড়িতে সুন্দর একটা ক্ল্যাট খালি আছে, একশো টাকা ভাড়া।

নিবারণবাবু বলেন—বেশ, সেখানেই উঠে যাওয়া যাক।

অবন্তী বলে—চৌরঙ্গিতে একটা বড় দোকান আছে, ফার্নিচার সাপ্লাই করে। দাম কিস্তিতে নেয়।

চারু আর হারু একসঙ্গে চেষ্টা করে—আমাদের জন্তে একটা নতুন টেবিল।

নরু বলে—আমার জন্তে একটা ক্যারাম বোর্ড।

নিবারণবাবু—বেশ তো, ঘর সাজাবার জন্তে যা যা দরকার, তা ছাড়া কিছু কিছু কাজের জিনিসও কিনে ফেলতে পারলে ভালই হয়।

চারু আর হারু বলে—একটা রেডিও না হলে! ভাল লাগে না দিদি!

অবাধ হাওয়ায় ঝড়ের মত ইচ্ছাগুলি যেন হু হু করে ছুটে আসছে। যেমন প্রৌঢ় নিবারণবাবু, তেমনি প্রায়শিশু নরু, সবারই জীবনের দাবি একসঙ্গে মুখর হয়ে উঠতে চাইছে। মুখর হয়ে উঠতে ভাল লাগছে। অবস্খী সরকারের ছ'চোখের উজ্জলতার মধ্যেও যেন একটা স্বপ্নময় নিবিড়তা। ভাগ্য প্রসন্ন হয়েছে, এবং সেই প্রসন্নতাকে একেবারে মনে-প্রাণে আপন করে নিতে হবে।

ভাইদের মুখের দিকে তাকিয়ে অবস্খী সরকার হেসে ওঠে। আজ একটা পিকনিক করলে কেমন হয় ?

চারু—খুব ভাল হয় দিদি।

নিবারণবাবু বিছানার উপর কাত হয়ে বসে হাসতে থাকেন।—সন্ধ্যা হয়ে এসেছে অবস্খী। আজ আর কোথায় গিয়ে পিকনিক করবি ? চারু আর হারু বলে—ছাদের ওপরে।

টাকা বের করে চারুর হাতে দিয়ে হাসতে থাকে অবস্খী—লুচি, চিংড়ি-কপি আর পায়ের হোক, কেমন ?

উল্লাসে লাফিয়ে আর উৎফুল্ল ভাবে চেষ্টিয়ে বাজার করবার জন্য ছুটে বের হয়ে যায় চারু আর হারু।

কালীপুরের গলির মুখে ছোট একটা বাড়ির জীবনে সুখের প্রতিষ্ঠার উৎসব সন্ধ্যা থেকে রাত দশটা পর্যন্ত গল্পে হাস্তে আর কলরবে মুখর হয়ে উঠতে থাকে। নিবারণবাবু বিছানার উপর কাত হয়ে শুয়ে শুয়েই চারটি গান গাইলেন। তাঁর জীবনের অনেক দিনের আগের প্রিয় ভজনগুলি যেন ভাঙ্গা সেতারের মত তাঁর মনের ঘরের এক কোণে ধুলোয় ঢাকা হয়ে পড়েছিল। রোগ আর অভাব এক সঙ্গে মিলে নিবারণবাবুর গলা রুদ্ধ করে রেখেছিল। কিংবা এমনও হতে পারে যে, নিবারণবাবুর গলা ঐ সব ভজনের অসার আশ্বাসগুলিকে ঘৃণা করে এবং ইচ্ছে করেই নীরব করে রেখেছিল। আজ হঠাৎ ভুল ভেঙ্গে গিয়েছে, তাই গলা খুলে চার চারটে গান গাইতে পারলেন নিবারণবাবু।

রাত যখন নিঝুম হয়, নিবারণবাবু যখন পায়ের আঁক কোকো খেয়ে ঘুমিয়ে পড়েন, এবং হারু চারু ও নরু বিছানার উপর লুটিয়ে পড়ে ঘুমন্ত চোখে নতুন নতুন অটেল স্বপ্ন দেখতে শুরু করে, তখন অবস্খী সরকারের আত্মাটা যেন একটু একলা হবার সুযোগ পায়।

আরও অনেকক্ষণ জেগে বসে থাকে অবস্খী। গঙ্গার ঘাটে মোটর বোটের কোন শব্দ শোনা যায় না। ঘুমন্ত ঘরের দেয়ালে আয়নাটার উপর অবস্খী সরকারের মুখের ছবি ভাসে। সত্যিই, অবস্খী এতক্ষণ পরে একলাটি হয়ে নিজেকে এইবার বড় স্পষ্ট দেখতে পায়। নিজের মুখের ঐ ছবিটিকেই দেখতে আজ নতুন করে ভাল লাগে, কারণ ছবিটি দেখতে খুবই সুন্দর। স্নো রুজ পাউডার আর লিপস্টিকের ধার ধারে না অবস্খী। কিন্তু অবস্খী জানে, এবং আজ আরও ভাল করে দেখতেই পায়, অবস্খীর ঐ দুই চোখের মধ্যেই কাজলমাখা একটা ছায়া-ছায়া কালো আপনি ফুটে রয়েছে। কাজলের দরকার হয় না। ঠোঁট দুটিও যে আপন রক্তের গর্বে রঙীন হয়ে আছে। লিপস্টিকের দরকার হয় না। রুমাল দিয়ে আস্তে একটু ঘষা দিলেই সারা মুখটা ঝকঝক করে ওঠে, স্নো ঘষবার কোন দরকার নেই।

আস্তে আস্তে খোঁপার বাঁধন খোলে অবস্খী। সে বাঁধনেও বিশেষ কোন স্টাইলের ছাঁদ ছিল না! দরকার কি? নরম নরম রেশমের স্তবকের মত ঐ এক রাশ কালো চুলের বোঝাকে সামান্য একটু চিরুনি বুলিয়ে ছেড়ে দিলে, কিংবা তিন পাক দিয়ে গুটিয়ে ঘাড়ের উপর তুলে দিলেই তো যথেষ্ট।

একেবারে সাদা প্লেন শাড়ি। সরু পাড়ের রেখা চোখেই পড়ে না। সে পাড়ের রং আছে কিনা, তাও বোঝা যায় না। আজ যে শাড়িটা পরে চাকরির জন্ম ইন্টারভিউ দিতে গিয়েছিল অবস্খী, সে শাড়িটা একটা সাদা ভয়েল, পাড়টা ক্রিম রং-এর সরু লেস। এই সাদাতে সাজের মধ্যে অবস্খী সরকারের কালো চোখ আর এলোমেলো

খোঁপার কালো স্তবক অদ্ভুত এক রূপের অভিমান নিবিড় করে তোলে। গলায় হার নেই, কানে কিংবা হাতেও কিছু নেই, অবস্তীর সেই মূর্তির মধ্যে অদ্ভুত একটা সাদাটে গর্ব যেন কঠোর মার্বেলের মত হাসে। অবস্তীও জানে, তার ঐ রূপের দিকে যার চোখ পড়ে, তারই চোখে যেন একটা লোভের বিশ্বয় চমকে ওঠে। যে হঠাৎ তাকায় সে হঠাৎ চোখ ফিরিয়ে নিতে পারে না।

কিন্তু তাতে কিছু আসে যায় না। অবস্তী সে-সব চোখের দৃষ্টিকে কোন দিন মনের ভুলেও শ্রদ্ধা করতে পারেনি। বরং, মনে মনে নিজেই একটা অস্বস্তিকর লজ্জার বেদনা অনুভব করেছে। পৃথিবীর এই সব হতভম্ব বিস্মিত আর লোভী চোখগুলি যেন কতগুলি বিদ্রূপ। ওরকমের চোখ নিয়ে অবস্তীকে চিনতে পারা যায় না। ঐসব দৃষ্টি কোন নারীর জীবনের সম্মান নয়। ঐসব দৃষ্টিকে ঘৃণা করতেই বরং ভাল লাগে।

জীবনে শুধু একজনের চোখের বিস্মিত দৃষ্টিকে ঘৃণা করতে পারেনি অবস্তী। ঘৃণা করা দূরে থাকুক, মনে-প্রাণে ভালই লেগেছে, এবং বার বার সেই ছুটি চোখেরই দৃষ্টিকে চোখের কাছে দেখতে ইচ্ছা করে। নিখিলের চোখের মধ্যে যেন অদ্ভুত একটা কৃতজ্ঞতার বিশ্বয় সব সময় জ্বলজ্বল করে। কারণ, নিখিলের চোখের সেই বিশ্বয় যে অবস্তীরই জীবনের সম্মান গর্ব আর অভিনন্দন। নিখিল কাছে এসে দাঁড়ালেই মনে হয় অবস্তীর, সে তার ভালবাসার ভাগ্যকেও নিজের হাতে গড়ে তুলতে পারছে।

টাকা-পয়সা দিয়ে তৈরী অদৃষ্টটা অবস্তীকে গরীব করে দিয়ে অবস্তীর জীবনের প্রথম ভালবাসার ইচ্ছাটাকেই ভয় দেখিয়ে দমিয়ে দিতে চেয়েছিল। কিন্তু সেই অদৃষ্টকেও নিজের জেদের জোরে তুচ্ছ করেছে অবস্তী। গল্পে শোনা যায়, মানত সফল করবার জন্তু অনেকে বুক চিরে রক্ত দিয়ে ব্রত করে। অবস্তীর ভালবাসার কাণ্ডটাও প্রায় সেইরকম; অবস্তীর মত গরীব মেয়ের পক্ষে তার ভালবাসার

মানুষের জন্ম মাসে ত্রিশটা টাকা খরচ করা বুক চিরে রক্ত দিয়ে ব্রত করার চেয়েও কি কম কঠোর ব্রত ?

নিখিলকে চোখের সামনে দেখতে পাওয়া যাবে না, অবন্তীর জীবনের সেই রিক্ততার চেয়ে ভয়ানক রিক্ততা আর কি হতে পারে ? এই রিক্ততা কল্পনাতেও সহ্য করতে পারে না অবন্তী । বিশ্বাস করে অবন্তী, নিখিলের জন্ম সে সবই করতে পারে । সে জন্ম আগুনে ঝাঁপ দেবার মত ব্রত করবার যদি দরকার হয়, তা'ও করতে বোধ হয় এক মুহূর্তও দেরি করবে না অবন্তী । আজ মনে হয়, হ্যাঁ, সেই রকমই একটা ব্রত আজ পালন করতে পেরেছে অবন্তী । দরকার হয়েছিল এবং অল্প কোন উপায়ই যে ছিল না । একেবারে মাথা নীচু করে, চোখ ঝাপসা করে, আবেদন জানিয়ে, অভিমান করে এবং ইচ্ছে করেই এই কালো চোখের ছায়া-ছায়া নিবিড়তা আরও নিবিড় করে একটা লোকের চোখের বিষয়কে লুভিয়ে দিয়ে, এবং লোকটার পাথুরে আপত্তিকে অনেক চেষ্টায় গলিয়ে দিয়ে অবন্তী তার মানতে আজ সফল করতে পেরেছে । আজও ভাগ্যটা অবন্তীকে ঠকাবার চেষ্টা করেছিল, কিন্তু অবন্তী সত্যিই, শুধু একটা সুন্দর অভিনয়ের জোরে সেই ভাগ্যকেই ছলিয়ে ভুলিয়ে আর নিজেকে জয়ী হয়ে ফিরে আসতে পেরেছে । নিজেকে ওভাবে ছোট করতে গিয়ে অবন্তীর এত দিনের এত প্রিয় অহংকারের গায়ে একটা আগুনের জ্বালাও লেগেছিল । কিন্তু সে জ্বালাকেও তুচ্ছ করেছে অবন্তী । নিখিলের জন্ম সবই করতে পারে অবন্তী ।

কানপুরে চলে যাবার দুঃখ থেকে নিখিলকে বাঁচাতে পেরেছে অবন্তী । নিখিল এখন কলকাতাতেই থেকে ভাল চাকরির চেষ্টা করতে পারবে । নিখিলের হাতে প্রতি মাসে এক'শো টাকা তুলে দিতেও অবন্তীর কোন অসুবিধা নেই । সে সুযোগ, সে শক্তি নিজেই আজ অর্জন করেছে অবন্তী ।

এতদিনে অবন্তীর জীবনের সেই জেদের তপস্যা সফল হয়েছে ।

নিজের হাতে নিজের ভাগ্য গড়বার আশা এইবার একেবারে উপহার হাতে নিয়ে দেখা দিয়েছে। আয়নার সামনে দাঁড়িয়ে খোঁপা খুলতে খুলতে জীবনের এই সফল গর্বের আনন্দকেই যেন ছুঁচোখে ধারণ করে আরও সুন্দর হয়ে ওঠে অবন্তী।

আর একটা আনন্দ। কালই সকালে এই শুভ খবর শুনে কত খুশি হয়ে উঠবে সেই মানুষটি, যার নাম নিখিল মজুমদার। পৃথিবীর মধ্যে এই তো একমাত্র মানুষ, যার মুখ থেকে আজ এক বছর ধরে ভালবাসার কথা শুনে আসছে অবন্তী। পৃথিবীর কোন ধূর্ত ও সজাগ চক্ষুও আজ পর্যন্ত বুঝে ফেলবার সুযোগ পায়নি যে, অবন্তী সরকার ঐ নিখিল মজুমদারের গরীব ভাগ্যটাকেও সুখী করবার জন্য প্রাণপণে একটা ভাল চাকরি খুঁজছে।

আজকের আনন্দের মধ্যে আরও অনেক কথাই মনে পড়ে। অবন্তীরই মুখ থেকে যে আশ্বাস পেয়ে মুগ্ধ হয়ে আছে নিখিলের মন, এবং যে আশ্বাসের প্রেরণায় প্রাণপণে একটা ভাল চাকরি খুঁজছে নিখিল। সেই আশ্বাসের ভাষাও যেন অবন্তীর এই সুখী ভাবনার নিভৃতে নীরবে গুঞ্জন করে।

—যেমন করেই হোক, আগে অবস্থার উন্নতি করে নিতে হয় নিখিল। আমি চাই, যেমন আমার তেমনই তোমার অবস্থা আগে স্বচ্ছল হোক, নইলে, অভাব আর কষ্টের মধ্যে বিয়ের উৎসবও বড় কষ্টের মনে হবে নিখিল।

খুব সত্যি কথা! নিখিলও স্বীকার করে। ছুঁজনেই রোজগার করবে, কেউ কারও কাছে ভাত-কাপড়ের প্রার্থী হয়ে থাকবে না, অথচ একই ভালবাসার ঘরে ছুঁজনে থাকবে।

গঙ্গার ঘাটের দিক থেকে ফুরফুরে বাতাস ভেসে আসছে। ভোরের বাতাস নাকি? এতক্ষণে বুঝতে পারে অবন্তী, শরীরটা বেশ ক্লান্ত হয়েছে। চোখ দুটোও নিবুম হয়ে আসছে। কাল সকালে উঠেই

প্রস্তুত হতে হবে। সৌভাগ্যের পথে প্রথম যাত্রা শুরু হবে।
বাতি নিভিয়ে দিয়ে শুয়ে পড়ে অবস্তী সরকার।
প্রথম তন্দ্রার মধ্যে আবছায়ার মত একটা স্মৃতির ছবি হঠাৎ একবার
যেন অবস্তীর চোখের উপর দিয়ে ছায়া বুলিয়ে দিয়ে চলে যায়। বড়
বড় কয়েকটা সোফা, প্রকাণ্ড একটা নোটিশ বোর্ড, দরজার গায়ে
ঝকঝকে পিতলের নেমপ্লেট আর দেয়ালের গায়ে ঘড়িতে প্রায়
একটা বাজে। এক ভদ্রলোক অবস্তী সরকারের মুখের দিকে হঠাৎ
একবার অদ্ভুতভাবে তাকিয়ে লিফটের দিকে ছুটে চলে গেলেন।
কি যেন সেই ভদ্রলোকের নাম? অনসূয়ার বোদি প্রভার দাদা হন
সেই ভদ্রলোক? হ্যাঁ, অদ্ভুতভাবে তাকিয়েছিলেন সেই ভদ্রলোক।
ভদ্রলোকের চোখ ছটোও বার বার বড় বিস্তীর্ণ রকমের মুগ্ধ হয়ে
উঠেছিল। তন্দ্রার মধ্যেই হেসে ফেলতে চেষ্টা করে অবস্তী।

টালিগঞ্জের গলির ভিতর ক্ষুদ্র একটা বাড়ির উঠানে পঁপে গাছের ডালে বসে সকাল বেলার কাক বড় বিশ্রী ডাক ছাড়ে। সঙ্গে সঙ্গে বাইরের দরজায় আরও বিশ্রী শব্দ করে একটা আঘাত বাজতে থাকে। প্রচণ্ড ভাবে কড়া নাড়ার কর্কশ শব্দ। বুঝতে পারে শেখর, বাড়িওয়ালার দারোয়ান ভাড়ার তাগিদ দিতে এসেছে।

বিছানার উপরে বসে অনাদিবাবুও হাঁক দেন; সেই হাঁকের স্বরও আর এক রকমের কর্কশতায় বিশ্রী হয়ে বেজে ওঠে—ওহে স্নযোগ্য ছেলে, শুনতে পাচ্ছ ?

শুনতে পেয়েছে, এবং বুঝতেও পেরেছে শেখর। অনাদিবাবু আজকের সকালের এই প্রথম সম্ভাষণেই শেখর নামে তাঁর এক অতিশিক্ষিত ছেলের অপদার্থ জীবনটাকেই আক্রমণ করেছেন। বাড়িওয়ালার দারোয়ান বৃড়ো বাপকে অপমান করতে এসেছে, এবং ত্রিশ বছর বয়সের ছেলে ঘরের ভিতর চুপ করে বসে সেই অপমানের কর্কশ শব্দ শুনছে। জীবনে এর চেয়ে বেশি ঘণার ব্যাপার আর কি হতে পারে ?

এখনও মেজের মাছরের উপর পড়ে আছেন বিভ্রাময়ী। কাল সকালে কালীঘাটে পূজা দিতে গিয়ে অনেকটা পথ হেঁটে হেঁটে যাওয়া-আসা করতে হয়েছিল। কোমরে মচকানির মত একটা ব্যথা ধরেছিল। তারই জের চলছে। সকাল হয়ে গেলেও এবং ঘুম ভেঙে গেলেও আজ আর উঠতে পারছেন না।

মধু আর বিধু কাঁথা মুড়ি দিয়ে ছোটো পুঁটলির মত পড়ে আছে। আজ আর জেগে উঠবার কোন তাড়া নেই। কিন্তু জেগে উঠতে হলো। অনাদিবাবু আরও জোরে চৈঁচিয়ে কথা বলতে শুরু করেছেন—লজ্জা পাওয়া উচিত। মান-সম্মান বোধ থাকলে তুমি

এতক্ষণ ওভাবে বসে থাকতে পারতে না। রোজগার করতে না পার, চুরি-ডাকাতি করতে তো পার।

বিভাময়ী উঠে বসে আর্তনাদ করেন—ভগবান!

অনাদিবাবু—রাখ তোমার ভগবান। ভগবানের এমনই দয়া যে, শিক্ষিত ছেলে ত্রিশ বছর বয়স পার করে দিয়েও একটা পয়সা রোজগারের সামর্থ্য পেল না।

শেখর বলে—মধু, একবার বাইরে যা তো।

মধু—কেন?

শেখর—যদি বাড়িওয়ালার দারোয়ান এসে থাকে, তবে...

মধু—তুমি গিয়ে দেখে এস। আমার ভয় করে।

শেখর হাসে। তার পরেই উঠে দাঁড়ায়, দরজা খুলে বাইরে গিয়ে বাড়িওয়ালার দারোয়ানের সঙ্গে কথা বলে। চলে যায় দারোয়ান। অনাদিবাবুর গলার স্বরের উদ্ভাপ শান্ত হয় না। বিভাময়ীর দিকে তাকিয়ে সেইরকমই কর্কশ স্বরে আর একটা নির্দেশ ঘোষণা করেন—আজ আর যেন উননে আগুন না দেওয়া হয়। কোন দরকার নেই। উপোস করে সবাই শেষ হয়ে যাও, এই আমি চাই।

উননে আগুন দেবার দরকার আছে ঠিকই। কিন্তু বিভাময়ী জানেন, আগুন দিয়েও কোন লাভ নেই। কারণ, তারপর যা দরকার হবে, তার কোন চিহ্ন নেই ভাঁড়ারে। না চাল, না ডাল। দুর্দশাটা একেবারে নিখুঁত হয়ে এই সংসারটাকে সব কাজের দায় থেকে আজ একেবার মুক্ত করে দিয়েছে।

অনাদিবাবু চিৎকার করেন—সুযোগ্য ছেলেকে বলে দাও বিভা, ভাঁড়ার ঘরের ভিতরে বসে যেন ধ্যান করে। তুমি হলেই কর্তব্য পালন করা হয়ে যাবে।

শেখর মিত্রের মনের উপর যেন একটা চাবুক আছড়ে পড়েছে, মুখটা হঠাৎ লালচে হয়ে ওঠে। কিন্তু ছটফট করে না শেখর।

আস্তে আস্তে এগিয়ে গিয়ে ভাঁড়ার ঘরের ভিতরে ঢোকে। তার পরেই চটি পায়ে দিয়ে বাড়ির বাইরে গিয়ে গলির পথে দাঁড়ায়। বিধু একটা লাফ দিয়ে উঠে দরজা দিয়ে উকি দেয়। তার পরেই চৈঁচিয়ে ওঠে—দাদা কোথায় চলে গেল মা।

অনাদিবাবু চৈঁচিয়ে ওঠেন—যাক, চলে যাক। তাই ভাল। তোরাও চলে যা। আমাকে মরবার আগে একটু হালকা হতে দে।

পেঁপে গাছের কাকটা অনেকক্ষণ ডেকে ডেকে ক্লান্ত হয়ে এবং বোধ হয় কলতলার দিকে তাকিয়ে একটু হতাশ হয়ে চলে গিয়েছে। বিভাময়ী উঠলেন। স্নান করলেন। এবং লক্ষ্মী-ঘট তুলে নিয়ে গিয়ে তুলসীতলায় জল ঢেলে দিয়ে আবার নতুন জল ভরে ঘরের ভিতর বিরে এলেন।

অনাদিবাবুর চোখে ক্রকুটি দেখা দেয়। আস্তে আস্তে বিড় বিড় করেন—অসহ! তোমার কাণ্ড অসহ।

বিভাময়ী—কি বললে?

অনাদিবাবু—ঐ লক্ষ্মী-ঘট এইবার সিক্যে তুলে রেখে দাও। আমি মরবার পর যখন সৌভাগ্যে সোনার সংসার জমে উঠবে, তখন আবার নামিয়ে এনে পূজো করো। অনেক হয়েছে, এবার একটু ক্ষান্তি দাও।

বিভাময়ী যেন শুনতে পাননি, কিংবা শুনেও বিচলিত হননি। কিংবা অদ্ভুত এক নির্বিকার অহংকার নিয়ে এই সংসারের সব ছুঁচুগ্যকেই তুচ্ছ করতে চাইছেন। তাই, যেমন রোজ সকালে তেমনই আজও সকালে ঘরের কোণে লক্ষ্মী-ঘট রাখলেন। তারপর বিধুর দিকে তাকিয়ে বললেন—মল্লিকবাবুদের বাগান থেকে আমপাতা নিয়ে আয় তো বাবা।

বিধু বলে—আমি পারবো না। মধু তুই যা।

মধু—আমিও পারবো না। আমি কাল নিয়ে এসেছি। তাছাড়া, আমার ওসব আর ভাল লাগে না।

বিভাময়ী—ভাল লাগে না মানে কি রে ?

মধু—ওতে কিছু হয় না। একেবারে মিছিমিছি, শুধু সময় নষ্ট। আর কোন কথা বলেন না বিভাময়ী। জ্বরের গায়ের উপর আঁচল ঢাকা দিয়ে আস্তে আস্তে হেঁটে ঘর ছেড়ে বাইরে চলে যান। খুব কাছে নয় মল্লিকবাবুদের বাগান। হেঁটে যেতে কষ্টও হচ্ছে। তবুও কয়েকটা আমপাতা এনে লক্ষ্মী-ঘটের চেহারা সাজাতেই হবে।

অনাদিবাবু বলেন—আশ্চর্য, তবু শিক্ষা হয় না। মানুষও মিছিমিছি নিজের জীবনকে এমন করে ঠকাতে পারে ?

মধু আর বিধু ঘরের বাইরে গিয়ে গলির রোদের মধ্যে চূপ করে দাঁড়িয়ে থাকে। অনাদিবাবুও উঠলেন, আর এভাবে পড়ে না থেকে অফিসে চলে যাওয়াই ভাল। যে ঘরে আজ উন্নত জ্বলবে না, হাঁড়ি চড়বে না, ছোটো ছোট ছেলেও উপোস করে থাকবে, সেই ঘরকে লক্ষ্মী-ঘট দিয়ে সাজাবার কাজ ছাড়া আর কোন কাজ করবার উপায় নেই। বিদ্রূপ, কী ভয়ানক বিদ্রূপ !

বিছানা থেকে নেমে মুখ ধোওয়ার জন্ত জলের ঘটি হাতের কাছে টেনে নিতেই অনাদিবাবুর বুকের ভিতরটা কনকন করে ওঠে। নিঃশ্বাসটা ফুঁপিয়ে ওঠে। চোখের কোণ থেকে টুপটাপ করে জলের ফোঁটা ঝরে পড়ে। ব্যস্তভাবে ডাক দেন অনাদিবাবু—ওরে মধু, ওরে বিধু !

ডাক শুনে মধু আর বিধু ব্যস্ত হয় না। এবং নিতান্ত অনিচ্ছায় মুখ গম্ভীর করে আস্তে আস্তে হেঁটে দু'জনে ঘরের ভিতরে ঢোকে। অনাদিবাবু প্রশ্ন করেন—শেখর কি সত্যিই চলে গেল ?

মধু—বড়দা অনেকক্ষণ হলো চলে গিয়েছে।

অনাদিবাবু—দেখ তো, কোন্ দিকে গেল ?...আর বিধু, তুই একটু দেখ তো বাবা, তোর মা কোন্ দিকে গেল। মানুষটা কাল থেকে জ্বরে ভুগছে।

মধু আর বিধু বাবার মুখের দিকে তাকিয়ে বিচলিত হয়। চোখ ছিল

ছল করছে তারই, যে মানুষটা এই এক মিনিট আগেও কঠোর ভাবে সবাইকে সরে যেতে আর মরে যেতে বলেছিলেন।

মধু ভয়ে ভয়ে বলে—তুমি কাঁদছো কেন বাবা ?

বিধু বলে—তুমি আজ আর অফিসে যেও না বাবা।

একটু অপ্রস্তুত হয়ে, তারপর ব্যস্তভাবে চোখ মুছতে থাকেন অনাদিবাবু, এবং শাস্তভাবে বলেন—যাক গে, তোরা একটা কাজ কর। আমার চিঠি নিয়ে রাধানাথের দোকানে একবার যা। মনে হয়, পাঁচ টাকার মত বাজার ধারে দিতে রাজি হবে রাধানাথ।

এক টুকরো কাগজের উপর অনেক মিনতি জানিয়ে রাধানাথের কাছে প্রতিশ্রুতি লেখেন অনাদিবাবু, আগেকার বাকি তেইশ টাকা আসছে মাসের মাঝামাঝি নিশ্চয়ই শোধ করে দেবেন, আজ যেন অন্তত পাঁচ টাকার চাল-ডাল পাঠিয়ে দেয় রাধানাথ।

চিঠি হাতে নিয়ে মধু আর বিধু বাইরে যাবার জন্তু তৈরী হতেই ঘরের দরজার কাছে হাঁক-ডাকের শব্দ শোনা যায়। ঘরে ঢোকে শেখর, সঙ্গে দু'জন কাঁকা মুটে। কাঁকার উপর নানারকম ছোট বড় কাগজের ঠোঙ্গায় ভারি-ভারি সামগ্রী।

আস্তে হাঁপ ছেড়ে শেখর বলে—মা কোথায় গেল মধু ?

বিধু বলে—এখনি ডেকে আনছি।

অনাদিবাবু তেমনই শাস্তভাবে বসে দেখতে থাকেন, এই নিরন্ন সংসারের ক্ষুধা মেটাবার জন্তু যা প্রয়োজন, অন্তত এক মাসের মত যা প্রয়োজন, সবই নিয়ে এসেছে শেখর। ছোট এক কোঁটা ঘি-ও আছে। কাঁকার জিনিস নামাতে নামাতে শেখরই অনাদিবাবুর দিকে তাকিয়ে বলে—তুমি তো পোস্তু খুব ভালবাস বাবা ?

অনাদিবাবু—হ্যাঁ, কিন্তু এসব কি ব্যাপার শেখর ?

শেখর—তোমার জন্তু এক পো পোস্তু এনেছি।

বোধ হয় আবার অনাদিবাবুর দু'চোখে একটা তপ্ততা ছলছল করে

উঠবে। বারান্দা থেকে উঠে ব্যস্তভাবে ঘরের ভিতরে চলে যান। এ কি হলো? কোথা থেকে এক ঘণ্টার মধ্যে এসব কি নিয়ে এল শেখর? অযোগ্য ছেলেকে ভয়ানক কর্কশ ভাষায় ধিক্কার দিয়ে কিছুক্ষণ আগে চুরি-ডাকাতির গৌরব ঘোষণা করেছিলেন তিনি। তবে কি, সত্যিই কি অযোগ্য ছেলে সেই ধিক্কারের জ্বালায় একটা কাণ্ড করে বসলো? দেখা যায়, মস্ত বড় একটা প্যাকেটও নিজের হাতে বয়ে নিয়ে এসেছে শেখর। প্যাকেটের উপর একটা বস্ত্রালয়ের নাম ছাপা রয়েছে। নিশ্চয় অনেকগুলি কাপড় জামার প্যাকেট।

—এ কি হলো? বিড়বিড় করে বলতে বলতে থর থর করে কাঁপতে থাকেন অনাদিবাবু। শেখর যেন আজকের অভিশপ্ত এই সকালের ধোঁয়াভরা বাতাসের মধ্যে অদৃশ্য হয়ে গিয়ে এই উপোসী সংসারটার জন্য এক গাদা খোরাক লুণ্ঠ করে নিয়ে এসেছে। সন্দেহ করতে ইচ্ছা করে না, কিন্তু সন্দেহ না করেই বা উপায় কি? কোন চাকরি করে না, আজ পর্যন্ত কোন চাকরি পায়নি, এখন শুধু মস্ত বড় একটা কাজ পাওয়ার আশায় মন বড় করে ঘরে বসে আছে যে ছেলে, সে ছেলে টাকা পেল কোথায়?

শেখরকে শুধু একটা প্রশ্ন করলেই তো অনাদিবাবুর মনের এই সন্দেহ মিটে যায়। কিন্তু প্রশ্ন করবারই সাহস হয়না। কে জানে, কি উত্তর দেবে শেখর? যদি একটা ভয়ংকর উত্তর দিয়ে বসে, যদি সত্যিই বলে দেয় যে, চুরি করেছি, একটা ধাম্পা দিয়ে এই বাজার নিয়ে এসেছি, খেয়ে খুশি হও তোমরা, তবে? তাহলে যে বলবারই আর কিছু থাকবে না।

অনাদিবাবুর দুর্বল মনের এই বিকার বোধ হয় খুব শিগগির শান্ত হতো না, যদি মধু তখন মহোল্লাসে ছুটে এসে একটা সুখবর না দিত। মধু বলে—দাদা নিজে টাকা দিয়ে জিনিস কিনে নিয়ে এসেছে বাবা, দাদা একটা কাজ ধরেছে, তাই টাকা পেয়েছে।

—সে কি রে শেখর ? বলতে বলতে ঘরের ভিতর থেকে বের হয়ে আসেন অনাদিবাবু ।

অনাদিবাবুর বিস্মিত স্বরের প্রশ্ন শুনে শেখর হাসে—একটা ছাত্রকে পড়াবার কাজ নিলাম । কাল থেকে পড়াতে হবে । ছাত্রের বাপের কাছ থেকে কিছু টাকা আগাম পেয়েছি ।

অনাদিবাবুর মুখটা করুণ হয়ে ওঠে ।—কিন্তু তুই যে বলেছিলি... । শেখর—হ্যাঁ, কোনদিন ভাবিনি যে, এরকম ছাত্র পড়াবার কাজ নেবার দরকার হবে । কিন্তু... !

অনাদিবাবু—কিন্তু আমার কথায় বোধ হয় মন খারাপ করে...!

শেখর হাসে—না বাবা, আমি ইচ্ছে করে আর বেশ খুশি হয়ে এই কাজটা নিয়েছি । মাসে একশো টাকা পাওয়া যাবে ।

দেখে মনে হয়, সত্যিই খুশি হয়েছে শেখর । ওর চোখে মুখে কোন অভিমানের ছাপ নেই । এত ভাল একটা চাকরি হতে হতেও হলো না, সে জন্তু এপর্যন্ত একটা আক্ষেপও শেখরের কথার মধ্যে বেজে উঠতে শোনা গেল না । অথচ নিজেই স্বীকার করেছে যে, নিজেরই দোষে কাজটা হয়নি । অনাদিবাবু একটু আশ্চর্য হয়ে প্রশ্ন করেন—কাল যে চাকরিটার জন্তু ইন্টারভিউ দিতে গিয়েছিলি, সে চাকরিটা হলো না কেন রে ?

চমকে ওঠে শেখর, এবং আনমনার মত বিড় বিড় করে উত্তর দেয়—বলেছি তো, নিজেরই ভুলে । হঠাৎ একটা ভুল হয়ে গেল ।

হ্যাঁ ভুল । শেখরের মনের ভিতরে বিচিত্র এক অনুভবের কপাটে কেউ যেন টোকা দিয়ে আস্তে আস্তে বলছে, ভুল করে ফেলেছো শেখর । শেখরের নিঃশ্বাস ছাপিয়ে যেন একটা অস্পষ্ট মধুরতা গুঞ্জন করে উঠছে, ভুল করে ভালই করছো শেখর ।

ঘরের ভিতরে টেবিলের উপর ছড়ানো বইগুলির দিকে দৃষ্টি পড়ে, এগিয়ে গিয়ে একটা বই তুলে নিয়ে বারান্দার কোণে চেয়ারে বসে পড়তে চেষ্টা করে শেখর । কিন্তু বুঝতে পারে, বই নয়, শেখর যেন

তার নিজের মনটাকেই পড়ছে। যে ঘটনাকে ভুলে যেতে ইচ্ছে করছে, সেই ঘটনার ছবিটাই বার বার মন জুড়ে ভেসে উঠছে। অনেকক্ষণ, নীরব হয়ে গিয়েছে টালিগঞ্জের গলির ভিতর ক্ষুদ্র বাড়িটা। বিভাময়ী ফিরে এসেছেন। লক্ষ্মী-ঘট সাজিয়েছেন। রান্না চাপিয়েছেন। আর মধু ও বিধু ঘরের বাইরে গিয়ে খেলতে শুরু করেছে। ঘরের ভিতরে বিছানার উপর বসে অনাদিবাবুর মুখটাও প্রসন্ন। দেখতে পেয়ে শেখরের মুখটাও প্রসন্ন হয়ে ওঠে। হাঁপ ছাড়ে শেখর, মনের ভিতর থেকে একটা গ্লানির ভার নেমে যায়। শেখরের ভুলের জন্য এই বাড়ির ক্লিষ্ট অদৃষ্ট যে সুখের প্রতিশ্রুতি থেকে বঞ্চিত হয়েছে, তারই কিছুটা ফিরিয়ে আনতে পেরেছে শেখর।

ছাত্র পড়াবার কাজ নিতে কত স্ব্গাই না শেখরকে এতদিন বাধা দিয়ে এসেছে! অনাদিবাবুর বিষয়টা অহেতুক নয়। শেখর নিজেও আজ নিজের কাণ্ড দেখে একটু বিস্মিত হয় বৈকি। বেশতো স্বচ্ছন্দে আজ নিজে এগিয়ে যেয়ে রতনবাবুর ছেলেকে পড়াবার কাজটা নিতে রাজি হয়ে এল। এবং সব অহংকারের মাথা খেয়ে রতনবাবুর কাছ থেকে কিছু টাকা আগাম চাইতে পারলো। উপোস করবো তবু ছেলে পড়ানো মাস্টারী কখনও করবো না, সেই অহংকেরে স্ব্গাটাকে আজ অনায়াসে জয় করেছে শেখর। বুকের আড়ালে নিঃশ্বাসের বাতাসে হঠাৎ এত সাহস এসে জুটে গেল কেমন করে? মনের ঐ ভুলের মধ্যেই কি এর প্রেরণার মায়া লুকিয়ে আছে? অবস্ন্তী সরকার নামে সেই নারী, যার দুই কালো চোখের তারায় বুজির দীপ্তি চিকচিক করে, সে নারী কল্পনাও করতে পারবে না যে, তারই সুখের জন্য নিজের সৌভাগ্যের পথ ছেড়ে দিয়ে শেখর নামে একটা মানুষ আজ একটা অতি সামান্যতা আর দীনতার সংসারে চূপ করে বসে আছে। নাই বা জানলো। শেখর যেন তার মনের একটা বেহায়া ভাবনাকে জোর করে থামিয়ে দিতে চেষ্টা করে। মস্ত

বড় একটা ত্যাগের দৃষ্টান্ত দেখিয়েছে শেখর, এই তথ্যটা অবস্তী সরকার যদি না জানতে পারে, তাতে কি-ই বা আসে যায় ? অবস্তী সরকারের মনের দশা কি হলো, বা না হলো, সে তথ্য না জানলেও চলে। অবস্তী সরকার না হয়ে অণু কোন নারী, কিংবা কোন পুরুষও যদি শেখরের কাছে ওরকম করুণ আবেদন জানিয়ে উপকার প্রার্থনা করতো, তাহলে শেখর নিশ্চয় বোঁকের মাথায় এইরকমই একটা ত্যাগের কাণ্ড করে ফেলতো। কিন্তু....কিন্তু বার বার সেই ব্যক্তিকে মনে পড়তো কি ?

ভাবতেও লজ্জা লাগে, অবস্তী সরকারের সেই ছায়া-ছায়া দুটো কালো চোখের শোভা দেখতে বেশ ভালই লেগেছিল ! কে জানে, উপকার করবার জন্ত, কিংবা ঐ ক্ষণিকের অদ্ভুত ভাল-লাগার জন্ত এই যে কাণ্ড করে চলে এল শেখর, সে কাহিনী লোকে শুনলে শেখরকে মূর্খ বলে উপহাস করবে, কিংবা একেবারে আদেখলা লোভী বলে মনে করবে ?

যা হয়ে গিয়েছে, তা তো হয়েই গিয়েছে। কিন্তু মনের ভিতরে আবার এরকমের একটা ঝঞ্জাট ঘটে কেন ? কেন আশা হয়, অবস্তী সরকার নিশ্চয় একদিন এসে কৃতজ্ঞতা জানিয়ে যাবে ? কেন মনে হয়, অবস্তী সরকারও বোধ হয় আশ্চর্য হয়ে ভাবছে, একটা মানুষ একটা অপরিচিত মানুষের জন্ত এত বড় ত্যাগ স্বীকারও করে ! নিজের চিন্তার এই প্রশ্নগুলিই যে ভয়ানক দুর্বলতা। অবস্তী সরকারের মত একটি নারীকে জীবনের কাছে ডেকে এনে ভাল-বাসতে ইচ্ছা করছে, তাই কি ?

সব প্রশ্নের বাড়াবাড়ি এখানেই থামিয়ে দিয়ে শেখর ভাবতে থাকে, যাদবপুরের সেই নতুন ল্যাবরেটরিতে একটা কাজ খালি আছে। আরও খোঁজ নিতে হবে, এবং কাজটা পাওয়ার জন্ত চেষ্টাও করতে হবে।

দুপুর হতেই খাওয়া-দাওয়া সেরে বের হয়ে যায় শেখর।

সাত

কাশীপুরের গলির সেই বাড়ী নয়, এটা হলো পার্ক সার্কাসের একটা নতুন বাড়ির ফ্ল্যাট। প্রতি রবিবারের সন্ধ্যায় এই ফ্ল্যাটের প্রথম ঘরের ছোট টেবিলের উপর ফুলদানিতে টাটকা ফুলের গুচ্ছ হাসে আর সুগন্ধ ছড়ায় এবং যতক্ষণ নিখিল না আসে ততক্ষণ চুপ করে বই পড়ে অবস্থী।

পর পর কয়েকটা মাস পার হয়ে গিয়েছে। অবস্থী সরকারের তিন'শো ষাট টাকা মাইনের চাকরির জীবনে আরও উন্নতির আশা দেখা দিয়েছে। জেনারেল ম্যানেজার বলেছেন, অবস্থীর কাজ দেখে আর একটু খুশি হবার সুযোগ পেলেই তিনি অবস্থীর মাইনে পঞ্চাশ টাকা বাড়িয়ে দেবার জন্য সুপারিশ করবেন।

কিন্তু নিখিলের জীবন এখনও শুধু ভাল চাকরির আশায় এবং চেষ্টায় দিন-রাত ব্যস্ত হয়ে রয়েছে। নিখিলের সেই চেষ্টাও যেন একটা রোগীর প্রাণের ছটফটানির মত। দিন-রাত শুধু চাকরির ভাবনাই ভাবছে নিখিল। সকাল থেকে রাত পর্যন্ত ছুটোছুটি করে। নিখিলের অমন সুন্দর ফরসা মুখের আভাও যেন মলিন হয়ে গিয়েছে।

অবস্থীও অনেকবার রাগ করে অভিযোগ করেছে—আমি থাকতে তোমার এত চিন্তা করবার কি আছে ?

কিন্তু কি আশ্চর্য; অবস্থীর এই অভিযোগের মধ্যে যে বিপুল সাস্থনা আছে, সেই সাস্থনাকেই যেন ভয় করে নিখিল। শোনা মাত্র মুখ ফিরিয়ে নেয়, এবং মুখটা আরও নিস্প্রভ হয়ে যায়।

অবস্থীও একদিন আশ্চর্য হয়ে প্রশ্ন করেছিল—আমার কাছ থেকে টাকা নিতে সত্যিই কি তুমি দুঃখ পাও নিখিল ?

—হ্যাঁ। মনের ঝোঁকে একটা ভীত আক্ষেপের মত স্বরে কথাটা বলেও ফেলেছিল নিখিল।

সজল হয়ে উঠেছিল অবস্তীর চোখ।—কিন্তু আমার যে তাইতেই আনন্দ। তোমাকে সাহায্য করতে পারছি, এই তো আমার সবচেয়ে বড় সৌভাগ্য।

নিখিল বলে—তুমি আমার দুঃখটা বোধহয় ঠিক বুঝতে পারছো না অবস্তী। আমি আজ পর্যন্ত তোমাকে কোন সাহায্য করতে পারলাম না, এই আক্ষেপ যে আমার মনের ভিতর কাঁটার মত বিঁধছে।

—ছিঃ। আরও নিবিড় অভিমানে দুই চোখ সজল করে নিখিলের কাছে এগিয়ে এসে আর একটা অভিযোগের কথা বলেছিল অবস্তী—আমার ভাগ্য কি তোমার ভাগ্য নয়? আমার টাকাকে তোমার নিজেরই টাকা বলে ভাবতে তোমার এই লজ্জার কোন মানে হয় না।

নিখিল হেসেছিল—তুমি ঠিকই বলেছ অবস্তী। আমি শুধু ভাবছি, আর কতদিন? কবে তুমি আমার টাকাকে তোমার টাকা বলে মনে করবার সুযোগ পাবে, আর মনে করতে একটুও লজ্জা পাবে না।

শুনে দুঃখিত হয়ে উঠেছিল অবস্তীর মুখ। ঠিকই বলেছে নিখিল। অবস্তী নামে যে মেয়ের ফটোকে নিখিল তার বুক-পকেটের ডায়েরির ভিতরে গোপন রত্নের মত লুকিয়ে রেখেছে, সে মেয়েকে আজও কোন উপকার করতে পারা গেল না, এই দুঃখ সহ্য করতে কষ্ট হয় নিখিলের। এই দুঃখ যে পুরুষের দুঃখ এবং এই দুঃখের লজ্জাও পুরুষের লজ্জা।

যতক্ষণ নিখিল না আসে ততক্ষণ ঘরের এই নীরবতার মধ্যে চূপ করে বসে অবস্তী তার মনের ভিতরের এই সব স্মৃতি, আর এই-রকমেরই যত প্রশ্নের নীরব মুখরতা সহ্য করে। আশুক নিখিল, এসে যদি আবার মুখ বিষণ্ণ করে, এবং অবস্তীর মুখের দিকে তাকিয়ে ঠিক সেই আগের মত বিস্ময় আর উজ্জল হাসি ওর দুই

চোখে উচ্ছলনা হয়ে ওঠে, তবে আজ আবার রাগ করতে হবে। আজ আবার বলতে হবে, আমার মাথার উপর মাথা তুলে একটা মস্ত বড় গবুটে পুরুষের মত কথা না বলতে পারলে তোমার মনে কোন আনন্দ হবে না, এ আবার কেমন মন? না হয় আমার কাছে অহংকারে একটু খাটোই হলে নিখিল।

মাঝে মাঝে, নীরব ঘরের ভিতরে এই প্রতীক্ষা আর ভাবনার মধ্যে অবন্তীর চেতনাটাই যেন আনমনা হয়ে যায়। এবং একদিন এমনই আনমনা হয়েছিল যে, ঘুমিয়েই পড়েছিল অবন্তী। নিখিল এসে ঘরের ভিতরে ঢুকে ডাক দিতেই ধড়ফড় করে জেগে চেষ্টা করে উঠেছিল—আঁ্যা! কি বলছেন আপনি?

নিখিল হাসে—কার সঙ্গে কথা বলছেন অবন্তী? স্বপ্ন দেখছেন নাকি?

অবন্তী বিব্রতভাবে বলে—না, ঠিক স্বপ্ন নয়। অল্প কথা ভাবছিলাম। অবন্তীর গম্ভীর চোখে-মুখে একটা ভীষণ অস্বস্তির ছায়া ফুটে রয়েছে। দেখে সেদিন একটু আশ্চর্যও হয়েছিল নিখিল। যে মেয়ে সর্বক্ষণ হাসতে চায়, সে মেয়েকে কিসের স্বপ্ন এত গম্ভীর করে দিল?

নিখিল আবার হাসে—অনেকদিন পরে তোমাকে গম্ভীর হতে দেখলাম অবন্তী।

আর একবার চমকে ওঠে অবন্তীর চোখের ছায়া-ছায়া কালো। এবং রুমাল দিয়ে চোখ মুছে তারপর যেন দেখতে পায়, না, ভয় করবার কিছু নেই, সত্যিই কোন ভয়ালোক লিফটের কাছে দাঁড়িয়ে অবন্তীর মুখের দিকে অদ্ভুতভাবে তাকিয়ে কোন প্রশ্ন করছে না।

নিখিল যতক্ষণ না আসে, ততক্ষণ বই পড়তে চেষ্টা করেও এক একদিন শুধু হয়রানিই সার হয়। অবন্তী যেন ইচ্ছে করেই আনমনা হয়ে যায়। এবং ভয়ও পায়। কি হবে উপায়, যদি নিখিলের জীবনটা এভাবে মাসের পর মাস এবং বছরের পর বছর শুধু চাকরি খোঁজার হয়রানিতেই হাসি হারাতে থাকে? বাবার কাছেও এখন

আর রহস্যটা অজানা নয়। এমন কি চারু হারু আর নরুও কিছু কিছু বুঝতে পেরেছে, নিখিলবাবু একেবারে পর নন; এবং একদিন যে একটা উৎসবের মধ্যে আরও সুন্দর হয়ে দেখা দিয়ে আরও আপন হয়ে যাবে নিখিল, এই বিশ্বাসের ছায়া এই বাড়ীর সবারই চোখে-মুখে লক্ষ্য করা যায়। অবন্তীর মনের গভীরে একটা ব্যাকুলতা মাঝে মাঝে যেন সব আগ্রহের জোর সঁপে দিয়ে প্রার্থনা করে, নিখিলের ভাগ্য একটু রঙীন হয়ে উঠুক, একটা ভাল চাকরি পেয়ে যাক নিখিল। নইলে অবন্তীর ভালবাসার আশাগুলিই যে শুকিয়ে ঝরে পড়ে যাবে।

চোখ বন্ধ করে আজও বোধহয় নিজের মনের এই নীরব প্রার্থনার ভাষা শুনছিল অবন্তী। ঘরের ভিতর পায়ের শব্দ শুনেই চমকে ওঠে, চোখ খুলে তাকায়, হেসে ওঠে। আজ এতক্ষণ পরে, বেশ একটু দেরি করে নিখিল এসেছে।

নিখিল হাসতে চেষ্টা করে।—বোধহয় অনেকক্ষণ ধরে আমার ওপর রাগ করে বসে আছ।

অবন্তী বলে—না, আর তোমার ওপর রাগ করতে পারছি না। রাগ হচ্ছে নিজেরই ভাগ্যের ওপর।

নিখিল—তার মানে ?

অবন্তী—তার মানে তোমারই ভাগ্যের ওপর। কি আশ্চর্য; আজ পর্যন্ত তোমার একটা ভাল চাকরির চিহ্ন পর্যন্ত দেখা গেল না।

নিখিল হাসে—একটা চিহ্ন দেখা গিয়েছে।

অবন্তীর চোখে হাসি ফুটে ওঠে।—তাই বল। এতক্ষণ তাই ভাবছিলাম।

—কি ?

—ভাবছিলাম, জীবনে কি এমন ভয়ানক অপরাধ করেছি যে, তোমার এই হয়রানি দিনের পর দিন শুধু দেখে দেখে চোখ ভেজাতে হবে।

ব্যক্তিভাবে তাকায় নিখিল, কারণ দেখতে পেয়েছে নিখিল, অবস্তীর চোখ দুটো ঝাপসা হয়ে উঠেছে।

নিখিল বলে—আমিও তাই ভাবছি অবস্তী। ইচ্ছে করছে, তোমার কাছে চিরকালের ঋণ স্বীকার করে এইবার চলে যাই। সে ঋণ কোনদিন শোধ করবো না। কিন্তু তুমি আর……।

অবস্তীর চোখের ছায়া-ছায়া কালো যেন হঠাৎ বিদ্যুতের ছোঁয়ায় জ্বলে ওঠে! —কি বলতে চাইছো তুমি? ভালবাসা ভুলে যাব? তোমাকে ভুলে যাব?

নিখিল—ভুলে যেতে পারলে তোমার ভালই হতো অবস্তী।

অবস্তীর মুখ করুণ হয়ে ওঠে।—তুমি এত বেশি হতাশ হয়ে পড়লে কেন নিখিল? নিজেই তো বলছো যে……।

নিখিল—হ্যাঁ, একটা ভালো কাজের সন্ধান পেয়েছি। দরখাস্ত করেছি এবং সাড়াও পেয়েছি।

অবস্তী—কিসের কাজ?

নিখিল—যাদবপুরের একটা নতুন লেবরেটরিতে কেমিস্টের কাজ।

অবস্তীর মুখের ছায়াচ্ছন্ন মেহুরতা মুছে যায়। চোখে-মুখে যেন আশাময় একটা উৎফুল্লতার হাসি ফুটে ওঠে। ব্যস্তভাবে প্রশ্ন করে।—আমার মন বলছে, এ কাজটা তুমি পাবে।

নিখিল—ভরসা হয় না।

অবস্তী—কেন?

নিখিল—খোঁজ নিয়ে জেনেছি, আমার চেয়ে অনেক বেশি কোয়ালি-ফাইড আর একজন প্রার্থী আছে। শেখর মিত্র নামে এক ভদ্রলোক, রিসার্চে তার রেকর্ড খুবই ভাল।

চমকে ওঠে অবস্তী—কি নাম ভদ্রলোকের?

নিখিল—শেখর মিত্র। লেবরেটরির ম্যানেজিং ডিরেক্টর জানিয়েছেন, যদি শেখর মিত্র এই কাজটা শেষ পর্যন্ত না নেয়, তবে আমাকে

কাজটা দেবার কথা ডিরেক্টর বোর্ডের মিটিংএ আলোচনা করা হবে। মনে হয়, তাহলে কাজটা আমিই পেয়ে যাব।

নীরব হয়ে তাকিয়ে শুধু শুনতে থাকে অবন্তী। এবং নিখিলও কিছুক্ষণ চুপ করে থেকে করুণভাবে হেসে ওঠে।—কিন্তু এরকম একটা অ্যাকসিডেন্ট যে হবেই হবে, সেটা কি করে বিশ্বাস করা যায় বল ?

অবন্তী বলে—যদি হয় ?

নিখিলের গলার স্বরও একটা আশাময় মধুরতার আবেগে টলমল করে ওঠে—যদি হয়...তবে...তারপর...তুমি মিছে কেন জিজ্ঞেস করছো অবন্তী। যদি হয়, তবে আমাদের স্বপ্নও যে সফল হয়ে যাবে।

ধীরে ধীরে, অবন্তীর সারামুখ জুড়ে অদ্ভুত একটা বিশ্বাসের হাসি ছড়িয়ে পড়ে ঝিকমিক করতে থাকে। ছ'চোখের ছায়া-ছায়া কালোর মধ্যে বুদ্ধির দীপ্তি ঝিলিক দিয়ে ওঠে। নতুন একটা প্রতিজ্ঞা যেন ছটফট করেছে অবন্তীর বুকের ভিতরে। অবন্তী বলে—আমার একটা কথা বিশ্বাস কর নিখিল।

নিখিল—বল।

অবন্তী—এই কাজটা তুমিই পাবে।

আট

মাসের পর মাস, পুরোপুরি তিনটি মাস পার হয়ে গিয়েছে। শেখর মিত্রের জীবনের ঘরে কোন আলাদিনের প্রদীপের আলো চমকে ওঠেনি। ঐ সেই রতনবাবুর ছেলেকে পড়ানো, আর কাজের চেষ্টা। টালিগঞ্জের গলির ক্ষুদ্র বাড়ির ভাগ্যের উপর টাকা-পয়সার সুখ অবাধ হয়ে ঝরে পড়েনি। কিন্তু একটা পরিবর্তন দেখা যায়। বাড়ির মুখে হাসি ফুটে উঠেছে। এই বাড়ির ক্লিষ্ট প্রাণগুলির সেই বিমর্ষতা আর নেই।

কোন সন্দেহ নেই, এই পরিবর্তন ঘটিয়েছে স্বয়ং শেখর। অনাদিবাবু দেখে আশ্চর্য হয়ে গিয়েছেন, তাঁর বড় ছেলের মুখের ভাবটাই বদলে গিয়েছে, চোখের দৃষ্টিটাও বড় সুন্দর হয়ে উঠেছে। টালিগঞ্জের এই ক্ষুদ্র বাড়িটাকেই হঠাৎ যেন বড় বেশি ভালবেসে ফেলেছে শেখর। মধু আর বিধুকে পড়াবার জন্য সারাদিনের মধ্যে অন্তত দুটি ঘণ্টা সময় হাতে রাখে শেখর। নিজের হাতে চা তৈরী করে অনাদিবাবুর হাতের কাছে তুলে দিয়ে গল্প করে শেখর। এমন কি, শখ করে নিজেই এক একদিন বিভ্রাময়াকে বারান্দায় একটা আসনের উপর বসিয়ে রেখে নিজেই রান্না করে। রান্নার একটা ডিঙ্কনারি কিনেছে শেখর। বেশ উৎসাহের সঙ্গে, মাঝে মাঝে মধু আর বিধুর সঙ্গে ছল্লোড় জমিয়ে সেই ডিঙ্কনারি দেখে মাছের নতুন রকমের রান্না রাঁধে শেখর। উঠানের একদিকে রজনীগন্ধার অনেক গুলি চারাও পুঁতেছে। টাকা-পয়সার হাসি নয়, কিন্তু বাড়িটা যেন প্রাণের হাসি হাসে।

আর একটা সত্য, তার খবর আর কেউ না জাহুক, শেখর জানে,

এবং জেনে নিজেই আশ্চর্য হয়ে গিয়েছে, তার মনের গভীরে একটি মায়ার ছবি হাসছে। পৃথিবীর একটা সুন্দর মুখের মেয়েকে হঠাৎ উপকার করতে গিয়ে বৃকের ভিতরে এরকম অদ্ভুত এক অনুভবের ফুল ফুটে উঠবে, ভাবতেও পারেনি শেখর। কিন্তু কোথায় গেল অবন্তী সরকার ?

আজ পর্যন্ত অবন্তী সরকারের আর কোন সংবাদ পায়নি শেখর। ইচ্ছে করলে তাকে তো এখনি গিয়ে দেখে আসতে পারা যায়। ঐ মিশন রো'তে সেই চারতলা বাড়ির ফ্ল্যাটে দি এগ্রিমেশিনারি লিমিটেডের অফিস। নিশ্চয় সেই অফিসেরই এক কক্ষে বসে এখন কাজ করছে অবন্তী সরকার।

সত্যিই কাজটা পেয়েছে তো অবন্তী ? সন্দেহ হয় শেখরের। পেয়ে থাকলে অবন্তীর কাছ থেকে একটা ধন্যবাদের চিঠি শেখরের কাছে এতদিনে পৌঁছে যেত নিশ্চয়। কিংবা কোন অন্ত্রুখে পড়েছে সেই মেয়ে, যার উপর একটা সংসারের প্রাণ বাঁচাবার দায় চেপে রয়েছে ?

প্রভার বাড়িতে একদিন ঘুরে আসতেই শেখরের কল্পনার এই ভয়টা মিটে যায়। প্রভার ছেলের অনুরোধ ছিল। প্রভার ননদ অনসূয়ার সঙ্গে দেখাও হলো। খুশি হয়ে কত কথাই না বললো অনসূয়া। অনসূয়া বি-এ পাশ করেছে। অনসূয়া এরই মধ্যে একবার রাজগীর বেড়িয়ে এসেছে। অনেক ছবি এঁকেছে অনসূয়া। ভবানীপুরের এক মেয়ে স্কুলে টিচারের কাজ খালি হয়েছে। দরখাস্ত করেছে অনসূয়া। আশা করেছে অনসূয়া, কাজটা হয়েই যাবে।

অনেক কথা বললো অনসূয়া এবং বিশেষ করে যার কথা অনসূয়ার মুখ থেকে শোনবার জন্য শেখরের সারা মন উৎকর্ষ হয়েছিল, তারই কথা বললো সব কথার শেষে :

আমার ভাগ্য বড় জোর ঐ টিচারি পর্যন্ত। অবন্তীর মত ভাগ্য সবারই হয় না।

শেখরের বিন্মিত চোখের দিকে তাকিয়ে অনসূয়া বলে—অবন্তীকে চিনতে পারছেন তো ? সেই যে আমার বন্ধু, প্রভার বউ-ভাতের দিন নেমস্তুলে এসেছিল। চমৎকার কথা বলতে পারে। বড় ভাল মেয়ে।

শেখর বলে—হ্যাঁ, মনে পড়ছে।

অনসূয়া—অবন্তী এসেছিল। ওর কাছ থেকেই সব খবর পেলাম। তিন শো ষাট টাকা মাইনের একটা কাজ পেয়েছে অবন্তী। কাজটার জ্ঞা অনেক ভাল ভাল ক্যানডিডেট ছিল। কিন্তু অবন্তীই পেয়ে গেল। সাধারণ গ্র্যাজুয়েট হলে হবে কি ? অবন্তী খুবই ট্যালেন্টেড মেয়ে।

ব্যস, এই পর্যন্ত, অবন্তী সরকারের গল্প এখানেই শেষ করে দিল অনসূয়া। মাত্র এইটুকু খবর জানিয়ে গিয়েছে অবন্তী। তার মধ্যে শেখর মিত্র নামে একটা মানুষের নামের কোন উল্লেখ নেই। অবন্তী সরকারের ভাগ্যের কাহিনীর মধ্যে শেখর মিত্র নামে কোন নায়কের ঠাই নেই। অবন্তী বলতে ভুলে গিয়েছে। কে জানে কিসের জ্ঞা ? যাক, তাহলে সুখী হয়েছে অবন্তী। এবং অবন্তী তার জীবনের অন্তত একটি ঘটনাকে দুর্লভ সম্পদের মত গোপন করে রেখেছে। শেখর মিত্র নামে একটি মানুষ গোপনে তাকে উপকারের যে উপহার দিয়েছে, সে উপহার অবন্তীর মনের ভিতরে লুকিয়ে রাখা গোপন ঐশ্বর্য। তাই কি ? তাই তো মনে হয়। নইলে অনসূয়ার কাছে এত কথা বলেও শুধু ঐ ঘটনার গল্পটাকে নীরব ক'রে রেখে দিল কেন অবন্তী ?

তবে কি ভুলেই গিয়েছে অবন্তী ? বিশ্বাস হয় না। সেই উপহারের মূল্য বোঝেনা অবন্তী, তাকে এত ক্ষুদ্র মনের মানুষ বলেই বা মনে করতে হবে কেন ? কিন্তু তবে কি ? শুধু এই প্রশ্নের কোন উত্তর খুঁজে পায় না শেখর। অবন্তী কি শেখরের ছ'চোখের দৃষ্টিকে সন্দেহ করলো আর ভয় পেল ?

সন্দেহ করলে বড় ভুল করবে অবস্তী। সে তো নিজেই দেখতে পাচ্ছে যে, একটা মাস পার হয়ে গেল, তবু শেখর মিত্র নামে এক ভদ্রলোক কোন প্রতিদান পাওয়ার দাবি নিয়ে, এমন কি অবস্তীর কাছ থেকে একটা কৃতজ্ঞতার কথা বা প্রশংসার কথা শোনবার আগ্রহ নিয়ে, অবস্তী সরকারের সুন্দর মুখ দেখবার জন্তু সামান্য একটা লোভ নিয়েও অবস্তীর চোখের সামনে উপস্থিত হতে চেষ্টা করেনি। তবে ভয় করে কেন অবস্তী?

বাড়ি ফিরে এসেই দেখতে পায় শেখর, একটা চিঠি এসে পড়ে রয়েছে। একটা কেজো চেহারার চিঠি, এবং চিঠিটা পড়তেই বুঝতে পারে, হ্যাঁ একটা কাজেরই চিঠি। যাদবপুরের লেবরেটরিতে যে কাজটা পাওয়ার চেষ্টা এতদিন ধরে করে এসেছে শেখর, সেই কাজটার সম্পর্কেই উপরওয়ালার চিঠি এসেছে। ছ'টা মাস দু'শো টাকা মাইনেতে কাজ করতে হবে, তারপর পার্মানেন্ট করা হবে। তখন মাইনে হবে পাঁচশো পঞ্চাশ টাকা। যদি রাজি হয় শেখর, তবে সাতদিনের মধ্যে ম্যানেজিং ডিরেক্টরের সঙ্গে দেখা করে কথা দিয়ে আসতে হবে।

কাজের চিঠি পড়া শেষ হতেই ডাকপিয়ন এসে একটা রেজিস্টারি করা চিঠি দিয়ে গেল। খুব বেশি আশ্চর্য না হলেও, শেখরের মনের ভিতরটা হঠাৎ একটু চমকে ওঠে, এবং খামের উপর লেখা 'প্রেরকের নামটা পড়তেই শেখর মিত্রের বুকের ভিতর নিঃশ্বাসের স্তরে স্তরে নিবিড় এক অমুভবের স্মৃতি রিমঝিম করে যেন বাজতে থাকে। অবস্তী সরকারের কাছ থেকেই এই চিঠি এসেছে।

‘বাধ্য হয়ে আবার আপনাকেই স্মরণ করছি। আমার অমুরোধ, একবার আমাদের বাড়িতে আসবেন। ঠিকানা দিলাম। হয় আজ, নয় কাল, সন্ধ্যাবেলা আপনারই অপেক্ষায় থাকবো। নমস্কার নেবেন। ইতি—অবস্তী সরকার।’

অবস্তীর চিঠিটা হাতে থেকে নামিয়ে টেবিলের উপরে রেখে দিলেও

বুঝতে পারে শেখর ; বুকের গভীরে অনুভবের সেই রিমঝিম খামতে চাইছে না। বাধ্য হয়ে শেখরকে স্মরণ করেছে অবন্তী। তার মানে, স্মরণ করতে বাধ্য হয়েছে ; তার মানে, ভুলে থাকতে অনেক চেষ্টা করেছে অবন্তী, কিন্তু শেষ পর্যন্ত ভুলে থাকতে পারেনি। এই তো, এ-ছাড়া এ-চিঠির আর কি অর্থ হতে পারে ? ভুলে থাকা নয়, সে তো ভোলা ! এই তিন মাস ধরে অবন্তীর নীরবতাকে একটা নির্মম বিস্মৃতি বলে যে সন্দেহ করেছিল শেখর, সে সন্দেহটাকে একেবারে মিথ্যে করে দিল অবন্তীর এই চিঠি। ঐ বিস্মৃতি বিস্মৃতি নয়, স্মৃতির সঙ্গে একটা নীরব অভিমানের লড়াই। বিস্মৃতির স্বর্মে বসি রক্তে মোর দিয়েছে যে দোলা ! অবন্তীর চিঠির অর্থ খুঁজতে গেলে 'বারবার অনেকদিন আগের পড়া সেই কবিতার কথাগুলিই যে মনে পড়ে। অবন্তীর চিঠি শেখর মিত্রের জীবনে প্রথম মুগ্ধতার প্রতি যেন স্নিগ্ধ আশ্বাসের উপহার।

হয় আজ, নয় কাল। শেখরের মনে হয়, আজই ভাল। শ্রাবণের সন্ধ্যাগুলি রোজই দু'এক পশলা বৃষ্টির জলে ভিজ়ে যায়। আজ কিন্তু মেঘ নেই। এবং আজ সন্ধ্যাতেও মেঘ থাকবে না বলেই মনে হচ্ছে। তাহ'লে আকাশ জুড়ে চাঁদের আলোও ফুটে উঠবে। কালের অপেক্ষায় না থাকাই ভাল। কে জানে কালকের দিনটা আজকের মত নির্মেঘ ও রোদে ঝলমল একটা দিন হবে কিনা, এবং কালকের সন্ধ্যাটা চাঁদের আলোয় ঝকমক করবে কিনা।

কিন্তু তারপর ? শেখর মিত্রের ভাবনা যেন হঠাৎ জ্যোৎস্নায় ভরে গিয়ে বিহ্বল হয়ে যায় ; এবং নিজের জীবনটাকেই ব্যাকুলভাবে প্রশ্ন করে, তারপর কি হবে ? অবন্তী সরকারের চোখের কাছে গিয়ে দাঁড়াবার জন্য এভাবে আকুল হয়ে ওঠার শেষ পরিণাম কি দাঁড়াবে ? অবন্তী যদি একেবারে অনায়াস আগ্রহে, একেবারে নিশ্চিন্ত মনে ও স্বচ্ছন্দে হাতটা এগিয়ে দেয়, তবে সেই হাত নিজের

হাতে তুলে নিয়ে শক্ত ক'রে ধরে রাখতে পারবে তো শেখর ? ভয় করবে না তো ?

কিংবা, অবন্তী যদি প্রশ্ন করে ; ভয়ানক শক্ত একটা প্রশ্ন ;— আমাকে ভাল লাগলো কেন ? মাত্র কিছুক্ষণের মত একটা মেয়ের মুখের দিকে তাকিয়ে কি এমন স্বর্গীয় শোভা দেখতে পেলেন যে মুগ্ধ হয়ে গেলেন ? তবে কি উত্তর দেবে শেখর মিত্র ?

প্রশ্নগুলিকে নিয়ে যেন কাঁপরে পড়ে শেখর। সত্যিই তো, কি উত্তর দিতে পারা যায় ? এরকম হঠাৎ ভাল-লাগার অর্থ কি ? এবং এই ভাল-লাগা কি সত্যিই ভাল মনের কোন মায়া ? কিংবা নিতান্তই একটা লোভ ?

বললে কি বিশ্বাস করবে অবন্তী, যদি বলা যায় যে, তোমাকে ভালবাসতে ইচ্ছে হয়েছে বলেই শেখর মিত্র তোমার চিঠি পাওয়া মাত্র ছুটে এসেছে ? এ ছাড়া আর কোন কারণ নেই। কেন যে এই ইচ্ছে হলো, সে প্রশ্ন করো না। কারণ, সে প্রশ্নের কোন অর্থ হয় না।

কিন্তু অবন্তী কি সত্যিই বুঝতে পেরেছে যে, অবন্তীরও ভাল লেগেছে ? শুধু একটা উপকার করেছে শেখর মিত্র, তারই জগু কি এই ভাল-লাগা ? তাহ'লে ভুল করেছে অবন্তী। এরকম ভাল-লাগা কখনও ভালবাসা হয়ে ফুটে উঠতে পারে না। এ শুধু একটা উপকারকে ভালবাসা।

লজ্জা পায় শেখর। বুঝা মনের ভিতর এই সব প্রশ্নের কোলাহল তুলে লাভ কি ? আজই আর কয়েকঘণ্টা পরে, পার্ক সার্কাসের সন্ধ্যা যখন আলোয় ভরে যাবে, তখন অবন্তীকে চোখে দেখেই এই সব প্রশ্নের মীমাংসা হয়ে যাবে।

যদি স্পষ্ট ক'রে বলেই ফেলে অবন্তী, তবে শেখরও স্পষ্ট করেই জানিয়ে দিতে একটুও দ্বিধা করবে না। হ্যাঁ, ভাল লেগেছে তোমাকে। তুমি যেদিন ডাকবে, সেদিনই আবার আমি তোমার

কাছে এসে দাঁড়াবো। তুমি যতদিন অপেক্ষা করতে বলবে, ততদিন অপেক্ষায় থাকবো। যদি বল, না, আর একটা দিনও প্রতীক্ষা সহ্য করতে পারবো না, তবে বেশ তো, এই মাসেরই কোন দিনে তোমারই মনের মত একটি সন্ধ্যায় বিয়েটা হয়ে যাক। উৎসবের ঘটা দরকার নেই; গভীর রাতে আকাশের তারায় তারায় যেমন চোখে-চোখে কথা বলে মন জানাজানি করে; তেমনই তুমি আর আমি ছ'জনের মনের দাবি স্বীকার করে নিয়ে চিরকালের আপন হয়ে যাই। শালগ্রাম সাক্ষী হতে পারে; রেজিস্ট্রারের সাক্ষাতেও হতে পারে। অবস্থার নিজের একটা সংসার আছে। রুগ্ন বাপ, আর তিনটি ছোট ছোট ভাই। সেই সংসারের নীড় থেকে অবস্থীকে উপড়ে নিয়ে আসতে পারা যাবে না, এবং উচিতও নয়। কিন্তু এটা কি আর এমন একটা ভয়ানক সমস্যা? থাকুক না অবস্থী; নিজের চাকরির রোজগারে তার বাপ আর ভাইদের জীবনের দিনগুলিকে সুখী করে রাখুক। অবস্থীর জীবনের এই রীতি-নীতির মধ্যে শেখর কোন সমস্যা সৃষ্টি করবে না। একটুও আপত্তি করবে না শেখর। শেখরেরও তো এইরকম একটা মায়ার দায়ে ভরা সংসার আছে। বাপ আর মা, এবং দুটি ছোট ছোট ভাই। অবস্থীও নিশ্চয় এমন কোন অদ্ভুত জেদ করবে না এবং করা উচিতও নয় যে, বিয়ের পর তোমাকে আমারই কাছে এসে থাকতে হবে। এটুকু নিশ্চয় জানে অবস্থী, কোন পুরুষের পক্ষে সে-রকম দাবি স্বীকার ক'রে বিয়ে করা সম্ভব নয়!

তাহলে শেষ পর্যন্ত কি দাঁড়ালো? এলোমেলো ভাবনাগুলিকে একটু গুছিয়ে নিয়ে শেখর যেন তার ভালবাসার জীবনের রূপ কল্পনা করতে চেষ্টা করে। হ্যাঁ, ভালই তো, ছ'জনের কেউ কারও দায় আর-মুন্নার নীড় হতে সরে যাবে না। সরে যাবার দরকার হয় না। অর্থাৎ, ছ'জনের জীবন ভালবাসার রাখী ধারণ ক'রে আর-একটি অদেখা নীড় গড়ে তুলবে, যেখানে যে-কোন লগ্নে, আকাশে তারা

থাকুক কিংবা চাঁদ থাকুক, শেখর মিত্রের বৃকের উপরে লুটিয়ে পড়ে থাকতে পারবে অবস্তী। এবং শেখরও অবস্তীর মুখের হাসির দিকে তাকিয়ে বলতে পারবে, এই তো ভাল অবস্তী। সারাদিনের মধ্যে এই একবার দেখা, এবং তারপরেই অদেখা, এই তো ভাল। আষ্টেপৃষ্ঠে বাঁধা ভালবাসার জীবন ভাল নয়। ভালবাসা লোহার শিকল নয়, ভালবাসা হলো ফুলডোর।

মা হয় তো মাঝে মাঝে রাগ করবেন. এ কিরকম কাণ্ড শেখর? অবস্তী কি জানে না যে, ওর স্বশুর শাশুড়ি আছে? বাপের সংসারেই কি চিরকাল পড়ে থাকবে বউ?

সমস্যা বটে। কিন্তু এই সমস্যার একটা সমাধানও মনে মনে খুঁজে পায় শেখর। মা'র মনে ক্ষোভ থাকবে না, যদি অবস্তী এসে মাঝে মাঝে স্বশুর আর শাশুড়ির কাছে থাকে। অবস্তীরও কোন আপত্তি হবে না নিশ্চয়। আপত্তি কেন, খুশিই হবে অবস্তী।

রতন বাবুর ছেলেকে পড়াতে যাবার কথা যখন মনে পড়ে, তখন প্রায় দুপুর। পড়াতে যাবার সময় হতে এখনও কয়েক ঘণ্টা দেরি। কিন্তু আজ একটু আগে পড়াতে গেলেই তো ভাল হয়। বিকাল শেষ হবার আগেই ছাত্র পড়াবার কাজটা সেরে নিয়ে, তারপর তারপর ট্রামে চড়ে সোজা ময়দানে গিয়ে খোলা হাওয়ার ভিতর একটা ঘণ্টা পার ক'রে দিলেই সন্ধ্যা ঘনিয়ে উঠবে। তারপর সেখান থেকে পার্ক সার্কান পৌঁছে যেতেই বা কতক্ষণ?

পার্ক সার্কাসের বিপুল আকারের একটা নতুন বাড়ির একটা ফ্ল্যাট। প্রথম ঘরটি বেশ সুন্দর ক'রে সাজানো। সোফা আছে, রেডিও আছে, কার্পেট পাতা আছে, রঙীন লেসের পর্দা দরজায় ঝুলছে। প্রকাণ্ড ফুলদানিতে ফুলের স্তবকও আছে।

শেখর মিত্রকে দরজার কাছে দেখতে পেয়ে সন্ধ্যাবেলার আলোর মতই হেসে ওঠে অবস্তী সরকারের কালো চোখের তারা। কিন্তু শেখর মিত্র যেন ক্ষণিকের মত অপ্রস্তুত হয়ে তার নিজের চোখের বিব্রত বিস্ময়টাকে সামলে রাখবার চেষ্টা করে। বোধ হয় ঠিক এইরকমের একটা রঙীন অভ্যর্থনা আশা করেনি শেখর।

হ্যাঁ, রঙীনই বটে। অবস্তী সরকারের মূর্তিটাও রঙীন হয়ে গিয়েছে। সেই মার্বেলের মত সাদাটে গর্বে সাজানো চেহারা নয়। অবস্তীর সিন্ধের শাড়িতে রঙীনতা, তার গলার সোনার হারের লকেটটাও একটা রঙীন পাথর।

শেখরকে বসতে অনুরোধ ক'রে অবস্তী ব্যস্তভাবে ঘরের ভিতরে চলে যায়।

শেখর আশা করে, অবস্তী সরকারের বাবা কিংবা বাড়ির আর কেউ এখনি সামনে এসে শেখরকে দেখে খুশি হবে আর গল্প করবে। শেখর মিত্রের নামটাকে এই বাড়ির কানের কাছেও কি কোনদিন উচ্চারণ করেনি অবস্তী? হতে পারে না।

কিন্তু অবস্তী একাই ফিরে এল। হাতে খাবারের প্লেট এবং চায়ের কাপ। অবস্তী সরকারের কালো চোখে সেই বুদ্ধির দীপ্তি বড় সুন্দর হয়ে আবার চিকচিক করতে থাকে।

—শেখরবাবু! কথা বলেই লজ্জা পেয়ে মুখ ফেরায় অবস্তী।

শেখর বলে—আপনি ভাল আছেন তো ?

অবস্খী হঠাৎ গম্ভীর হয়ে বলে—না। সেই জন্তই আপনাকে ডেকেছি শেখরবাবু।

শেখর—বলুন।

অবস্খী ক্রভঙ্গী ক’রে হাসে।—আমি আপনার বোনের নন্দ অনসূয়ার বন্ধু। আমাকে ‘আপনি’ করে বলবেন না।

তার পরেই সোজা শেখর মিত্রের মুখের দিকে তাকিয়ে অবস্খী বলে—তা ছাড়া, আপনিই একমাত্র মানুষ, যার কাছ থেকে আমি উপকার পেয়েছি। লোকে আমাকে অহংকারী বলে জানে, কথাটা খুব মিথ্যে নয়। কিন্তু আপনিই তো জানেন, আমি আপনার কাছে মাথা হেঁট করেছি। জীবনে আর কারও কাছে মাথা হেঁট করিনি।

বিব্রতভাবে শেখর বলে—এ কথার কোন অর্থ হয় না। দরকারে পড়ে একটা দাবি করেছিলে তুমি, তাকে মাথা হেঁট করা বলে না। অবস্খী—জানি না, কেন আপনার কাছ থেকে উপকার চাইবার এত সাহস হঠাৎ মনের ভিতরে এসে গেল।

শেখর হাসে—তুমিই জান, কেন তোমার সে সাহস হলো ?

অবস্খী—আমি জানি। আপনাকে দেখে কেন জানি মনে হয়েছিল যে, আপনি আমার অনুরোধ রাখবেন।

শেখর—সেটা তোমার মনের গুণ, আমার কোন গুণ নয়।

অবস্খী—বাই হোক, আমার লাভ এই যে, আপনার কাছে আমার জীবনের কোন দুঃখের কথা বলতে আমার মনে কোন লজ্জার বাধা নেই। আপনিই আমার ভয় ভেঙ্গে দিয়েছেন।

শেখরের মনের ভিতরে লুকিয়ে থাকা সেই অদ্ভুত মায়াচ্ছবির হাসিটা যেন আরও নিবিড় হয়ে শেখরের চোখের উপর ফুটে ওঠে।

অলীক স্বপ্ন নয়; কল্পনাও নয়; সত্যিই অবস্খী সরকার আজ শেখরের চোখের কত কাছে বসে মুখের দিকে তাকিয়ে গল্প করছে।

শেখর বলে—তোমার কথা শুনে আমারই মনের ভয় ভেঙ্গে গেল অবস্তী ।

অবস্তী—কিসের ভয় ?

শেখর—আমার ভয় হয়েছিল, আমার কাছে ওরকম একটা উপকার পাওয়ার অমুরোধ ক’রে তুমি লজ্জা পেয়েছ, এবং সেই লজ্জাতে, আর হয়তো আমার মনটাকেও সন্দেহ ক’রে আমার কাছ থেকে একেবারে আড়াল হয়ে লুকিয়ে থাকছো ।

অবস্তী—আপনাকে ভুলে যাব, এমন অসম্ভবও আপনি বিশ্বাস করেন শেখরবাবু ?

শেখর বলে—না অবস্তী ।

অবস্তী—তাই তো বিপদে পড়ে আপনারই কথা মনে হলো, তাই আপনাকে ডেকেছি ।

শেখর—বিপদ ?

অবস্তী—হ্যাঁ ।

শেখর—কিসের বিপদ ?

অবস্তী—যাদবপুরের একটা নতুন লেবরেটরিতে নতুন একটা কাজে লোক নেওয়া হবে ।

শেখর আশ্চর্য হয়—হ্যাঁ ।

অবস্তী—আমারই বান্ধবীর দাদা হন, তাঁর নাম নিখিল মজুমদার, তিনি ঐ কাজের জন্ত দরখাস্ত করেছেন ।

শেখর—তা জানি না ।

অবস্তী—কাজটা এতদিনে তিনিই পেয়ে যেতেন । কিন্তু বাধা দিয়েছে আপনার দরখাস্ত ।

শেখর—তার মানে ?

অবস্তী—বুঝতেই তো পারছেন, আপনার মত কোয়ালিফাইড লোক পেলে নিখিল মজুমদারের মত সাধারণ একজন বি-এস-সি’কে ওরা নেবে কেন ? ওরা বলেছে, শেখর মিত্র নামে

ক্যানডিডেট যদি ঐ কাজ নিতে শেষ পর্যন্ত রাজি না হয়, তবেই নিখিল মজুমদার কাজটা পাবে।

শেখরের চোখে যেন অদ্ভুত এক কৌতূহলের আগুন জ্বলে উঠতে চাইছে। এ কেমন বিপদ? নিখিল মজুমদার ঐ ভাল মাইনের কাজটা না পেলে অবস্তী সরকারের জীবন দুঃখিত হবে কেন? অবস্তী সরকারের জীবনের সুখ-দুঃখের মধ্যে নিখিল মজুমদার কে? গম্ভীর স্বরে প্রশ্ন করে শেখর—নিখিল মজুমদারের কাজ না হলে সেটা তোমার বিপদ কেন হবে, বুঝতে পারছি না।

উত্তর না দিয়ে মাথা হেঁট করে অবস্তী সরকার। কিন্তু ঐ নিরুত্তর ভঙ্গীই যে ভয়ংকর স্পষ্ট একটা উত্তর। খুব স্পষ্ট করে, কোন কুণ্ঠা না রেখে জানিয়ে দিচ্ছে অবস্তী সরকার, নিখিল মজুমদার নামে একটি মানুষ সুখী হলে অবস্তী সরকারের জীবনের আশা পূর্ণ হয়।

শেখর—নিখিল মজুমদার কি তোমার অনেক দিনের চেনা? অবস্তীর মুখ লজ্জায় লালচে হয়ে ওঠে। চোখের চাহনি নিবিড়। লিপস্টিক দরকার হয় না যে ঠোঁটে, সেই ঠোঁটের রক্তাভাও যেন লাজুক হাসি হাসে।

অবস্তী বলে—না। একবছরের চেয়ে কিছু বেশি হবে।

শেখর—তার মানে, তোমার চাকরিটা হবার বছর খানেক আগে। অবস্তী—হ্যাঁ।

শেখর—তুমি কি নিখিল মজুমদারের সঙ্গে পরামর্শ করে, অর্থাৎ তার সম্মতি নিয়ে আমাকে এই অনুরোধ করছো?

ব্যস্তভাবে আপত্তির ভঙ্গীতে মাথা নাড়ে অবস্তী—না, আপনার নাম তার কাছে কখনও করিনি। সে বড় আত্মসম্মানী মানুষ, শুনলে কখনই রাজি হতো না।

শেখর—নিখিল মজুমদার যদি ঐ কাজটা না পায়, তবে?

অবস্তী—না পেলে চলবে কি করে শেখরবাবু?

শেখর—তার মানে ?

অবন্তী—নিখিল যে তাহলে...

শেখর—নিখিল মজুমদার তাহলে তোমাকে বিয়ে করতে রাজি হবে না ?

অবন্তী উদাস ভাবে বলে—সে হয়তো রাজি হবে, কিন্তু...

শেখর হাসে—কিন্তু তুমি কি ক'রে রাজি হবে ? তাই না ?

অবন্তী—আপনি তো বুঝতেই পারছেন ।

শেখর হাসে—আমার বোঝবার আর কোন দরকার নেই অবন্তী সরকার ।

আর কোন কথা না বলে, এবং অবন্তী সরকারকে চমকে দিয়ে ঘর ছেড়ে সোজা দরজার দিকে এগিয়ে যায় শেখর ।

—শেখরবাবু । প্রায় চেষ্টা দিয়ে ডাক দেয় অবন্তী সরকার । ডাকটা আতঁনাদের মত শোনায । অবন্তী সরকারের কালো চোখ করুণ হয়ে মেঘলা সন্ধ্যার মত তাকিয়ে থাকে ।

অবন্তী বলে—আমি জানি, আপনীর উপর বড় বেশি দাবি করছি, অথচ দাবি করবার কোন অধিকার নেই ।

বেশ শক্ত স্বরে অথচ শান্তভাবে উত্তর দেয় শেখর—অধিকার ছিল ।

অবন্তী—কি বললেন ?

শেখর—সত্যিই কি শুনতে পাওনি ?

অবন্তী—না ।

শেখর—তা হলে আর প্রশ্ন করো না । আমি চলি ।

অবন্তী—আপনি কি সত্যিই আমার অনুরোধ শুনে রাগ করলেন, ?

শেখর—শুনে সুখী হলাম যে, তুমি একটা মানুষকে ভালবাসতে পেরেছ ।

অবন্তী—সে ভালবাসা ব্যর্থ হয়ে যাবে যদি আপনি... ।

অবন্তীর মুখের দিকে অপলক চোখে তাকিয়ে থাকে শেখর ।

তারপরেই বলে—কি বলতে চাও তুমি ?

অবন্তী—আপনি নিখিলকে ঐ কাজটা নেবার সুযোগ দিন ।

শেখর—তার মানে আমি কাজটা নিতে রাজি না হই, এই তো ?

অবন্তী—হ্যাঁ ।

শেখর—বেশ, তাই হবে ।

চলে যায় শেখর । অবন্তী সরকারের সিঙ্কের শাড়ির আঁচল ছুলে ওঠে । তরতর ক'রে হেঁটে শেখরের পাশে পাশে চলতে চলতে পথের কিনারা পর্যন্ত এগিয়ে আসে অবন্তী ।

দূরে ট্রামের মাথায় নীল লাল আলোকের চোখ জ্বলজ্বল করছে । এগিয়ে আসছে ট্রাম । লাইনের তার ঝনঝন ক'রে বাজে । অবন্তী সরকারের হাসিমাখা উজ্জ্বল মুখের দিকে শেষ বিস্ময়ের দৃষ্টি তুলে মুখ ফিরিয়ে নেয় শেখর ।

অবন্তী বলে—জানি না, আপনাকে কি বলে ধন্যবাদ জানানো শেখরবাবু । আপনি যে উপকার করলেন, তেমন উপকার কোন আপনজনও করে না ।

আবার বোধহয় ভুল হলো। হোক ভুল। এই ভুলের স্মৃতি শুধু শেখরের জীবনে গোপন হয়ে আর নীরব হয়ে থাকবে। কেউ জানবে না যে, শেখর মিত্র তার জীবনের প্রথম মায়ার ছবিকে চোখের কাছে রেখে দেখতে গিয়ে চোখভরা জ্বালা আর একটা কৌতুকের দংশন নিয়ে ফিরে এসেছে।

শুধু তাই নয়, সেই নির্ভুর কৌতুককেই আবার একটা উপহার দিয়ে এসেছে। নিজেরই সৌভাগ্যের হৃৎপিণ্ডটা উপড়ে নিয়ে অবস্তী সরকারের কাছে নিবেদন করে চলে এসেছে।

অবস্তী সরকার কেন নিখিল মজুমদারকে ভালবেসেছে, এই প্রশ্নের কোন অর্থ হয় না। এর জ্ঞান অভিমান করারও কোন অর্থ হয় না। অবস্তী সরকার তার নিজের স্বপ্নের জগতে আছে। নিজের ভালবাসার মানুষের সুখের জ্ঞান যতটুকু করা সাধ্য, তাই করেছে। অবস্তী সরকার কোনদিন বলেনি যে, শেখর মিত্র নামে উপকারী একটা মানুষের জ্ঞান তার মনের পাতায় কোন মুহূর্তেও এক ফোঁটা মায়ার শিশির স্নিগ্ধ হয়ে উঠেছে। শেখর মিত্রের ভুল ঘটিয়েছে শেখর মিত্রেরই মন। অবস্তী সরকার নামে একটি মেয়ের কথা দিনের পর দিন মনের ভাবনায় পুষে রাখবার জ্ঞান কেউ তাকে দিবি দেয়নি।

অবস্তীকে মনে-প্রাণে ঘৃণা করতে পারলো না কেন, এবং আজও পারছে না কেন শেখর? বুঝতে পারে শেখর, আসল ভুল হলো নিজেকেই চিনতে না পারা। যার সঙ্গে কোন স্বার্থের সম্পর্ক নেই, তারই জ্ঞান বার বার এভাবে নিজের স্বার্থ তুচ্ছ করা বোধহয় মনেরই একটা রোগ। অতি কোমল দুর্বল ও মেরুদণ্ডহীন একটা পৌরুষ,

যার প্রতিজ্ঞার জোর অবন্তী সরকারের মতো মেয়ের কালো চোখের কৌতুকের কাছে বারবার জব্দ হয়ে যায়।

ভালবাসা কাকে বলে, এই প্রশ্ন নিয়ে জীবনে কোনদিন মাথা ঘামায়নি শেখর। কেন মানুষ ভালবাসে, কিসের জন্তু ভালবাসে কে জানে? অবন্তীই জানে, কেন নিখিলকে তার এত ভাল লাগলো, আর শেখর মিত্রের চোখের দৃষ্টিটার মধ্যে সে কোন অর্থই খুঁজে পেল না। কিন্তু অবন্তী সরকারের জন্তু শেখর মিত্রের মনের এই যে দশা, সেটা কি একটা মোহ মাত্র? ভালবাসা নয়? *

অন্য কারও উপরে নয়, রাগ হয় শুধু নিজের উপর। চোখভরা এই যে জ্বালা, সেটা শুধু একটা আত্মশিকার। অবন্তীর কথা মনে পড়লে রাগ হয় না। নিখিল মজুমদার নামে এক ব্যক্তির উপর বিন্দুমাত্রও আক্রোশ জাগে না। বরং, ভাবতে ভাল লাগে যে, অবন্তী সরকারের ভয়ানক অনুরোধের কাছে আজও জয়ী হয়ে ফিরে এসেছে শেখর। শেখর আপত্তি করলে, অবন্তী সরকারের পক্ষে শেখরকে একটিও কঠোর কথা বলবার অধিকার ছিল না। তবু অনায়াসে অবন্তীকে অবন্তীর স্বপ্নের পথে এগিয়ে যেতে সাহায্য করবে বলে কথা দিয়ে এসেছে শেখর।

বাড়ি ফিরে এসে প্রথম যে কাজটা করে শেখর, সেটা হলো একটা চিঠি লেখার কাজ। যাদবপুরের নতুন লেবরেটরির ম্যানেজিং ডিরেকটরকে যথাসৌজন্যের সঙ্গে জানিয়ে দেয়, ঐ কাজ নিতে রাজি নয় শেখর মিত্র।

চিঠিটা ডাক বাঞ্চে ফেলে দিতেই মনটা হাল্কা হয়ে ওঠে। জীবনের একটা সুন্দর উদ্ভাস্তির নাটক এইখানে সমাপ্ত হয়ে গেল। অবন্তী সরকার নামে একটা গল্প শুধু মাঝে মাঝে মনে পড়বে। এর চেয়ে বেশি কোন বিড়ম্বনার ভয় জীবনে আর রইল না। যাকে ভাল লেগেছিল তারই জন্তু শেষ পর্যন্ত ভাল ভাবে একটা ভাল কাজ ক'রে দিতে পারা গেল। কোন ক্ষতি হয়নি, ঠকেওনি শেখর।

নিজেরই ত্রিশ বছর বয়সের বৃকের ভিতরে ফুটে ওঠা একটা ভালবাসাকে সম্মানিত করেছে শেখর। ভুল নয়, বোকামিও নয়।

উঠানের কোণে রজনীগন্ধার চারা বেশ বড় হয়ে উঠেছে। মধু আর বিধু অনেকগুলি দোপাটি আর গাঁদাও লাগিয়েছে। মা উঠানের উপর মাছুর পেতে বসে একমনে রামায়ণ পড়েন। অফিস থেকে ফিরে আসেন অনাদিবাবু। শেখর বলে—তোমার ও মা'র ছুটো অয়েল পেন্টিং করাবো বাবা।

অনাদিবাবু হাসেন—আপাতত আমাকে এক কাপ চা ক'রে দে দেখি।

এগার

চা-এর কাপ হাতে তুলে নিয়ে কিছুক্ষণ কি-যেন ভাবেন অনাদি বাবু। চা-এর কাপে একটা চুমুক দেবার পর আবার কিছুক্ষণ আনমনার মত তাকিয়ে থাকেন। এই কিছুক্ষণ আগে অনাদিবাবুর যে ক্লান্ত মুখটাকে বেশ প্রসন্ন দেখাচ্ছিল, সেই মুখের উপরে একটা বিষণ্ণতার ধোঁয়াটে ছায়া যেন ঘন হয়ে উঠেছে। সত্যিই অস্ফুট স্বরে আক্ষেপের মত কি-একটা কথাও যেন বলে ওঠেন অনাদিবাবু।

শেখর বলে—কি হলো বাবা ? চা-এর চিনি ঠিক আছে তো ?

অনাদিবাবু—না।

শেখর—চিনি কম হয়েছে ?

অনাদিবাবু—হ্যাঁ।

চামচ ভরে চিনি নিয়ে এসে অনাদিবাবুর চা-এ ঢেলে দেয় শেখর। এইবার চা বেশ মিষ্টি, খুব বেশি মিষ্টি হয়ে ওঠে ঠিকই। কিন্তু দেখে বোঝা যায় না, অনাদিবাবুর মুখের সেই অপ্রসন্ন ভাব কেটে গিয়েছে কি না, এবং আগের মত প্রসন্নতায় মিষ্টি হয়ে উঠেছে কি না।

বরং হৃষিক্তির মত ভুরু কুঁচকে একটা কথা বললেন অনাদিবাবু—
বাড়িটা এবার নীলামে চড়বে শেখর।

শেখর—কেন ?

অনাদিবাবু—কেন আবার কি ? বাড়িটা যে ব্যাঙ্কের কাছে মার্টগেজ আছে, সেটা কি ভুলেই গিয়েছিস ?

শেখর—হ্যাঁ...না....ভুলিনি ঠিকই, কিন্তু সব সময় মনে থাকে না।

—মনে না থাকলে চলবে কি ক'রে ? সুদ প্রায় মূল ছাড়িয়ে গিয়েছে। আর কতদিন অপেক্ষা করবে ব্যাঙ্ক ?

—আমাকে কি করতে বলছো ?

—দেনা শোধ কর ।

—দেনাটা এখন দাঁড়িয়েছে কত ?

—সুদ আর মূল নিয়ে প্রায় সাড়ে ছয় হাজার ।

—এখনি সাড়ে ছয় হাজার টাকা পাব কোথা থেকে বল ?

—না পেলে বাড়িও থাকবে না । নীলাম হয়ে যাবে ।

কোন উত্তর না দিয়ে চুপ ক'রে ভাবতে থাকে শেখর । এবং অনাদি-বাবুর সেই গম্ভীর ও বিষন্ন মুখ এইবার বেশ একটু তিক্ত হয়ে ওঠে । অনাদিবাবু বলেন—তার মানে, গাছতলায় গিয়ে দাঁড়াতে হবে । তোমার মত শিক্ষিত ও ইয়ং একটি ছেলে থাকতে বাপ-মা আর ছোট-ছোট দুটো ভাই গাছতলায় গিয়ে ঠাঁই নেবে, ভাবতে তোমার একটু লজ্জা পাওয়া উচিত নয় কি ?

লজ্জা ? শুধু লজ্জা কেন ? বুঝতে পারে শেখর, তার মনের ভিতরে যেন একটা জ্বালা ধরেছে । কোন শব্দ না ক'রে জীবনের একটা অসার উল্লাস যেন পুড়তে শুরু করেছে । সুখী হয়নি এই বাড়িটা, সুখী হতে পারে না । ছাত্র-পড়ানো রোজগারের এক'শো টাকা দিয়ে ডাহা উপোসের অভিশাপ থেকে যদিও বা বাঁচা যায়, কিন্তু সুখী হওয়া যায় না । শুধু টিকে থাকাই বেঁচে থাকা নয় । এবং গাছতলায় আশ্রয় নিয়ে বেঁচে থাকা মরে যাওয়ার চেয়ে ভাল নয় নিশ্চয় । বাবার আক্ষেপটা অকারণ বিরক্তির চিৎকার নয় । এই আক্ষেপ যে সত্যিই একটা আত্মনাদ ।

শেখর বলে—বাড়িটাকে নীলাম থেকে বাঁচাবার কি উপায় হতে পারে বুঝতে পারছি না ।

অনাদিবাবু—যদি সুদটা আর বাড়তে না দেওয়া হয়, তবে ব্যাঙ্ক কিছু বলবে না । আপাতত নীলাম থেকে বাড়িটা বেঁচে যাবে । এখন প্রতিমাসে সুদ দাঁড়িয়েছে প্রায় চল্লিশ টাকা । যদি অন্তত এই চল্লিশটা টাকা মাসে মাসে দিয়ে ফেলা যায়, তবে ব্যাঙ্ক আপাতত তুষ্ট থাকবে ।

শেখর—তাই'লে তাই কর।

চৈঁচিয়ে ওঠেন অনাদিবাবু—আমি কি করবো? আমাকে একথা বলতে তোমার লজ্জা পাওয়া উচিত।

শেখর বলে—তার মানে আমিই দেব।

অনাদিবাবু—কোথেকে দেবে? তোমার ঐ ছেলে-পড়ানো রোজগার একশো টাকা থেকে?

শেখর—হ্যাঁ।

অনাদিবাবু—তার মানে সংসারের ভাত-কাপড়ের খরচের জন্তু এখন থেকে মাত্র ষাটটা টাকার বেশি তুমি দিতে পারবে না।

শেখর হাসে—শেষ পর্যন্ত তাই তো দাঁড়ালো।

অনাদিবাবু—বাপ-মা-ভাইদের ওপর সত্যি সত্যি মনের দরদ থাকলে তুমি একথা বলতে পারতে না শেখর। বলাইবাবুর ছেলে পরেশটা আজ প্রায় চার বছর হলো সন্ন্যাসী হয়ে গিয়ে হরিদ্বারে থাকে। সেই পরেশও বলাইবাবুক প্রতি মাসে হুঁশো টাকা পাঠায়। কিন্তু তুমি...

অনাদিবাবুর কথাগুলি কাঁটাগাছের ডালের আঘাতের মত শেখরের বুকের ভিতরটাকে যেন ঝাঁচড়ে চিরে ক্ষতাক্ত ক'রে দিচ্ছে। সাধ ক'রে একটা অতি-চতুর সুন্দর মেয়ের ছলছল চোখের ছলনার কাছে নিজেরই সুস্থ-বুদ্ধিটাকে বলি দিয়ে এসেছে শেখর। যাদবপুরের লেবরেটরির চাকরিটাকে অবস্খী সরকারের অমুরোধের মোহে এভাবে ছেড়ে না দিলে আজ অনায়াসে ব্যাঙ্কের দেনা শোধ করবার প্রতিজ্ঞা অনাদিবাবুর কাছে এই মুহূর্তে ঘোষণা ক'রে দিতে পারতো শেখর, এবং অনাদিবাবুর মুখে অগাধ প্রসন্নতার হাসি ফুটিয়ে তুলতে পারতো।

ইঠাং চৈঁচিয়ে ওঠেন অনাদিবাবু—তোমার নিজেরই জীবনের ওপর তোমার কোন দরদ নেই শেখর।

চমকে ওঠে শেখর; এবং চোখ দুটোও থর থর ক'রে কেঁপে ওঠে।

অনাদিবাবুর অভিযোগ এক বিন্দুও অতিশয়োক্তি নয়। নিজেরই ওপর কোন দরদ নেই শেখরের। শেখুর মিত্রের জ্ঞাত যে নারীর মনে এক কোঁটাও মায়া নেই, সেই নারীকেই ভালবাসতে ইচ্ছা ক'রে, এই ভুলের অভিশাপ চরম হয়ে উঠেছে। গল্পে শোনা যায়; সুন্দরী নর্তকীর একটি কটাক্ষের ইঙ্গিতে কত রাজা-মহারাজা তার সর্বস্ব সেই নারীর পায়ের কাছে ঢেলে দিয়ে ফতুর হয়ে গিয়েছে। সেই রকমেরই একটা ঘটনা কি শেখর মিত্রের মত বিজ্ঞান-জানা মানুষের যুক্তি-বুদ্ধির শক্তি লোপ করে দিল? শুধু ঠকবার জ্ঞাত, শুধু নিজেকে রিক্ত ক'রে দিয়ে কান্দাল হয়ে যাবার জ্ঞাত একটা নেশায় পেয়ে বসলো জীবনটাকে?

জোর ক'রে, যেন নিজেরই উপর মায়া ছড়িয়ে দিয়ে শাস্ত হতে চেষ্টা করে শেখরের মন। না, আর নয়। তা ছাড়া আর ভাববার আছেই বা কি? অবস্খী সরকারের ভালবাসার ইতিহাস নিজের কানেই শোনা হয়ে গিয়েছে। সে ভালবাসার পরিণাম প্রায় তৈরী হয়েই গিয়েছে। নিখিল মজুমদার নামে একটি মানুষকে আপন ক'রে নিয়ে ধন্য হয়ে যাবে অবস্খী সরকারের জীবন। রক্তমঞ্চের শেষ অঙ্কের শেষ হয়ে এসেছে, ড্রপ সীন পড়তে আর দেরি নেই। শেখরের জীবনেও মনের ভুলে এক নারীকে ভালবাসবার ইচ্ছাটা নিজেরই বিক্রমে মরে গিয়ে এইবার কবরের মাটিতে মিশে যাবে।

মিশে গিয়েছে বোধ হয়। বুঝতে পারে শেখর; এতক্ষণের মনের ভিতরে সেই কামড় শাস্ত হয়ে গিয়েছে। এবং মনেও পড়ে, রেডিয়েশন সম্বন্ধে একটা প্রবন্ধ অর্ধেক লেখা হয়ে পড়ে আছে। সেই লেখাটা সম্পূর্ণ করলে কেমন হয়? লেখাটা এদেশের কোন কাগজে না নিক, বিদেশের কোন কাগজে নেবে বলেই তো মনে হয়। এবং তাহ'লে অন্তত শ' পাঁচেক টাকা কি পাওয়া যাবে না?

টাইপিস্ট চারুবাবুর কথাগুলি শুনতে বেশ ভালো লাগে অবন্তীর। সাদাসিধা সরল মেজাজের বুড়ো মানুষ। আজকালকার মেয়েদের উপর একটুও রাগ নেই তাঁর মনে। আজকালকার মেয়েরা চাকরি করে, দেশের এই নতুন রীতির হাওয়া খুব পছন্দ করেন চারুবাবু। যখন তখন অবন্তীর কাছে অবন্তীরই প্রশংসা করেন—এই তো চাই মা, নিজের পায়ে দাঁড়াতে হয়, মেয়ে হলেই যে ঘরকুনো হয়ে পরের গলগ্রহ হয়ে পড়ে থাকতে হবে, এমন কোন কথা নেই।

সেদিন কথায় কথায় নিজের এক ভাগ্নের নামে একটা গল্প বললেন টাইপিস্ট চারুবাবু, আর সেই গল্প শুনে চমকে ওঠে অবন্তী, তার পরেই মনে মনে হেসে ফেলে। মামা জানানো না যে, তাঁর ঐ ভাগ্নেই অবন্তী সরকারের ভালবাসার পাত্র হয়ে প্রতি সন্ধ্যায় পার্ক সার্কাসের এক নতুন বাড়ির এক ফ্ল্যাটের একটি সুন্দর ক'রে সাজানো ঘরের নিভতে বসে অবন্তীর মুখের দিকে তাকিয়ে থাকে।

চারুবাবু বললেন—আমার এক ভাগ্নে আছে, তার নাম নিখিল মজুমদার, বড় ভাল ছেলে। সেও দেখছি প্রতিজ্ঞা ক'রে বসে আছে যে, রোজগারে মেয়ে ছাড়া আর কাউকে বিয়ে করবে না।

অবন্তী হেসে হেসে প্রশ্ন করে—আপনার ভাগ্নের মনে এরকম আইডিয়া দেখা দিল কেন? ভদ্রলোক বোধহয় নিজে কোন কাজ না ক'রে ঘরে বসে থাকতে চান?

চারুবাবু—না, মোটেই তা নয়। ভাগ্নে বাবাজীর বক্তব্য এই যে, রোজগারে জীব ভালবাসাই হলো সত্যিকারের ভালবাসা। স্বামী খাওয়ায় পরায় বলে বাধ্য হয়ে যে ভালবাসা বেশির ভাগ জ্বী বাসে, সেরকম ভেজাল ভালবাসা নয়।

—বাঃ ! ঠাট্টার ভঙ্গীতে অবন্তী কথাটা বললেও, ঐ ছোট্ট কথাটা যেন একটা অভিনন্দনের সুরে বেজে ওঠে । নিখিল মজুমদারের মন চিনতে পারা গেল । কী সুন্দর মন !

সেদিনই সন্ধ্যাতে কী সুন্দর একটা উৎসবের মতো সাড়া জেগে উঠলো পার্ক সার্কাসের নতুন বাড়ীর ফ্ল্যাটে সুন্দর ক’রে সাজানো ঘরে । চারু হারু আর নরু নিখিলের সঙ্গে ক্যারাম খেলায় মেতে ওঠে । নরু হঠাৎ একটা আনন্দের কথা টেঁচিয়ে বলেই ফেলে—
আমরা জানি নিখিলদা, শিগগির আপনি আমাদের কে হবেন ?
চারু ও হারু হেসে হেসে খমক দেয়—চুপ কর বোকা !

নিখিল মুগ্ধভাবে হাসে, আর অবন্তী সরকার মুখ লুকিয়ে হাসে ।

নিবারণবাবুও এই ঘরের ভিতরে এসে বসে রইলেন অনেকক্ষণ । নিখিলের সঙ্গে গল্পও করলেন অনেকক্ষণ । তিনি জানেন, সবই জানেন, অবন্তী সরকার নিজের মুখে তাঁর কাছে সব কথা বলে দিয়েছে । এবং শুনে খুশি হয়েছেন নিবারণবাবু । ভগবানের অশেষ দয়া । নইলে নিখিলও এত ভাল একটা কাজ এত সহজে পেয়ে যাবে কেন ? আর, সেই নিখিল তাঁদের আপন জন হয়ে যাবার জন্য এত আগ্রহই বা দেখাবে কেন ?

যখন ঘরে আর কেউ থাকে না, শুধু সোফার উপর পাশাপাশি বসে নিখিল আর অবন্তী গল্প করে, তখন ঘড়ির দিকে তাকিয়ে বোঝা যায়, রাত মন্দ হয়নি ।

নিখিল বলে—কি ভাবছো অবন্তী ?

অবন্তী বলে—আমার ভাগ্যের কথাটাই ভাবছি । অদ্ভুত !

নিখিল—তাহ’লে আমার ভাগ্যের কথাও ধর ।

নিখিলের মূর্তিটাকে আজ দেখতে বেশ নতুন রকমের মনে হয় । মুখের হাসিটাও নতুন । চোখের দৃষ্টিও যেন নতুন প্রাণ পেয়েছে । এবং কথা বলবার ভঙ্গীটাও অভিনব । বেশ মাথা উঁচু ক’রে আর

অবস্তীর মুখের দিকে সোজা, বড় স্পষ্ট ও বড় স্বচ্ছন্দ একটি আগ্রহের উজ্জলতা নিয়ে তাকিয়ে থাকে নিখিল। অবস্তী সরকারের কাছে কৃতজ্ঞতার ভারে বিনত নিখিলের সেই মূর্তি আর নেই। নিখিলের ভালবাসার অধিকার যেন নতুন-পাওয়া একটা গর্বের জোরে এতদিনে টান হয়ে দাঁড়াতে পেরেছে। নিখিলের যে মন এতদিন যে আক্ষেপ সহ্য করতে গিয়ে বার বার স্রিয়মান হয়েছে; সেই মন এইবার একটি সুন্দর আশার দর্প নিয়ে জেগে উঠেছে। অবস্তী সরকারের আশার পথ থেকে যে শেষ বাধা সরে গিয়েছে, সে-কথা এখনও জানে না অবস্তী। যাদবপুরের লেবরেটরির চাকরিটা পেয়েছে নিখিল। আজ অনায়াসে নিজের থেকেই হাত এগিয়ে দিয়ে অবস্তীর হাত ধরে জিজ্ঞেস করতে পারবে নিখিল— আর দেরি ক’রে লাভ কি অবস্তী? বাবাকে বল, বিয়ের দিনটা স্থির ক’রে ফেললেই হয়।

এতদিন ধরে নিখিলের যে মাথা একটু হেঁট হয়ে থাকতো, সেই মাথাকেই উচু ক’রে অবস্তীর মুখের দিকে তাকিয়ে হেসে হেসে প্রশ্ন করে নিখিল—কি ভাবছো অবস্তী?

কল্পনা করতে পারে নিখিল, শোণামাত্র কত খুশি হয়ে উঠবে অবস্তী, এবং হয়তো একটু বিস্মিত হয়ে চমকেও উঠবে। আর, বুঝতে পেরে ধ্বংস হয়ে যাবে, তার ভালবাসার মানত এতদিনে সফল হলো।

নিখিলের জীবনের একটা উল্লাস যেন বহুদিনের অভিমান থেকে মুক্ত হয়ে ছ’চোখের চাঞ্চল্যের মধ্যে বার বার ছটফট করছে। অবস্তীর উপকার গ্রহণ করে এতদিন যে বিস্ময় সহ্য করেছে নিখিল, এইবার অবস্তীকে সেই বিস্ময় সহ্য করতে হবে। যে-কোন উপকার আর যে-কোন উপহার এইবার অবস্তীর কাছে নিষ্প্রভ এসে স্বচ্ছন্দে বলতে পারবে নিখিল—এই নাও অবস্তী, আমার দেওয়া উপহার। অবস্তীকে উপহারে আর উপকারে সুখী করবার ক্ষমতা আজ পেয়েছে নিখিল মজুমদার।

অবন্তী হেসে ফেলে—একটা গর্বের কথা বলবো ?

নিখিল—বল ।

অবন্তী—আমার গর্ব, আমি যা চেয়েছিলাম, তার সবই পেলাম । প্রতিজ্ঞা করেছিলাম, নিজে রোজগার ক’রে বাবা আর ভাইগুলোর জীবনে একটু আনন্দ এনে দেব । প্রতিজ্ঞা করেছিলাম, যাকে ভালবাসবো তাকেও...।

নিখিল হাসে—বলেই ফেল, লজ্জা করবার কি আছে ?

অবন্তী—তাকেও আমার নিজের মনের মতন তৈরী ক’রে নেব ।

নিখিল আশ্চর্য হয়—তার মানে ?

অবন্তী—তাকেও বড় ক’রে তুলবো ।

নিখিল—এ যে আরও দুর্বোধ্য হয়ে গেল ।

অবন্তী হাসে—তার ভাগ্যকেও আমিই বড় ক’রে দিয়েছি । এই আমার গর্ব ।

নিখিল—কিছুই বুঝলাম না অবন্তী ।

অবন্তী—তোমার এই সার্ভিসটা আমারই চেষ্টায় পেয়েছ, সে খবর তুমি জান না । কোন দিন তোমাকে বলিনি, বলবোও না ভেবেছিলাম । কিন্তু...।

নিখিলের উচু মাথার উল্লাস যেন হঠাৎ ভয় পেয়ে কেঁপে ওঠে । এতক্ষণ মনের ভিতরে উতলা হয়ে ওঠা এত সুন্দর গর্বের বাতাসটা যেন হঠাৎ ধুলোয় ভরে গেল । এ কি বলছে অবন্তী ? অবন্তীর চোখ দুটো যেন বিজয়িনী জাছুকরীর চোখের মত জ্বলজ্বল করছে । নিখিলের সৌভাগ্য যেন সত্যিই অবন্তীরই একটা কৌতূকের সৃষ্টি ।

নিখিল বলে—কি বলছিলে বল ।

অবন্তী—কিন্তু আজ আর বলতে বাধা নেই । আমার সব আশা সফল হয়েছে নিখিল । আমার নিজের জীবনের আনন্দ, আমি যাদের ভালবাসি তাদের জীবনের আনন্দ, সবই আমার নিজের

হাতের গড়া। আমার মত একটা সাধারণ মেয়ে, এর চেয়ে বেশি আর কোন্ গর্ব আশা করতে পারে বল ?

নিখিল হঠাৎ গম্ভীর হয়ে যায়—আমি সত্যিই কল্পনাও করতে পারিনি, কিছুতেই বিশ্বাস করতে পারছি না যে, আমার চাকরিটা তোমার চেষ্টায় হয়েছে।

অবন্তী—বিশ্বাস কর নিখিল।

নিখিল—বিশ্বাস করতে চাই, কিন্তু...।

অবন্তী হাসে—হ্যাঁ, এর মধ্যে একটা কিন্তু আসছে ঠিকই। সেটাও একটা গল্প।

নিখিল—শুনি।

অবন্তী—এক ভদ্রলোক। বেশ লোক। অদ্ভুতও বলতে পারা যায়। সে ভদ্রলোক আমার অনুরোধ ঠেলতে পারেন না।

চুপ করে অবন্তী সরকার। নিখিল মজুমদারের চোখের দৃষ্টি হুঃমহ কৌতূহলে জ্বলজ্বল করে।—গল্পটা স্পষ্ট ক'রে না বললে কিছুই বুঝতে পারছি না।

অবন্তী—সে ভদ্রলোক খুব কোয়ালিফাইড। সায়েন্সে রিসার্চ স্কলার। আমি যে কাজটা পেয়েছি, সে কাজটার জন্য সেই ভদ্রলোকও প্রার্থী ছিল। কাজটা তারই ভাগ্যে অবধারিত ছিল। কিন্তু মজার ব্যাপার এই যে....।

অবন্তী সরকারের মুখের হাসিটা হঠাৎ আরও ছটফট ক'রে বেজে ওঠে—ইন্টারভিউ-এর দিন সেই ভদ্রলোক আমার অনুরোধে ইন্টারভিউ না দিয়েই সরে পড়লো।

নিখিল—তারপর ?

অবন্তী—ঠিক এইরকমই কাণ্ড আবার করতে হলো তোমার চাকরিটার জন্য। ঐ ভদ্রলোকই আবার এই কাজটার জন্য দরখাস্ত করেছিল।

টেনিয়ে ওঠে নিখিল—শেখর মিত্র ?

অবন্তী—হ্যাঁ। তোমার কাছ থেকে যেদিন গুনলাম যে শেখর মিত্র নামে একজন খুব কোয়ালিফাইড ক্যানডিডেট এই কাজের জন্ত চেষ্টা করছে, সেদিন আমিই শেখর মিত্রকে চিঠি দিয়ে ডেকে এনে অনুরোধ করলাম। ভদ্রলোক খুশি হয়ে রাজি হয়ে গেল। আমার কথায় শেখর মিত্র কাজটা নেয়নি বলেই তুমি পেয়ে গেলে। নিখিল মজুমদার ছ'চোখের নিখর দৃষ্টি দিয়ে যেন গিলে গিলে অবন্তী সরকারের মুখের হাসি আর এই গল্পের শব্দগুলিকে বুঝবার চেষ্টা করে।

অবন্তী বলে—তুমি একটু আশ্চর্য হয়ে গিয়েছো বলে মনে হচ্ছে।

নিখিল—একটু নয়, যথেষ্ট আশ্চর্য হচ্ছি।

অবন্তী—কেন ?

নিখিল—ছনিয়াতে এমন বোকা মানুষও আছে।

অবন্তী—তার মানে ?

নিখিল—তার মানে, ঐ শেখর মিত্র, এরকম একেবারে নিঃস্বার্থ পরোপকারী একটা বেকুব।

অবন্তী—হ্যাঁ, পরোপকারী বলতে পার, বেকুবও বলতে পার। কিন্তু...

আবার একটা কিন্তু দিয়ে মুখের হাসিটাকে একটু জটিল ক'রে তোলে অবন্তী সরকার।—কিন্তু, ঠিক একবারে নিঃস্বার্থ বলা যায় না।

নিখিল—কেন ?

মুখে রুমাল চাপা দেয় অবন্তী—আর প্রশ্ন করো না নিখিল। উত্তর দিতে বড় লজ্জা করবে আমার।

নিখিল মজুমদারের চোখের কোঁতুহল এইবার তীক্ষ্ণ হয়ে হাসতে থাকে।—লজ্জার ব্যাপার আছে তাহলে ?

অবন্তী—হ্যাঁ।

নিখিল—কি ?

অবন্তী—আমার বিশ্বাস, ভদ্রলোক যেন একটা আশা নিয়ে……যাক, আর বলতে পারবো না নিখিল।

নিখিল গম্ভীর হয়ে বলে—তোমার মুখ দেখে মুগ্ধ হয়েও বোধ হয় ?

অবন্তী—হ্যাঁ তাই, তাতে কি আসে যায় ? আমার কি দোষ বল ?

নিখিল—কেমন যেন অদ্ভুত ভঙ্গীতে কটকট ক’রে হাসতে থাকে—সত্যি কথা। তোমার মুখ দেখে কেউ মুগ্ধ হয়ে যদি পাগল হয়ে যায়, তবে তোমার অপরাধ হবে কেন ? ভদ্রলোক নিজের মনের ভুলেই নিজেকে পাগল করেছেন।

চৈঁচিয়ে হেসে ওঠে অবন্তী—আমিই বা সেই পাগলামির স্রোযোগ নিতে ছেড়ে দেবো কেন ?

হাতের ঘড়ির দিকে তাকায় নিখিল মজুমদার। আনমনা হয়ে চুপ ক’রে কিছুক্ষণ কি-যেন ভাবতে থাকে। তারপর হঠাৎ প্রশ্ন ক’রে বসে—শেখর মিত্র দেখতে কেমন ?

অবন্তী হাসে—দেখতে ভাল বৈকি। দেখতে বেশ চালাকও।

নিখিল—বয়স একটু বেশি হয়েছে বোধহয়।

অবন্তী চৈঁচিয়ে ওঠে—না না। তোমার চেয়ে বেশি নয়, বরং একটু কম বলেই মনে হয়।

নিখিল—বাড়ির অবস্থা কেমন ?

অবন্তী—সে-সব খবর রাখি না। কিন্তু একটু গরীব বলেই মনে হয়।

নিখিল—আমারও তাই মনে হয়। নইলে পরের উপকার করবার জ্ঞান এরকম মূর্খের মত নিজের ক্ষতি কে আর করে ? শক্ত ক’রে চিবিয়ে চিবিয়ে কথাগুলি উচ্চারণ করে নিখিল।

হঠাৎ উঠে দাঁড়ায় নিখিল মজুমদার—রাত হয়েছে। চলি এবার।

অবন্তী—এমন কিছু রাত হয়নি।

নিখিল—তা ঠিকই ; তবে মিউজিক কনফারেন্সের একটা টিকেট কিনেছি। তাই যেতে হচ্ছে।

দরজার কাছে দাঁড়িয়ে অবন্তী সরকারের মুখের দিকে তাকিয়ে কি

যেন বলতে চেষ্টা করে নিখিল। এবং বোধ হয় ঠিক ভাল ক'রে বলবার মত ভাষা মুখের কাছে পায় না। নিখিলের চোখের চাহনির ভঙ্গী আর ভীষ্ণতা আর একবার দপ্ ক'রে হেসে ওঠে। তার পরেই যেন ভয় পাওয়া মানুষের চোখের মত থরথর করে। অবস্তীর ঐ সুন্দর মুখ, কালো চোখ আর চোখের তারার বুদ্ধির দীপ্তি ভয় করবার মত বস্তু নয়, কিন্তু নিখিলের চোখ দুটো সত্যিই যে বড় বেশি ভয় পেয়েছে। থরথর করে নিখিলের ঠোঁট দুটো।

যাবার আগে একটা কথা বলেই ফেলে নিখিল, আর বলে ফেলেই হো হো ক'রে হেসে ওঠে।—অদ্ভুত গল্প শোনালে অবস্তী। শেখর মিত্র নামে একটা লোক তোমাকে ভালবেসে ফেলেছে অথচ তুমি তাকে ভালবাস কিনা, সেদিকে তার কোন খেয়ালই নেই।

—হ্যাঁ। কথাটা বলে লজ্জা পেয়ে হাসতে থাকে অবস্তীও।

নিখিল বলে—সবচেয়ে অদ্ভুত, আরও মজার কথা, তুমি তাকে ভালবাসতে পারনি।

ক্রকুটি করে অবস্তী—আবার আমার কথা বারবার টেনে এনে মিছিমিছি কেন....।

নিখিল মজুমদার হাঁটতে শুরু করে, এবং মুখের হাসিটাও যেন না থেমে সঙ্গে সঙ্গে শব্দ ক'রে চলতে থাকে। অবস্তীর দিকে অদ্ভুত-ভাবে তাকিয়ে ব্যস্তভাবে কথা শেষ করে নিখিল—সত্যিই শেখর মিত্র একটা অদ্ভুত...।

কথাটা ঠিক শেষ হলো না, কিন্তু চলে গেল নিখিল মজুমদার।

ভের

অনসুয়া বলে—আপনি যে আমাদের ভুলেই গিয়েছেন ?

শেখর—কেমন ক’রে বুঝলে ?

অনসুয়া—সেই যে কবে বোনপোর অন্নপ্রাশনের দিনে এসেছিলেন, তারপর এই এতদিন পরে দ্বিতীয় শুভাগমন।

শেখর—একটা শুভ খবরের আঁচ পেলাম এতদিনে, তাই ভাল ক’রে জানতে এসেছি।

অনসুয়া হেসে মুখ ফেরায়। প্রভা এসে বলে—কিন্তু উনি এখন নিজেই শুভ খবরের শত্রু হয়ে উঠেছেন। এখনও পর্যন্ত মন স্থির করতে পারছেন না।

শেখর হাসে—তার মানে ?

প্রভা—উনি বলছেন, অজানা অচেনা একটা মানুষকে কেমন ক’রে...

শেখর—ঠিকই তো বলেছে। বেচারী একটু চেনা-জানা না ক’রে একটা কাণ্ড ক’রে ফেলতে রাজি হচ্ছে না, ভালই তো।

অনসুয়া—আপনিই বলুন, আমি বললে আপনার বোন বিশ্বাস করে না।

প্রভা—পাত্র তো বিয়ে করবার জন্য পাগল, কিন্তু উনিই রাজি নন।

শেখর—পাগল হলো কেন ?

প্রভা—গান শুনে। মিউজিক কনফারেন্সে অনসুয়ার ঠুংরি শুনে পাত্রমশাই নিজে যেচে অনেক কষ্ট ক’রে ঠিকানা জোগাড় ক’রে একেবারে ওঁর অপিসে হাজির হয়েছে। পাত্র একেবারে অচেনাও নয়। পাত্রের দাদা ওঁরই সঙ্গে দিনাজপুরের কলেজে এক ক্লাসে পড়তেন।

শেখর—পাত্র কি করে ?

প্রভা—আগে তেমন কিছু করতো না। কিন্তু এখন খুব ভাল একটা সার্ভিস পেয়েছে। মাইনে চার-পাঁচশো টাকার মত।

শেখর—বাস, তবে আর অসুবিধার কি আছে? পাত্রের সঙ্গে অনসূয়ার একটু ভাব করিয়ে দাও। ওরা নিজেরাই একটু চেনা-জানা ক'রে একেবারে নিঃসন্দেহ হয়ে যাক।

অনসূয়া চৈঁচিয়ে ওঠে—কখখনো না। ওসব বেহায়াপনা আমার দ্বারা সম্ভব হবে না।

শেখর—তাহলে পাত্রকে বলে দিলেই তো হয় যে, মেয়ে রাজি নয়।

প্রভা হাসে—তাতেও রাজি নয় অনসূয়া।

শেখর—তার মানে?

অনসূয়া—মানে খুব সোজা। এত তাড়াতাড়ি করবার কি আছে? দেখাই যাক না, ভদ্রলোকের মন কতদিন পাগল হয়ে থাকতে পারে।

শেখর—তাই বল। ধীরে স্তৃষ্ণে গুণতে হবে, এই তোমার বক্তব্য।

অনসূয়া—হ্যাঁ। কিন্তু আপনার কোন বক্তব্য তো আজ পর্যন্ত শুনতেই পাওয়া গেল না। একেবারে ফুল স্টপ দেগে বসে আছেন। হাসিঠাট্টার উল্লাসটা যেন শেখর মিত্রের মনের ভেতর গিয়ে হঠাৎ একটা হোঁচট খায়। আনমনার মত চমকে ওঠে শেখর। যেন একটা পুরনো ক্ষতের উপর আঘাত লেগেছে। হ্যাঁ, ফুল স্টপ; অনসূয়া জানে না যে, শেখর মিত্রের জীবনে একটা আশার কবিতা হঠাৎ ভাষা হারিয়ে মিলের আগেই স্তব্ধ হয়ে গিয়েছে। অনসূয়া জানে না, তারই বান্ধবী অবন্তী সরকার এখন একটা নির্ভুর কৌতূকের গল্প হয়ে শেখর মিত্রের স্মৃতির আড়ালে পড়ে আছে।

শেখর জোর ক'রে হাসে—আমার বক্তব্য থাকলেও কোন দিন শুনতে পাবে না।

অনসূয়া—তা জানি, মশাই ডুবে ডুবে জল খেতে খুব ওস্তাদ। যাক...আপাতত চা খান।

চা আনে অনসূয়া। চা খেতে খেতে গল্প করে শেখর। সে-সব গল্প একেবারে ভিন জগতের গল্প। হাইড্রোজেন বোমা থেকে শুরু করে দক্ষিণ মেরুর বরফের রহস্য পর্যন্ত সব কিছুই সেই গল্পের মধ্যে থাকে।

অনসূয়া হঠাৎ মুগ্ধ হয়ে বলে—আপনি বড় সুন্দর বুঝিয়ে বলতে পারেন। অবস্খীটা আজ এখানে থাকলে এই সব গল্প কত মজা করে শুনতে পেত।

বোধ হয় মনটা একটু অসাবধানে ছিল, তাই বলে ফেলে শেখর—অবস্খী সরকার কবে এসেছিল ?

অনসূয়া—অনেক দিন হলো আসে না। কে জানে ওর কি হয়েছে। মাঝে একদিন মিউজিয়ামের গেটের কাছে আমার সঙ্গে দেখাও হয়েছিল। কিন্তু, কী অদ্ভুত, খুব গম্ভীর হয়ে আর শুধু কেমন আছ বলেই তড়বড় করে সরে পড়লো।

প্রভাদের বাড়ির চা-এর আসর থেকে উঠে আবার কলকাতার রাতের পথে একা চলতে চলতে শেখর মিত্রের মনের ভিতর নীরব গল্পটা যেন ছটফট করে ওঠে। অবস্খী সরকার গম্ভীর হয়ে গিয়েছে কেন ? ও মেয়ের পক্ষে তো গম্ভীর হওয়া সাজে না।

পথের বাঁক ঘুরতে গিয়ে পিছনের গাড়ির শব্দে চমকে ওঠার পর শেখর মিত্রের মনটাও এই হঠাৎ বিষণ্ণতার ছোঁয়া থেকে মুক্ত হয়ে যেন হেসে হেসে নিজেকেই ঠাট্টা করে, অবস্খী সরকারের কথা ভেবে তোমারও এত গম্ভীর হওয়া আর সাজে না।

চৌদ্দ

পার্ক সার্কাসের মস্ত বড় নতুন বাড়ির ফ্ল্যাটে সুন্দর ক'রে সাজানো একটি ঘর। সোফার উপর বসে আছে যে সুন্দর মেয়ে, নাম যার অবন্তী সরকার, সে আজ সত্যিই বড় গম্ভীর। দুই কালো চোখের তারায় সেই বুদ্ধির দীপ্তি হঠাৎ বোকা হয়ে গিয়েছে, খুব বেশি চিকচিক করে না। অফিস থেকে অনেকক্ষণ হলো ফিরে এসেছে অবন্তী সরকার। সারা বাড়িটার জানালায় জানালায় সন্ধ্যার আলো ফুটেছে। অবন্তী সরকারের এই ঘরেও আলো জ্বলে। কিন্তু এই ঘরের সঙ্গে যেন বেশ একটু বেমানান হয়ে বসে আছে অবন্তী সরকার। এত নীরব, এত স্তব্ধ আর এত গম্ভীর মূর্তি রঙীন কভারে ঢাকা সোফার সঙ্গে ঠিক সাজে না।

শুধু তাই বা কেন? অবন্তী সরকারের ঐ রঙীন সাজের সঙ্গে, গলার হারের লকেটের ঐ পাথরের ঝিকঝিক হাসির সঙ্গে ওর এত গম্ভীর একটা মুখকেও মানায় না।

নিখিল মজুমদার নিশ্চয়ই এখন আর আসবে না। কেন আসবে না, সে রহস্যের কিছুই আজ আর অবন্তী সরকারের অজানা নয়। গত এক মাসের মধ্যে একটি দিন ভুল করেও এখানে আসেনি নিখিল মজুমদার। সেই ভাল সার্ভিসটা পাওয়ার পর থেকে কাজের দায় নিয়ে সারা দিনের অনেকটা সময় ব্যস্ত হয়ে থাকতে হয় ঠিকই। কিন্তু কাজ শেষ হবার পরেও তো অনেক সময় থাকে। বিশেষ ক'রে এই রকমের এক একটি সন্ধ্যার সময়ে। এর আগে প্রায় প্রতি সন্ধ্যাতেই ঠিক এইরকমই প্রথম আলো জ্বলবার লগ্নটা এগিয়ে আসতেই নিখিল মজুমদারের মূর্তি এই ঘরের দরজায় দেখা দিয়েছে। হাসিভরা উজ্জ্বল চোখে কৃতার্থতার আনন্দ

ভরে নিয়ে এই ঘরের সোফায় বসে অবস্তী সরকারের সঙ্গে গল্প ক'রে চলে গিয়েছে নিখিল। সেই নিখিল কেন এমন উদাস হয়ে গেল, জানতে পেয়েছে অবস্তী।

শেষ কবে এসেছিল নিখিল? খুব স্মরণ করতে পারে অবস্তী সরকার। নিখিল মজুমদারের চাকরি হবার প্রথম সপ্তাহের রবিবারের সন্ধ্যায়। তার পর আর নয়। সেই যে অদ্ভুতভাবে তাকিয়ে চোঁচিয়ে আর হেসে হেসে চলে গেল নিখিল, তারপর আসেনি।

নিখিলের সেই অদ্ভুত চাহনি, সেই উচ্চ হাসি, আর সেই ব্যস্ততার অর্থ সেদিন বোঝা যায়নি। কিন্তু আজ বোঝা যায়। নিখিলের আর এই বাড়িতে না আসার রহস্যটা বুঝতে বেশি দেরি হয়নি অবস্তীর। অফিসের টাইপিস্ট চাকরবাবুর সামান্য কয়েকটা কথা থেকেই একটা অসামান্য কাহিনীর মর্ম জেনে ফেলেছে অবস্তী।

আজ এতদিন পরে এই ঘরের সোফার উপর বসে গস্তীর অবস্তী সরকার স্মরণ করে, কী অদ্ভুত মানুষের মন! সেই রাতেই মিউজিক কন্ফারেন্সে গিয়ে ঐ নিখিল মজুমদার অনশ্রুয়াকে প্রথম দেখতে পেয়েছিল। সেই তো নিখিলের চোখে প্রথম অভিশাপ লাগলো। তার জের আজও মেটেনি। অফিসের টাইপিস্ট চাকরবাবুর কথায় প্রথম যেটুকু জানতে পেরেছিল অবস্তী, এই কদিনের মধ্যে খোঁজ নিয়ে তার চেয়ে আরও অনেক বেশি কিছু জানতে পেরেছে। মনে পড়ে, চাকরবাবু কদিন আগে তাঁর ভাগ্নের নামে যে নতুন গল্পটা বললেন।

—ছেলেদের মনের লীলা দেখে মরে যাই মা। আমার সেই ভাগ্নেই কিনা একটা মেয়ের গান শুনে মুগ্ধ হয়ে গিয়েছে, আর তাকে বিয়ে করবার জন্তু ব্যস্ত হয়ে উঠেছে।

চমকে উঠেছিল অবস্তী—কি বললেন?

চাকরবাবু—ভবানীপুরে আমারই বাড়ির পাশে থাকে যে শৈলেশ,

তার বোন অনসূয়া নামে মেয়েটি বেশ ভাল গান গাইতে পারে।

—অনসূয়া ! চেষ্টা করে ওঠে অবস্তী।

চারুবাবু—তুমি অনসূয়াকে চেন নাকি ?

অবস্তী—চেনা চেনা মনে হচ্ছে। কিন্তু সে মেয়ে তো রোজগারে মেয়ে নয়।

চারুবাবু—না, সেই জন্মেই তো আশ্চর্য হচ্ছে। আরও একটা কথা। আমার ভাগ্নে বাবাজি গাইয়ে বাজিয়ে মেয়েদের দস্তুর মত ঘেঁলাই করতো। অথচ দেখ, মাত্র একটিবার গান শুনেই...

চারুবাবুর কাছ থেকে কথায় কথায় আরও খবর শুনেছে অবস্তী। নিখিলের মা দিনাজপুর থেকে চলে এসেছেন, অনসূয়ার সঙ্গে নিখিলের বিয়ের সম্বন্ধ পাকাপাকি করবার জন্য।

একদিন চোরঙ্গীর পথের উপর একটু দূরে দাঁড়িয়ে অবস্তী। নিজের চোখেই দেখেছে, অনসূয়ার দাদা শৈলেশবাবু আর নিখিল একই ট্যাক্সি থেকে নেমে সিনেমা হাউসের ভিতরে ঢুকছে। আজ আর কোন সন্দেহ নেই, কেন নিখিল মজুমদার এই ঘরের দরজার কাছে এসে হেসে হেসে দাঁড়াবার সব দায় ভাল করেই ভুলে গিয়েছে।

নিখিল মজুমদার অবস্তী সরকারের চোখের নাগালে আর আসেনি। কিন্তু অবস্তী সরকার অনেকবার টেলিফোনে নিখিলের নাগাল পেয়েছে। প্রত্যেক বারই অবস্তীর প্রশ্নের উত্তরে নিখিল সেই একই উত্তর দিয়ে কথা শেষ করে দিয়েছে—নানা কাজে বড় ব্যস্ত আছি একেবারেই সময় পাই না।

কী সুন্দর সহজ ও সংক্ষিপ্ত মিথ্যা! নিখিল মজুমদার কল্পনা করতে পারে না যে, তার জীবনের নতুন গল্পের অনেক কিছুই অবস্তী সরকারের জানা হয়ে গিয়েছে। তাই অক্লেশে ওভাবে অত সহজ ও সরল একটা মিথ্যা কথাকে অনায়াসে অবস্তী সরকারের কানের উপর ছুঁড়ে দিতে পেরেছে নিখিল। অবস্তী সরকারের চোখে:

জ্বালা কখনও নীরব ধিক্কার দিয়ে হেসে ওঠে, আবার কখনও বা আরও তপ্ত হয়ে গলে পড়তে চায়।

অনসূয়ার গানের মধ্যে এমন অভিশাপ থাকতে পারে, কোনদিন স্বপ্নেও সন্দেহ করেনি অবন্তী। আর, নিখিল মজুমদার নামে মানুষটা তার মনের মধ্যে এত বড় পাগলামি লুকিয়ে রেখেছিল? অবন্তী সরকারের এত কল্পনা ও চেষ্টার গৌরবে গড়া সুখের জগৎ থেকে পালিয়ে যাবার ইচ্ছা হয় একটা গানের জগৎ?

অপমানের কামড়টা বুকের পাঁজরে পাঁজরে যেন রক্ত ঝরিয়ে দিচ্ছে। অনসূয়ার গান অবন্তী সরকারের ভালবাসার মানুষকে লুঠ ক'রে নিয়ে গিয়েছে। অবন্তী সরকারের এতবড় আশার স্বপ্ন, সব গর্ব যে ব্যর্থ হতে চললো।

সোফা থেকে স্তব্ধ শরীরটাকে তুলে নিয়ে জানালার কাছে এসে দাঁড়ায় অবন্তী। কোলাহলময় পথের ধোঁয়াটে কুহেলিকার দিকে তাকিয়ে, একটা প্রশ্নের সঙ্গে যেন মনে মনে সংগ্রাম করে অবন্তী। নিখিল মজুমদারকে ফিরিয়ে আনা যায় না?

চোখের সামনে শুধু ধোঁয়াটে কুহেলিকাই ছিল, ঝকঝকে মিরর নয়। নইলে নিজের চোখেই নিজের মুখটাকে এখন দেখতে পেয়ে চমকে উঠতো অবন্তী। ঠোঁটের উপর দাঁত বসে গিয়েছে, যেন একটা নতুন প্রতিজ্ঞার উল্লাস নিয়ে মনে মনে খেলা করছে অবন্তী।

ধিক্কাধিক করে চোখের তারা। আর, বারবার মনে পড়ে, শেখর মিত্র নামে একটি মানুষের কথা। আজও ডাকলে কি সে মানুষ না এসে পারবে? অবন্তীর অনুরোধকে ভক্তের মত পূজা করে যে মানুষ, সে কি আবার একটু সাহায্য করবে না? ঐ তো এই পৃথিবীতে এক জন মাত্র মানুষ, যার কাছে অনায়াসে দুঃখের কথা বলে দুঃখ থেকে উদ্ধারের দাবি করতে পেরেছে অবন্তী। সে তো একটা মাটির মানুষ, অবন্তীর উপকার করতে পারলেই ধন্য হয়ে যায়। ঐ একটি মানুষ, যার কাছে অবাধে, বিনা লজ্জায়, অসঙ্কোচে

সব কথা বলে দিতে পারে অবন্তী । ঐ একটি লোক, যে ভুল ক'রে
মনে মনে অবন্তীকে ভালবেসে বসে আছে ।

শেখর মিত্রের বাড়িতে যাবার দরকার নেই । চিঠি দিলেই যথেষ্ট ।
জানালার কাছ থেকে সরে এসে শেখর মিত্রের কাছে চিঠি লেখে
অবন্তী ।—আমার বিপদ । বিশ্বাস আছে, এই খবর শুনে নিশ্চয়
একবার আসবেন ।

পনর

বেশ একটু আশ্চর্য হয়েছে অনসূয়া এবং ভাবতে একটু অস্বস্তিও বোধ করে। নিখিল মজুমদার নামে এক ভদ্রলোক সত্যিই যে পাগলের মত কাণ্ড করছেন। এরই মধ্যে অনসূয়াকে সাতটা চিঠি লিখে ফেলেছে নিখিল মজুমদার। সব চিঠির বক্তব্য প্রায় একই। যদিও তোমার সঙ্গে আমার সাক্ষাৎ চেনা-শোনা নেই, যদিও আমার পরিচয় তুমি অনেক কিছুই জান না, এবং তোমার পরিচয়ও আমি অনেক কিছু জানি না, তবু সেটা কি এমন কোন বাধা যে আমাদের বিয়েই হতে পারে না? একেবারে সব জেনে-শুনে আপন হওয়া যায়, আবার একেবারে আপন হয়ে নিয়ে তারপর সব জানা-শোনা যায়, এই দুটোই কি সত্য নয়? আপন হবার পরেও কে কার জীবনের সবটুকু জানতে পারে অনসূয়া? আপন হবার আগে তো প্রায় কিছুই জানা যায় না। তুমি শত চেষ্টা ক'রে, এক বছর ধরে অপেক্ষা ক'রে, আর আমাকে চোখে দেখে ও আমার কথা শুনে আমাকে কতটুকুই বুঝতে আর চিনতে পারবে? একটু অজানা এবং কিছুটা না-বোঝা না থাকলে আপন হবার আনন্দ যে মধুর হয় না অনসূয়া।

নিখিলের চিঠি পড়তে খারাপ লাগে না, কথাগুলিকে অবিশ্বাসও করে না অনসূয়া, এবং কথাগুলির মধ্যে কোন ভুল আছে বলেও মনে হয় না। চোখে দেখে আর কথা শুনে মানুষকে কতটুকুই বা চেনা যায়?

ঘরের ভিতর একলা বসে অনেকদিন অনেকবার অনেকক্ষণ ধরে এই ভাবনা অনসূয়াও ভেবেছে। আর, গম্ভীর মুখটাকে বার বার

আঁচল দিয়ে মুছে নিজের মনকেও প্রশ্ন করেছে—কই, প্রভা বৌদির দাদা শেখর মিত্র মানুষটাকে এতদিন ধরে দেখে শুনেও চিনতে পারা গেল কি ?

একটা চেনা চিনতে পারা গিয়েছে ঠিকই ; মানুষটা যেন নিখুঁত মানুষ। মনের ভুলেও কোন মানুষকে বোধ হয় একটা টোকা দিয়ে ছুঁতে দিতে পারে না শেখর মিত্র। নিজের ছুঁতটাকে হাসি দিয়ে ঢেকে রাখে, আর পরের ছুঁতটাকে হাসিয়ে দেবার জন্তু সব সময় ব্যস্ত হয়ে রয়েছে।

কিন্তু সে চেনা নয়। শেখর মিত্রের মনের ভিতরে কোন ইচ্ছা কি লুকিয়ে নেই ? অনসূয়াকে কি শুধু বোনের ননদ বলে মনে করে শেখর মিত্র, তার বেশি কিছু মনে করতে ইচ্ছা করে না ?

সকলেই নিখিল মজুমদার নয়। সকলেই মুখ দেখে কিংবা গান শুনে পাগল হয়ে ওঠে না, আর পর পর সাতটা চিঠি লিখে ভালবাসার আশা জানিয়ে দিতে পারে না এমন মানুষও আছে নিশ্চয়, যে তার ভালবাসার আশা আর ইচ্ছাটাকেই সব চেয়ে নীরব ক’রে দিয়ে বুকের গভীরে লুকিয়ে রাখে, আর শত আঘাতে মুখ খুলে সে আশা ও ইচ্ছাটাকে মুখের ক’রে বাজিয়ে দিতে পারে না। শেখর মিত্র যদি এইরকমই নীরব মনের মানুষ হয়ে থাকে, তবে ? এই একটা প্রশ্ন ? অনসূয়ার জীবনের একটা বড় কঠিন প্রশ্ন। শুধু জানতে চায় অনসূয়া, প্রভা বৌদির দাদার মনে অনসূয়া নামে কোন মেয়ের নাম কোন ভাবনা ব্যাকুল ক’রে তোলে না। শেখর মিত্র আসে, হাসে, কথা বলে আর চলে যায়—এই মাত্র। এর মধ্যে আর কোন ইচ্ছার ছায়া নেই।

এই প্রশ্নের উত্তর আজও পায়নি অনসূয়া, এবং পায়নি বলেই বোধ হয় নিখিল মজুমদারের চিঠির উত্তরে আজ পর্যন্ত একটি চিঠিও লিখতে পারেনি অনসূয়া। প্রভা কতবার জিজ্ঞেস করেছে, কিন্তু নিখিল মজুমদারের ইচ্ছাটাকে মেনে নেবার জন্তু মাথা নেড়ে

একটা সুস্পষ্ট 'হ্যাঁ' জানাতে পারেনি ; অথচ 'না' বলে সব প্রশ্ন
থামিয়ে দিতে পারেনি ।

অস্বীকার করে না অনসূয়া, এবং নিজের চিন্তার ভাষাটাকে বেশ
স্পষ্ট বুঝতেও পারে । নিখিল মজুমদারকে বিয়ে করতে কোন
আপত্তি নেই ; শুধু যদি জানতে পারে অনসূয়া, এই বিয়ে
শেখর মিত্র নামে একটা মানুষের মনের কোন নীরব আশাকে
ব্যথিত ক'রে তুলবে না ।

নিখিল মজুমদারের চিঠির মধ্যে আর একটা বড় সুন্দর কথা লেখা
আছে । একেবারে অকপট মনের আবেগ নিয়ে স্বচ্ছন্দে লিখেছে
নিখিল মজুমদার—তুমি কি কাউকে ভালবাস ? এবং তোমাকেও
সে ভালবাসে ? যদি তাই হয়ে থাকে, তবে আমার কিছু বলবার
নেই । আমি খুশি হয়ে তোমার কথা ভুলে যাব ।

শেখর মিত্রকে ভালবেসেছে অনসূয়া, একথা বললে বেশি বলা হয়ে
যায় । তাই যদি হতো, তবে অনসূয়া এতদিন চুপ করে থাকতো
না । মানুষটাকে ভাল লাগে, এর বেশি কিছু নয় । এবং এটাও
সত্য যে, শেখর মিত্রকে ভালবাসার সাহস পেত অনসূয়া, যদি
কোন মুহূর্তে বিশ্বাস করতে পারতো যে, শেখর মিত্র অনসূয়াকে
সত্যিই ভালবাসতে চায় । কিন্তু এমন উপলব্ধির মুহূর্ত অনসূয়ার
জীবনে কোন দিন কোন বিষয় নিয়ে সত্য হয়ে ওঠেনি ।

আরও একটা অদ্ভুত কথা আছে নিখিল মজুমদারের চিঠিতে । লেখাটা
যেন খুব ভয়ে-ভয়ে আর বড় বেশি করুণ হয়ে মানুষের ভাগ্যের
অদ্ভুত একটা জটিলতার বেদনা বলে দিতে চেষ্টা করেছে ।—এমন
যদি হ'য়ে থাকে অনসূয়া, তোমাকে কেউ একজন ভালবাসে, অথচ
তুমি তাকে ভালবাসো না, তবে আমাকে বিয়ে করতে রাজি হওয়া
তোমার উচিত কিনা, সেটা তুমি ভেবে দেখবে । কিন্তু আমি রাজি
হয়েই আছি । অনসূয়ার চিন্তার সমস্যাটাকে খুব সরল ক'রে দিয়েছে
নিখিল মজুমদারের চিঠি । ঠিকই তো, একবার লজ্জার মাথা খেয়ে

শেখর মিত্রের মনটাকেই যাচাই ক'রে নিলেই তো হয়! যদি শেখর মিত্রের মনে অনসূয়া নামে একটা ভাবনা থেকে থাকে, আর সে ভাবনার মধ্যে ভালবাসার ইচ্ছা থেকে থাকে, তবে অনসূয়ার কর্তব্য সোজা ও সরল হয়ে যায়। হয়, শেখর মিত্রের ভালবাসার ইচ্ছাকে অগ্রাহ্য ক'রে নিখিল মজুমদারকে বিয়ে করতে হবে; নয়, নিখিল মজুমদারের ভালবাসার দাবি তুচ্ছ ক'রে শেখর মিত্রকেই বিয়ে করতে হবে। ভাগ্যি ভাল, অনসূয়ার পঁচিশ বছর বয়সের মন নিজে সাধ ক'রে এই পৃথিবীর কাউকে ভালবেসে অঙ্ক হয়ে যায়নি। তাই ভালবাসার জন্তু এগিয়ে যাবার পথটা এখনও সোজা ও সরল আছে।

এইবার একটা কলম হাতে তুলে নিতে পারে অনসূয়া এবং একটা চিঠিয়ে লিখে ফেলে। কিন্তু নিখিল মজুমদারকে নয়; নিখিলকে চিঠি লিখে উত্তর দিতে আরও একটু দেরি করতে হবে। প্রভা বৌদির দাদা শেখর মিত্রকেই চিঠি লেখে অনসূয়া।—আপনি একদিন আসুন। কেন আসতে বলছি সে-কথা এই চিঠিতেই জানিয়ে দিচ্ছি। উত্তরটা তৈরী ক'রে নিয়ে আসবেন। আমার প্রশ্ন, হঠাৎ আমার গান শুনে খুশি হয়েছেন যে ভদ্রালোক; তাঁকে বিয়ে করা আমার উচিত হবে কি? আপনার কোন আপত্তি নেই তো?

বোল

শৈলেশের হাতে একটা চিঠি। চিঠি দিয়েছে নিখিল, আজই সন্ধ্যার সময় এখানে আসবে নিখিল।

প্রভা মুখ টিপে হাসে—পীরিতের দায়। বড় অস্থির হয়ে উঠেছে বেচারী।

শৈলেশ একটু বিরক্ত ভাবে বলে—কিন্তু অনসূয়া এরকম করছে কেন? হ্যাঁ কিংবা না, একটা কথা স্পষ্ট ক'রে বলে দিলেই তো হয়।

প্রভা আবার মুখ টিপে হাসে—দাদা যে পরামর্শটা দিয়ে গেলেন, সেটা তুচ্ছ করছো কেন?

শৈলেশ—কিসের পরামর্শ?

প্রভা—অনসূয়ার সঙ্গে নিখিল বাবুর একটু ভাব-সাব হবার সুযোগ ঘটিয়ে দাও। নিজেরাই আলাপ ক'রে যতটুকু পারে ছুজনকে বুঝে নিক। শুধু অনসূয়াকে গোঁয়ার বলে বকা দিয়ে লাভ কি?

শৈলেশ—তাহ'লে কি করা যায়? তুমিই একটা পরামর্শ দাও।

প্রভা হাসে—চল, আজ সন্ধ্যায় আমরা ছুজন বাইরে চলে যাই, সিনেমায় কিংবা গড়পারের মাধুরীদির বাড়িতে।

শৈলেশ—তা'তে কি হবে?

প্রভা—নিখিল বাবু সন্ধ্যা বেলায় এখানে এসে অনসূয়াকে একা দেখতে পেয়ে ……।

খিলখিল ক'রে হেসে উঠে প্রভা তার পরিকল্পনার কৌতুকে ছটফট ক'রে ওঠে।—তার পর দাদার পরামর্শটাই সত্যি হয়ে যাবে তোমার গোঁয়ার বোনের ভয় ভেঙ্গে যাবে, আর ভাব-সাব হয়েও যাবে।

সন্ধ্যা হবার আগেই যখন শৈলেশ আর প্রভা সিনেমার ছবি

দেখতে চলে গেল, তখন একটু আশ্চর্য হলেও তার মধ্যে কোন চক্রযন্ত্র আছে বলে সন্দেহ করতে পারেনি অনসূয়া। কিন্তু সন্দেহটা একেবারে একটা ভয়াবহ শিহর তুলে চমকে উঠলো তখন, যখন ঘরের দরজার কাছে পায়ের শব্দ শুনে তাকাতেই অচেনা এক ভদ্রলোকের মূর্তি চোখে পড়লো।

ভদ্রলোক বলেন—শৈলেশবাবুকে আমি একটা চিঠি দিয়েছিলাম। তিনি জানেন, আজ আমি তাঁর সঙ্গে দেখা করতে আসবো।

অনসূয়া—শৈলেশবাবু বাড়িতে নাই।

ভদ্রলোক—তিনি কি আপনার দাদা?

অনসূয়া—হ্যাঁ।

ভদ্রলোক—আমি নিখিল।

চমকে, মাথা হেঁট ক'রে আর মুখ ঘুরিয়ে অনসূয়া বলে—বসুন।

চেয়ারে বসেই নিখিল বলে—কিন্তু তাই বলে তুমি উঠে যেও না।

সত্যি, চেয়ার ছেড়ে উঠে দাঁড়িয়েছিল অনসূয়া। নিখিল বলে—বসো অনসূয়া।

চেয়ারে বসেই বুঝতে পারে অনসূয়া দাদা আর বৌদির সিনেমার ছবি দেখতে যাওয়ার ব্যাপারটা কত বড় একটা চক্রান্ত।

নিখিল বলে—আমি আগে জানতুম না যে, আমার মেজদা আর তোমার দাদা শৈলেশবাবু দিনাজপুর কলেজে এক ক্লাসের বন্ধু ছিলেন। অনসূয়া—হ্যাঁ, আমরা সবাই তখন দিনাজপুরে ছিলাম।

তখন বাবাও ছিলেন।

নিখিল হাসে—তাহলে হয়তো আজ এই প্রথম নয়, তোমাকে অনেকদিন আগেই দেখেছি।

অনসূয়া হাসে—হতে পারে।

নিখিল—তোমার গানও তখন শুনেছি বোধ হয়।

অনসূয়া মুখ ফিরিয়ে হাসে—হতে পারে।

গভীর কৌতুহলের আবেগে চোখ দুটোকে হঠাৎ অপলক ক'রে

অনসূয়ার মুখের দিকে তাকিয়ে কি-যেন দেখতে থাকে নিখিল।
স্মৃতির সঙ্গে মিলিয়ে মিলিয়ে কি-যেন খুঁজছে। তার পরেই ব্যস্ত-
ভাবে প্রশ্ন করে—আচ্ছা, দিনাজপুরে থাকতে তুমি কখনও অভিনয়
করেছিলে ?

চমকে ওঠে অনসূয়া—হ্যাঁ, একবার স্কুলের প্রাইজের দিনে অভিনয়ে
একটা পার্ট নিয়েছিলাম।

নিখিল—জনা সেজেছিলে তুমি !

আর একবার আশ্চর্য হয়ে চমকে ওঠে অনসূয়া—হ্যাঁ, কিন্তু কি
ক'রে বুঝলেন আপনি !

নিখিল—সবই মনে আছে, তাই বুঝতে অসুবিধা হলো না।

বিত্রতভাবে তাকায় অনসূয়া, এবং চোখের চাহনিতে একটা ভীক-
ভীক কাঁপুনিও ফুটে ওঠে। —কি মনে আছে ?

নিখিল—জনার সেই মুখটা ...তা ছাড়া আরও একটা ব্যাপার
মনে আছে।

অনসূয়া আর কোন প্রশ্ন করে না। বরং বৃকের ভিতরে একটা
অস্বস্তির চাঞ্চল্য লুকিয়ে চুপ ক'রে শুধু নিখিলের স্মৃতির ইতিহাস
শোনবার জন্য প্রস্তুত হবার চেষ্টা করে।

নিখিল হাসে—জনার অভিনয় দেখে মুগ্ধ হয়ে একটা ছেলে জনাকে
আরও ভাল ক'রে দেখবার জন্য সেই থিয়েটার ঘরের পিছনের
দরজার কাছে এসে দাঁড়িয়েছিল, মনে পড়ছে তো ?

কোন উত্তর দেয় না অনসূয়া।

নিখিল বলে—অভিনয় শেষ হবার পর বাড়ি যাবার জন্য জনা যখন
থিয়েটার ঘরের ভিতর থেকে বের হয়ে স্কুলের গাড়িতে উঠতে যাবে,
ঠিক তখন...

অনসূয়া হঠাৎ বিরক্ত হয়ে এবং বেশ একটু রুক্ষ স্বরে বলে
ওঠে।—একটা পুরনো ঘটনাকে আপনার এত খুশি হয়ে বলবার
কোন দরকার ছিল না।

হেসে যেলে নিখিল—তাহলে নিশ্চয় তোমার মনে আছে, সেই ছেলেটা জনার কাছে এগিয়ে এসে বেকাঁস যে কথাটা হঠাৎ বলে ফেলেছিল।

অনসূয়া নীরবে শুধু শুনতে থাকে, কোন উত্তর দেয় না এবং চোখের চাহনিতে সেই বিরক্তির ছায়াটা কাঁপতে থাকে।

নিখিল বলে—জনা কিন্তু রাগ করেনি ; ছেলেটাকে ধমক দিতেও পারে নি। শুধু আশ্চর্য হয়ে একবার তাকিয়েছিল জনা, কাজল বোলানো সেই দুটি বড়-বড় চোখ তুলে।

অনসূয়া—তের বছর বয়সের জনার পক্ষে সেটা কোন অপরাধ নয়। ও বয়সের চোখ একটুতেই আশ্চর্য হয়।

কিন্তু নিখিল মজুমদারের হাসিটা যেন মাত্রা ছাড়া রকমের বেহায়ার মত আরও মুখর হয়ে ওঠে। —আমিও তো তাই বলছি। আসল অপরাধী ছিল ছেলেটা।

অনসূয়া বলে—দাদা আর বউদির বাড়ি ফিরতে বোধহয় দেরি হবে। নিখিল—তা জানি।কিন্তু সেই অপরাধী ছেলেটার মুখটা কি তোমার একটুও মনে পড়ে না ?

অনসূয়া—কি বললেন ?

নিখিল—সেই অপরাধী মুখটাকে আজ দেখলে সত্যিই চিনতে পারবে কি ?

নিখিলের মুখের দিকে অপলক চোখের কৌতূহল তুলে কিছুক্ষণ তাকিয়ে থাকে অনসূয়া, এবং তার পরেই লজ্জা পেয়ে শিউরে ওঠে। আঁচল তুলে মুখ ঢাকা দিয়ে হেসে ফেলে অনসূয়া।

নিখিল—অপরাধীকে চিনতে পারলে তো অনসূয়া ?

অনসূয়া—ওসব কথা থাক, আপনি এখন আমাকে রেহাই দিন।

নিখিল—তার মানে ? প্রশ্নটাই যেন ভয় পেয়ে চৌঁচিয়ে উঠেছে। হঠাৎ গম্ভীর হয়ে যায় নিখিল, এবং অনসূয়ার মুখের হাসির দিকে আতঙ্কিতের মত তাকিয়ে থাকে।

অনসূয়ার মুখের ধূর্ত হাসিটা এইবার কোমল হয়ে যায়।—তার
* মানে, সত্যিই আপনাকে ভয় দেখাচ্ছি না। কিছুক্ষণ চুপ ক’রে
বসে থাকুন, আমি চা নিয়ে আসছি। *

নিখিল—তুমি বসো অনসূয়া, চা-এর জন্ত আমি মোটেই ব্যস্ত নই।
আমি কিসের জন্ত ব্যস্ত, সেটা তোমার অজানা নয়।

অনসূয়ার পঁচিশ বছর বয়সের শক্ত সতর্ক মনের ভাষা এইবার
সত্যিই লজ্জায় বিপন্ন হয়ে ওঠে, এবং সেই লজ্জার মধ্যে যেন একটু
করুণতাও আছে। নিখিল মজুমদারকে ‘না’ বলে দেবার জন্ত
অনসূয়ার মনে কোন প্রতিজ্ঞা নেই। অথচ হ্যাঁ বলে রাজি হবার
জন্তও মনটা তৈরী হয়নি।

অনসূয়া বলে—আপনি কেন এত ব্যস্ত হয়ে উঠলেন নিখিল-
বাবু?

নিখিল—যে ভালবাসে সে ব্যস্ত না হয়ে পারে না অনসূয়া।

আনমনার মত অস্থির দিকে তাকিয়ে কিছুক্ষণ কি-যেন ভাবতে থাকে
অনসূয়া। রাগ হয় নিজেরই উপর। শেখরবাবুকে ওরকম প্রশ্ন
ক’রে একটা চিঠি না লিখলেই ভাল ছিল।

নিখিল—আমার এতগুলি চিঠির একটিরও উত্তর তুমি দাওনি।
সেজন্ত দুঃখ করি না। আমি শুধু জানতে চাই, সত্যিই কি তুমি...।
অনসূয়া বলে—আর মাত্র দু’টি দিনের মত আমার অভাবতা সহ্য
করুন নিখিলবাবু।

নিখিল—কি বললে?

অনসূয়া—মাত্র আর দু’টি দিন আমাকে সময় দিন, তার পরেই
জানতে পারবেন।

নিখিলের গভীর মুখ আশ্বস্ত হয়ে হেসে ওঠে না, বরং যেন একটা
সন্দেহের বেদনায় মেহুর হয়ে ওঠে। নিখিল বলে—কিছু মনে করে।
না অনসূয়া, একটা কথা বলছি।

অনসূয়া—বলুন।

নিখিল—আমার সন্দেহ হচ্ছে, আমি বোধ হয় তোমার ওপর একটা
অশ্রায় দাবি ক’রে ফেলেছি।

অনসূয়া ভীতভাবে বলে—কেন এরকম মনে করেছেন ?

নিখিল—মনে হচ্ছে, তোমার কোন অসুবিধা আছে ; হয়তো তুমি
আর কাউকে....।

অনসূয়া গম্ভীর হয়ে বলে—না নিখিলবাবু।

নিখিল—কিন্তু তোমাকেও কি আর কেউ...।

অনসূয়া—না, আপনি ছাড়া আর কেউ নয়। অস্তুত আমি জানি
না, আর কেউ আমার মত একটা সস্তা মেয়েকে যদি মনে মনে....
জানি না, এরকম কাণ্ড সত্যিই মানুষের জীবনে সম্ভব কিনা।

নিখিল—সম্ভব হয় অনসূয়া।

অনসূয়া—কেমন ক’রে বুঝলেন ?

নিখিল—নিজের চোখে এমন কাণ্ড সম্ভব হতে দেখেছি।

অনসূয়া হাসে—নিজের জীবনে নয় তো ?

নিখিল—না, শেখর মিত্র নামে এক ভদ্রলোকের জীবনে।

—কি বললেন ? ক’র জীবনে ? প্রশ্ন করতে গিয়ে থরথর ক’রে
কঁপে ওঠে অনসূয়ার গলার স্বর।

নিখিল—শেখর মিত্র নামে এক ভদ্রলোকের জীবনে। সে এক
অস্তুত মানুষ।

অনসূয়া—কি কাণ্ড করেছে সে ভদ্রলোক ?

নিখিল—একজনকে সে ভালবাসে। শুধু ভালবাসে বললে সব
কথা বলা হয় না। কবির লেখায় পড়েছিলাম....সাধু কহে শুন মেঘ
বরিষার, নিজেই নাশিয়া দেয় বৃষ্টিধার। ব্যাপারটা সেইরকমই।
শেখর মিত্র সত্যিই একেবারে নিজেই নাশিয়া এক মেয়েকে
ভালবাসে। তার মানে, ভালবাসতে গিয়ে নিজেকে যে কি-ভয়ানক
নাশ ক’রে ফেলেছে, সেদিকে তার আক্কেপও নেই।

অনসূয়া—সে মেয়ের নামধামের খবর বোধহয় আপনি জানেন না ?

নিখিল—জানি বৈকি। ভাল মাইনের চাকরি করে সেই মেয়ে;
তার নাম অবন্তী সরকার।

অনসূয়া চমকে উঠতেই নিখিল সন্দিক্তভাবে প্রশ্ন করে—অবন্তীকে
তুমিও চেন নাকি?

অনসূয়া বলে—চিনি।

নিখিল আশ্চর্য হয়—শেখর মিত্রকেও চেন?

অনসূয়া—হ্যাঁ। আমার বউদির দাদা হন তিনি।

নিখিল—কি আশ্চর্য!

নিখিলের চোখে শুধু একটা খবর শোনার আশ্চর্য থমথম করে।
কিন্তু অনসূয়ার মনের গভীরে একটা ভয়ানক লজ্জার আশ্চর্য সেই
মুহূর্তে একেবারে ফাঁকা হয়ে যায়। কি ভয়ানক ভুল! মাথামুণ্ড
নেই! একটা কল্লনার ভুলে শেখর মিত্রের কাছে একটা চিঠি লিখে
ফেলেছে অনসূয়া। অবন্তীকে ভালবাসে শেখর মিত্র; শেখর
মিত্রের মনে আর কোন মেয়ের ছবি নেই।

চেয়ার ছেড়ে উঠে দাঁড়ায় অনসূয়া।—আমি এইবার চা নিয়ে
আসি নিখিলবাবু। ততক্ষণ আপনি....

নিখিল হাসে—বল, কি করবো?

অনসূয়া—ততক্ষণ আমাকে আর সন্দেহ না করে মনে মনে তৈরী
করে রাখুন, দাদাকে কি বলবেন।

নিখিল—তুমি যা বলেছ, তাই বলবো।

অনসূয়া—কি বলেছি আমি?

নিখিল—মাত্র আর দুটো দিন পরে তুমি স্পষ্ট করে জানিয়ে দেবে
যে...।

অনসূয়া—না, আপনি আজই দাদাকে বলতে পারেন।

চেয়ার থেকে উঠে অনসূয়ার কাছে এসে অনসূয়ার একটা হাত
ব্যাকুলভাবে কাছে টেনে নেয় নিখিল—অনসূয়া! স্পষ্ট করে বল।

অনসূয়া বলে—হ্যাঁ।

সত্তর

অনসুয়ার চিঠি। চিঠিটা পড়ে একটু আশ্চর্য না হয়ে পারে না শেখর। অনসুয়া কোন দিন শেখরের কাছে চিঠি লেখেনি, শেখরও না। অনসুয়ার জীবনের কোন প্রয়োজনে শেখরের ডাক আসতে পারে, এরকম কোন ধারণাও কোনদিন শেখরের মনে ছিল না। অনসুয়ার বিয়ে হবে, অনসুয়াকে বিয়ে করবার জন্য এক ভদ্রলোক ব্যস্ত হয়ে উঠেছে। ভালই তো, অনসুয়ার যদি আপত্তি না থাকে, তবে হয়ে যাক এই বিয়ে। এর মধ্যে শেখর মিত্রের আপত্তি করবার কি আছে? শেখর মিত্রের পরামর্শেরই বা দরকার কি?

বার বার কয়েকবার অনসুয়ার চিঠিটা পড়ে শেখর। পড়তে পড়তে অনসুয়া মুখের উপর সেই সব সময় শিউরে থাকা এক টুকরো সুন্দর হাসির ছলটাও মনে পড়ে। অনসুয়ার মনটাও সত্যিই একেবারে সাদা, ভালবাসাবাসি নিয়ে কোন ঝগড়াট কোনদিন অনসুয়ার জীবনে ঘটেছে বলে মনে হয় না। একজন ভালমানুষের জীবনের সঙ্গিনী হয়ে হেসে হেসে জীবনটাকে ভালভাবে কাটিয়ে দিতে চায়, এর চেয়ে বড় কোন আকাঙ্ক্ষা অনসুয়ার নেই, একথা প্রভার মুখে অনেকবার শুনেছে শেখর।

শেখর মিত্রের সামনেই অনসুয়াকে কতবার ঠাট্টা করেছে প্রভা।— অনসুয়ার ভয়টা কিসের জান দাদা? ওর ধারণা, ওকে কেউ ভালবাসতে পারবে না। যিনি স্বামী হবেন, তিনিও না। অনসুয়ার যুক্তি; একটা অজানা লোকের কাছে অপমান ভোগ করবার জন্য বিয়ে করবার দরকার হয় না। তার চেয়ে বিয়ে না হওয়াই ভাল। অনসুয়ার এই ভয়টা সত্যি কোন নকল ভয় নয়। এবং প্রভা ঠাট্টা ক’রে বললেও কথাটা মিথ্যে নয়। বিয়ে করবে না বলে একটা

প্রতিজ্ঞা ক’রে এতদিন পার ক’রে দিয়ে এসেছে, একটা মেয়ে স্কুলে চাকরি নেবার জন্তও তৈরী হয়েছিল অনসূয়া। কিন্তু....ভাবতে গিয়ে শেখরও মনে মনে হেসে ফেলে। এক ভদ্রলোক অনসূয়ার গান শুনে মুগ্ধ হয়ে বিয়ে করবার জন্ত ব্যস্ত হয়ে উঠেছে, খবরটা শুনতে পেয়েই বেচারার বিয়ে না করবার প্রতিজ্ঞাটা ভেঙ্গে গিয়েছে। ভয়টাও বোধ হয় ভেঙ্গে গিয়েছে।

তবু কেমন যেন খটকা লাগে। নিজের দাদা থাকতে বউদির দাদার কাছে পরামর্শ চায় কেন অনসূয়া? হ্যাঁ, কোন সন্দেহ নেই, শেখর মিত্রকে খুব বেশি শ্রদ্ধা করে অনসূয়া। এবং শেখর সুখী হোক, এরকম একটা শুভেচ্ছার ভাষাও প্রায়ই অনসূয়ার কথায় কথায় প্রকাশ হয়ে পড়ে। নিজের কানেই শুনেছে শেখর, প্রভাকে জিজ্ঞাসা করছিল অনসূয়া, শেখরবাবুর একটা ভাল কাজটাজ্ঞ এখনও হলো না কেন বউদি?

—হলো না। হচ্ছে না। কপালের লিখন, নইলে আমার দাদার মত মানুষকে এত কষ্ট সহ্য করতে হবে কেন?

অনসূয়া চিন্তিতভাবে বলে—আমার মনে হয়, শেখরবাবুই গা লাগিয়ে কোন চেষ্টা করেন না। ভদ্রলোক কেমন যেন উদাস হয়ে রয়েছেন।

প্রভা বলে—তুমি ভুল বুঝেছ অনসূয়া। একটা ভাল চাকরির জন্ত দাদা চেষ্টা ক’রে ক’রে হয়রান হয়ে যাচ্ছে।

শেখরের জন্ত অনসূয়ার শুভেচ্ছার আরও কথা অনসূয়ার মুখে নির্জৈই শুনতে পেয়েছে শেখর। সে শুভেচ্ছা শেখরের জীবনের একটা উৎসবের বাসর দেখবার ইচ্ছা। এবং সেই শুভেচ্ছার কথা বলতে গিয়ে অনসূয়ার মুখের ভাষার লাগাম যেন ভেঙ্গে যায়।—শুনেছি কত সুন্দর সুন্দর শিক্ষিত মেয়ে মনের মত স্বামী পাওয়ার জন্ত ছটফট করছে, কিন্তু আমি বলি বউদি, তোমার এই দাদা ভদ্রলোক কি তাদের কারও চোখে পড়ে না?

প্রভা বলে—দাদা সামনে রয়েছেন, তা না হলে তোমাকে এখনি
একটা কথা বলতে পারতাম অনসূয়া, যে-কথা শুনলে নিজেই জ্বক
হয়ে যেতে।

অনসূয়ার সঙ্গে শেখর মিত্রের ঠাট্টার সম্পর্কটা হাসাহাসির মধ্যেই
শেষ হয়ে যায়, সম্পর্ক কোন দিন কোন গভীর চিন্তার ঘনঘটা সৃষ্টি
করেনি। অনসূয়ার মত মেয়ের সঙ্গে যদি শেখর মিত্রের বিয়ে
হতো, তবে শেখর মিত্রের জীবন অসুখী হতো না নিশ্চয়। কিন্তু
অনসূয়ার সঙ্গে শেখরের বিয়ে হোক এমন কোন ইচ্ছার চেষ্টা কারও
মনে এবং কোন ঘটনায় সত্য হয়ে ওঠেনি। বিয়ে হতে পারে, এমন
সম্ভাবনার ইঙ্গিতও দু'জনের মনের কোন ভাবনার মধ্যে ফুটে
ওঠেনি। অনসূয়া চায়, পৃথিবীর কোন ভাল মেয়েকে বিয়ে করে
সুখী হোক শেখর মিত্র। এবং শেখর চায়, পৃথিবীর কোন ভাল
ভদ্রলোককে বিয়ে ক'রে সুখী হোক অনসূয়া। এই মাত্র, এর বেশি
কিছু নয়।

অনসূয়ার চিঠিটা আর একবার পড়ে নিয়েই মনে মনে তৈরী
হয় শেখর, আজই সন্ধ্যায়, রতনবাবুর ছেলেকে অঙ্ক শেখাবার
পাল্লা একটু তাড়াতাড়ি শেষ ক'রে দিয়ে ভবানীপুরে যেতে হবে।
আর, একেবারে মন খুলে, চৈঁচিয়ে হেসে হেসে অনসূয়াকে বলে
দিতে হবে।—খুব ভাল কথা অনসূয়া। শুনে সুখী হলাম। আর
একটুও দেরি না ক'রে বিয়েটা ক'রে ফেল দেখি।

আর একটা চিঠি। সে চিঠি হাতে তুলে নিয়েই বুঝতে পারে শেখর,
অনসূয়ার চিঠি নয়, এবং ঠিক অনসূয়ার মত মনের কোন মেয়ের
লেখা এই চিঠি নয়। লেখাটা চেনা, মর্মে মর্মে চেনা। অবস্খী
সরকারের চিঠি। চিঠি দেখে যতটা আশ্চর্য হয়, চিঠি পড়ে তার চেয়ে
বেশি আশ্চর্য হয়। আবার আহ্বান জানিয়েছে অবস্খী, কারণ
আবার অবস্খী সরকারের জীবন একটা সমস্তার বেদনায় অসুখী
হয়ে উঠেছে। কিসের সমস্তা? কল্পনা করতে পারে না শেখর।

কিন্তু যে সমস্তার বেদনা দেখা দিক না কেন, অবন্তী সরকারের এই লজ্জাহীন মিনতির কি অন্ত হবে না কোনদিন? নিখিল মজুমদারকে ভালবেসে মুগ্ধ হয়ে আছে যে নারীর জীবন, সে নারী তার ভাগ্য গড়বার খেলায় শেখর মিত্রকে বারবার আহ্বান করবে, কি ভয়ানক কোতুকিনী হয়ে উঠেছে অবন্তী সরকার। মনে মনে একটা ধিক্কার দিয়ে চিঠিটা বন্ধ করতে গিয়ে হঠাৎ শেখর মিত্রের মন, এবং সেই সঙ্গে হাতটাও যেন সব কঠোরতা হারিয়ে আবার শিথিল হয়ে যায়। ধিক্কার দিতে পারে না, মনের রূঢ় ভাষাটাকে হঠাৎ সামলে নেয়; এবং চিঠিটা বন্ধও করে না; অলস হাতটা যেন অদৃষ্ট এক মায়া়ার আবেশে কোমল হয়ে চিঠিটাকে আর একবার আন্তে আস্তে খোলে, এবং চোখের সব আগ্রহ ঢেলে দিয়ে লেখাটা পড়তে থাকে শেখর। বিপদ? বিপদে পড়েছে অবন্তী। বিপদে পড়ে এই পৃথিবীর মধ্যে বেছে বেছে শুধু একজনেরই কাছে, শেখর মিত্রের কাছে রক্ষার আবেদন জানিয়েছে অবন্তী। অবন্তীর চোখের জলে আর মুখের হাসিতে যে ছলনাই থাকুক না কেন, অবন্তীর এই বিশ্বাস যে শেখর মিত্রের জীবনের একটা গৌরবের স্বীকৃতি। বিশ্বাস করে অবন্তী, তাকে বিপদের ভয় থেকে মুক্ত করবার জগ্ন্য চেষ্টা করবার কোন মানুষ পৃথিবীতে যদি থেকে থাকে, সে হলো শেখর মিত্র। অবন্তীর চিঠিকে তুচ্ছ করলে নিজেকেই যে ছোট করে ফেলা হয়। তবে? তবে আজ সন্ধ্যায় ভবানীপুরে আর যাওয়া হবে না। পার্ক স্ট্রীটের সেই নতুন বাড়ির ফ্ল্যাটে সুন্দর করে সাজানো ঘরে অবন্তী সরকারের জীবন কোন্ বিপদের বেদনায় বিয়গ্ন হয়ে উঠেছে, একবার শুধু দেখে আসতে দোষ কি?

আঠার

অবন্তী বলে—আমার বিশ্বাস ছিল, আমার চিঠি পেয়ে আপনি নিশ্চয় আসবেন।

শেখর—আমার কিন্তু বিশ্বাস ছিল না যে, তোমার চিঠি আবার কখনও পেতে হবে, আর আমিও আবার কখনও এখানে আসতে পারবো।

অবন্তী—একটা বিপদে পড়ে আপনাকে ডেকেছি।

শেখর—কিসের বিপদ ?

অবন্তী—বড় অপমান শেখরবাবু। কোন দুঃস্বপ্নেও ভাবতে পারিনি যে, আমাকে এমন অপমানের মধ্যে পড়তে হবে।

শেখর—কিসের অপমান ?

অবন্তী—আমারই অদৃষ্টের। তাই আপনাকে ডেকেছি।

শেখর—আমি তোমার অপমান দূর ক'রে দিতে পারি, এ বিশ্বাস তুমি কোথায় পেলেন ?

অবন্তী—হ্যাঁ, বিশ্বাস আছে ; আপনি ইচ্ছে করলেই পারেন।

শেখর—তাহলে বল।

অবন্তী—আপনি কি অনসূয়াকে বিয়ে করতে পারেন না ?

শেখরের চোখের দৃষ্টি চমকে ওঠে—একি অদ্ভুত অনুরোধ ?

অবন্তীর চোখ ছল ছল করে—হ্যাঁ শেখরবাবু। কোন উপায় না দেখে শেষে আপনাকে এই অদ্ভুত অনুরোধ করতে হচ্ছে।

শেখর—অনসূয়ার সঙ্গে আমার বিয়ে হলে তোমার কোন লাভ আছে কি ?

অবন্তী—হ্যাঁ। তাহলে নিখিলের ভুল ভেঙ্গে যাবে।

সব রহস্য এইবার একেবারে স্বচ্ছ হয়ে যায়। শেখর বলে—বুঝলাম,

নিখিল মজুমদারই তাহলে অনসূয়াকে বিয়ে করবার জ্ঞান তৈরী হয়েছে।

অবন্তী—হ্যাঁ। আমাকে এত চিনতে পেরেও সে মানুষ এত ভুল করলো কেমন করে? আশ্চর্য, যদি জানতাম যে অনসূয়া ওকে ভালবেসেছে, তবে না হয়.....

শেখর—তবে কি?

অবন্তী—তবে আমি চুপ করেই সরে যেতাম, আর আপনাকেও এই অনুরোধ করতাম না।

হেসে ফেলে শেখর—তুমি স্পষ্ট করে একটি সত্য কথা বলবে?

অবন্তী—বলবো, অন্তত আপনার কাছে কিছুই লুকবো না।

শেখর—তুমি কাকে জব্দ করতে চাও? নিখিলবাবুকে, না অনসূয়াকে, না আমাকে?

অবন্তীর মুখটা করুণ হয়ে ওঠে। আস্তে আস্তে বলে—আমি কাউকে জব্দ করতে চাই না। আমি চাই সকলেই সুখী হোক।

শেখর—ভাল কথা। কিন্তু আমাকে ঐ অনুরোধ আর করো না। বিস্মিতভাবে তাকিয়ে থাকে অবন্তী, এবং অবন্তীর চোখের সেই বিস্ময়ও যেন মৃদু ভয়ে সিরসির করে। অবন্তী বলে—কেন?

যেন প্রচণ্ড একটা ধিক্কার কোন মতে বিস্ফোরণের আবেগ থামিয়ে শেখর মিত্রের কথাগুলির মধ্যে উদ্ভাপ ছড়িয়ে জ্বলতে থাকে—তুমি আমার কে? আমিই বা তোমার কে? আমার কাছে এত বড় দাবি করবার সাহস কোথায় পেলো অবন্তী? এত নিলজ্জতাই বা কোথায় পেলো?

অবন্তী—শেখরবাবু!

শেখর—কি?

অবন্তী—আমি জানি।

শেখর—কি জান?

অবন্তী—আপনি মনে-প্রাণে চান যে আমি সুখী হই।

শেখরের চোখ দপ ক'রে জ্বলে ওঠে—কেন চাই ?

অবন্তী—তা'ও জানি। আপনি আমাকে ভালবাসেন।

হঠাৎ একটি আচমকা আঘাতে শেখরের সব মুখরতা বোবা হয়ে যায়। স্তব্ধ হয়ে দাঁড়িয়ে অবন্তীর মুখের দিকে তাকিয়ে থাকে। অবন্তীর কালো চোখের তারায় বুদ্ধির দীপ্তি আরও শানিত হয়ে চিকচিক করছে। সব জানে, সব বুঝে ফেলেছে অবন্তী। অবন্তী সরকারের জন্ম শেখর মিত্রের মনের গভীরে আজও যে অনুভবের মায়া মুখ লুকিয়ে পড়ে আছে, তাকে যেন অনেকদিন আগেই দেখে ফেলেছে অবন্তী। তাই বার বার ডাকে, তাই তো শেখর মিত্রকে যত অদ্ভুত অম্লরোধ করতে একটুও লজ্জা পায় না অবন্তী। কিন্তু...। কিন্তু কি ? কি ভয়ানক একটা কৌতূহল শেখর মিত্রের বুকের ভিতর উতলা হয়ে উঠছে ! কিন্তু কিসের জন্ম, কেন, শেখর মিত্রের জন্ম অবন্তী সরকারের মনে একবিন্দু মোহ আজও ফুটে উঠলো না ? সত্যিই কি তাই ? অবন্তী সরকার তার কোন স্বপ্নের মধ্যে ভুলেও শেখর মিত্রের হাতে হাত রাখবার জন্ম চঞ্চল হয়ে ওঠেনি ? শুধু শেখর মিত্রের জীবন নিংড়ে কতকগুলি উপকার লুঠ ক'রে নিতেই ভাল লাগে অবন্তীর ?

অদ্ভুত এক দুর্বলতায় অলস হয়ে যায় শেখর মিত্রের নিঃশ্বাসগুলি। অবন্তী সরকারের মুখের দিকে তাকিয়ে থাকতে ভাল লাগে। প্রশ্ন করতে ইচ্ছা করে, তুমি ভালবেসেছ কি ?

কিন্তু বৃথা এই প্রশ্ন। শেখর জানে, এই প্রশ্ন একটা কপট ঠাট্টার চেয়েও অসার। অবন্তী সরকার যে তার জীবনের উপকারক শেখর মিত্র নামে একটা লোককে ভালবাসে না, এই ক'মাসের ইতিহাসে, অবন্তী সরকারের জীবনের এই রঙীন উন্নতির ইতিহাসে সেই সত্য প্রমাণিত হয়েছে।

শেখর মিত্রকে ভালবাসতে কেন ইচ্ছে হলো না অবন্তীর, কেন ভালবাসতেও পারলো না ? এই তো একটিমাত্র প্রশ্ন, যার জন্ম

শেখর মিত্রের জীবনের অনেক মুহূর্তের ভাবনা বিস্তৃত হয়েছে, এবং সেই বিষয় একটা তীক্ষ্ণ অপমানের কৌতুকে ব্যাধিতও হয়েছে।

অবন্তীর সুন্দর মুখের ছবিটা যেন শেখরের হৃ'চোখ জুড়ে ভাসছে। বড় সুন্দর মুখ, অবন্তীকে এমন সুন্দর কোনদিনও দেখায়নি। ঐ অবন্তী জানে, শেখর মিত্র তাকে ভালবাসে। অবন্তী নিজের মুখে ঘোষণা ক'রে শেখরের বৃকের নিভৃত গোপন করা একটি অনুভবের মায়াকে আজ যেন উৎসবের পতাকার মত বাতাসে মেলে দিয়েছে। এই যথেষ্ট। অবন্তীর মনের কাছে কৈফিয়ত দাবি করবার কোন অর্থ হয় না। শেখর মিত্রকে না ভালবাসবার খুব অধিকার অবন্তীর আছে।

—আচ্ছা, এবার আমি চলি। চলে যাবার জন্তু পা বাড়িয়ে দরজার দিকে এগিয়ে যায় শেখর।

অবন্তী বলে—তাহলে আমি নিশ্চিত হলাম।

শেখর—তার মানে ?

অবন্তী—আপনি অনসূয়াকে...

শেখর—আমি ইচ্ছে করলেই অনসূয়াও আমাকে বিয়ে করতে ইচ্ছে করবে কেন ?

অবন্তী—নিশ্চয় করবে ? সে বিশ্বাস আমার আছে। আপনি একবার বলেই দেখুন না কেন ; তখন বুঝবেন যে আমার বিশ্বাস মিথ্যে নয়।

শেখর—তুমি এই বিশ্বাস কোথায় পেলে ?

কোন উত্তর না দিয়ে মাথা হেঁট ক'রে দাঁড়িয়ে থাকে অবন্তী। শেখরের হৃ'চোখের কোণে এতক্ষণের স্নিগ্ধতার ছায়া হঠাৎ আবার বিরক্ত হয়ে কঠোর হয়ে যায়। পরমুহূর্তেই চমকে ওঠে শেখর। অবন্তী সরকারের কালো চোখের তারায় বুদ্ধির দীপ্তি একেবারে নিভে গিয়েছে। অবন্তীর চোখ থেকে ঝরঝর ক'রে জলের ফোঁটা ঝরে পড়ছে। একটা অসহায় শিশুর মুখ, আদর দাবি করে শুধু

দাবির জোরে, যুক্তির জোরে নয়। যেন নিজের ভুলের আর অপরাধের ভয়ে দিশাহারা একটা আত্মার কান্নাভরা মুখচ্ছবি।

শেখর—এ কি করছো অবন্তী ?

অবন্তী—নিখিলকে জব্দ করবার জন্তে নয়, আপনাকে সুখী করবার জন্তেই এই অনুরোধ করেছি শেখরবাবু। বিশ্বাস করুন। অনসূয়াকে আমি চিনি। অনসূয়ার মত মেয়ে আপনার মত মানুষকেই ভালবাসতে চায়, ভালবাসতে পারবেও। আর আপনিও অনসূয়ার মত মেয়েকে দ্বীপনে পেলে সুখী হবেন।

চুপ করে অবন্তী। শেখরও কোন প্রশ্ন করে না। সারা ঘরের নীরবতা যেন বেদনায় কোমল হয়ে অবন্তীর চোখের জলের ফোঁটাগুলিকে বরণ করছে। একেবারে স্বচ্ছ মুক্তার মত, একেবারে খাঁটি চোখের জল। কোন ভেজাল নেই।

অবন্তী বলে—বিশ্বাস করুন। আপনি সুখী হবেন বলেই আমার এই অনুরোধ।

শেখর—সেকথা থাক। বল, তুমি সুখী হবে ?

অবন্তী—হ্যাঁ।

শেখর—আচ্ছা।

চলে গেল শেখর।

উল্লিখ

দরজা বন্ধ ক'রে সোফার কোণ ঘেঁষে ক্লান্ত পাখির মত যেন সুন্দর চেহারা আর সুন্দর সাজের সব শোভা গুটিয়ে চুপ ক'রে বসে থাকে অবস্তুী সরকার।

যা মনে মনে ভেবে রেখেছিল অবস্তুী, তাই করতে পেরেছে। কোন ভুল হয়নি। জীবনের প্রতিজ্ঞা অটুট রাখতে হলে সংসারের সত্য ও মিথ্যার কাছে যে কঠোর অভিনয় করতে হয়, সেই অভিনয়ই নিখুঁত ভাবে সম্পন্ন করতে পেরেছে অবস্তুী। নিজের স্বার্থ, নিজের কাজ গুছিয়ে নিতে হলে, হাসি-কান্নার মধ্যে একটু নকল মায়া রাখতে হয়। ভালবাসার জ্ঞান, অবস্তুী ও নিখিল নামে দুটি মানুষের ভালর জ্ঞান এই অভিনয় করতে হলো। অবস্তুীর চোখের জলকে একটুও সন্দেহ করতে পারেনি শেখর মিত্র।

অবস্তুী সরকারের জীবনের ভালবাসার পথে কাঁটা হয়েছে অনসূয়া। সেই কাঁটা সরাতে হবে। খুব সুন্দর ক'রে সেই কাঁটা সরিয়ে ফেলবার ব্যবস্থা করতে হবে। ক'রে ফেলেছে অবস্তুী। শেখর মিত্র অবস্তুীর অনুরোধের মায়া আজও এড়াতে পারেনি। রাজি হয়ে চলে গিয়েছে।

তারপর ? তারপর নিখিল মজুমদার আবার এই ঘরের দরজার কাছে এসে দেখা দিতে আর কতই বা দেরি করবে ? ফিরে আসবে নিখিল, অনসূয়ার গানের সুর সব সুখ হারিয়ে নিখিল মজুমদারের কানে বিষের জ্বালা ধরিয়ে দেবে।

শেখর মিত্রকে বিয়ে করতে অনসূয়া রাজি হবেই হবে, কোন ভুল নেই। জানে অবস্তুী, নিজের কানেই অনসূয়ার কাছে কতবার শুনেছে অবস্তুী, প্রভা বউদির দাদার মত মহৎ মনের মানুষ পৃথিবীতে ক'জন আছে জানি না। শেখর মিত্রকে বড় বেশি আস্থা করে অনসূয়া।

অবন্তীর মনের কল্পনাগুলিই তন্দ্রার মত আলস্বে শিথিল হয়ে যায়। যেন দেখতে পাচ্ছে অবন্তী, নিখিল মজুমদার আবার তার চোখের কাছে এসে দাঁড়িয়েছে। সেই নিখিল, যাকে নিজের চেষ্টায় ভাল চাকরিতে ভাগ্যবান ক'রে দিয়ে অবন্তী সরকার তাকে জীবনের ঘরে চিরকালের অতিথি করবার জন্য প্রস্তুত হয়েছিল। এসেছে সেই নিখিল। তার চোখে করুণতা, মুখে অভিমান, মনে আত্মগ্লানি। অনসূয়ার কাছে যাবার পথ রুদ্ধ দেখে আবার এই পথে ফিরে এসেছে।

—ছিঃ। নিজের অজ্ঞাতে, এবং বোধ হয় এরকম একটা ঘণার জ্বালাকে সামলাবার জন্য মনে মনে প্রস্তুত ছিল না অবন্তী, তাই বেশ জোরে একটা ধিকারের সুরে কথাটা বলেই ফেলে, এবং সোফার কোণ থেকে অলস দেহটাকে ধড়ফড়িয়ে সরিয়ে নেয় অবন্তী। তন্দ্রাটা যেন চোখের মধ্যে ছটফট করছে।

এই নিখিলকে কাছে ফিরে পাওয়ার জন্য, জীবনের প্রথম ভালবাসার সম্মান রক্ষার জন্য, নিজে সুখী হবার জন্য আজ একটা কঠোর অভিনয় নিখুঁতভাবে সম্পন্ন করতে পেরেছে অবন্তী। অবন্তী সরকারের বুকের ভিতর একটা বিদ্রূপের অসার হাসি ছুটে বেড়ায়। হাসিটা হাহাকারের মত। কি ভয়ানক মিথ্যা কথা! শেখর মিত্র সুখী হবেই বলে নাকি অবন্তী সরকার চায় যে, অনসূয়ার সঙ্গে শেখর মিত্রের বিয়ে হোক। অবন্তী আজ খাঁটি চোখের জল ঝরিয়ে শেখর মিত্রকে বুঝিয়ে দিতে পেরেছে, অবন্তী সরকার শেখর মিত্রের জীবনের সুখের জন্যই চিন্তা করছে। বিশ্বাস করেছে, ধন্য হয়েছে মানুষটা। একটা অভিনয়ের কথা। কিন্তু কথাগুলি বড় সুন্দর, বড় মিষ্টি। বিশ্বাস না করেই বা পারবে কেন? ঐ মিথ্যা কথাগুলি বলতে গিয়ে অবন্তী সরকারের বুকের ভিতরটাও যেন মিষ্টি হয়ে গিয়েছে। অবন্তী সরকারের ভাবনাগুলি আবার একটা অলস তন্দ্রার ভারে যেন অভিভূত হয়ে যায়।

মিথ্যে বলেনি অনসূয়া। শেখর মিত্র মানুষটা সত্যিই মহৎ মনের মানুষ। বোকা হলেও কি মহৎ ঐ বোকামি! যে মেয়েকে মনে মনে ভালবাসে, তারই কাছ থেকে যত আঘাত উপহারের মত বরণ ক'রে নিলে খুশি হয়। অদ্ভুত মানুষই বটে। এমন মানুষের ভালবাসাকে ভয়ও করে। শেখর মিত্রকে ভালবাসতে হলে ওর কাছে যে মাথা তুলে দাঁড়াতেই পারা যাবে না। ওর ভালবাসাকে মস্ত একটা দয়া বলে মনে হবে। তা না হলে...

ঘরের ভিতর ঢোকেন নিবারণবাবু।—কি রে, তুই এতক্ষণ এখানে চুপ ক'রে বসে কি ভাবছিস?

অবস্তীর ভাবনার ডোর নিবারণবাবুর কথার শব্দে হঠাৎ ছিন্ন হয়ে যায়। বুঝতে পারে অবস্তী, সত্যিই অনেকক্ষণ ধরে এখানে চুপ ক'রে যেন চোরের মত বসে মিছামিছি অনেক ভাবনা ভুগছে, যদিও অবস্তীর প্রতিজ্ঞাটা বেশ সফল হয়েছে। আর এত ভাবনার কি-ই বা দরকার ছিল?

—শরীর ভাল তো?

নিবারণবাবুর প্রশ্নে হেসে ফেলে উত্তর দেয় অবস্তী—হ্যাঁ ভাল।

নিবারণবাবু চলে যেতেই বুঝতে পারে অবস্তী, একটু মিথ্যে কথাই বলা হলো। মাথার ভিতরে কেমন একটা ভার থমকে রয়েছে। শরীরটাকেও কোনদিন এত দুর্বল মনে হয়নি। আজকের অভিনয় বেশ নির্ভুর একটা শাস্তিও দিয়েছে, নইলে এই শরীরের ভিতরেও এত যন্ত্রণা এমন ক'রে অস্থির হয়ে ওঠে কেন?

অনসূয়ার ভাগ্যটা মন্দ নয়। পরের ভালবাসার মানুষও ওর গানের টানে কাছে ছুটে গিয়ে ওকে আপন ক'রে নিতে চায়। আবার অগ্নের ভালবাসা না পেয়ে ফিরে যাওয়া মানুষ অনসূয়াকে বিয়ে করতে অনায়াসে রাজি হয়ে যায়। বাঃ। আরও ভাগ্য ভাল অনসূয়ার, এত এলোমেলো ইতিহাসের কোন খবর রাখে না

অনসূয়া। সাদা মনের অভ্যর্থনা নিয়ে জীবনের সঙ্গী বরণ করবার জন্ত তৈরী হয়ে আছে। অনসূয়ার মনের মতন একটা মন থাকলেই তো ভাল হতো।

অবন্তী সরকারের চোখে সুন্দর উৎসবের মত একটা স্বপ্নের আবছায়া যেন আনাগোনা করে। আজ না হোক কাল, কাল না হোক আরও কয়েকটি দিনের মধ্যেই শেখর মিত্রের একটা ইচ্ছার বাণী অনসূয়ার কানের কাছে গিয়ে গানের মত বেজে উঠবে। একটি মহৎ মনের মানুষ, সেরকম মানুষ পৃথিবীতে আর ক'জন আছে জানে না অনসূয়া, সে-ই অনসূয়াকে, হাত ধরে তার চিরকালের ভালবাসার ঘরে ডেকে নিয়ে যেতে চায়। শেখর মিত্র বড় সাহসী। বড় লোভী। ছিঃ।

হুহাতে কপাল টিপে ধরে অবন্তী সরকার। আজকের অভিনয়ের আনন্দটা বৃকের ভিতর আর্তনাদ ক'রে উঠেছে। আন্তে আন্তে মাথা তুলে বন্ধ দরজার দিকে তাকায় অবন্তী। না, কেউ নেই, অনেকক্ষণ হলো চলে গিয়েছে শেখর।

ছি ছি ছি! কত সহজে হ্যাঁ বলে চলে গেল লোকটা। বলতে মুখের ভাষাটা একটুও বাধলো না। অবন্তী সরকারের চোখের একটা ইশারায় লোকটা বোধ হয় চুরি-ডাকাতি আর মানুষ-খুন করতে পারে। নিখিল মজুমদার যে-মেয়েকে বিয়ে করবার জন্ত পাগল হয়ে উঠেছে, তাকে শুধু নিজের মহত্বের জোরে সরিয়ে নিয়ে গিয়ে ভালবাসলে যে ডাকাতি করা হয়, একটা মানুষের আশাকে খুন করা হয়, এই সামান্য সত্যটুকু বুঝবার মত কোন সন্দেহও কি নেই শেখর মিত্র নামে ঐ বিদ্বানের মনে?

জানালা খুলে পথের দিকে উদ্ভ্রান্তের মত তাকিয়ে থাকে অবন্তী। শেষ ট্রাম পার্ক সার্কাসের ডিপোর দিকে ফিরছে। অনেক রাত হয়েছে। কে জানে কোথায়, এই পৃথিবীর কেমন একটা ঘরে এখন নিশ্চিন্ত মনে ঘুমিয়ে পড়েছে অর স্বপ্ন দেখছে শেখর মিত্র?

কুড়ি

—আম্বন বৈজ্ঞানিক। শেখরকে দেখতে পেয়েই সম্ভাষণ জানায় অনসূয়া। এবং কথাটা বলতে গিয়ে হেসেও ফেলে।

এই হাসির মধ্যে একটা ঠাট্টার স্বর বেজে উঠলেও, হাসিটা যে নিছক ঠাট্টা নয়, সেটা হাসির স্বরেই প্রমাণিত হয়। বেশ মিষ্টি স্বর। শ্রীতি আছে, শুভেচ্ছা আছে, অনসূয়ার হাসির সেই মিষ্টি স্বরে। অনসূয়ার শ্রদ্ধার একটা দুর্ভাবনাই যেন এতদিনে নিশ্চিত হয়েছিল। শেখর মিত্রের মন জুড়ে অবস্তী নামে এক নারীর ভালবাসার স্মৃতি আর অনুভব ছড়িয়ে আছে। শেখর মিত্রের মনটা একলা নয়; সেই মনের সঙ্গে একটা স্বপ্ন আছে। ভদ্রলোকের জীবনটাও আর একলা পড়ে থাকবে না। জীবনের সঙ্গিনীকে চিনে রেখেছে শেখর মিত্র। খুবই ভাল সঙ্গিনী। যেমন সুন্দর, তেমনই শিক্ষিত আর তেমনই রোজগারে। শেখরের মত মানুষের সঙ্গে অবস্তীর মত মেয়েকেই মানায়।

শেখর বলে—কালই তোমার চিঠি পেয়েছি, তবু কাল আসতে পারিনি; একটু দেরি হয়ে গেল।

শেখরের গম্ভীর মুখের গম্ভীর স্বর শুনে যদিও একটু বিস্ময় বোধ করে অনসূয়া, তবুও আর একবার উচ্ছ্বসিত স্বরে হেসে ওঠে—একটু দেরি হয়েছে, তাতে মহাভারত অশুদ্ধ হয়ে যায়নি।

শেখর—ঠিকই বলেছ অনসূয়া; তোমার চিঠি পাওয়া মাত্র যদি ব্যস্ত হয়ে চলে আসতাম তবে ভয়ানক ভুল হতো। একদিন দেরি করে ভালই হলো।

অনসূয়া—তার মানে ?

শেখর—তার মানে, যদি কালই তোমার সঙ্গে দেখা করতে

আসতাম, তবে একটা ভুল কথা বলে দিয়ে চলে যেতাম, আর তুমি আমার সেই ভুল কথাটাকেই বিশ্বাস ক'রে ফেলতে।
 অনসূয়ার মুখ এইবার গম্ভীর হয়—কিছুই বুঝলাম না শেখরবাবু।
 অনসূয়ার মুখের দিকে অদ্ভুতভাবে তাকিয়ে থাকে শেখর। শেখরের চোখের এরকম অদ্ভুত দৃষ্টি কোনদিন দেখেনি অনসূয়া। যেন অনসূয়াকে এই প্রথম দেখছে শেখর এবং এই প্রথম দেখার অল্পভবেই অনসূয়ার প্রাণমনের পরিচয় বুঝে ফেলবার চেষ্টা করছে। অনসূয়া আর একবার হাসতে চেষ্টা করে, এবং সেই হাসির মধ্যে একটা চতুর ঠাট্টার মধুরতা মিশিয়ে দেয়।—কিন্তু এত গম্ভীর হবার কি হলো? আমার মুখের দিকে এত কষ্ট করে তাকিয়ে না থেকে যার মুখের দিকে তাকালে কাজ হবে... ..।

শেখর—ভুল।

চমকে ওঠে অনসূয়া—কিসের ভুল? কার ভুল?

শেখর—তোমার ভুল। তুমি না বুঝে-সুঝে ঠাট্টা করছো অনসূয়া। অনসূয়ার চোখের দৃষ্টি উদাস হয়ে যায়। শেখর মিত্রকেই যেন নতুন ক'রে দেখতে হচ্ছে, এবং শেখর মিত্রও নতুন হয়ে গিয়েছে মনে হয়। এ তো সেই হাসি-ঠাট্টার শেখরবাবু নয়, ভয়ানক গভীর অভিমানের শেখর মিত্র।

অনসূয়া বলে—আমি ঠাট্টা করতে চাই না। কিন্তু আমাকে বুঝিয়ে দিন, যে কোথায় কিসের ভুল হলো।

অনসূয়ার প্রশ্ন শুনেও যেন শুনতে পায়নি শেখর। এবং শেখরের মনটাও যেন নিজেরই চক্রান্তের একটা অদ্ভুত মধুরতার জালে জড়িয়ে পড়েছে। চোখ দুটো যেন ইচ্ছে ক'রে একটা মুগ্ধতা খুঁজছে। অনসূয়াকে দেখে মুগ্ধ হয়ে উঠুক চোখ, মিষ্টি হয়ে যাক বুক। অনসূয়া পৃথিবীর কোন মেয়ের চেয়ে ছোট নয়, কারও চেয়ে কম সুন্দর নয়। অনসূয়া যার জীবনের সঙ্গিনী হবে, তার জীবন সুখী হবেই হবে। এই মেয়েকে জীবনে ভাল লাগিয়ে নেবার

জন্ম চেষ্টা করতে হয় না, এমন মেয়ে আগনা থেকেই ভাল লেগে যায়।

শেখর—আমি ভুল করেছি ঠিকই, আগে ভুল করেছি। তার মধ্যে একটা বড় ভুল এই যে, তোমাকে দেখেও বুঝতে পারিনি।

অনসূয়া আবার হেসে হেসে একটা ঠাট্টার আবেশ ছড়িয়ে দিয়ে শেখর মিত্রের এই ভয়ানক গম্ভীর কথার কঠোর শব্দগুলিকে লঘু ক'রে দিতে চেষ্টা করে।—আমাকে দেখা মাত্র নয়নবাবুদের কাকাতুয়াটাও বুঝে ফেলতে পারে যে, আমার কোন মতলব নেই....।

একটু থেমে নিয়েই খিলখিল করে হেসে ওঠে অনসূয়া—নয়নবাবুদের কাকাতুয়াটা ভয়ানক সাবধান। মানুষ কাছে এসে দাঁড়ালেই বুঝে ফেলে যে ওর বু'টিতে হাত দেবার একটা মতলব নিয়ে কাছে এসে দাঁড়িয়েছে। তখনি ঠুকরে দেয়। কিন্তু আমাকে চোকরায়নি, কারণ আমার কোন মতলব ছিল না।

হেসে হেসে গল্প বলছে অনসূয়া, কিন্তু শেখর মিত্রের বুকের ভিতরে একটা অপরাধ যেন নির্ভুর ভীৰুতায় দপদপ করতে থাকে। মতলব? অনসূয়ার কোন মতলব নেই, কোনদিনও ছিল না। এবং অনসূয়ার কাছে কোনদিন কোন মতলব নিয়ে আসেনি শেখরও। কিন্তু আজ? আজ শেখর মিত্র যে একটা মূর্তিমান মতলব?....না, ঠিক তা নয়। একটা মতলবের দূত, একটা অভিসন্ধির প্রতিনিধি; এবং সে অভিসন্ধি আবার নিজের জীবনের অভিসন্ধি নয়। অবস্খী সরকারের জীবনের স্বপ্নকে নিষ্কটক করবার জন্ম নিজে আজ কটক বরণ করতে এসেছে শেখর।

না, কটক নয়। অনসূয়াকে কটক বলবার কোন অধিকার নেই। নিজেরই মনের ভাষার ভয়ানক ভুল শুধরে নিয়ে আবার কল্পনা করতে পারে শেখর। সে নিজেই আজ অনসূয়ার জীবনের কটক হবার জন্ম একটি গম্ভীর অভিমানের ছলনা নিয়ে এখানে এসে

দাঁড়িয়েছে। অনসূয়াকে অন্তত আভাসে এইটুকু আজ এখনি
জানিয়ে যেতে হবে যে, আমি তোমারই অপেক্ষায় রয়েছি।
হঠাৎ শেখর মিত্রের চোখ দুটো যন্ত্রণা-কাতর রোগীর চোখের মত
করণ হয়ে ছটফট করে ওঠে। শেখর বলে—তুমি কি সত্যিই তোমার
ভুল বুঝতে পারনি অনসূয়া?

অনসূয়া—না।

শেখর—আমার কাছে চিঠিতে কি লিখেছ, ভুলে গেলে?

অনসূয়া—না ভুলিনি। একটা দিন দেরি ক’রে চিঠি লিখলে
আপনাকে ওরকম অনুরোধ করতাম না।

আশ্চর্য হয় শেখর—তার মানে?

অনসূয়া—আমি বিয়ে করবো, তাতে আপনার আপত্তি আছে কিনা,
একথা জিজ্ঞেস করবার কোন দরকার ছিল না।

টেকিয়ে ওঠে শেখর—দরকার ছিল। দরকার এখনও আছে।

ভয়াতুর চোখ ভুলে তাকিয়ে থাকে অনসূয়া। আস্তে আস্তে কম্পিত
স্বরে প্রশ্ন করে—সত্যিই কিছু বুঝতে পারছি না শেখরবাবু।

শেখর—আমার আপত্তি আছে।

—একি বলছেন আপনি? প্রশ্ন করেই স্তব্ধ দুটো চোখ ভুলে
তাকিয়ে থাকে অনসূয়া।

ধীরে ধীরে হেঁটে ঘর ছেড়ে চলে যায় শেখর।

প্রভা টেকিয়ে ডাক দেয়—দাদা চলে গেল নাকি অনসূয়া?

অনসূয়া—হ্যাঁ।

একুশ

অনাদিবাবু বলেন—একচল্লিশ টাকা তো ব্যাঙ্কের রাগ থামাবার জন্ত সুদ দিতেই চলে গেল।

অনাদিবাবুর কণ্ঠস্বরের রকম দেখেই বুঝতে পারে শেখর, অনাদিবাবুর পিঠের বেদনাটা এইবার বোধ হয় একেবারে বুকের ভিতরে চলে এসেছে। টালিগঞ্জের গলির ক্ষুদ্র বাসাবাড়ির বুকে আবার আর্তনাদ শুরু হয়েছে। উঠানের রজনীগন্ধাকে একটা ঠাট্টা বলে মনে হয়। রতনবাবুর ছেলেকে পড়াবার কাজ ছাড়া টাকা আনবার মত অণু কোন কাজ করবার সৌভাগ্য এখনও হয়নি।

কাজের জন্ত দরখাস্ত করাই একটা কাজ হয়ে উঠেছে। এবং আর একটি কাজ খুঁজছে শেখর। কিন্তু এই খোঁজাখুঁজির পারিণামও মাঝে মাঝে যেন এক একটা নির্মম বিক্রপের খোঁচা দিয়ে অনিশ্চিত হয়ে যায়। ছাত্রের অভিভাবক বলেন—আপনার যদি কোন ভাল স্টেটাস থাকতো, তবে ভাল মাইনে দিতে....অর্থাৎ আপনার পক্ষে এক'শো টাকা মাইনে দাবি করবার একটা অর্থ হতো।

স্টেটাস চাই। অদৃষ্টের নিয়মটাকে বুঝতে চেষ্টা করতে গিয়ে মাঝে মাঝে হেসে ফেলে শেখর। স্টেটাস নেই বলে টাকা আসছে না; না টাকা নেই বলে স্টেটাস হচ্ছে না? ঐ যে বন্ধু নগেন, যাকে পুরো ছুটো মাস ধরে টিগনোমেট্রির মারপ্যাচ বুঝিয়ে দিয়ে একটু উপকার করতে পেরেছিল শেখর, সেই নগেন এখন সরকারী কলেজের অধ্যাপক। টায়েটুয়ে পাস নম্বর পেয়েও নগেন যে কেমন ক'রে ওরকম ভাল মাইনের একটা অধ্যাপনার কাজ পেয়ে গেল, সে রহস্য না জানলেও অনুমান করতে পারে শেখর। নগেনও প্রাইভেট ছাত্র পড়ায়, এবং ছাত্রের বাপ খুশি হয়ে নগেনকে ছুশো

টাকা মাইনে দেয়। শেখর জানে, নগেন তাতে সন্তুষ্ট নয়। শেখরের কাছে অনেকবার রাগ ক'রে আক্ষেপ ক'রেছে নগেন—ছেড়ে দেব; হুশো টাকায় প্রাইভেট ছাত্র পড়ানো পোষায় না। যেখানে ট্যালেন্টের সম্মান নেই, সেখানে যাওয়াই উচিত নয়।

অনাদিবাবুর গম্ভীর গলায় আত্ননাদ আবার কর্কশ স্বরে বেজে ওঠে।—তাহলে কথা রইল বিভা, মধু বিধুর গরম জামা এই শীতে আর হবে না।

বিভাময়ী—না হলে যে ছেলে ছুটো এই শীতে নিউমোনিয়াতে....। চেষ্টায়ে ওঠেন অনাদিবাবু—ওসব মেয়েলি ঝাকামি দিয়ে যদি আমাকে বিরক্ত কর, তবে মনে রেখ, আমার এই গরম আলোয়ানটাকে ছিঁড়ে কুটিকুটি ক'রে পুড়িয়ে দেব।

ঘরের ভিতরে বসে চুপ ক'রে এই ধিক্কারের আঘাতগুলিকে শুধু সহ্য করে শেখর; কিন্তু মনে মনে যেন নিজেকেও ধিক্কার দিয়ে ছিন্নভিন্ন ক'রে দিতে থাকে। টালিগঞ্জের গলির একটি ক্ষুদ্র বাসাবাড়ির এই কয়েকটা মানুষের জীবনের এই ক্লেশ শেখর মিত্রেরই চোখের একটা কুৎসিত ভুলের সৃষ্টি। একটা মেয়ের সুন্দর মুখের দিকে তাকিয়ে মুগ্ধ হওয়ার ভুল। লম্পট ধনী বাজে মেয়েমানুষের খপ্পরে পড়ে লাখ টাকা ফুঁকে দিয়ে আর ফতুর হয়ে ভিখিরী হয়ে যায়; শেখরের জীবনের অনাচারও প্রায় সেইরকম। অথচ শেখর মিত্র ওরকম লম্পট ধনীর চেয়েও বেশি মূর্খ। তবু সে লম্পট কিছু পেয়ে, কোন বস্তুর বিনিময়ে দাম দিতে গিয়ে ফতুর হয়। কিন্তু শেখর মিত্রের প্রাপ্তি যে একেবারে শূণ্য। কোন কিছু নয়, কোন কিছুর বিনিময়ে নয়, শুধু ঠকবার আনন্দে আত্মহারা হয়ে নিজেকে দরিদ্র করেছে শেখর।

দেখতে পেয়েছে শেখর, এই কয়েকদিন ধরে দেখে আসছে, রোজই একবার ক'রে পঞ্জিকা ঘাঁটেন বিভাময়ী। উপোস করবার জ্ঞান যেন একটা ছুতো খুঁজছেন বিভাময়ী। যত পুষ্টিবিহীন দিনক্ষণ আছে,

সবগুলিকেই কখনও একবেলা এবং কখনও বা দুবেলা উপোস দিয়ে পুজো করছেন। কি আশ্চর্য, পবিত্র দিনগুলি কত ঘন-ঘন দেখা দেয়, এবং এক একদিন প্রায় জ্ঞান হারিয়ে আধমরার মত মাছরের উপর পড়ে থাকেন বিভ্রাময়ী।

অনাদিবাবু আবার আক্কেপ করেন, এবং আক্কেপটাই যেন চাপা কান্নার স্বরের মত গুনগুন করে। —কি ভেবেছিলাম, আর কি হলো! ভেবেছিলাম মধু আর বিধুকে এবছর একটা ভাল স্কুলে ভর্তি করে দেবো। ভাল স্কুল দূরে থাক, ঐ চালাঘরের স্কুলও আর ওদের কপালে নেই। এবার নাম কাটিয়ে ঘরে বসিয়ে রাখতে হবে। দরজার কপাটে কড়া-নাড়ার শব্দ শুনে শেখর মিত্রের বিমর্ষ মনের ভয় চমকে ওঠে। কে এসেছে? বাড়িওয়ালার দারোয়ান? ব্যাক্তের পিয়ন? রাধানাথ মুদি?

কিংবা হয়তো রতনবাবুর ছেলেটাই এসেছে, এইবার জানিয়ে যেতে যে, বাবা বলেছেন, আপনাকে আর পড়াতে হবে না, প্রফেসার নগেনবাবু এবার থেকে আমাকে পড়াবেন।

দরজা খুলে দিতেই এক অপরিচিত ভদ্রলোককে দেখতে পেয়ে বিস্মিত হয় শেখর। এবং ভদ্রলোক এক মুহূর্ত দেরি না ক'রে ব্যস্তভাবে প্রশ্ন করে।—আপনিই কি শেখরবাবু?

—হ্যাঁ।

—আমি আপনার কাছেই এসেছি।

—বলুন, কেন?

—আপনাকে দেখতে?

সত্যিই ভদ্রলোক একেবারে অপলক চোখ নিয়ে শেখর মিত্রের মুখের দিকে তাকিয়ে থাকেন। যেন দেখে ধন্য হয়ে যাচ্ছেন।

শেখর একটু বিরক্তভাবে বলে—আপনার কথা শুনে মনে হচ্ছে...

ভদ্রলোকও হেসে ফেলেন—আপনার মনে হচ্ছে, একটা পাগল এসে আপনার সামনে দাঁড়িয়েছে।

শেখর—না, মনে হচ্ছে, আপনার বিশেষ কোন উদ্দেশ্য আছে।

ভদ্রলোক—তা তো আছেই।

শেখর—বলুন, কি উদ্দেশ্য?

ভদ্রলোক—আমাকে ক্ষমা করুন।

শেখর ত্রুটি করে—তার মানে?

ভদ্রলোক—তার মানে, আমি নিখিল মজুমদার।

চমকে ওঠে শেখর মিত্র। এবং নিখিল মিত্রের ঐ প্রসন্ন ও কৃতজ্ঞ মুখেরই অদ্ভুত একটা ক্ষমাপিপাসু বেদনার দিকে তাকিয়ে আশ্চর্য হয়ে যায়। ক্ষমা কেন? কিসের ক্ষমা?

নিখিল বলে—ক্ষমা তো করবেনই, তা ছাড়া আপনার রেসিংও চাই।

শেখর জোর ক'রে হাসতে চেষ্টা করে—আমার বয়স বোধ হয় আপনার চেয়ে।

নিখিল—আমার চেয়ে বোধহয় একটু কমই হবে। তাতে কি আসে যায় শেখরবাবু? আপনি যে আমার চেয়ে অনেক অনেক বড়।

শেখর—ওসব কথা আপনি চেষ্টা করে বললেও আমি বিশ্বাস করবো না।

নিখিল—না করুন, তাতে আমার বিশ্বাসেরও কোন ক্ষতি হবে না।

শেখর—যাক্ সেসব কথা।

নিখিল—আমিও বলি, যাক্ সেসব কথা। আসল কথা এই যে, আমার স্বার্থপর মনটাকে ক্ষমা করুন।

শেখর—স্বার্থপর মন?

নিখিল—হ্যাঁ। আপনি নিজেকে বঞ্চিত ক'রে আমাকে চাকরি দিয়েছেন। আমার সৌভাগ্য আপনারই কাছে ঋণী।

শেখর—এই কথাটি আপনি বলবেন, এতক্ষণ এই ভয়ই করছিলাম।

নিখিল—না বলে উপায় নেই শেখরবাবু। আমি জীবনে সুখী হয়েছি, একথা মনে করলেই যে আপনার কথা মনে পড়ে।

শেখর হাসে—কিন্তু সুখী হবার একটা ব্যাপার যে এখনও বাকি আছে ?

নিখিল—কি বললেন ?

শেখর—বিয়েটা ।

নিখিল—হ্যাঁ, বাকি আছে বটে, কিন্তু নিশ্চিত হয়েছি ।

শেখর—কিরকম ?

নিখিল হাসে—আমাকে এখন আপনার কুটুম বলে একরকম ধরেই নিতে পারেন ।

শেখর আশ্চর্য হয়—আমার কুটুম ? অবস্তী সরকারের সঙ্গে আমাদের তো কোন কুটুম্বিতার সম্পর্ক নেই ।

নিখিলও আশ্চর্য হয়ে তাকায়—অবস্তী সরকারের সঙ্গে আপনাদের কুটুম্বিতা নাই বা থাকলো । অনসূয়ার সঙ্গে তো আছে ।

—অনসূয়া ? টেঁচিয়ে ওঠে শেখর ।

নিখিল—হ্যাঁ ।

শেখর—অনসূয়ার সঙ্গে আপনার বিয়ে ?

নিখিল—হ্যাঁ ।

শেখর—অবস্তীর সঙ্গে নয় ?

নিখিল—ছিঃ, কি যে বলেন !

শেখর—কিন্তু অনসূয়া কি..... ।

শেখরের মুখের প্রশ্ন হঠাৎ যেন থমকে চুপ ক'রে যায় । নিখিল বলে—কি বললেন ?

শেখর—না, কিছু নয় ।

নিখিল মজুমদারের প্রশন্ন মুখের দিকে অপরাধীর মত কুণ্ঠিতভাবে তাকায় শেখর । এবং সেই মুহূর্তে শেখরের সেই কুণ্ঠিত চোখের দৃষ্টি অদ্ভুত একটা বেদনায় যেন বিচলিত হয়ে কাঁপতে থাকে । কী বিপুল আশ্বাসে খুশি হয়ে আছে নিখিল মজুমদার ! হয়তো সত্যিই আগে রাজি হয়েছিল অনসূয়া, এবং অনসূয়ার সেই প্রতিশ্রুতির

পুলক মনে-প্রাণে গ্রহণ ক'রে খুশি হয়ে রয়েছে নিখিল মজুমদারের জীবনের আশা। অনসূয়াকে ভালবাসে নিখিল ; অনসূয়ার সঙ্গে জীবনের একটি সুন্দর নীড় বাঁধবার কল্পনা যেন নিখিলের চোখে জ্বলজ্বল করেছে। কিন্তু জানে না নিখিল, ওর স্বপ্নকে এই শেখর মিত্রই একটা মিথ্যা হিংসার সাপের মত দংশন ক'রে এসেছে। একটা কপট আগ্রহের অভিনয় ক'রে অনসূয়ার মনে নতুন ভাবনা ধরিয়ে দিয়ে এসেছে শেখর। পৃথিবীর এক ভদ্রলোককে বিয়ে করবে অনসূয়া, এই সামান্য ও সরল একটা ঘটনা সহ্য করতে শেখর মিত্র রাজি নয়; আপত্তি আছে শেখরের, এই কথা শেখরের মুখ থেকেই শুনতে পেয়ে কি-ভয়ানক চমকে উঠেছিল অনসূয়া ! মনে পড়ে শেখরের, অনসূয়ার সেই বিস্মিত ব্যথিত ও স্তব্ধ চোখ দুটোর করুণ দৃষ্টিটাও মনে পড়ে।

বুকের ভিতরও একটা যন্ত্রণার স্বর যেন ধিক্কার দিয়ে বলতে থাকে, —ছি ছি, কিসের জগৎ, কার জগৎ, বেচারী নিখিল মজুমদারের স্বপ্ন ব্যর্থ করবার চক্রান্ত করেছে শেখর ?

নিখিল—এবার তাহলে খুশি হয়ে আমাকে চলে যেতে বলুন শেখর বাবু।

শেখর মিত্রের গম্ভীর ও বেদনাক্লিষ্ট চেহারাটা হঠাৎ যেন হেসে উচ্ছল হয়ে ওঠে—খুব খুশি ; এর চেয়ে ভাল খুশির খবর আর কি হতে পারে ?

নিখিল চলে যেতেই বোধ হয় এক মিনিটের বেশি দেরি করে না শেখর। মনে মনে নিজের মনের একটা ভুলের অভিষাপকে ধিক্কার দিয়ে কয়েকটি মুহূর্ত গুধু ছটফট করে। এই অতি নীচ হীন নির্ভুর ও মূর্খ ভুলটাকে এই মুহূর্তে মিথ্যে ক'রে দিতে হবে।

নিজেরই বুদ্ধি আর কাণ্ডজ্ঞানের উপর ভয়ানক একটা সন্দেহ। মাথাটা বোধ হয় সুস্থতা হারিয়েছে, নইলে অবস্কার ঐ চক্রান্তের প্রস্তাবেও রাজি হয় মানুষ ? সন্দেহ করে শেখর, এবং সঙ্গে সঙ্গে

নিজেরই উপর যে ঘৃণা মনের ভিতর শিউরে ওঠে, তেমন ঘৃণা আর কাউকে করবার দুর্ভাগ্য জীবনে কখনও হয়নি।

অবস্তী সরকারের অনুরোধের নির্ভরতাটা এতক্ষণে যেন শেখরের শাস্ত মনের চিন্তায় ধরা পড়ে যায়। অবস্তীর ঐ অনুরোধের অর্থ, নিখিল নামে একটি মানুষের জীবনের স্বপ্নকে হত্যা করা, যে-মানুষ শেখরের জীবনের বিরুদ্ধে কোন শত্রুতা করেনি। অবস্তীর ঐ অনুরোধ রক্ষা করার অর্থ অনসূয়া নামে একটি মেয়েকে কঁাকি দেওয়া আর অপমান করা। অনসূয়াকে ভালবেসে নয়, অনসূয়ার জীবনের কোন ভালবাসার দাবি পূর্ণ হবে বলে নয়, অনসূয়াকে বিয়ে করতে হবে এই উদ্দেশ্যে যে, অবস্তী নামে এক মেয়ের আকাজ্জক পথ অব্যাহত হয়ে যাবে। কি ভয়ানক, কি ঘৃণা এই অনুরোধের হৃদয়টা! অথচ এমনই একটি অনুরোধের কাছে আত্মসমর্পণের সম্মতি ঘোষণা ক'রে চক্রান্তের পথে অনেকদূর এগিয়ে গিয়েছে শেখর।

এখনই বের হতে হবে। আর এক মুহূর্তও দেরি করা যাবে না। ভবানীপুরের একটা বাসার কথা শেখরের মনে পড়ে। এখনই রওনা হলে পৌঁছে যেতে বড় জোর আধ ঘণ্টা।

অনসূয়া কি এখন বাড়িতে আছে? আছে নিশ্চয়। যদি না থাকে, তবে অপেক্ষা করতে হবে, যতক্ষণ না অনসূয়া বাড়ি ফিরে আসে। ঐ বোকা মেয়ের স্তব্ধ ছোটো চোখের ভুল ধারণা ভেঙ্গে দিতে হবে।

বাইশ

নিখিল মজুমদারকে একটা চিঠি দিতে হবে, এবং সেই চিঠিতে শুধু আট-দশটা কথা লিখতে হবে। না নিখিলবাবু, আমি রাজি নই, কমা করুন, ইতি অনসূয়া।

হাতের কাছে কাগজ ও কলম ছিল। এবং লেখবার কথাগুলি মনের ভিতর ছটফটও করছিল। কিন্তু তবু হাত গুটিয়ে চুপ ক'রে বসে ভাবতে থাকে অনসূয়া, এ কি অদ্ভুত কথা বলে গেল শেখর মিত্র! আপত্তি আছে শেখর মিত্রের, কিন্তু কিসের আপত্তি?

চিঠি পেয়ে খুবই চুঃখিত হবে নিখিল মজুমদার; এবং অনসূয়ার মনের অদ্ভুত রকম দেখে অনসূয়াকে একটা বিশ্বাসঘাতিকা বলে সন্দেহ করবে আর রাগ করবে। করুক, উপায় নেই। অনসূয়াও রাগ ক'রে নিখিলকে প্রশ্ন করতে পারে, তুমিও শেখর মিত্রের নামে যে-সব কথা বলে গেলে, সেসব কথা যে মিথ্যে নয়, তার কি কোন প্রমাণ আছে? কোথা থেকে, কেমন ক'রে, আর কি দেখে প্রমাণ পেলে যে, অবস্তীকে ভালবাসে শেখর মিত্র?

ঘরের ভিতরে ঢুকে শেখর হেসে ওঠে—কোন ভয় নেই, তুমি নিশ্চিন্ত মনে চিঠি লেখ, আমি এখনি চলে যাচ্ছি।

অনসূয়া চেয়ার থেকে উঠে দাঁড়িয়ে বলে—বসুন।

শেখর—না, এখনই পেটের ভাবনায় বের হতে হবে।

অনসূয়া—কোথায় যাবেন?

শেখর—প্রথমে যাব ক্লাইভ স্ট্রীট, তারপরেই এলগিন রোডে ছাত্তরের বাড়ি।

অনসূয়া—তা হ'লে চা খেয়ে যান।

—না। অনসূয়ার গম্ভীর মুখের দিকে তাকিয়ে আবার হেসে ওঠে

শেখর—আজ কিন্তু তোমাকে একটুও ভাল দেখাচ্ছে না।

শুধু—আজ কেন ? কোনকালেই ভাল দেখায়নি, তবু...

শেখর হাসে—রাগ করো না, কথাটা বলতে একটু ভুল হয়েছে।

আজ তোমার মুখে এই গম্ভীরতা একটুও ভাল দেখাচ্ছে না।

অনসুয়া—কেন ?

শেখর—যখন ভাবসাব হয়ে গিয়েছে, সব ভয় ভেঙ্গে গিয়েছে,

যখন বিয়ের দিনটার কথা ভেবে তৈরী হতে হচ্ছে, তখন....

অনসুয়া—কে বললে ?

শেখর—সবাই জানে! সবই শুনেছি।

অনসুয়া—কিন্তু...

শেখর—কি ?

অনসুয়া—আপনি খুশি হচ্ছেন কেন ?

শেখর—তার মানে ? আমি যে সব চেয়ে বেশি খুশি।

অনসুয়ার চোখে একটা অস্বস্তি যেন ক্রকুটি ক'রে ওঠে।—কিন্তু

আপনিই যে সেদিন বললেন, আপনার আপত্তি আছে।

হেসে ওঠে শেখর—বলেছিলাম বটে, অস্বীকার করছি না। কিন্তু

তখন আপত্তি যে সত্যিই ছিল।

অনসুয়া—কেন ?

শেখর—তখন কি জানতাম যে, নিখিল মজুমদারকে বিয়ে করবার জ্ঞান তুমি ব্যস্ত হয়ে উঠেছো ?

মাথা হেঁট করে অনসুয়া। কিন্তু অনসুয়ার গম্ভীর মুখটা ধীরে ধীরে হেসে উঠতে থাকে। যেন একটা কথা ভাবনার, একটা ভুল

কল্পনার বেদনা থেকে এতক্ষণে হঠাৎ মনটা মুক্ত হয়ে গেল। হাসছে

শেখর মিত্র। সত্যিই, অনসুয়ার সঙ্গে হাসাহাসির সম্পর্ক ছাড়া

শেখর মিত্রের মনে অনসুয়ার জ্ঞান আর কোন সম্পর্কের ইচ্ছা নেই।

শেখর মিত্রের কাছে অনসুয়া শুধু তার বোনের ননদ, এই মাত্র।

মুখ তুলে তাকায় অনসুয়া, এবং এইবার অনসুয়ার মুখের হাসিতে

চতুর এক আক্রমণের সঙ্কল্প ছটফট করতে থাকে। এবং প্রভা চা

নিয়ে ঘরের ভিতর ঢুকতেই চোঁচিয়ে ওঠে অনসূয়া—সায়েন্টিস্ট মশাই
যে ডুবে ডুবে জল খাওয়ার খুব ভাল বিজ্ঞান আয়ত্ত ক’রে ফেলেছেন,
সে খবরও অনেকেই জানে।

হঠাৎ গম্ভীর হয়ে যায় শেখর—কটা বেজেছে, একবার ঘড়িটা দেখে
বলে দে তো প্রভা।

হ্যাঁ, একটু ছুতো ক’রে প্রভাকে ঘর থেকে সরিয়ে দিল শেখর মিত্র।
এবং বেশ একটু বিব্রতভাবে, যেন মনের ভিতর একটা অপরাধের
জ্বালা লুকিয়ে প্রশ্ন করে শেখর—অনেকেই জানে, একথার অর্থ কি
অনসূয়া?

অনসূয়া—নিখিলবাবু জানে।

শেখর—কি জানে?

অনসূয়া—অবস্তীকে আপনি...

শেখর—কথাটা খুব মিথ্যে নয়। কিন্তু নিখিলবাবু তোমাকে আর
একটা কথা বলতে ভুলে গিয়েছেন।

অনসূয়া—কি কথা?

শেখর—অবস্তী আমাকে ঘেন্না করে। কাজেই....।

চুপ করে শেখর। শেখরের চোখ ছোটো উদাসভাবে হাসতে থাকে।
তারপর ঘরের বাতাসকে যেন একটা মনখোলা ঠাট্টার আমোদে
হাসিয়ে দিয়ে হো হো ক’রে হেসে ওঠে শেখর—এবার চলি।
কাজেই বুঝতে পারছো অনসূয়া, ডুবে ডুবে জল খাওয়ার বিজ্ঞান
আমি একটুও আয়ত্ত করতে পারিনি। শুধু ডুবে গিয়েছি।

ভেইশ

দরজাটা খোলাই ছিল। সেই দরজার সামনে একটা ছায়া এগিয়ে আসতেই ঘরের ভিতর থেকে ছ'পা এগিয়ে এসে উকি দেয় অনসূয়া। সঙ্গে সঙ্গে চমকে ওঠে—একি? তুমি এই অসময়ে? হঠাৎ না বলে-কয়ে? কি মনে ক'রে অবস্তী?

অবস্তী—তুমিই বা এত চমকে উঠলে কেন অনসূয়া? কি মনে করে? এর আগে এরকম হঠাৎ না বলে-কয়ে অসময়ে কতবারই তো এসেছি।

ছুই বাঙ্কবী, অনসূয়া আর অবস্তী। জীবনে কোনদিন এমন অদ্ভুত ব্যাপার কখনও দেখা যায়নি যে, অনসূয়া আর অবস্তী হঠাৎ ছ'জনে ছ'জনকে দেখতে পেয়ে এরকম শুকনো চোখ তুলে ছ'জনের দিকে ছ'জনে তাকিয়েছে। যে সাক্ষাতে হাসির উল্লাস ফোয়ারা হয়ে উঠলে পড়তো, সে সাক্ষাৎ যেন একটা তীব্র অভিযোগের হানাহানি শিউরে তুলেছে।

অবস্তীকে, হেসে হেসে অভ্যর্থনা করতে ভুলে গিয়েছে অনসূয়া। অনসূয়ার মনের ভিতরে সত্যিই যে ভয়ানক এক অভিযোগের আক্ষেপ বাজছে। নিজেকে কি মনে করে অবস্তী? শেখর মিত্রের মত মানুষের ভালবাসা পাওয়া যে ওর কত বড় সৌভাগ্য, সেটা বোধ হয় শুধু ওর ঐ ভাল চাকরির অহংকারে বুঝতে পারছেন না অবস্তী? কি সাহস! শেখর মিত্রকে ঘৃণা করে অবস্তীর মত মেয়ে? অবস্তী সরকারের সেই সুন্দর ছায়া-ছায়া কালো চোখের তারায় একটা অভিযোগের বিছাৎ যেন ঝিলিক দিয়ে ফুটে উঠতে চায়। অনসূয়ার মুখের দিকে তাকিয়ে কি-যেন সন্দেহ করছে, ভয় পাচ্ছে

আর রাগ করছে অবন্তী। শেখর মিত্র নামে একটা লোক হঠাৎ এসে বিয়ে করবার ইচ্ছে জানালেই খুশি হয়ে রাজি হয়ে যেতে হবে, এরকম একটা বাজে মন নিয়েও কত অহংকারী হয়ে উঠেছে অনসূয়া। কত গম্ভীর হয়ে কথা বলছে! কোন মানুষের মনের আসল খবর না জেনে ওভাবে যে রাজি হতে নেই, এটুকু কাণ্ডজ্ঞান আছে কি অনসূয়ার? অনসূয়ার মুখ দেখে মনে হয়, এসেছিল শেখর মিত্র, এবং অনায়াসে শেখর মিত্রের কাছে জীবনের সব হাসি সঁপে দেবার ইচ্ছা জানিয়ে দিয়ে এখন এত গম্ভীর হয়ে উঠেছে অনসূয়া।

অবন্তী বলে—ইচ্ছে ক’রে, তোমার কাছে অপমানিত হব জেনেও একবার আসতে হলো অনসূয়া।

অনসূয়া—এসেছ, ভালই করেছে, কিন্তু এরকম মিথ্যে সন্দেহ ক’রে আমাকে অপমান না করলেই ভাল ছিল অবন্তী।

অবন্তী—হ্যাঁ, ঠিকই বলেছ, সন্দেহ না ক’রে পারছি না।

অনসূয়া—মিথ্যে সন্দেহ।

অবন্তী—মিথ্যে কেন? শেখরবাবু কি এখানে আসেননি?

অনসূয়া—এসেছেন বৈকি। আজও এসেছিলেন; এই তো কিছুক্ষণ আগে চলে গেলেন।

অবন্তী হাসে—কি বলে গেলেন, সেটা কি বলতে পারবে?

অনসূয়া—পারবো বৈকি।

অবন্তী হাসে—তাহ’লে পেরে যাও।

অনসূয়াও হাসে।—আমি যে-কথা স্বপ্নেও বিশ্বাস করতে পারি না, সেই কথাই বলে গেলেন।

অবন্তীর চোখ দুটো ধরধর ক’রে কাঁপে, তার পর একেবারে ভিজেই যায়।—স্পষ্ট ক’রে বলেই ফেল অনসূয়া, যদিও জানি তদ্রলোক কি বলেছেন।

অনসূয়া—জান না বোধ হয়।

অবন্তী—খুব জানি। কিন্তু তুমি কি বলেছ জানি না, বুঝতেও পারছি না।

অনসূয়া হাসে—আমি শেখরবাবুকে আমার বিয়েতে আসবার জগ্ন্য নেমস্তন্ন করেছি।

অবন্তী—কি বললে? তোমার বিয়ে?

অনসূয়া হাসে—তোমাকেও কি নেমস্তন্ন করবো না বলে সন্দেহ করছো?

অবন্তী—না, সে সন্দেহ নয়। কার সঙ্গে তোমার বিয়ে?

অনসূয়া—তা'ও জানতে পারবে।

অবন্তী—ভজ্রলোকের নাম?

অনসূয়া—নিখিল মজুমদার। দাদার বন্ধুর ভাই।

অবন্তীর দুই চোখের সন্দেহ যেন অগাধ বিস্ময়ের আবেগ হয়ে শুধু জ্বলজ্বল করতে থাকে। গম্ভীর মুখের সেই ভয়ানক সন্দেহের গুমোট হঠাৎ যেন এই পৃথিবীর একটা মিষ্টি বিদ্রূপের আঘাতে ছিন্নভিন্ন হয়ে গিয়েছে। শুধু অনসূয়াকে নয়, মনে মনে এই মুহূর্তে যেন নিখিল মজুমদারের অকৃতজ্ঞ মনটাকেও অভিনন্দিত করতে ইচ্ছে করছে। অনসূয়া যে সত্যিই অবন্তী সরকারকে মুক্তির আশ্বাস শুনিয়ে দিচ্ছে। না, ভুল করেনি শেখর মিত্র, ভুল করেনি অনসূয়া, ভুল করেনি নিখিল মজুমদারও।

অনসূয়া—শুনে খুশি হলে তো অবন্তী?

চৈঁচিয়ে ওঠে অবন্তী—তুই আমাকে আর কত অপমান করাব অনসূয়া? তোর বিয়ের কথা শুনে আমি খুশি না হলে এই দুনিয়াতে আর কে খুশি হবে বল দেখি।

অনসূয়াও হাসে।—কিন্তু আমি খুশি হব কবে?

অবন্তী—তার মানে?

অনসূয়া—তুই বিয়ে করবি কবে?

অবন্তী—আমি? আমাকে বিয়ে করবে কে? যমে?

অনসূয়া হাসে—থাক্, এত অভিমান করিস না অবন্তী।

অবন্তী গভীর হয়—না ভাই, অভিমান করবারও জোর নেই আমার।

অনসূয়া—কি বললি ? মনে হচ্ছে, সত্যিই কারও ওপর তোর অভিমান আছে।

অবন্তী—না, অভিমান নয় অনসূয়া। তার ক্ষমা চাইবারও জোর পাচ্ছি না।

কিছুক্ষণ চুপ ক’রে দাঁড়িয়ে থাকে অবন্তী। পথ হারিয়ে যায় নি। কিন্তু পথটাই যে অদ্ভুত। কেমন ক’রে এগিয়ে যাওয়া যায় ? সেই সাহসই বা কোথা থেকে পাওয়া যায় ? অবন্তী সরকারের সুন্দর কালোচোখের আশা আর সাহস যেন একটা অবসাদের বেদনায় ডুবে গিয়েছে।

কিন্তু হেসে উঠেছে অনসূয়ার চোখ। আর কোন সন্দেহ নেই অনসূয়ার। মিথ্যে সন্দেহ করেছে শেখর মিত্র। শেখর মিত্রেরই চোখ নেই। ‘আজ এখানে থাকলে নিজেই দেখে লজ্জা পেত শেখর মিত্র। শেখর মিত্রকে ভালবাসার জন্য কী গভীর ব্যাকুলতা থমকে রয়েছে এই ভয়ানক চালাক অবন্তীরই চোখে। অনসূয়া বলে—একটু চা খাও অবন্তী।

অনসূয়ার অতুরোধ শোনা মাত্র ছটফট করে ওঠে অবন্তী—না না, আমার সময় নেই অবন্তী। কিছু মনে করো না।

চলে গেল অবন্তী। দেখে বোঝা যায় না, কোথাও পালিয়ে গেল, না, কারও কাছে ছুটে চলে গেল অবন্তী।

চক্ৰবৰ্ত্তী

রতনবাবুর ছেলে শেখরের চোখের সামনে বসে কঠিন গণিতের ফরমুলা বুঝতে গিয়ে হিমসিম খায়। পাতার পর পাতা অঙ্কে অঙ্কে ভরে যাচ্ছে, তবু কঠিন গণিতের প্রবলেম সমাধান হবে বলে মনে হয় না। টিউটর শেখরও আনমনার মত তার জীবনের সমস্যাটা চিন্তা করে ; কোন ফরমুলাই খুঁজে পাওয়া যাচ্ছে না। সমাধান করবার কোন আশাই দেখা যায় না।

শুধু কঠিন একটা ঘণ্টা ছুটফুট করে নিজের মনের ভিতরে। এ কি অদ্ভুত এক হীনতার চক্রান্তে স্বীকৃতি জানিয়ে অবস্খী সরকার নামে এক নারীকে আশ্বাসে খুশি ক'রে চলে এসেছে শেখর? অদ্ভুত, একটা মেরুদণ্ডহীন হিরোইজম ; শেখর মিত্র তার জীবনের পৌরুষ বিসর্জন দিয়ে এক নারীর সুন্দর দুটি কালো চোখের কপট অশ্রুদাস হবার জন্ত কথা দিয়ে এসেছে। যত খুশি নিজের ক্ষতি ক'রে অবস্খীর কালো চোখের স্বপ্নের বিলাস-লীলাকে সাহায্য করা যায়, সে অধিকার শেখরের আছে। কিন্তু শেখরের জুপিণ্টটাই যেন হঠাৎ চমকে ঘুম ভেঙ্গে আর মোহ ছিঁড়ে জেগে উঠেছে, বুঝতে পেরেছে শেখর, অবস্খীকে সুখী করবার জন্ত পরের ক্ষতি করবার কোন অধিকার তার নেই। নিখিল মজুমদারের ইচ্ছার পথে কাঁটা ছড়িয়ে দেবার, আর অকারণে বেচারি অনসুয়ার মনের শ্রদ্ধার সুযোগ নিয়ে তার মনে শেখরের সম্পর্কে একটা ইচ্ছা জাগিয়ে তুলবার হীন সঙ্কল্পকে এই মুহূর্তে চূর্ণ ক'রে দিতে হবে। ব্যস্তভাবে চোখের দৃষ্টি উতলা ক'রে, কি যেন খুঁজতে থাকে শেখর। ছাত্র প্রশ্ন করে—
আপনার শরীরটা আজ ভাল নয় বলে মনে হচ্ছে শেখরদা।

শেখর বলে—আমাকে এক টুকরো কাগজ আর তোমার পেনটা দাও। একটা দরকারি চিঠি লেখবার আছে।

কাগজ আর পেন শেখরের হাতের কাছে রেখে দিয়ে ছাত্রও অনুমতি চায়—আজ এখন তাহলে আমিও উঠি শেখরদা।

—এস। ছাত্রকে বিদায় দিয়ে সেই পড়ার ঘরের নিভূতে একেবারে একলাটি হয়ে শেখর মিত্র তার মনের বিজ্রোহ ছোট একটি চিঠির মধ্যে তিনটি লাইনে একেবারে স্পষ্ট ভাষায় যেন উৎকীর্ণ ক’রে দেয়।

—অসম্ভব অবস্থী। তোমার অনুরোধ রক্ষা করবার সামর্থ্য আমার নেই। তোমাকে মূর্খের মত ভালবাসি ঠিকই, কিন্তু সেই ভালবাসার জন্ত মূর্খ হতে পারবো না। নিখিল হোক, অনসূয়া হোক, পৃথিবীর যে কেউ হোক, কারও ক্ষতি করতে পারবো না। তাতে তুমি সুখী হও বা না হও।

চিঠিটার মধ্যে জ্বালা আছে। চিঠিটাকে বেশিক্ষণ পকেটে রাখতেও অস্বস্তি হয়। এই মুহূর্তে ঐ চিঠিকে পার ক’রে দেওয়াই উচিত।

রতনবাবুদের বাড়ির গেট পার হয়ে যখন পথের উপর এসে দাঁড়ায় শেখর, তখন এলগিন রোডের বড় বড় কুম্ভচূড়ার উপর ছপূরের রোদ ঝলক দিয়ে ছড়িয়ে পড়েছে। আর বেশি দূর নয় পোস্ট অফিস। ঐ চিঠিকে এই মুহূর্তে অবস্থী সরকারের কালো চোখের উদ্দেশে রওনা করিয়ে দিয়ে মুক্ত হয়ে যাবে শেখর। জানুক অবস্থী সরকার, শেখর মিত্রের মহত্বটা খুব বেশি মূর্খ নয়।

শেখরের এই আসন্ন মুক্তির লগ্নটাকেই যেন একটা ক্ষেপা হাওয়ার আঘাতে ছ ছ ক’রে উড়িয়ে দিয়ে একটা ট্যান্ডি শেখরের প্রায় গা ঘেঁষে ছুটে চলে যায়, এবং তার পরেই আচমকা থেমে যায়।

সামান্য একটু দূরে গিয়ে গাড়িটা থেমেছে। গাড়ি থেকে নেমেছেন এক মহিলা। চলে গেল ট্যান্ডি। মহিলা ছপ ক’রে ফুটপাথের উপর দাঁড়িয়ে আছেন। তার পরেই শেখরের চোখের কঠিন দৃষ্টি হঠাৎ চমকে উঠেই বুঝতে পারে, দাঁড়িয়ে আছে অবস্থী সরকার।

কোন সন্দেহ নেই, লালচে ঠোঁটে হাসি ফুটিয়ে শেখরের জন্ত
দাঁড়িয়ে আছে অবন্তী ।

শেখর কাছে আসতেই অবন্তী বলে—বাচ্ছিলাম টালিগঞ্জ ।
আপনারই কাছে ।

শেখর হাসে—খুব আশ্চর্যের কথা ।

অবন্তী—আরও আশ্চর্যের কথা বলবো ?

শেখর—কি ?

অবন্তী—এখনি একবার আমাদের বাড়িতে আপনাকে যেতে হবে ।

শেখর—কেন ?

অবন্তী—কথা আছে ।

শেখর—এখানেই বল ।

অবন্তী ক্রকুটি করে ।—এখানে বলা যায় না ।

শেখর—খুব বলা যায় । আমার কাছে তোমার বলবার মত এমন
কোন কথা নেই, যা এখানে দাঁড়িয়ে বলা যায় না ।

অবন্তীর ক্রকুটি আরও কঠোর হয়ে ফুটে ওঠে ।—শুনে সুখী হলাম ।
ছ’দিনের মধ্যেই একেবারে নতুন মানুষ হয়ে গিয়েছেন ।

কোন উত্তর দেয় না শেখর । এবং অবন্তীর মুখের দিকে তাকাতেও
ভুলে যায় । মনে হয়, কৃষ্ণচূড়ার ছায়াতলে একেবারে একলা
দাঁড়িয়ে আছে শেখর । একটা খোঁড়া ভিখারী লাঠি ঠুকে ঠুকে
কাছে এসে দাঁড়িয়ে সুর ক’রে আবেদন জানায়—ভগবান আপনাদের
মনোবাঞ্ছা পূর্ণ করুন । খোঁড়াকে মুড়ি খেতে পয়সা দিন বাবা ।

খিল খিল ক’রে হেসে ওঠে অবন্তী—খোঁড়াকে ছুটি পয়সা দিন
তাহলে । ও কি বলছে, শুনতে পাচ্ছেন না ?

শেখর বলে—কিছু মনে করো না, আমি চলি ।

অবন্তীর চোখ ছটো হঠাৎ গন্তীর হয় । গলার স্বরটাও অস্বাভাবিক
রকমের কঠোর ।—একটু দাঁড়ান । সামান্য একটা জিজ্ঞাস্তা আছে ।

শেখর—বল ।

অবন্তীর কালো চোখ এইবার যেন দপ ক'রে জ্বলে ওঠে।—
অনসূয়াকে বিয়ে করবার কথা ভাবতে আপনার মনে একটু লজ্জাও
হচ্ছে না ?

শেখর—কি বললে ?

অবন্তী যেন বিকার রোগীর প্রলাপের মত বিড় বিড় করে, অথচ দম
বন্ধ ক'রে বলতে থাকে।—আপনি খুব মহৎ। আর, খুব মহৎ বলে
আপনার মনে বড় অহংকার আছে। কিন্তু...শুধু আমার একটা
অমুরোধের জন্ত, আমার একটা বিস্ত্রী খেয়ালের জন্ত আপনি
নিজেকে একেবারে বাজে...একটা ছোট মনের লোকের মত...।

শেখর—চুপ কর অবন্তী।

অবন্তী—ধমক দেবেন না। আমাকে ধমক দেওয়া আপনার মত
দুর্বল মানুষের একটুও সাজে না।

পকেট থেকে চিঠিটা বের ক'রে অবন্তীর হাতের কাছে এগিয়ে
দিতেই যেন ভয়ে চমকে ওঠে অবন্তী। হাত কাঁপে। তারপর
সেই কাঁপা হাতেই চিঠিটা তুলে নেয়।

কৃষ্ণচূড়ার ছায়ার কাছে একা স্তব্ধ হয়ে দাঁড়িয়ে চিঠিটার দিকে
তাকিয়ে থাকে অবন্তী। এবং অত্মদিকে না তাকালেও বুঝতে পারে,
হন হন ক'রে হেঁটে চলে গেল শেখর।

পাঁচিশ

টালিগঞ্জের গলির ভিতরে ক্ষুদ্র বাড়ির জানালায় বিকালের রোদ লুটিয়ে পড়েছে। বাড়ির দরজার কাছে পথের উপর ঘুর ঘুর করছে মধু আর বিধু। বার বার গলির মুখের দিকে ওরা তাকায়, যেখানে বড় রাস্তার এক টুকরো ছবি দেখতে পাওয়া যায়। বড় বড় বাস যায়, ছোট মোটর গাড়ি যায়, আর সাইকেল ও রিক্সা। পথের ভিড়টাও যেন শ্রোতের মত গড়িয়ে চলেছে। আজ রেসের দিন। হাঁক দিয়ে, রেসের বই বিক্রি করছে ফেরিওয়ালা; সেই হাঁকও শোনা যায়।

এগিয়ে আসছে শেখর, দেখতে পায় মধু আর বিধু। সেই মুহূর্তে দু'জনে একসঙ্গে ছুটে শেখরের দিকে এগিয়ে যায়, যেন কোন অভিনব বার্তা শোনার বার জ্ঞাত এতক্ষণ ধরে এই ভাবে শেখরের আসার আশায় পথের উপর ঘুর ঘুর করছিল ওরা।

মধু বলে—একজন মহিলা তোমার জ্ঞাত বসে আছেন, বড়দা।

বিধু বলে—অনেকক্ষণ হলো বসে আছেন।

শেখরের চোখে আতঙ্কের ছায়া শিউরে ওঠে। মধু আর বিধুও বড়দার মুখের ভাব দেখে হঠাৎ অপ্রস্তুতভাবে তাকিয়ে থাকে। সন্দেহ করে, সুসংবাদটা বোধ হয় ভয়ানক একটা দুঃসংবাদ। নইলে বড়দা অমন ক'রে চমকে উঠবে কেন?

শেখর বলে—মা কোথায়?

মধু—মা ভবানীপুরে দিদির বাড়িতে গিয়েছেন।

শেখর—কেন?

বিধু—অনসূয়াদির বিয়ের কথা শুনতে।

শেখর—বাবা কোথায়?

মধু—অফিসে গিয়েছেন।

শেখর—মহিলা তোমাদের সঙ্গে বোধ হয় অনেক গল্প করেছে ?

বিধু—ওঃ, অনেক গল্প !

মধু—আমাকে ভূগোলের বই থেকে কত প্রশ্ন করেছেন, আমি সব ঠিক ঠিক উত্তর দিয়েছি ।

শেখর চুপ ক'রে দাঁড়িয়ে কি-যেন ভাবে । তারপরেই ছ'চোখের একটা তীব্র দৃষ্টিকে যেন আরও ভয়ানক রকমের তীক্ষ্ণ ক'রে বলে—
আমি কি কাজ করি, কত মাইনে পাই, বাবা কি করেন, কত টাকা মাইনে পান, এই সব কথাও নিশ্চয় জিজ্ঞাসা করেছে ?

মধু সন্দ্বিগ্ন হয়ে, আর একটু ভয় পেয়ে বলে—হ্যাঁ ।

বিধু উৎফুল্ল হয়ে বলে—আমি সব ঠিক ঠিক উত্তর দিয়েছি ।

সেইরকমই স্তব্ধ হয়ে থমকে থাকে শেখর । তারপর অসার কৌতুকে ধিকৃত নিজের এই ভাগ্যকেই মনে মনে ধিক্কার দিয়ে বাড়ির দিকে এগিয়ে যেতে থাকে ।

বিধু ভয় পেয়ে বলে ওঠে—মহিলা খুব ভাল লোক বড়দা । আমাকে আদর করতে গিয়ে কেঁদে ফেলেছেন । ছ'চোখ থেকে ঝরঝর ক'রে জল ঝরে পড়েছে ।

হ্যাঁ, সেই হল অশ্রুর বিদ্রূপ জোর ক'রে এখানে এসে ঢুকেছে । কি দুঃসাহস ! চৈঁচিয়ে ওঠে শেখর—কি ?

বিধু—হ্যাঁ বড়দা, মহিলা বলেছেন, ভগবান বড় ছষ্টু, নইলে তোমাদের এত কষ্ট দেবে কেন ?

শেখর—তোমরাও নিশ্চয় ওর কাছে অনেক বাজে কথা বলেছ ?

মধু বলে—আমি বলিনি বড়দা, বিধুই বলে দিয়েছে, বাবা কতবার না খেয়ে অফিসে গিয়েছে, মা'র জ্বরের সময় ওষুধ কেনবার পয়সা ছিল না ।

বিধু রাগ ক'রে চৈঁচিয়ে ওঠে ।—মহিলাই যে জিজ্ঞেসা করলেন ।

স্তব্ধ হয়ে আরও কিছুক্ষণ দাঁড়িয়ে থাকে শেখর । তারপর কুণ্ঠিত-ভাবে দরজা ঠেলে বাড়ির ভিতরে চলে যায় ।

বারান্দার উপর টুলের উপর বসে বই পড়ছে অবন্তী সরকার।
চৈত্রের রোদে ঝলসানো আর ঝড়ে আহত রঙীন পাখীর মত
ক্লান্ত বিষণ্ণ ও ছেঁড়া-ছেঁড়া মূর্তি। তবু শেখরকে দেখে সারা মুখে
হাসি ফুটিয়ে তুলতে পারে অবন্তী।

অবন্তী বলে—আবার আপনাকে আশ্চর্য ক’রে দিলাম।

শেখর—সত্যি কথা।

অবন্তী—অনসূয়াদের বাড়িতে গিয়েছিলাম। একটা সুসংবাদও
শুনে এলাম।

শেখরের চোখে কৌতূহলের চমক লাগে—কিসের সুসংবাদ?

খিল খিল ক’রে হেসে অবন্তী বলে—অনসূয়ার সঙ্গে নিখিলের
বিয়ের তারিখও প্রায় ঠিক হয়ে গিয়েছে।

হাসছে অবন্তী। যেন ওর মাথার উপর থেকে ভয়ানক একটা
শাস্তির বোঝা নেমে গিয়েছে। বোধহয় একেবারে হালকা হয়ে
গিয়েছে অবন্তীর জীবনটাই, তাই অবাধে খিল খিল ক’রে মুক্তির
হাসি হাসছে।

শেখর বলে—মধু আর বিধু কি তোমাকে চা খাওয়াবার চেষ্টা
করেছে?

অবন্তী হাসে—অনেক চেষ্টা করেছে, কিন্তু আমিই রাজি
হইনি।

শেখরও হাসে—তাহলে আমি চেষ্টা করি।

অবন্তী—না।

অপ্রসন্নভাবে অবন্তীর মুখের দিকে তাকায় শেখর। দুঃসহ রকমের
একটা অস্বস্তিও বোধ করে। এটা এলগিন রোডের ফুটপাথ নয়,
শেখরেরই গৃহনীড়ের একটি নিছৃত কোণ। এখানে দাঁড়িয়ে অবন্তী
সরকারকে কোন সত্য কথা একটু স্পষ্ট ক’রে বলে দিতে হলে
শেখরকে এই মুহূর্তে পৃথিবীর শ্রেষ্ঠ অভদ্র হবার মত শক্তি পেতে
হবে। কিন্তু তাও যে সম্ভব নয়।

অবন্তী—আমার মুখের দিকে তাকিয়ে কি দেখছেন ? নতুন ক’রে কিছু দেখবার নেই ।

বলতে গিয়ে অবন্তীর কথাগুলি যেন যন্ত্রণাক্ত স্বরে থর থর করতে থাকে ; এবং শেখরও চমকে ওঠে, হ্যাঁ, একটা নতুন জিনিস বটে । অবন্তী সরকারের চোখের দৃষ্টি যেন ত্রুদ আঙুনের শিখার মত জ্বলছে ।

অবন্তী বলে—আপনার চিঠি পড়েছি । আপনি মহৎ, আপনি আমার অনুরোধের চক্রান্তে পড়েও সে মহত্বকে একটুও খাটো করতে পারেননি । সবই বিশ্বাস করি । আপনি বোকা নন, তাও খুব বুঝতে পেরেছি । কিন্তু আপনি একটি ভয়ানক ...

শেখর ত্রুদ করে—তুমি অনর্থক রুষ্ট হয়ে...

অবন্তী—ছি ছি, মানুষ নিজের এরকম সর্বনাশও করে !

শেখর—কার সর্বনাশ হলো ?

চৈচিয়ে ওঠে অবন্তী—তুমি আমার কথার মায়ায় পড়ে কেন নিজের এই দশা করলে ?

দু’হাত তুলে মুখ ঢাকা দেয় অবন্তী, আর সারা শরীরটাই যেন ফুঁপিয়ে ওঠে । বৃকের ভিতরে গোপন করা একটা গর্বের কোঁতুক যেন নিজের ভুলের নিষ্ঠুরতায় ভেঙে চূর্ণ হয়ে গিয়েছে । অবন্তী সরকারের অন্তরাগ্না অসহ্য যন্ত্রণায় শোণিতাক্ত হয়ে উঠেছে, নইলে চোখের জলে ভিজে যায় কেন অবন্তী সরকারের দুই হাত ?

আশ্চর্য হয় শেখর—কি হলো অবন্তী ?

অবন্তী—মাপ কর শেখর ; আমি কোন দিন কোন স্বপ্নেও বিশ্বাস করতে পারিনি যে, অবন্তী সরকারের মত একটা মেয়ের জন্তু একটা মানুষ অনর্থক এই ভয়ানক শাস্তি নিজেকে দিতে পারে । তুমি যে বৃকের রক্ত উপহার দিয়ে আমাকে ভালবেসেছ শেখর ।

শেখর বিব্রতভাবে বলে—তুমি একটু বাড়িয়ে ভাবছো অবন্তী ।

অবন্তী—নিজের ভাগ্য বলি দিয়ে আমাকে সুখের ঘরে ঢুকিয়ে দিয়ে,

তুমি উপোস করেছ, নিজের বাপ-মা-ভাইদের সুখের আশা ছিঁড়ে তাদেরও উপোস করিয়েছ...ছি ছি ছি, এরকম একটা পাপও মানুষ করে! আমার কাশীপুরের গলির সেই ত্রিশ টাকার ভাড়াটে বাড়ি যে তোমার এই বাড়ির চেয়ে অনেক বড়লোক ছিল।

অবস্তীর কথাব জ্বালাটা শেখরের মনের ভিতরে গিয়ে একটা প্রদাহ ছড়ায়; অস্বীকার করে না শেখর, কথাটা মিথ্যে বলেনি অবস্তী।

চোখ মোছে অবস্তী—রাগ করো না। আমি জানি, তুমি কেন এই ভুল করলে?

শেখর—কেন?

অবস্তী—আমাকে ভালবাসবার ভুলে।

শেখর—তা সত্যি। কিন্তু...

—আর কোন কিন্তু নেই শেখর। আস্তে আস্তে শেখরের কাছে এগিয়ে আসে অবস্তী। মাথা হেঁট করে দাঁড়িয়ে থাকে। অবস্তী বোধহয় বুঝতেও পারে না যে, শেখরের একেবারে বুকের কাছে এসে সে দাঁড়িয়েছে। মেঝের দিকে তাকিয়ে কি দেখতে থাকে অবস্তী, তা সে-ই জানে।

শেখর বিব্রতভাবে ডাকে—অবস্তী।

অবস্তী—তোমার এই ডাক শুনেই চলে যাব শেখর। আর কিছু বলো না।

শেখরের চোখ করুণ হয়ে ওঠে—কেন?

অবস্তী—আজ বোধহয় তোমাকে ভালবাসবার মত মন পেয়েছি।

অবস্তীর হাত ধরে শেখর। হেঁট মাথা না তুলে আস্তে আস্তে হাত ছাড়িয়ে নেয় অবস্তী।—কিন্তু তুমি আবার ভুল করে আমাকে বিশ্বাস করো না শেখর।

অবস্তীর হেঁট মাথা ছ'হাতে বুকে জড়িয়ে ধরে শেখর। অবস্তী বলে—ভুল করো না।

অবস্তীর এই আত্মধিকারের ভাষাকেই অবিশ্বাস ক’রে শেখরের চোখে মুখে আর ছুই হাতের আগ্রহে যেন বিপুল এক বিশ্বাসের ঝড় উথলে উঠতে চাইছে। অবস্তীর মুখটাকে তুলে ধরতে চায় শেখর।

—না শেখর। ক্ষমা কর।

জোর ক’রে মুখ নামিয়ে নেয় অবস্তী। ‘তু’পা পিছনে সরে গিয়ে শাস্তভাবে বলে—পারবো না শেখর। আমার মাথা বড় বেশি হেঁট ক’রে দিয়েছ তুমি। তুমি বড় বেশি মহৎ। তুমি অবস্তীর সব দোষ ভুলে গিয়ে কাছে টানছো, সে তোমার দয়া।

শেখর—তোমার ভুল সন্দেহ অবস্তী।

অবস্তী হাসে—না শেখর, সত্যিই তোমার ভালবাসাকে একটা মস্ত বড় দয়া বলে মনে হচ্ছে। আমার সব অহংকার মিথ্যে ক’রে দিয়ে তোমার দয়া নিতে পারবো না।

শেখর মুখ ফিরিয়ে নিয়ে, পাঁচিলের বাইরে ঐ মাঠের গাছগুলির ভিড় থেকে আরও দূরে এক ফালি খোলা আকাশের দিকে তাকিয়ে থাকে।—আমার আর কিছু বলবার নেই অবস্তী।

অবস্তী—আমি নিজেকেই সন্দেহ করছি শেখর, তোমাকে নয়। এত সস্তায়, বলতে গেলে বিনা দামে তোমার কাছ থেকে এত দামী জিনিস পেতে চাই না শেখর। অথচ, দাম দেবার সামর্থ্যও নেই, তোমার ক্ষতি হবে এই আমার ভয়। তাই...

আর কোন কথা বলে না অবস্তী। বারান্দা থেকে আস্তে আস্তে নেমে পড়ে। দেখতে পায় শেখর, সেই এক ফালি আকাশের উপর দিয়ে সরু সরু মেঘের কতকগুলি রেখা ভেসে যাচ্ছে। একেবারে সাদা, তুলোর মত হালকা কতকগুলি মেঘের রেখা।

ছায়াবিশ

জেনারেল ম্যানেজার বলেন—বিলেত যাবেন মিস সরকার ?

অবস্তী হতভম্ব হয়ে তাকিয়ে থাকে।—এই প্রশ্ন কেন করছেন স্মার ? বিলেত যাবার টাকা কোথায় পাব ?

হেসে ফেলেন জেনারেল ম্যানেজার—আমি চেষ্টা করলে পাবেন না কেন ? কোম্পানিই খরচ দেবে। রাজি থাকেন তো বলুন।

অবস্তী—কোম্পানির কোন কাজে বিলেত যেতে হবে ?

জেনারেল ম্যানেজার জোরে হেসে মাথা দোলাতে থাকেন।—নো মিস, নো। আপনার নিজের কাজে।

অবস্তী—কোন কাজ শিখতে হবে ?

জেনারেল ম্যানেজার—কিছু না।

অবস্তী—তা হলে ?

জেনারেল ম্যানেজার—আমি যাব লগুনে। ছ'টি মাস থাকবো। আমার সেক্রেটারি হয়ে আমার সঙ্গে সঙ্গে থাকবেন।

চুপ ক'রে নিজের মনের বিস্ময় ছিন্ন ভিন্ন ক'রে বুঝতে চেষ্টা করে অবস্তী। আজ হঠাৎ জেনারেল ম্যানেজার বিশেষ এক জরুরি কাজে অবস্তীকে তাঁর প্রাইভেট কেবিনে আহ্বান করেছেন। আজ অফিসে এসেই টাইপিষ্ট চারুবাবুর গম্ভীর কথাগুলির ভাষা বুঝতে পেরেছে অবস্তী, জেনারেল ম্যানেজার সকাল আটটায় অফিসে এসেছেন, কিন্তু কোন ফাইল স্পর্শও করেননি। সেই সকাল আটটা থেকে তাঁর প্রাইভেট কেবিনে সোফার উপর এলিয়ে পড়ে আছেন। এখন স্বচক্ষেই দেখতে পায় অবস্তী, ঠিকই, জেনারেল ম্যানেজার জুতো মুক্ত পা সোফার উপর তুলে দিয়ে

এলিয়ে বসে আছেন ; শরীরটাকে যেন অর্ধেক গড়িয়ে দিয়েছেন ।

জেনারেল ম্যানেজার বলেন—এখন আপনি কত পাচ্ছেন ?

অবন্তী—তিনশো ষাট ।

জেনারেল ম্যানেজার—এক হাজার পেলে খুশি হবেন ?

চমকে ওঠে অবন্তী সরকার—খুশি কেন হব না স্ত্রার, কিন্তু কাজটা করতে পারবো কিনা বুঝতে পারছি না ।

ট্টেচিয়ে হেসে ফেলেন ম্যানেজার । তার পরেই ফিসফিস ক'রে বলেন—কাজ করতে বলছে কে আপনাকে ?

অবন্তী—আপনিই যে বললেন, সেক্রেটারির কাজ করতে হবে ।

জেনারেল ম্যানেজার—তার মানেই হলো নো কাজ । আপনি বড় বেশি ইননোসেন্ট মিস সরকার ।

অবন্তী—মাপ করবেন আমাকে ।

জেনারেল ম্যানেজার আশ্চর্য হন—আপনি কি সত্যিই কোনরকম সন্দেহ করছেন ?

অবন্তী—হাঁ, সন্দেহ হচ্ছে, মিছিমিছি বিলেত ঘুরে বেড়াতে পারবো না ।

জেনারেল ম্যানেজার—তা হলে একটা কাজ নিয়েই বিলেত যান । আমি সব ব্যবস্থা ক'রে দিচ্ছি ।

অবন্তী—এ বিষয়ে আমার বাবার সঙ্গে আলোচনা না ক'রে আমি কিছু বলতে পারবো না স্ত্রার ।

জেনারেল ম্যানেজার—আপনার বাবাকে বলবেন যে... ।

বলতে বলতে হঠাৎ থেমে গিয়ে অবন্তীর মুখের দিকে অভূতভাবে তাকিয়ে থাকেন জেনারেল ম্যানেজার । যেন অবন্তীর কালো চোখের ছায়া-ছায়া রহস্যের মায়াময় শোভার দিকে অপলক চোখে তাকিয়ে আছেন । অবন্তীর কপালের উপর বিন্দু বিন্দু ঘামের ফোঁটা হঠাৎ ফুটে উঠে চিকচিক করে ।

জেনারেল ম্যানেজার—আপনার বাবাকে বলবেন যে, তাঁর মেয়েকে

আন্তরিকভাবে ভালবাসে এমন এক ব্যক্তি তার উপকার করতে চায়।...আমি অনেক দিন থেকে...যেদিন প্রথম তোমাকে দেখেছি অবস্তী, সেদিন থেকেই তোমার কোন উপকার করবার জন্ত স্বপ্ন দেখছি।

—এ কি বলছেন আপনি ? শঙ্কিত হয়ে জেনারেল ম্যানেজারের মুখের দিকে তাকিয়ে থাকে অবস্তী।

—হ্যাঁ অবস্তী, আমি চাই না যে, তোমার মত মেয়ে তিনশো ষাট টাকা মাইনেতে বিজ্ঞাপন লেখার কাজ নিয়ে এখানে পড়ে থাকবে। পাবলিসিটি সুপারভাইজার নামে একটা নতুন পোস্ট আমি তৈরী করেছি। তুমি বিলৈত-টিলৈত না গিয়েও এই পোস্টে কাজ করতে পার।

—এ কাজটাই বা কেমন কাজ, আমি একাজ পারবো কিনা, কিছুই বুঝতে পারছি না স্থার।

—আবার বুঝতে ভুল করলে অবস্তী সরকার। আমি তোমার জন্মেই এই পোস্ট তৈরী করেছি। বলতে গেলে কোন কাজ করতেই হবে না, তারই নাম সুপারভাইজারের কাজ। ডিপার্টমেন্টের অন্য লোকগুলোর ভুল-টুল ধরে মাঝে মাঝে এক আধটা হৈ-হল্লোড় করলেই হয়ে গেল। মাইনে ছ'শো টাকা।

—এই কাজটা নিয়ে শেষে কোন বিপদে পড়তে না হয় স্থার।

—বিপদ ? আমি থাকতে তোমার বিপদ ? তুমি আমাকে চিনতেই পারলে না অবস্তী সরকার।

—ঠিক আছে স্থার। আমি কাজটা নেব। আপনার কাছে কি বলে যে কৃতজ্ঞতা জানাবো...

—ছিঃ অবস্তী সরকার, আমি তোমার কৃতজ্ঞতার ক্যানডিডেট। আমি...আমি তোমারই ক্যানডিডেট।

—কি বললেন ?

—খুব স্পষ্ট ক'রে বলে ফেলেছি অবস্তী। তুমি বোধহয় জান না

যে, আমি একটা হতভাগ্য। আমার ছাব্বিশ বছর বয়সে আমার স্ত্রী আমাকে এই পৃথিবীতে একলা ছেড়ে দিয়ে অন্ধ জগতে চলে গিয়েছে। আজ আমার বয়স একচল্লিশ। এই পনের বছরের ইতিহাসে এমন একটা সুযোগও পেলাম না যে, কাউকে ভালবেসে সুখী হই। ভালবাসবার মত একটা মুখই দেখতে পাইনি। হ্যাঁ, জোর ক'রে বলবো, আজ দেখতে পেয়েছি। সে মুখ হলো তোমার মুখটি।

—স্মার।

—সন্দেহ করো না অবস্তী। আমার টাকার অভাব নেই। আমার ক্ষমতার অভাব নেই। তোমাকে সুখী করবার মত আর একটি জিনিস আমার আছে...আমার এই হার্ট। জানি, লোক আড়ালে আড়ালে হেসে হেসে নিন্দে করবে, দি এগ্রি-মেশিনারি লিমিটেডের জেনারেল ম্যানেজার কিনা অফিসের একটা মেয়ে-কেরানিকে বিয়ে করলো। কিন্তু সেই নিন্দেকে আমি সোনার মুকুটের মত মাথায় তুলে নেব অবস্তী।

—মাপ করবেন স্মার।

—না, মাপ করতে পারবো না। জেনারেল ম্যানেজারের চোখ ধকধক করতে থাকে।

অবস্তী—মাপ করতেই হবে; আমাকে আর ওসব কথা বলবেন না। জেনারেল ম্যানেজার কিছুক্ষণ চোখ ছোট ছোট ক'রে অবস্তীর মুখের দিকে তাকিয়ে থেকে তারপর বলেন—মাপ করতে পারি, সত্যি প্রাণ খুলে মাপ ক'রে তোমাকেই টাকা-পয়সায় সুখী ক'রে দিতে পারি, যদি তুমি...তুমি নিশ্চয় আমার কথাগুলির অর্থ বুঝতে পারছো অবস্তী।

জেনারেল ম্যানেজার হঠাৎ তাঁর অলস শরীরটাকে মোচড় দিয়ে টান হয়ে উঠে দাঁড়ান। অবস্তীর দিকে যেন একটা ঝাঁপ দিয়ে এগিয়ে গিয়ে অবস্তীর একটা হাত ধরে ফেলেন।—এমন কিছুই

দাবি নয় অবস্তী। অফিস ছুটির পর সন্ধ্যাবেলা শুধু আমার সঙ্গে বাক্সবীর মত একটু বেড়িয়ে আসা, সপ্তাহে একটা ছুটো সন্ধ্যা শুধু কোন একটা ভাল বারে বসে একটু ড্রিংক, কিংবা কোন ভাল ছবি দেখতে।

হাত ছাড়িয়ে নেবার চেষ্টা করে অবস্তী। কিন্তু জেনারেল ম্যানেজার যেন বাঘের খাবার মত কঠোর আগ্রহে অবস্তীর হাতটাকে আঁকড়ে ধরে রেখেছেন। অবস্তীর মুখের উপর জেনারেল ম্যানেজারের হাপরের মত বুকটার ভিতর থেকে নিঃশ্বাসের বাতাস থেকে থেকে দমক দিয়ে ছড়িয়ে পড়ছে। সেই নিঃশ্বাসের বাতাস মদের গন্ধের বাজে উগ্র হয়ে রয়েছে।

মুখ ঘুরিয়ে নিয়ে অবস্তী বলে—হাত ছেড়ে দিন, আমাকে যেতে দিন।

জেনারেল ম্যানেজার—কথা দিয়ে যাও।

অবস্তী—কোন কথা নেই। আমাকে অপমান করবেন না।

জেনারেল ম্যানেজার—লাইফের এত বড় প্রসপেক্ট নষ্ট করো না মিস অবস্তী সরকার।

অবস্তী জ্রকুটি করে—প্রসপেক্ট ?

জেনারেল ম্যানেজার—হ্যাঁ, শুধু সন্ধ্যাবেলা আমার সঙ্গে এক দুই ঘণ্টার মত বন্ধু হবে, তার জন্য তুমি প্রতি সন্ধ্যার ফী হিসাবে আমার কাছ থেকে নগদ নগদ পঞ্চাশ টাকা পাবে। অন্য ফুটির সব খরচ আমার। বল ?

কোন উত্তর দেয় না অবস্তী। অবস্তীর সেই কালো চোখের বুদ্ধির দীপ্তি যেন হিংস্র হয়ে জ্বলতে থাকে।

অবস্তী বলে—হাত ছাড়ুন আমি উত্তর দিচ্ছি।

অবস্তীর হাত ছেড়ে দিয়ে আবার সোফার উপর এলিয়ে পড়েন জেনারেল ম্যানেজার, এবং দেওয়াজ খুলে গেলাস বের করেন।

অবস্তী বলে—আমি চলি।

টেঁচিয়ে ওঠেন জেনারেল ম্যানেজার—পঞ্চাশ নয়, একশো টাকা ক’রে দেব মিস সরকার। প্রতি সন্ধ্যায় একশো টাকা। থিংক অব ইট।

অবস্থা—আপনার মাইনে তো মাসে আড়াই হাজার টাকা। সন্ধ্যা বেলায় ফুঁতির জন্য এত টাকা, এরকম হাজার হাজার টাকা কোথা থেকে পাবেন ?

জেনারেল ম্যানেজারের চোখ মুখ একসঙ্গে হেসে ওঠে।—তাই বল। তোমার সন্দেহ হয়েছে, আমি এত টাকা পাব কোথায় ? তাই না ? অবস্থা—হ্যাঁ।

জেনারেল ম্যানেজার—মহামান্য সরকার উদার হস্তে কয়েক লক্ষ টাকা দিয়ে এই হতভাগা কোম্পানিকে সাহায্য করেছেন। কোম্পানির ভাগ্যের জন্য আই কেয়ার এ ব্র্যাস পেনি। আপাতত টাকাগুলো নিয়ে আমি নিজেকেই ইচ্ছামত সাহায্য করছি...তুমি আর কত পোলে খুশি হবে গুড গার্ল ?

জেনারেল ম্যানেজারের এই অভিশপ্ত প্রাইভেট কেবিনের দরজার পর্দাটার দিকে একবার তাকায় অবস্থা সরকার। তার পরেই, চতুর পাখির মত যেন ডানার ঝাপটের মত একটা শব্দ ছড়িয়ে এক নিমেষে ঘর ছেড়ে বাইরে চলে যায়।

সাতাশ

রতনবাবুর ছেলে পাস করেছে, বেশ ভাল মার্ক পেয়ে পাস করেছে। বড় খুশি হয়ে রতনবাবু তাঁর এলগিন রোডের প্রকাণ্ড বাড়ির বাগানে পায়চারি করছিলেন, এবং মনে মনে ধন্যবাদ জানাচ্ছিলেন, শেখর নামে সেই ইয়ং ম্যানকে, তাঁর ছেলের টিউটর শেখর মিত্রকে।

শেখরকেই সাক্ষাতে একটা ধন্যবাদ ও কৃতজ্ঞতা জানানোর জন্য অপেক্ষা করছিলেন রতনবাবু। নইলে, এতক্ষণে তিনি শালকিয়াতে তাঁর কারখানায় চলে যেতেন।

শেখরও আসতে দেরি করেনি। এবং শেখরকে দেখতে পেয়েই এগিয়ে এসে মহা খুশির আবেগে বিহ্বল হয়ে কোলাকুলি করলেন রতনবাবু।—তোমার জন্মই, তুমি এত ভাল ক'রে পড়িয়েছ বলেই ছেলেটা পাস করতে পেরেছে শেখর।

শেখর হাসে—আমার ছাত্রও বেশ ইন্টেলিজেন্ট, কাকাবাবু।

রতনবাবু—যাই হোক, আমি কিন্তু তোমার ছাত্রের কাছ থেকে কতকগুলো খবর জানতে পেরে বড় দুঃখিত হয়েছি।

শেখর—কি ?

রতনবাবু—তুমি নাকি আজকাল তিন জায়গায় ছেলে পড়াতে শুরু করেছ ?

শেখর—হ্যাঁ, এতে দুঃখিত হচ্ছেন কেন কাকাবাবু ?

রতনবাবু—তোমার মত এত ব্রিলিয়েন্ট স্কলার শুধু কয়েকটা ছেলে পড়িয়ে দিন পার ক'রে দেবে, ভাবতে আমার বেশ খারাপই লাগছে শেখর।

শেখর—উপায় নেই, তাই বাধ্য হয়ে...

রতনবাবু—আমি তাই ভেবে দেখেছি, আর আমাদের দেবকীবাবুকে বলেও রেখেছি। তাঁর কেমিক্যাল ওয়ার্কসের লেবরেটরিতে

অ্যাসিস্টেন্ট রিসার্চ অফিসার হিসাবে তোমাকে নিতে তিনি রাজি হয়েছেন। শ'তিনেক টাকা মাইনে, ভবিষ্যতে উন্নতিও আছে।

শেখর—আপনার শুভেচ্ছাই যথেষ্ট কাকাবাবু, কিন্তু আপনি আমার জন্ত চাকরির চেষ্টা করবেন না।

রতনবাবু—কেন ?

শেখর—চাকরি করবার মত আর মন নেই।

রতনবাবু—তাই বা কেন ?

শেখর—কেউ যোগ্যতার বিচার করে না কাকাবাবু। কেউ দয়াক'রে চাকরি দিতে চায়, কেউ বা ঘুস আশা ক'রে চাকরি দিতে চায়। ঐ দুই সর্বের একটিও স্বীকার করবার সামর্থ্য আমার নেই।

রতনবাবু—ঘুসের কথা ছেড়ে দাও, লোকের দয়ার উপর এত ঘৃণা কেন ?

শেখর—যোগ্যতার সম্মান না ক'রে দয়া করা মানে অপমান করা। এইরকম দুটো চাকরি অবশ্য পেয়েছিলাম। চাকরি দেবার কর্তারা আমার আবেদন ভেরি কাইগুলি কনসিডার ক'রে ইন্টারভিউ মঞ্জুর করেছিলেন। ভাগ্যি ভাল যে সে দুটো চাকরিও ভাগ্যে জোটেনি।

রতনবাবু—অদ্ভুত কথা।

শেখর—তা ছাড়া, গত মাসেও একটা চাকরি পেয়েছিলাম। আড়াইশো টাকা মাইনের একটা চাকরি। সাতটা দিন কাজও করেছিলাম। কিন্তু সুপারিন্টেন্ডেন্ট বললেন যে, তাঁর মেয়ের বিয়ের জন্ত ফার্নিচার কিনতে একটি হাজার টাকা চাই। এক মাসের মধ্যেই দিতে হবে, নইলে...

রতনবাবু—নইলে কি ?

শেখর—নইলে তিনি ঐ পোস্টে আরও ভাল লোক নেবার জন্ত চেষ্টা করবেন।

হেসে ওঠেন রতনবাবু—এই সামান্য একটা ব্যাপার দেখে তুমি ঘাবড়ে গেলে কেন শেখর ? সর্বত্র এই ভো নিয়ম। টাকা না ছিল,

আমার কাছে চাইলেই পারতে, আমি তোমাকে টাকাটা ধার
বাবদ দিতাম।

শেখর—সে কথা মনেই হয়নি কাকাবাবু। বরং চাকরিটাকে ঘেঁষা
করতেই ভাল লাগলো। সেদিনই ছেড়ে দিয়ে হাঁপ ছাড়লাম।

রতনবাবু শুকনো দৃষ্টি তুলে তাকান—তোমার কথাগুলি একটু
দাস্তিক দাস্তিক হয়ে যাচ্ছে না কি শেখর ?

শেখর—আপনি ঠিকই বলেছেন কাকাবাবু, ঐরকমই মনে হয়।
যে নিজেকে যথেষ্ট অসম্মান করতে পারে, লোকে তাকে বিনয়ী
বলে মনে করে।

রতনবাবু—তাহলে ছেলে পড়িয়েই জীবন কাটাবে ?

শেখর—হ্যাঁ, আর ম্যাথমেটিকস নিয়ে রিসার্চ করবো, সেটা কারও
দয়া না পেয়েও চালিয়ে যেতে পারবো।

রতনবাবু—অর্থাৎ জীবন সংগ্রামে তুমি ভয় পেয়ে, পিছিয়ে গিয়ে,
লুকিয়ে থাকতে চাইছো। তুমি আধুনিক যুগের উপযোগী নও
শেখর।

শেখর হাসে—আপনার সঙ্গে তর্ক করতে চাই না কাকাবাবু।

ড্রাইভারকে গাড়ি বের করবার নির্দেশ দিয়ে রতনবাবু গম্ভীর ভাবে
বলেন—যাই হোক, আই উইশ ইওর সাক্সেস।

রতনবাবু চলে যাবার পর ছাত্রের সঙ্গে একবার দেখা ক'রে আবার
পথের উপর এসে কৃষ্ণচূড়ার মাথার উপর রোদ আর রঙের খেলা
দেখতে দেখতে চলতে থাকে শেখর। সাক্সেস ? কে জানে ঐ
অদ্ভুত কথাটার অর্থ কি ? রতন কাকাবাবু কাকে সাক্সেস বললেন,
তা তিনিই জানেন। শেখর শুধু জানে যে, তার জীবনের সব
আক্কেপ মিটে গিয়েছে। অভিযোগগুলিও যেন বেদনা হারিয়ে
ফেলেছে। দিন চলে যাচ্ছে। বেশ ভাল ভাবেই চলে যাচ্ছে।
আর বুকের ভিতরেও যেন সোনালি রোদে ঝলমল লাল
কৃষ্ণচূড়ার রং-এ ভরে গিয়েছে।

তিন বেলা তিন বাড়িতে ছাত্র পড়িয়ে যে টাকা পাওয়া যায়, সেটা যথেষ্ট কি অযথেষ্ট, তার বিচার করতেই ইচ্ছা হয় না। শেখর জানে যে, বাবা আজ তাঁর অনেকদিনের পুরনো একটা শেখর কথা বলা মাত্র সেই শেখর দাবি পূর্ণ ক'রে দিতে পেরেছে শেখর। একটা সাদা শাল গায়ে দেবার শখ ছিল অনাদিবাবুর। এই পঞ্চাশ ষাট বা আশি টাকার মধ্যে একটা সাদা শাল। সেই শাল গায়ে দিয়ে পৌষের সকালে পার্কের আশে পাশে বেড়াতে ইচ্ছা করে অনাদিবাবুর। তাঁর সেই ইচ্ছা এতদিনে সফল হয়েছে। শেখর মনে করে, এই তো সাকসেস। একটা সামান্য বস্তুর কাছ থেকে অসামান্য প্রসন্নতা পেয়ে যাবার মত মনকে পাওয়া।

নিজেকেও অসামান্য মনে হয়। হ্যাঁ, হোক না দম্ভ। এমন দম্ভ ছাড়া জীবনটা খুশিই বা হবে কেন? শেখরের বৃকের ভিতরে যে পরিপূর্ণতার আনন্দ টলমল করে, এবং সেটা যে শেখরের জীবনের এক জয়ী ভালবাসার দম্ভ! চলে গিয়েছে, সরে গিয়েছে অবস্খী। মাসের পর মাস পার হয়ে গিয়েছে, পৃথিবীর কোথাও অবস্খীকে এক মুহূর্তের জগ্গুও চোখে দেখতে পায়নি শেখর। অবস্খীর নামটাও কোথাও উচ্চারিত হতে শোনেনি। অবস্খীর গল্প কারও মুখে ধ্বনিত হয়নি। ভাবতে একটু অদ্ভুতই মনে হয়। অবস্খী শেখরকে ভালবেসেছে, তাই সরে গেল অবস্খী। শেখর অবস্খীকে ভালবেসেছে, অবস্খীকে তাই ধরে রাখতে পারলো না শেখর। ভালবাসার বন্ধন চরম ক'রে দেবার জগ্গু চরম ছাড়াছাড়িই শেষে সত্য হয়ে উঠলো। অদ্ভুত বটে! কিন্তু কি আশ্চর্য, মনে হয় শেখরের, শুধু মাঝ রাতের স্বপ্নছড়ানো ঘুমের মধ্যে নয়, এই জেগে থাকা কর্মকোলাহলের প্রতি মুহূর্তের ব্যস্ততার মধ্যে অবস্খী যেন শেখরের বৃকের কাছে ঘুরছে। অবস্খীর খোঁপার সৌরভ নিজের নিঃশ্বাসের মধ্যেই যেন অনুভব করতে পারা যায়।

অবস্খীর হেঁট মাথা তুলে ধরতে, আর সেই কালো চোখের রহস্যের

উপর ভালবাসার একটি তপ্ত ও সিক্ত স্পর্শ চিহ্নিত ক'রে দিতে চেয়েছিল শেখর। কিন্তু রাজি হয়নি অবন্তী, সেই সুযোগ গ্রহণ করতে পারেনি। দম্ভ আছে অবন্তীরও! বেশ তো। এমন দম্ভ অবন্তীর মত মেয়েকেই যে সবচেয়ে ভাল মানায়। ভালই করেছে অবন্তী।

এই তো প্রভাদের বাড়ি। হেঁটে হেঁটে অনেক দূর চলে এসেছে শেখর। ভবানীপুরে প্রভাদের বাড়ির কাছে এসে পড়েছে। এখানেই আজ একবার আসবার কথা ছিল। প্রভা লিখেছে, অনসূয়া আজ শ্বশুরবাড়ি থেকে এখানে আসবে। তুমি এস একবার। বিয়ের দিন তুমি আসতে পারনি বলে বাড়ির সবাই দুঃখিত।

দুঃখিত হবারই কথা। প্রভাদের বাড়ির কেউ যে জানে না, অনসূয়ার বিয়ের দিন শেখরকে বিকেল থেকে রাত পর্যন্ত সময়টা একটা চাকরির জ্ঞান ইন্টারভিউ দিতেই পার ক'রে দিতে হয়েছিল।

শেখর বাড়িতে ঢুকতেই প্রভা চৈঁচিয়ে হেসে ওঠে।—অনসূয়া এসেছে দাদা।

শেখর—স্বামিক এসেছে, না একা?

প্রভা—ঐ যে, তোমার কথা শুনেই এসে পড়েছে।

শেখরকে প্রণাম ক'রে অনসূয়া লজ্জিতভাবে হাসে। আশ্চর্য হবার কিছু নেই। সাদা মনের মানুষ অনসূয়া, ভালবাসাবাসি নামে ঝগ্গাটের কোন ধার না ধরেও সুখী হয়েছে। ওর মুখের ঐ স্বচ্ছ সুন্দর লাজুক হাসিই বলছে যে...।

শেখরের ধারণাকে প্রভাই চৈঁচিয়ে ঘোষণা ক'রে দেয়। আজ কাল আর অনসূয়া বলে না যে, না জেনে শুনে বিয়ে করতে নেই।

প্রভার দিকে তাকিয়ে শেখর হাসে—তাই নাকি ম্যাডাম?

অনসূয়া বলে—আজ্ঞে হ্যাঁ, স্মার। কিন্তু আপনি যে জেনে শুনেও...

অনসূয়াই যেন হঠাৎ সাবধান হয়ে গিয়ে কথাটা আর শেষ করে না।

কিন্তু সেই অসমাপ্ত কথার অর্থটা যেন শেখরের বুকের ভিতরে গিয়ে
চৈতন্য বড়ের মত মাতামাতি করতে থাকে ।

চা আনতে চলে যায় প্রভা, এবং অনসূয়ার চোখের একটা ধূর্ত
ইঙ্গিত লক্ষ্য ক'রে সেই মুহূর্তে ভিতরের ঘর থেকে এই ঘরে এসে
প্রবেশ করে যে, সে হলো নিখিল মজুমদার ।

চৈচিয়ে হেসে ওঠে নিখিল—আপনার বোনের ননদের এখন ধারণা
হয়েছে যে, বিয়ের পরেই চেনা-জানা হওয়া ভাল । সুতরাং আমিও
আমার যত গল্প...।

নিখিলের দিকে তাকিয়ে ক্রভঙ্গী ক'রে অনসূয়া বলে—চুপ কর
তুমি । অত কথা, আর শুধু নিজের কথা না বললেও চলবে ।

কিন্তু অনসূয়ার বাধাকে তুচ্ছ ক'র এবং আরও মুখর হয়ে নিখিল
যেন নিজের মনের আবেগে বলতে থাকে ।—আমি অনসূয়াকে না
বলে থাকতে পারিনি । সবই বলে দিয়েছি । আমি যে কি পদার্থ,
সেটা অনসূয়া ভাল করেই জানতে পেরেছে । কাজেই অনসূয়ার
মনে না-জানা-শোনার ভয় আর নেই শেখরবাবু ।

অনসূয়া আবার বাধা দেয়—আঃ, থাম বলছি ।

অনসূয়া আর নিখিলের চোখে চোখে যেন একটা নীরব চক্রান্তের
ইশারা ছুটাছুটি করে । জানে না, কল্লনাও করতে পারে না শেখর,
এই চক্রান্তের মধ্যে প্রভাও আছে । আজ এই ঘরের মধ্যে
শেখরকে বিশেষ একটি অমরোদের মায়া দিয়ে ঘিরে ধরবার, এবং
শেখরের উদাস মনটাকে বিচলিত করবার জন্য একটি চক্রান্ত আগে
থেকেই প্রস্তুত ছিল, তাই প্রভাও যথাসময় চিঠি দিয়ে শেখর
মিত্রকে এখানে টেনে নিয়ে এসেছে ।

অনসূয়া বলে—আপনি তো এই ভদ্রলোকের আর আমার অনেক
উপকার করলেন, কিন্তু এইবার নিজের উপকার একটু করুন ।

নিখিল—আমিও তাই বলি ।

শেখর বিস্মিত হয়—কি বলছেন, বুঝলাম না ।

নিখিলের মুখের হাসি যেন একটা হঠাৎ বেদনায় গম্ভীর হয়ে যায়।
—আপনি বিশ্বাস করুন শেখরবাবু, আমি আর অনসূয়া দু'জনেই
দুঃখিত, আমরা সত্যিই সহ্য করতে পারছি না যে, আপনি এখনও
এরকম একা-একা...

হেসে ওঠে শেখর—এইবার বুঝলাম, কেন প্রভা আমাকে আসবার
জ্ঞপ্তি চিঠি দিয়েছে, আর কেনই বা আমার বোনের ননদ আর নন্দাই
দু'জনে মিলে এখানে আমাকে বেশ একটু কর্ণার ক'রে...

অনসূয়া—ঠিকই সন্দেহ করেছেন আপনি। কিন্তু আজ আর রেহাই
পাবেন না।

শেখর—বল, কি করতে হবে ?

অনসূয়া—বলতে হবে।

শেখর—কি ?

অনসূয়া—অবস্তীকে আপনি বিয়ে করবেন।

শেখর গম্ভীর হয়।—তুমি সত্যিই না জেনে শুনে, ভার্য্যে কোন খবর
জান না বলেই হঠাৎ এরকম অনুরোধ করতে পারছো অনসূয়া।

অনসূয়া মুখ টিপে হাসে—সব খবর জানি! আপনার গম্ভীর
মুখটাকে আর আমি বিশ্বাস করি না।

শেখর আশ্চর্য হয়।—কি জান ?

অনসূয়া—জানি যে, অবস্তীর ওপর এত রাগ ক'রে থাকা আপনার
আর সাজে না।

শেখর—আমি রাগ করেছি ?

অনসূয়া—তা ছাড়া আর কি ? আমরা কি কোন খবর রাখি না
ভাবছেন ? অবস্তী বেচারী আকুল হয়ে ছুটে গিয়েছে আপনার
কাছে, আপনারই বাড়িতে, তবু আপনার অভিমান ভাঙলো না ?

শেখর—ভুল বুঝেছো অনসূয়া, অবস্তীর ওপর আমার কোন
অভিমান নেই।

নিখিল বিষমভাবে বলে—এবং যদি কোন সন্দেহ থেকে থাকে যে.....

শেখর—অবস্তীর মন আমি জানি, আমার কোন সন্দেহ নেই নিখিলবাবু।

অনসূয়া—অবস্তী আপনাকে মনে প্রাণে শ্রদ্ধা করে।

নিখিল—ভালবাসেও।

শেখর আনমনার মত বিড়বিড় করে।—আমি তাই বিশ্বাস করি, কিন্তু অবস্তী নিজেই বিশ্বাস করে না।

নিখিল আর অনসূয়ার চোখে চোখে ইশারার চক্রান্ত হঠাৎ করুণ হয়ে যায়; ছ'জনেরই কল্পনার উল্লাস হঠাৎ স্তব্ধ হয়ে যায়। কি অদ্ভুত আর কি জটিল একটা মনের অভিশাপে পড়েছে অবস্তী সরকারের জীবনটা। নিজেই ভালবাসবার আকুলতাকে বিশ্বাস করে না? তবে শেখর মিত্রের বাড়িতে কেন সেদিন ওরকম পাগলের মত অস্থির হয়ে ছুটে গিয়েছিল?

অনসূয়া ভয়ে ভয়ে প্রশ্ন করে—কি বলতে চায় অবস্তী।

শেখর—বলতে চায়, আমি রাজি হলেও সে রাজি হতে পারে না।

অনসূয়া—কি আশ্চর্য!

শেখর হাসে—আশ্চর্য হবার কিছু নেই অনসূয়া। অবস্তী কারও কাছে মাথা হেঁট করতে পারে না।

অনসূয়া—আপনাকে বিয়ে করলে অবস্তীর মাথা হেঁট হয়ে যাবে?

শেখর—না, ঠিক তা নয়। আমার কাছে মাথা হেঁট করতে হয়েছে, তাই আমাকে বিয়ে করতে রাজি নয় অবস্তী।

অনসূয়া—অদ্ভুত অহংকার।

শেখর আবার হাসে—তা বটে; কিন্তু মন্দ কি?

প্রভা চা নিয়ে আসে। চায়ের কাপে চুমুক দিয়ে ঘরের ভিতর পায়চারি ক'রে ঘুরতে থাকে শেখর। ঘরের গন্তীরতা দেখে প্রভার মুখের হাসিও নিম্প্রভ হয়ে যায়।

—চলি এবার। ছোট্ট একটা কথা বলে শেখর মিত্র ঘরের দরজা পার হয়ে চলে যেতেই নিখিল বলে ওঠে—বুঝলাম, ইচ্ছে ক'রে নিজেকে ভয়ানক শাস্তি দিল অবস্তী।

আঠাশ

পার্ক সার্কাসের একটি নতুন বাড়ির ফ্লাটের একটি সাজানো ঘরের দরজা থেকে চলে গেল যে লোকটা, সে হলো মিশন রো'র সেই অফিসের আরদালি। যাবার সময় আরদালি বলে গেল।—সাহেব বলেছেন, আপনার যদি কিছু বলবার থাকে, তবে আলিপুরে সাহেবের বাড়িতে গিয়ে বলে আসবেন।

অবস্খী বলে—ঠিক আছে, তুমি যাও।

আরদালি বলে—সাহেব আমাকে জানতে বলে দিয়েছেন, আপনি যাবেন কি না, আর গেলে কখন যাবেন ?

অবস্খী বলে—সাহেবকে বলে দিও, আমি যাব না, তার কাছে গিয়ে কোন কথা বলবার দরকার আছে বলে মনে করি না।

—বহুত আচ্ছা। চলে যায় আরদালি।

অফিসের চিঠিটা অবস্খীর হাতেই ছিল, আর ছিল একটি চেক। চিঠিটা হলো, অবস্খী সরকারের চাকরি খতম ক'রে দিয়ে একটা রিগ্রেটের চিঠি। আর চেকটা হলো অতিরিক্ত এক মাসের মাইনে। চিঠিতে জেনারেল ম্যানেজারের সহি। কোম্পানি সিদ্ধান্ত করেছে যে, পাবলিসিটি অফিসার নামে একটা পোস্ট রাখবার আর কোন দরকার নেই।

সুন্দর ক'রে সাজানো ঘরের চারদিকে একবার তাকায় অবস্খী। কালো চোখের তারা দুটো জ্বলতে থাকে। গম্ভীর মুখটা ধীরে ধীরে কঠোর হয়ে উঠতে থাকে। তার পরেই চোখ জুড়ে একটা শাস্ত স্নিগ্ধতা থমথম করতে থাকে। যেন এতদিনে অবস্খীর মাথার উপর একটা দুর্লভ আশীর্বাদের ধারা হঠাৎ ঝরে পড়ছে।

আর মনে হয়, একটা ফাঁকির প্রাসাদ ধুলো হয়ে ঝরে পড়লো।

এতদিনে। ভালই হলো। মস্ত বড় একটা অভিশপ্ত সৌভাগ্য চূর্ণ হয়ে গেল, এই মাত্র। আবার এই বিরাট সহরের একটা কোণে, মলিন একটা গলির মুখে ছোট একটা বাসার ভিতরে ঢুকে অভাব উপোস আর দীনতার জীবন বরণ ক'রে নিতে হবে। মন্দ কি? বেশ আরাম করে একটা হাঁপ ছাড়া যাবে। নিজেকে আর এত ঘৃণা করবার ভয় থাকবে না।

জেনারেল ম্যানেজারের চিঠি পেয়ে ভয়ে মাথা হেঁট হয়নি, বরং ঘরের ভিতরে ঘুরে ঘুরে মাথাটা বেশ উঁচু করে ভাবতে থাকে অবস্তী। খবর শুনে বাবা আবার ছুঁখে মুসড়ে পড়বেন, এবং আবার ভগবানের দয়াতে সন্দেহ করবেন। চারু হারু আর নরু স্কুল থেকে ফিরে এসে খবর শুনেই আতংকিত হবে। হোক, ওরা জানে না যে, এই সব রঙ্গীন সৌভাগ্য অবস্তী সরকার নামে একটা মেয়ের কালো চোখের নিষ্ঠুর কৌতুকের সৃষ্টি। জানতে পারলে ওরাও বোধহয় বলে ফেলবে যে, ভালই হলো।

ঘরের দরজায় পর্দার কাছে একটা ছায়া এসে দাঁড়িয়েছে বলে মনে হয়। অবস্তী বলে—কে?

—আমি টাইপিষ্ট চারুবাবু।

ব্যস্তভাবে এগিয়ে এসে চারুবাবুকে ঘরের ভিতর ডেকে নিয়ে বসতে অনুরোধ করে অবস্তী। চারুবাবু বলেন—খবর শুনে খুবই ছুঁখিত হয়ে তোমার সঙ্গে দেখা করতে এসেছি অবস্তী মা।

অবস্তী হাসে—ছুঁখ করবেন না।

চারুবাবুর চোখ দুটো যেন রাগে কটমট করে। ছুঁখ করবো বৈকি। আমরা অফিসের সবাই ঠিক করেছি, কোম্পানীর ডিরেক্টরদের কাছে গিয়ে তোমার হয়ে সাক্ষী দেব। তুমি এখনই জেনারেল ম্যানেজারের বিরুদ্ধে একটা কমপ্লেন লিখে আমার কাছে দাও, আমি যথাস্থানে সেই কমপ্লেন পাঠিয়ে দেব।

অবস্তী—কিসের কমপ্লেন?

চাক্ৰবাবু—ওসব প্ৰশ্ন কৰো না অবন্তী মা। আমৰা সব খবৰ ৰাখি।
ঐ অসভ্য বৰ্বৰ জেনাৰেল ম্যানেজাৰ কেন তোমাৰ চাকৰিটাকে
বাৰ্তিল কৰে দিলো, সেৱহস্ত আমৰা জানি। ওকে শিক্ষা দেওয়া
উচিত।

অবন্তী—আমি আৰ কমপ্লেন কৰবো না চাক্ৰবাবু। চাকৰিটা
যাওয়াতে আমি খুশিই হয়েছি।

চাক্ৰবাবু কিছুক্ষণ গম্ভীৰ ভাবে অবন্তীৰ মুখৰ দিকে তাকিয়ে থেকে
তাৰ পৰেই হঠাৎ যেন প্ৰসন্ন হয়ে ওঠেন।—তা একৰকম ভালো।
আত্মসম্মান বজায় রেখে সৰে যাওয়াই ভালো।

অবন্তী বলে—চা আনি ?

চাক্ৰবাবু—না না, তুমি আৰ এই অসময়ে আমাকে চা খাওয়াবাব
চেষ্টা কৰো না। তা ছাড়া, এই তো আমাৰ সেই ভাগে বাবাজীৰ
বাড়ি থেকে চা খেয়ে আসছি। ভাগে-বউটি সত্যিই বড় সুন্দর।
যেমন ভাল স্বভাব, তেমনি ভাল দেখতে।

অবন্তীৰ কালে চোখের তারা তেমনই স্নিগ্ধ হয়ে থাকে, একটুও
চমকে ওঠে না।—আপনার ভাগের বিয়ে হলো কবে ?

চাক্ৰবাবু—এই তো মাস দেড়েক হলো। কেন ? তুমি খবৰ
পাওনি ?

অবন্তী—না।

চাক্ৰবাবু—ভাগে-বউ যে বললে, তোমাৰ নাম কৰেই বললে, তুমি
তাৰ বন্ধু।

অবন্তী—ঠিকই বলেছে। বোধ হয় লজ্জা ক'ৰে, কিংবা ৰাগ ক'ৰে,
না হয় ভুল ক'ৰে চিঠি দিতে ভুলে গিয়েছে।

চাক্ৰবাবু—অদ্ভুত ভুল ! যাক, যদি তোমাৰ কোন দৰকাৰ থাকে
তবে বুড়োকে একটা খবৰ দিও অবন্তী।

অবন্তী—একটা দৰকাৰেৰ কথা এখনই বলতে পাৰি।

চাক্ৰবাবু—বল।

অবস্তী—আমার জন্ত একটা বাসা খুঁজে দিন। ভাড়া পঁচিশ ত্রিশের বেশি হলে চলবে না।

—সে কি? আশ্চর্য হয়ে তাকিয়ে থাকেন চারুবাবু। তারপরেই যেন একটু কুণ্ঠার সঙ্গে আর চিন্তিতভাবে প্রশ্ন করেন—তোমাকে একটু আধটু সাহায্য করতে পারে, এমন কোন আত্মীয় কি নেই?

অবস্তী—না চারুবাবু।

চারুবাবু—তা হলে চাকরিটা যাওয়াতে তুমি তো খুবই অশুবিধেয় পড়লে। বড় দুঃখের ব্যাপার হলো। তোমার অবস্থা এতটা অসহায় বলে আমি ভাবতেই পারিনি।.....যাক, দেখি কি করতে পারি।

উনত্রিশ

এক অহংকরে মেয়ের কথায় ওঠেন বসেন, এই অভিযোগ আত্মীয়দের কথায় আলোচনায় ও মন্তব্যে বহুবার শুনতে পেয়েও কোনদিন অখুশি হননি যে নিবারণবাবু, তাঁরই মন যেন এইবার একটা অখুশির প্রকোপে রুদ্ধ হয়ে উঠেছে। বেলঘাটার বসাক বাগান লেনের দুটি ছোট কুঠিরির চেহারার দিকে তাকালে নিবারণবাবুর চোখের দৃষ্টিটা যেন কুঁচকে যায়, এবং একটা বোবা বিরক্তি জকুটি হয়ে ফুটে ওঠে। এ কি হলো? এত ভাল চাকরিটা হারিয়ে অবস্থা এ কোন ভয়ানক একটা জগতের গলির ভিতর এসে ঠাঁই নিল! চাকর হারুনরু আর গ্রামোফোন বাজায় না, ক্যারাম খেলে না। কারণ গ্রামোফোন নেই, ক্যারাম বোর্ড নেই। রেডিও সেট বেচে দিতে হয়েছে। পার্ক মার্কার্সের ফ্ল্যাটের সেই রঙীন জীবনের শোভাকে যেন ধুলো করে হাওয়ায় উড়িয়ে দিয়ে অবস্থা সবাইকে একটা বনবাসের ক্লেশ ও দুঃখের মধ্যে টেনে নিয়ে এসেছে।

প্রশ্ন করতে গিয়ে নিবারণবাবুর গলার স্বর রুদ্ধ হয়ে ওঠে।—এমন ভাল চাকরিটা ছেড়ে দিলি কেন অবস্থা।

—ছাড়িয়ে দিলে।

—কেন ছাড়িয়ে দিলে?

—আমাকে পছন্দ করলো না।

—কেন?

—বোধহয় আমার অহংকারের জন্ত।

—অমন অহংকার কি না থাকলেই নয়? হিঃ, তোর লজ্জিত হওয়া উচিত অবস্থা।

অবস্থা শুধু নীরবে তাকিয়ে থাকে, নিবারণবাবুর আক্ষেপের ভাষা

চুপ ক'রে সহ্য করে। এবং আশ্চর্য হয়। মেয়ের অহংকারের জেদ দেখে যে মানুষ জীবনের অনেক বছর খুশি হয়ে অনেক কষ্ট সহ্য করেছে, সেই মানুষেরই কাছে আজ মেয়ের অহংকার অসহ্য হয়ে উঠেছে।

—ভগবান কি আছেন? বিশ্বাস করতে তো আর ইচ্ছে হয় না। নইলে...। নিজের মনেই বিড়বিড় করেন নিবারণবাবু, এবং পক্ষাঘাতে আড়ষ্ট শরীরটাকে টান ক'রে উঠে বসতে চেষ্টা করেন। উঠে বসেন, এবং লাঠি ভর দিয়ে আস্তে আস্তে হেঁটে কুঠুরির জানালার কাছে এসে দেখতে থাকেন, ছোট একটা ছাতা আর একটা ঝোলা হাতে নিয়ে কোন্ এক মেয়েস্কুলে পড়াতে চলে গেল অবস্খী। পঁয়ষটি টাকা মাইনে পায় অবস্খী। তিনশো ষাট টাকা মাইনের স্বর্গ থেকে তাড়া খেয়ে পঁয়ষটি টাকা মাইনের রসাতলে নেমে গিয়েছে তাঁর ঐ অহংকের মেয়ে।

এই পঁয়ষটি টাকা মাইনের চাকরিটা পেতেও কি কম ঝগড়াটাইতে হয়েছে। ভাগ্য ভাল, চাকুবাবু নামে সেই টাইপিষ্ট ভদ্রলোক অবস্খীকে বেশ স্নেহ করেন। তিনিই অনেক চেষ্টা ক'রে খোঁজ নিয়ে এসেছিলেন, এবং অনেক মানুষকে ধরাধরি ক'রে ও তোষামোদ করে অবস্খীকে চাকরিটা পাইয়ে দিতে সাহায্য করেছেন।

অবস্খীর ভাগ্যটার উপর রাগ করতে গিয়ে অবস্খীরই উপর রাগ হয়, এবং মাঝে মাঝে নিবারণবাবু তাঁর এই নির্ভুর রাগটার জখ্য নিজেই লজ্জিত হন। হঠাৎ চোখ দুটো ছলছল ক'রে ওঠে। না, মেয়েটার উপর রাগ করা উচিত নয়। মেয়েটা নিজেই বা কি কম শাস্তি পাচ্ছে? ওরই শাস্তি যে সব চেয়ে বেশি। মেয়েস্কুলের চাকরি ছাড়া সন্ধ্যা-বেলা আরও হুঁজায়গায় দুটি ছাত্রী পড়াবার কাজ নিয়েছে। পনর পনর, মোট ত্রিশ টাকা আরও পাওয়া যায়; এবং এই ত্রিশটা টাকা পাওয়ার জখ্য মেয়েটাকে যে খাটুনি খাটতে

হচ্ছে, তার ফল কলেছে। চারু হারু ও নরুর স্কুলের মাইনেটা অবশ্য ঐ ত্রিশটাকার জোরেই কুলিয়ে যায়, কিন্তু অবস্তীর চেহারাটা যে শুকিয়ে ঝিরঝিরে হয়ে গেল।

টাইপিষ্ট চারুবাবু আসেন মাঝে মাঝে। তাঁর কথার মধ্যে একটা উদ্দেশ্যের ইঙ্গিত মাঝে মাঝে যেন চমকে ওঠে। এবং সেই ইঙ্গিতই যথেষ্ট। বুঝতে পারেন নিবারণবাবু, অবস্তীর জীবনের ভালর জন্য খুব বেশি চিন্তা করেন চারুবাবু।

আক্কেপ করেন চারুবাবু।—অবস্তী যদি ইচ্ছে করে, তবে এরকম কষ্টের জীবন সহ্য করবার দরকার আর হবে না নিবারণবাবু।

—বুঝলাম না চারুবাবু।

—এমন ভাল ছেলে কি নেই যে অবস্তীর মত মেয়েকে বিয়ে করতে পারলে ধন্য হয়ে যাবে ?

—আপনি কি অনুপমের কথা বলছেন ?

—হ্যাঁ।

হ্যাঁ, অনুপম নামে একটি যুবকের মনের ইচ্ছার আভাস নিবারণবাবু জানতে পেরেছেন। ে রিফিউজি মেয়ে-স্কুলে কাজ করে অবস্তী, সেই স্কুলেরই কমিটির মেম্বার অনুপম এই বসাকবাগান লেনের কুঠুরির মানুষগুলির জীবনের দশা নিজের চোখে দেখে গিয়েছে। অনুপমের অনেক খবর জানেন চারুবাবু। চারুবাবুর কাছেই জানতে পেরেছেন নিবারণবাবু, খুবই সদাশয় সৎ প্রকৃতির ছেলে ঐ অনুপম। টাকা পয়সা আছে অনুপমের, ওকালতির পশারও ভাল, এবং বেলেঘাটার বড় রাস্তার পাশে অনুপমের বাড়িটার চেহারাও সুন্দর ও সৌখীন।

যেদিন প্রথম এসেছিল অনুপম, সেদিন অবস্তী হেসে হেসে শাস্ত ভাষায় অনুপমকে একটা অনুরোধও শুনিয়ে দিয়েছিল।—এরকম জায়গায় আপনার মত মানুষের আসা উচিত নয় অনুপমবাবু।

কিন্তু অনুপম কোন উত্তর না দিয়ে অবস্তীরই মুখের দিকে কিছুক্ষণ

তাকিয়েছিল, এবং তারপরেই হেসে ফেলেছিল—আপনি রাগ করলেও আমি আসবো।

—কেন ?

—সত্যি কথা বলছি, কিছু মনে করবেন না।

—বলুন।

—আপনাদের মত মানুষের পক্ষে এত কষ্ট সহ করা উচিত নয়।

—উচিত নয় ঠিকই, কিন্তু...

—কোন কিন্তু নেই। আমি সাহায্য করবো, এবং সে সাহায্য আপনাকে নিতে হবে।

—না। মাপ করবেন।

অবস্তীর কথার মধ্যে রাগের উত্তাপ না থাকুক, খুবই স্পষ্ট ও কঠিন একটা আপত্তির সুর অবশ্যই ছিল। কিন্তু দেখা গেল যে, অনুপম সে আপত্তি গ্রাহ্য করলো না।

তার পর, শুধু একদিন ছ'দিন নয়, এই সাত মাসের মধ্যে অনেকবার এসেছে অনুপম। এবং অবস্তীর সঙ্গে সামান্য ছ'চারটে কথায় আলাপ শেষ হয়ে গেলেও প্রতিদিন অনেকক্ষণ ধরে এই কুঠুরির নিভুতে বসে, নিবারণবাবুর সঙ্গে, নয় চারু হারু আর নরুর সঙ্গে গল্প করেছে অনুপম।

এরই মধ্যে একদিন একটা কাণ্ড করেছিল অনুপম।

অভাবের সংসার; নিবারণবাবু অনেক চিন্তা ক'রে শেষে ঠিক করলেন, তিনি নিজেই ঘরে বসে ছাত্র পড়াবেন। তাতে যা হয় তাই ভাল। দশ হোন্, কুড়ি হোন্, সামান্য কয়েকটা টাকা পেলেও যে অনেক কাজ হবে। মেয়েটা শুধু একাই খেটে খেটে শুকিয়ে যাবে কেন ?

চারুবাবু চেষ্টা ক'রে ছ'জন ছাত্র জোগাড় ক'রে দিয়েছিলেন। সন্ধ্যাবেলা ছাত্র ছ'জন এসে নিবারণবাবুর কাছ থেকে পড়া শিখে যাবে। দশ দশ কুড়ি টাকা প্রতিমাসে পাওয়া যাবে। কিন্তু বাদ

সাধলো অনুপম। অনুপম এসে নিবারণবাবুকে ছাত্র পড়াতে দেখে রেগে অস্থির হয়ে গেল।—ছি, ছি, এ কি কাণ্ড করছেন আপনি? কি ভেবেছেন? আমি থাকতে আপনাকে এই বয়সে এরকম যাচ্ছেতাই কাণ্ড করতে দেব না। তাতে যাই মনে করুন আপনি।

অনুপমের কঠোর বাধায় ছাত্র পড়িয়ে কুড়ি টাকা রোজগারের সুযোগ পেলেন না নিবারণবাবু। এবং সে দিন নিবারণবাবুর হাতে অনুপম জোর ক’রে একশো টাকা গছিয়ে দিয়ে চলে যাবার পর আবার একদিন এসে অনুরোধ করে!—আমাকে পর মনে করবেন না।

নিবারণবাবু—না, তা কেন মনে করবো? পরই তো আপনজন হয়ে যায়।

অনুপম—আমার কাছ থেকে টাকা নিতে কোনদিন আপনি আপত্তি করবেন না। আপত্তি করলে আমি খুবই দুঃখিত হব।

আর আপত্তি করেননি নিবারণ বাবু। এবং একদিন একটু বেশি উৎসাহিত হয়ে চৈঁচিয়ে উঠেছিলেন—শুনেছিস অবন্তী?

—কি?

—অনুপম সত্যিই আমাদের একেবারে পর নয়।

—তার মানে কি?

—তার মানে, আজই অনুপমের সঙ্গে আলাপে আলাপে জানতে পারলাম, তোর মেজ পিসির এক জা-এর ছেলে হলো অনুপম।

অবন্তী হাসে—কিন্তু তাই বলে অনুপমবাবু যখন-তখন টাকা দিতে চাইলে তুমি নিয়ে বসো না।

অপ্রসন্নভাবে তাকিয়ে থাকেন নিবারণবাবু—কি বলতে চাইছিস? অনুপমের টাকা নিয়ে অত্যাচার করছি আমি?

অবন্তী—হ্যাঁ।

—কেন?

—ভদ্রলোককে মিছিমিছি ঠকানো হচ্ছে ?

—একথারই বা মানে কি ! অনুপমের মতো ছেলে কি.....।

—তিনি খুব ভাল ছেলে, কোন সন্দেহ নেই। কিন্তু তাঁর টাকা নেওয়া আমাদের উচিত নয়।

অবস্তীর মুখের দিকে তাকিয়ে চোখের গভীর দৃষ্টিটাকে একটু কোমল ক’রে নিয়ে নিবারণবাবু বলেন—খুব বেশি অহংকার ভাল নয় অবস্তী। এমন অহংকারের কোন অর্থ হয় না।

নীরব হয়ে শুধু শুনতে থাকে অবস্তী। কোন উত্তর দেয় না।

নিবারণবাবু বলেন—বেশ, তা’হলে অনুপমকে স্পষ্ট ক’রে বলে দেব যে, আর টাকা নেওয়া আমাদের উচিত নয়।

ত্রিশ

অবস্তী তখনও বাড়ি ফেরেনি। সন্ধ্যা হয়ে গিয়েছে অনেকক্ষণ।
স্কুলের ছুটির পর দু'জায়গায় ছাত্রী পড়িয়ে ফিরতে রোজই সন্ধ্যা
পার হয়ে যায়, এবং সন্ধ্যায় বৃষ্টি ধামলে ফিরতে বেশ একটু রাতও
হয়।

এক পশলা বৃষ্টি হয়ে গেল। তবু বসাক বাগান লেনের অতি ছোট
একটা বাড়ির কুঠিরির ভিতরে বেতের মোড়ার উপর চুপ ক'রে বসে
থাকে অনুপম। অনুপমের হাতে একটা ফুলের তোড়া।

একটা কথা খুবই স্পষ্ট ক'রে বলেছেন নিবারণবাবু, এবং চমকে উঠে
নিবারণবাবু সঙ্গে সেই মুহূর্তে আলাপ বন্ধ ক'রে দিয়েছে অনুপম।
নিবারণবাবুর কথাটা বিশ্বাস করতে পারেনি অনুপম। অসম্ভব!
এই আপত্তি নিতান্তই একটা অভিমান। যতই অহংকার থাকুক
অবস্তীর, অনুপমের কাছে অকৃতজ্ঞ হবার মত মেয়ে নয় অবস্তী।
একদিন দু'দিন নয়, সাত-আট মাস ধরে এই অভাবের সংসারটাকে
উপকারে উপকারে ভরে দিয়েছে অনুপম। অবস্তী কি জানে না,
নিবারণবাবুর শরীরটা আজ এতটা সুস্থ হয়ে উঠলো কেমন ক'রে?
কা'র সাহায্যে? অবস্তীরই বাপ ও ভাইদের জীবনে আনন্দ এনে
দিয়েছে যে, তাকেই তুচ্ছ করবে অবস্তী? হতে পারে না।

অবস্তী জানে না, অবস্তীকে মনে-প্রাণে ভালবেসেছে অনুপম।
কোনদিন এই ভালবাসার কথা অবস্তীর কাছে বলেনি অনুপম।
বলার দরকার কি? অবস্তীর ঐ সুন্দর দুটি চোখ নিশ্চয়ই বোকা
নয়। বুঝতে পারেনি কি অবস্তী? ঘরে ঢোকে অবস্তী, এবং
অনুপমকে দেখেই চমকে ওঠে। এই ঘরের ভিতরে কোনদিন অনুপম
আসেনি। কিন্তু আজ যেন একটা শুভ প্রতীক্ষার ব্রত উদ্‌যাপন
করবার জন্য ফুলের তোড়া হাতে নিয়ে বসে আছে অনুপম।

অবস্তী বলে—বাবা কি বাড়িতে নেই ?

অনুপম হাসে—আছেন। কিন্তু আমি আপনারই অপেক্ষায় বসে আছি। আপনারই কাছে কয়েকটা কথা বলবার আছে।

—বলুন।

—আপনার বাবার কাছ থেকে একটা কথা শুনে দুঃখিত হলাম। আমার কাছ থেকে সাহায্য নেওয়া নাকি আপনাদের উচিত নয়। অবস্তী হাসে—তার মানে, আমাদের টাকা দিয়ে সাহায্য করা আপনার উচিত নয়।

—কেন অবস্তী ?

চমকে ওঠে অবস্তী। এবং অনুপমের সেই শাস্ত আশ্বস্ত ও মুগ্ধ চোখের দিকে তাকিয়ে করুণভাবে হাসতে থাকে।—আমি ঠিক এই ভয়ই করেছিলাম অনুপমবাবু।

—ভয় ? তোমাকে আমি ভালবাসি, এর জন্য তুমি ভয় পেলে অবস্তী ?

—আপনি ভুল করেছেন অনুপম বাবু।

—কিসের ভুল ?

—আপনার মনে সন্দেহ থাকা উচিত ছিল যে, আমি আপনাকে ভালবাসি না।

—তুমি ভালবাস না ?

অবস্তী আবার হাসে—মাপ করবেন অনুপমবাবু। আপনার সন্দেহ করা উচিত ছিল যে, আমি হয়তো অশ্রু কাউকে ভালবাসি।

অনুপম—কিন্তু সে কি আমার চেয়ে বেশি ভালবাসে তোমাকে ?

অবস্তী—তাই তো মনে হয়।

অনুপম—সে কি আমার মত এরকম প্রাণ ঢেলে দিয়ে তোমাদের উপকার করতে পেরেছে ?

অবস্তীর চোখে এক টুকরো বিহ্বলের ঝিলিক চমকে ওঠে। সে নিজেকে প্রায় প্রাণে মেরে ফেলে আমাদের উপকার করেছে।

শুক হয়ে যায় অনুপমের চোখের সব চকলতা। অপলক চোখে ঘরের আলোটার দিকে কিছুক্ষণ তাকিয়ে থাকে অনুপম। তার পরেই চৈঁচিয়ে হেসে ওঠে।—বৃষ্টি থেমে গিয়েছে বোধ হয়।

অবন্তী—হ্যাঁ।

অনুপম—নরুকে একবার ডাকুন তো।

অবন্তী—কেন ?

অনুপম—ফুলের তোড়াটা নরুকে দিয়ে যাই।

অবন্তীর ডাক শুনে নরু আসে। নরুর হাতে ফুলের তোড়া তুলে দিয়েই দরজার দিকে এগিয়ে যায় অনুপম।

লাঠি ভর দিয়ে পাশের ঘর থেকে আস্তে আস্তে হেঁটে যখন এই ঘরের ভিতরে ঢোকেন নিবারণবাবু, তখন অনুপম চলে গিয়েছে। অবন্তীর ক্রান্ত চেহারার দিকে তাকিয়ে গন্তীর স্বরে বলেন।—এরকম অদ্ভুত কথা তো আগে তোকে কখনও বলতে শুনিনি।

অবন্তী—কি ?

নিবারণবাবু—অনুপমকে এইমাত্র যে কথাটা বললি। কথাটা কানে এল তাই আশ্চর্য হয়ে গেছি। আমার ধারণা ছিল না যে, নিখিল কখনও আমাদের উপকার করেছে।

চমকে উঠলেও শুধু চুপ ক'রে শুনতে থাকে অবন্তী। নিবারণবাবু নিজের মনের বিশ্বাসের আবেগে বলতে থাকেন—কে জানে, কোন-দিনও তো বুঝতে পারিনি, নিখিল আমাদের এত উপকার করেছে। বেচারী নিজেকে প্রাণে মেরে....।

চৈঁচিয়ে ওঠে অবন্তী—ভুল বুঝেছ বাবা। নিখিল নয়।

নিবারণবাবু ফ্যালফ্যাল ক'রে তাকিয়ে থাকেন—তবে কে ?

অবন্তী—তাকে তুমি দেখনি। তাকে তুমি চেন না।

নিবারণবাবু অপ্রস্তুতের মত কুণ্ঠিত স্বরে বলেন—সে কোথায় ?

—এই কলকাতাতেই আছে।

—আসে না কেন ?

—আমাদের ঠিকানা জানে না।

—ঠিকানা জানিয়ে দে।

—না।

—কেন?

—তাকে আর বিরক্ত করতে চাই না।

—তার মানে?

তার মানে, সে নিজেই কষ্টে আছে।

—তোর কষ্টের চেয়ে বেশি কষ্ট তো নয়।

—বেশি না হোক, কম নয়।

—ছেলেটি খুবই গরীব নাকি?

—ইচ্ছে ক’রে গরীব হয়েছে।

—কিসের জন্তু।

—আমাদেরই জন্তু।

—কি বললি?

—আমারই জন্তু। ওকে ঠকিয়ে ওর চাকরিটা আমিই নিয়েছিলাম।

—মিশন রো’র অফিসের চাকরিটা?

—হ্যাঁ।

স্তব্ধ হয়ে কিছুক্ষণ দাঁড়িয়ে থাকেন নিবারণবাবু। বসাক বাগানের সরু গলির ভিতর থেকে ঘুঁটে পোড়া ধোঁয়া এসে সারা ঘরের ভিতর ছড়িয়ে পড়ে। মাথা তুলে ঘরের চালাটার দিকে একবার তাকান নিবারণবাবু। তখনো চালার একটা ফুটো দিয়ে টুপ টাপ ক’রে জলের ফোঁটা ঝরছে। আড়ষ্ট শরীরটাকে টান ক’রে নিয়ে একটা হাঁপ ছাড়েন নিবারণবাবু। ক্ষীণ অথচ তীক্ষ্ণ একটা হাসির রেখা তাঁর বিবর্ণ মুখের উপর ছটফট ক’রে ওঠে। নিবারণবাবু বলেন—
ভগবান আছেন মনে হচ্ছে।

একত্রিশ

শীত ফুরিয়েছে কবেই, গ্রীষ্মও ফুরিয়ে গেল। কালো কালো আষাঢ়ে মেঘের ছায়া মাঝে মাঝে টালিগঞ্জের গলির তপ্ত ধূলোর উপরেও এসে লুটিয়ে পড়ে।

জটিল গণিতের বই বন্ধ ক'রে মাঝে মাঝে জানালা দিয়ে আষাঢ়ে মেঘের কালো-কালো শোভার দিকে শেখর মিত্রকেও তাকাতে হয়। অবস্তু সরকার নামে একটি নারীর মুখটাও বেশ ভাল ক'রে এবং বার বার মনে পড়ে।

ডাক পিয়ন এসেছিল বোধহয়। মধু ছুটে এসে একটা চিঠি শেখর মিত্রের হাতের কাছে ফেলে দিয়ে চলে যায়। দেখে বুঝতে পারে না শেখর, এই চিঠি কার চিঠি হতে পারে। এবং চিঠি খুলেই বুঝতে পারে, অনসূয়ার চিঠি।

কিন্তু চিঠিটা অনসূয়ার কোন সুখবর নয়। অবস্তু সরকারেরই খবর। অনসূয়ার চিঠির ভাষাটাও যেন একটা ক্রুদ্ধ ক্রুদ্ধ অনুযোগের ঝড়।—এ কি কাণ্ড করছেন আপনি? অবস্তুীর জীবনের জন্তু কি আপনার কোন দায়িত্ব নেই? মেয়েটা যে না খেয়ে মরতে বসেছে……।

চমকে ওঠে শেখর। শেখরের চোখে যেন জ্বালাভরা ধোঁয়ার ছোঁয়া এসে লেগেছে। চিঠির লেখাগুলিকেই অস্পষ্ট ও দুর্বোধ্য কতগুলি প্রলাপ বলে মনে হয়। চোখ মোছে শেখর।

—অবস্তুী এখন থাকে বেলেঘাটার একটা গলিতে। এগার নম্বর বসাক বাগান লেন। একটা রিফিউজি মেয়ে-স্কুলে ষাট টাকা মাইনের চাকরি করছে অবস্তুী। ডাক্তার বলেছে, অবস্তুীর বুকের ব্যাথাটা হলো পুরিসির ব্যাথা।

অনসূয়ার লেখা চিঠিটাকে হুমড়ে বুকের কাছে চেপে ধরে শেখর। মনে হয়, বুকের পাঁজরটা কাঁপতে কাঁপতে এখনই ছিঁড়ে যাবে। এ কি করলো অবন্তী? কাকে শাস্তি দিচ্ছে ঐ ভয়ানক মেয়ে? বিধু হঠাৎ এসে ডাক দেয়।—এক ভদ্রলোক তোমার সঙ্গে দেখা করতে এসেছেন বড়দা।

ঘরের বাইরে এসে এক অপরিচিত প্রবীণ ভদ্রলোককে দেখে প্রশ্ন করবার আগে সেই ভদ্রলোকই বলে ওঠেন—আমি আমার ভাগ্নে-বউ অনসূয়ার কাছ থেকে আপনার ঠিকানা নিয়ে বিশেষ একটা অনুরোধ নিয়ে আপনার কাছে এসেছি।

শেখর—বলুন।

ভদ্রলোক—আমি হলাম টাইপিষ্ট চারুবাবু, অবন্তী যে অপিসে কাজ করতো, আমি সেই অফিসেই কাজ করি। কথাটা হলো....।

চারুবাবু একটু বিব্রত ভাবে এবং একটু বিচলিত স্বরে বলেন—অবন্তী আমাদের একটা মিথ্যা কথা বলেছিল যে, তাকে সাহায্য করতে পারে এমন কোন আত্মীয় তার নেই। কিন্তু আমার ভাগ্নে-বউ-এর কাছে শুনলাম যে, আপনি অবন্তীর কাছে আত্মীয়ের চেয়েও আপন জন।

প্রতিবাদ করে না শেখর। আজ যেন সারা পৃথিবীটাই চৈঁচিয়ে আর রাগ ক'রে সাক্ষী দিচ্ছে যে, শেখর মিত্রই হলো অবন্তী সরকার নামে এক নারীর একমাত্র আপন জন।

চারুবাবু বলেন—আমি শুধু এই কথাই আপনাকে বলতে এসেছি। যে, আপনি যদি অবন্তীর উপর রাগ ক'রে থাকেন, তবে সেটা মস্ত ভুল করা হবে শেখরবাবু। আপনি সব খবর জানেন না, আমিও আপনাকে বলবো না। শুধু এইটুকু বলতে পারি যে, আমাদের অবন্তীর মত এমন খাঁটি মনের মেয়ে আমি আর দেখিনি।

চারুবাবুর চোখ দুটো ছল ছল করছে বলে মনে হয়। শেখর

বলে—আপনার ইচ্ছা এই তো, আমি যেন অবস্খীর সঙ্গে একবার দেখা করি ?

চারুবাবু—তাই, তাই, তার বেশি কিছু বলতে চাই না।

শেখর—তাই হবে। আপনি নিশ্চিন্ত থাকুন।

তবু চারুবাবু আরও একটা কথা বলতে চেষ্টা করেন, এবং চেষ্টা করতে গিয়ে তাঁর হৃ'চোখে যেন একটা আবেদন নিবিড় হয়ে ওঠে। বোধ হয় আরও নিশ্চিন্ত হতে চান চারুবাবু, এবং শেষ পর্যন্ত বলেই ফেলেন—তোমরা হৃ'জনে সুখী হয়েছ জানতে পেলেই আমরা সুখী হব।

বলতে বলতে এবং আস্তে আস্তে হেঁটে চলে যান বুড়ো টাইপিস্ট চারুবাবু।

বজ্রিশ

এগার নম্বর বসাক বাগান লেন, বেলঘাটা। বাড়িটা খুঁজে পেতে অনেক হয়রান হতে হয়েছে। সারি সারি অনেকগুলি টিনের শেড, তার মধ্যে মরচে পড়া যত টিনের পিঁপে পাহাড়ের মত স্তূপ ক'রে সাজানো। এখানেও নয়। এর পরে একটা গরু-মহিষের খাটাল। তারপরে গলি। সেই গলির মধ্যে যেখানে মস্ত বড় একটা ডাস্টবিন, তারই পাশে এগার নম্বর নিকেতন।

কপালের ঘাম মুছে শেখর দরজার দিকে তাকায়। এখানেই থাকে অবস্তী সরকার। শেখরের মনের ভিতর একটা ক্লান্ত যন্ত্রণা যেন ফিস ফিস ক'রে বলে, বোধ হয় মরেই গিয়েছে তোমার অবস্তী সরকার।

সরিয়া হয়ে ডাকাতের মত ছরস্তু আগ্রহ নিয়ে দরজার কড়া নাড়ে শেখর। এবং সেই মুহূর্তে দরজা খুলে দিয়ে ভিতর থেকে যে মেয়ের দৃষ্টি চোখ আশ্চর্য হয়ে তাকিয়ে থাকে, সে হলো অবস্তী সরকার।

সত্যিই অবস্তী সরকার। দেখে বিশ্বাস করতে পারা যায়। কিন্তু শেখরের মনে হয়, অবস্তী সরকারের জীবন্ত চেহারার ঐ রূপ না দেখেও মরা চেহারার রূপ দেখলেই বোধ হয় ভাল ছিল। শেখরের জুপিগুটা তাহলে এমন ক'রে আগুনে পোড়া সাপের মত যন্ত্রণায় ছটফট ক'রে উঠতো না।

অবস্তী সরকার দাঁড়িয়ে আছে। সেই কালো চোখের তারায় বুদ্ধির দীপ্তিটা যেন জ্যোৎস্না হয়ে গলে গিয়েছে। শীর্ণ ও শুকনো একটা মুখ। ঠোঁটের লালচে শোভা যদিও মরে গিয়েছে, কিন্তু অবস্তীর মুখের হাসি মরে যায় নি। শেখরের দিকে তাকিয়ে অবস্তীর রোগা মুখের সব বিষাদ ছাপিয়ে বর্ষায় ধোয়া চাঁদের আলোর মত হাসি ফুটে উঠেছে।

এক হাতে একটা ছাতা। আর এক হাতে একটা ব্যাগ, তার মধ্যে
কতগুলি বই আর খাতা। কালোপাড় একটা স্নেন শাড়ি দিয়ে
মোড়া একটা সাদা ও রোগা খেলনা-মূর্তির মত স্থির হয়ে রয়েছে
অবস্তীর শরীরটা।

শেখর বলে—কোথাও যাবার জন্ত তৈরী হয়েছ বোধহয় ?

অবস্তী—হ্যাঁ।

শেখর—স্থলে বাচ্ছ ?

অবস্তী—হ্যাঁ।

শেখর—পুরিসির ব্যাথাটা নেই ?

অবস্তী হাসে—আছে, কিন্তু ভুলেই গিয়েছি।

শেখর—আমাকে শাস্তি দেবার জন্তেই কি এই কাণ্ড করলে ?

অবস্তী—কিসের কাণ্ড ?

শেখর—এই, হৃদশা।

অবস্তী—কা'র ?

শেখর—তোমার।

অবস্তী—না, হৃদশা নয়।

শেখরের চোখের আলা এইবার যেন আরও মরিয়া হয়ে ছটকট
করে।—তবে ?

মাথা হেঁট করে না অবস্তী। মুখ তুলে সোজা শেখরের মুখের দিকে
তাকিয়ে থাকে। অবস্তীর দুই কালো চোখে যেন বিচিত্র এক গর্বের
ছায়া নিবিড় হয়ে রয়েছে।

শেখর—আমার কথার উত্তর দাও অবস্তী।

অবস্তীর চোখের পাতাও হঠাৎ ভিজে গিয়ে কালো চোখের ছায়া-
ছায়া রহস্যকে আরও স্নিগ্ধ ক'রে তোলে। অবস্তী বলে—খুব খুশি
মনে নিজের এই দশা করেছে। নইলে হেঁট মাথা তুলে তোমার
মুখের দিকে তাকাবার জোরই যে পাচ্ছিলাম না।

কই বলেছে অবস্তী। হেঁট মাথা নয়। অবস্তী যেন আজ তার

জীবনের এক ভয়ানক কঠিন গৌরবের জোঁয়ে জর করা ভালবাসার দিকে মুখ তুলে তাকিয়ে আছে। শেখরের প্রাণের সব তৃষ্ণাকে তৃপ্ত হবার জন্য আহ্বান করছে অবন্তী সরকারের ঐ সাদা ও শুকনো দুটি চৌঁট।

শেখর বলে—তুলে যেতে হবে না।

অবন্তীকে আর কোন প্রস্তাব করবারই সুযোগ দেয় না শেখর। শেখরের দুই হাতের ব্যাকুল আগ্রহের মধ্যে বন্দী হয়ে যায় অবন্তীর রোগা চেহারা। ইচ্ছে ক’রে, যেন বুকভরা অগাধ দুঃসাহসের জোরে মুখটাকে শেখরের পিপাসার কাছে এগিয়ে দেয় অবন্তী। চোখের পাতা আরও ভিজে গেলেও চোখ বন্ধ করে না অবন্তী।

শেখর বলে—এই তো চাই। এইভাবে মাথা তুলে দাঁড়িয়ে থাক অবন্তী। সরে যেও না।

অবন্তী—সরে যাব না। কিন্তু একটিবার অন্তত মাথা নামাবার সুযোগ দাও।

শেখর—সুযোগ পরে পাবে।

পরে মানে অনেকদিন পরে নয়, আর সামান্য কিছুক্ষণ পরেই মাথা নামাবার সুযোগ পায় অবন্তী।

শেখর বলে—তোমার বুকের ব্যথাটাকে যে শিগগির সারিয়ে তুলতে হবে অবন্তী।

অবন্তী হাসে—মনে হচ্ছে, মেরেই গিয়েছে।

